

Āṅguttaranikāyaṭṭhakathāya

Dukādinipātānaṃ Atthavaṇṇanābhūtā

Bhadantasāriputtatherena katā

Sāratthamañjūsā nāma

Āṅguttaraṭṭikā

(Dutiyo bhāgo)



Buddhavasse 2552

Marammavasse 1370

AD. 2008

Romanized from Myanmar version published in 1961

© Buddhasāsana Society

Ṭikā Series 19

First published in 2008 by Ministry of Religious Affairs

Yangon, Myanmar

THE PĀLI ALPHABET
IN BURMESE AND ROMAN CHARACTERS

VOWELS

အ a အာ ā ဣ i ဤ ī ဥ u ဦ ū ဧ e ဩ o

CONSONANTS WITH VOWEL "A"

က ka	ခ kha	ဂ ga	ဃ gha	င ṅa
စ ca	ဆ cha	ဇ ja	ဈ jha	ည ṇa
ဋ ta	ဌ tha	ဍ ḍa	ဎ ḍha	ဏ ṇa
တ ta	ထ tha	ဒ da	ဓ dha	န na
ပ pa	ဖ pha	ဗ ba	ဘ bha	မ ma

ယ ya ရ ra လ la ဝ va သ sa တ ha ဠ ḷa ၎ ṁ

VOWELS IN COMBINATION

-ာ ၎ = ā ဝိ = i ဝိ = ī ဣ = u ဣ = ū ဧ = e ဩ = o

က ka	ကာ kā	ကိ ki	ကိ kī	ကု ku	ကု kū	ကေ ke	ကော ko
ခ kha	ခါ khā	ခိ khi	ခိ khī	ခု khu	ခု khū	ခေ khe	ခေါ kho ...

CONJUNCT-CONSONANTS

ကက kka	ဃ န္ဂha	ဏ န္ဓha	ဈ သhya	ဠ pla	ဣ lla
ကွ kka	ဠ cca	ဏ္ဍ ṇḍa	ဠ dhva	ဠ pba	လျ lya
ကျ kya	ဠ ccha	ဏ္ဍ ṇṇa	ဠ nta	ဠ bbha	လှ lha
ကြိ kri	ဠ jja	ဏ္ဍ ṇha	ဠ ntva	ဠ bya	ဂှ vha
ကွ kla	ဠ jjha	တ္တ tta	ဠ ntha	ဠ bra	ဠ sta
ကွ kva	ည ṇṇa	တ္တ ttha	ဠ nda	ဠ mpa	ဠ stra
ဈ khya	ည ṇha	တ္တ tva	ဠ ndra	ဠ mpha	ဠ sna
ဠ khva	ည ṇca	တ္တ tya	ဠ ndha	ဠ mba	လျ sya
ဂှ gga	ဠ ṇcha	တြ tra	ဠ nna	ဠ mbha	သ ssa
ဠ ggha	ည ṇja	ဠ dda	ဠ nya	ဠ mma	သွ sma
ဈ gya	ည ṇjha	ဠ ddha	ဠ nha	ဈ mya	သွ sva
တြ gra	ဠ ṭta	ဠ dya	ဠ ppa	ဠ mha	တ္တ hma
ဏ ṅka	ဠ ṭtha	ဠ dra	ဠ ppha	လျ yya	တ္တ hva
ဠ ṅkha	ည ḍḍa	ဠ dva	ဈ pya	လျ yha	ဠ ḷha
ဠ ṅga					

၁	၂	၃	၄	၅	၆	၇	၈	၉	၀
1	2	3	4	5	6	7	8	9	0

Aṅguttaraṭīkā

Dutiyabhāga

Mātikā

Piṭṭhaṅka

Dukanipāta

1. Paṭhamapaṇṇāsaka 1. Kammakāraṇavagga

1. Vajjasuttavaṇṇanā	1
2. Padhānasuttavaṇṇanā	2
3. Tapanīyasuttavaṇṇanā	3
5. Upaññātasuttavaṇṇanā	4
6. Saññojanasuttavaṇṇanā	4
7. Kaṇhasuttavaṇṇanā	5
8. Sukkasuttavaṇṇanā	6
9. Cariyasuttavaṇṇanā	8
10. Vassūpanāyikasuttavaṇṇanā	9

2. Adhikaraṇavaggavaṇṇanā 9

3. Bālavaggavaṇṇanā 26

4. Samacittavaggavaṇṇanā 28

5. Parisavaggavaṇṇanā 39

2. Dutiyapaṇṇāsaka

(6) 1. Puggalavaggavaṇṇanā 45

(7) 2. Sukhavaggavaṇṇanā 46

(8) 3. Sanimittavaggavaṇṇanā 48

(9) 4. Dhammavaggavaṇṇanā 48

(10) 5. Bālavaggavaṇṇanā 50

Mātikā

Piṭṭhaṅka

3. Tatiyapaṇṇāsaka

(11) 1. Āsāduppajahavaggavaṇṇanā	...	55
(12) 2. Āyācanavaggavaṇṇanā	...	57
(13) 3. Dānavaggavaṇṇanā	...	58
(14) 4. Santhāravaggavaṇṇanā	...	58
(15) 5. Samāpattivaggavaṇṇanā	...	59
1. Kodhapeyyāla	...	65
2. Akusalapeyyāla	...	66
3. Vinayapeyyāla	...	66

Tikanipāta**1. Paṭhamapaṇṇāsaka 1. Bālavagga**

1. Bhayasuttavaṇṇanā	...	75
2. Lakkhaṇasuttavaṇṇanā	...	75
3-4. Cintīsuttādivaṇṇanā	...	76
5-10. Ayonisosuttādivaṇṇanā	...	76

2. Rathakāravagga

1. Ñātasuttavaṇṇanā	...	77
2. Sāraṇīyasuttavaṇṇanā	...	78
3. Āsaṁsasuttavaṇṇanā	...	78
4. Cakkavattisuttavaṇṇanā	...	81
5. Sacetanasuttavaṇṇanā	...	83
6. Apaṇṇakasuttavaṇṇanā	...	84
7. Attabyābādhasuttavaṇṇanā	...	88
8. Devalokasuttavaṇṇanā	...	88
9. Paṭhamapāpaṇīkasuttavaṇṇanā	...	88
10. Dutiyapāpaṇīkasuttavaṇṇanā	...	89

Mātikā

Piṭṭhaṅka

3. Puggalavagga

1. Samiddhasuttavaṇṇanā	90
2. Gilānasuttavaṇṇanā	90
3. Saṅkhārasuttavaṇṇanā	91
4. Bahukārasuttavaṇṇanā	92
5. Vajirūpamasuttavaṇṇanā	92
6. Sevitabbasuttavaṇṇanā	93
7. Jigucchitabbasuttavaṇṇanā	94
8. Gūthabhāṇīsuttavaṇṇanā	94
9. Andhasuttavaṇṇanā	95
10. Avakujjasuttavaṇṇanā	96

4. Devadūtavagga

1. Sabrahmakasuttavaṇṇanā	97
2. Ānandasuttavaṇṇanā	98
3. Sāriputtasuttavaṇṇanā	99
4. Nidānasuttavaṇṇanā	100
5. Hatthakasuttavaṇṇanā	110
6. Devadūtasuttavaṇṇanā	111
7. Catumahārājasuttavaṇṇanā	117
9. Sukhumālasuttavaṇṇanā	118
10. Ādhipateyyasuttavaṇṇanā	120

5. Cūlavagga

1. Sammukhībhāvasuttavaṇṇanā	121
2. Tiṭhānasuttavaṇṇanā	121
3. Atthavasasuttavaṇṇanā	122
4. Kathāpavattisuttavaṇṇanā	123

Mātikā		Piṭṭhaṅka
5. Paṇḍitasuttavaṇṇanā	...	123
6. Sīlavantasuttavaṇṇanā	...	124
7. Saṅkhatalakkhaṇasuttavaṇṇanā	...	124
8. Asaṅkhatalakkhaṇasuttavaṇṇanā	...	125
9. Pabbatarājasuttavaṇṇanā	...	125
10. Ātappakaraṇīyasuttavaṇṇanā	...	125
11. Mahācorasuttavaṇṇanā	...	126

2. Dutiyapaṇṇāsaka

(6) 1. Brāhmaṇavagga

1. Paṭhamadvebrāhmaṇasuttavaṇṇanā	...	127
2. Dutiyadvebrāhmaṇasuttavaṇṇanā	...	127
3. Aññatarabrāhmaṇasuttādivaṇṇanā	...	128
5. Nibbutasuttavaṇṇanā	...	128
6. Palokasuttavaṇṇanā	...	128
7. Vacchagottasuttavaṇṇanā	...	129
8. Tikaṇṇasuttavaṇṇanā	...	130
9. Jāṇussoṇisuttavaṇṇanā	...	138
10. Saṅgāravasuttavaṇṇanā	...	138

(7) 2. Mahāvagga

1. Tithhāyatanasuttavaṇṇanā	...	142
2. Bhayasuttavaṇṇanā	...	149
3. Venāgapurasuttavaṇṇanā	...	150
4. Sarabhasuttavaṇṇanā	...	160
5. Kesamuttisuttavaṇṇanā	...	165
6. Sālasuttavaṇṇanā	...	167
7. Kathāvattthusuttavaṇṇanā	...	167

Mātikā		Piṭṭhaṅka
8. Aññatitthiyasuttavaṇṇanā	...	169
9. Akusalamūlasuttavaṇṇanā	...	170
10. Uposathasuttavaṇṇanā	...	172

(8) 3. Ānandavagga

1. Chandasuttavaṇṇanā	...	180
2. Ājīvakasuttavaṇṇanā	...	181
3. Mahānāmasakkasuttavaṇṇanā	...	181
4. Nigaṇṭhasuttavaṇṇanā	...	181
5. Nivesakasuttavaṇṇanā	...	182
6. Paṭhamabhavasuttādivaṇṇanā	...	183
8. Sīlapabbatasuttavaṇṇanā	...	183
9. Gandhajātasuttavaṇṇanā	...	183
10. Cūḷanikāsuttavaṇṇanā	...	183

(9) 4. Samaṇavagga

1. Samaṇasuttādivaṇṇanā	...	185
6. Paṭhamasikkhāsuttavaṇṇanā	...	186
7. Dutiyasikkhāsuttādivaṇṇanā	...	188
11. Saṅkavāsuttavaṇṇanā	...	191

(10) 5. Loṇakapallavagga

1. Accāyikasuttavaṇṇanā	...	192
2. Pavivekasuttavaṇṇanā	...	192
3. Saradasuttavaṇṇanā	...	193
4. Parisāsuttavaṇṇanā	...	193
5. Paṭhama-ājānīyasuttādivaṇṇanā	...	195
8. Potthakasuttavaṇṇanā	...	196
9. Loṇakapallasuttavaṇṇanā	...	197

Mātikā	Piṭṭhaṅka
10. Paṃsudhovakasuttavaṇṇanā	198
11. Nimittasuttavaṇṇanā	201

3. Tatiyapaṇṇāsaka

(11) 1. Sambodhavagga

1. Pubbevasambodhasuttādivaṇṇanā	202
4. Samaṇabrāhmaṇasuttādivaṇṇanā	203
10. Dutiyānidānasuttavaṇṇanā	203

(12) 2. Āpāyikavagga

1. Āpāyikasuttavaṇṇanā	203
2. Dullabhasuttavaṇṇanā	204
3. Appameyyasuttavaṇṇanā	204
4. Āneñjasuttavaṇṇanā	205
5. Vipattisampadāsuttavaṇṇanā	206
6. Apaṇṇakasuttādivaṇṇanā	207
8. Paṭhamasoceyyasuttavaṇṇanā	207
9. Dutiyasoceyyasuttavaṇṇanā	207
10. Moneyyasuttavaṇṇanā	207

(13) 3. Kusināravagga

1. Kusinārasuttādivaṇṇanā	209
3. Gotamakacetiyaṣuttavaṇṇanā	209
4. Bharaṇḍukālāmasuttavaṇṇanā	211
5. Hatthakasuttavaṇṇanā	212
6. Kaṭuvīyaṣuttādivaṇṇanā	214
8. Dutiya-anuruddhasuttavaṇṇanā	215

Mātikā		Piṭṭhaṅka
9. Paṭicchannasuttavaṇṇanā	...	215
10. Lekhasuttavaṇṇanā	...	215

(14) 4. Yodhājīvavagga

1. Yodhājīvasuttavaṇṇanā	...	216
2. Parisāsuttavaṇṇanā	...	216
4. Uppādāsuttavaṇṇanā	...	217
5. Kesakambalasuttādivaṇṇanā	...	218
11. Paṭhamamoranivāpasuttādivaṇṇanā	...	218

(16) 6. Acelakavaggavaṇṇanā	...	219
------------------------------------	-----	-----

Peyyālavaggavaṇṇanā	...	220
----------------------------	-----	-----

Catukkanipāta

1. Paṭhamapaṇṇāsaka 1. Bhaṇḍagāmvagga

1. Anubuddhasuttādivaṇṇanā	...	221
3. Paṭhamakhatasuttādivaṇṇanā	...	222
5. Anusotasuttavaṇṇanā	...	222
6. Appassutasuttavaṇṇanā	...	223
7. Sobhanasuttavaṇṇanā	...	225
8. Vesārajjasuttavaṇṇanā	...	226
9. Taṇhuppādasuttavaṇṇanā	...	228
10. Yogasuttavaṇṇanā	...	229

2. Caravagga

1. Carasuttavaṇṇanā	...	231
2. Sīlasuttavaṇṇanā	...	233
3. Padhānasuttavaṇṇanā	...	238
4. Saṃvarasuttavaṇṇanā	...	238

Mātikā			Piṭṭhaṅka
5. Paññattisuttavaṇṇanā	239
6. Sokhummasuttavaṇṇanā	241
7. Paṭhama-agatisuttādivaṇṇanā	241
3. Uruvelavagga			
1. Paṭhama-uruvelasuttavaṇṇanā	242
2. Dutīya-uruvelasuttavaṇṇanā	245
3. Lokasuttavaṇṇanā	249
4. Kālakārāmasuttavaṇṇanā	253
5. Brahmacarīyasuttavaṇṇanā	255
6. Kuhasuttavaṇṇanā	261
7. Santuṭṭhisuttavaṇṇanā	262
8. Ariyavaṃsasuttavaṇṇanā	264
9. Dhammapadasuttavaṇṇanā	277
10. Paribbājakasuttavaṇṇanā	277
4. Cakkavagga			
1. Cakkasuttavaṇṇanā	280
2. Saṅgahasuttavaṇṇanā	280
3. Sīhasuttavaṇṇanā	282
4. Aggapasādasuttavaṇṇanā	285
5. Vassakārasuttavaṇṇanā	291
6. Doṇasuttavaṇṇanā	291
7. Aparihānīyasuttavaṇṇanā	293
8. Patilīnasuttavaṇṇanā	294
9. Ujjayasuttavaṇṇanā	297
10. Udāyisuttavaṇṇanā	299

Mātikā

Piṭṭhaṅka

5. Rohitassavagga

1. Samādhībhāvanāsuttavaṅṅanā	299
2. Pañhabyākaṇasuttādivaṅṅanā	301
5. Rohitassasuttādivaṅṅanā	302
7. Suvidūrasuttavaṅṅanā	303
8. Visākhasuttavaṅṅanā	303
9. Vipallāsasuttavaṅṅanā	304
10. Upakkilesasuttavaṅṅanā	305

2. Dutiyapaṅṅāsaka

(6) 1. Puññābhisandavagga

1. Paṭhamapuññābhisandasuttavaṅṅanā	306
2. Dutiyapuññābhisandasuttavaṅṅanā	306
3. Paṭhamasamvāsasuttādivaṅṅanā	306
5. Samajīvīsuttādivaṅṅanā	308
7. Suppavāsāsuttādivaṅṅanā	308

(7) 2. Pattakammavagga

1. Pattakammasuttādivaṅṅanā	308
5. Rūpasuttavaṅṅanā	309
7. Ahirājasuttavaṅṅanā	311
8. Devadattasuttavaṅṅanā	312
9. Padhānasuttavaṅṅanā	312
10. Adhammikasuttavaṅṅanā	312

(8) 3. Apaṅṅakavagga

1. Padhānasuttādivaṅṅanā	313
3. Sappurisasuttādivaṅṅanā	314

Mātikā			Piṭṭhaṅka
6. Kusiṇārasuttavaṇṇanā	314
7. Acinteyyasuttavaṇṇanā	315
8. Dakkhiṇasuttavaṇṇanā	315
9. Vaṇijjasuttavaṇṇanā	316
(9) 4. Macalavagga			
1-5. Pāṇātipātasuttādivaṇṇanā	316
7. Puttasuttavaṇṇanā	317
8. Saṃyojanasuttādivaṇṇanā	319
(10) 5. Asuravagga			
1. Asurasuttādivaṇṇanā	319
3. Dutiyasamādhisuttavaṇṇanā	320
4. Tatiyasamādhisuttavaṇṇanā	320
5. Chavālātasuttādivaṇṇanā	320
7. Khippanisantisuttādivaṇṇanā	321
3. Tatiyapaṇṇāsaka			
(11) 1. Valāhakavagga			
1-2. Valāhakasuttadvayaṇṇanā	322
3. Kumbhasuttavaṇṇanā	323
4. Udakarahadasuttavaṇṇanā	323
5. Ambasuttādivaṇṇanā	323
7. Mūsikasuttavaṇṇanā	324
8. Balībaddasuttavaṇṇanā	324
9. Rukkhasuttavaṇṇanā	324
10. Āsīvisasuttavaṇṇanā	325

Mātikā

Piṭṭhaṅka

(12) 2. Ekasivagga

1. Kesisuttādivaṇṇanā	325
8. Saṃvejanīyasuttādivaṇṇanā	326

(13) 3. Bhayavagga

1. Attānuvādasuttavaṇṇanā	326
2. Ūmibhayasuttavaṇṇanā	326
3. Paṭhamanānākaraṇasuttavaṇṇanā	328
4. Dutīyanānākaraṇasuttādivaṇṇanā	330
7. Paṭhamatathāgata-accharīyasuttavaṇṇanā	331
8. Dutīyatathāgata-accharīyasuttavaṇṇanā	332
9. Ānanda-accharīyasuttādivaṇṇanā	333

(14) 4. Puggalavagga

1. Saṃyojanasuttavaṇṇanā	333
2. Paṭibhānasuttavaṇṇanā	334
3. Ugghaṭitaññūsuttādivaṇṇanā	334
5. Sāvajjasuttādivaṇṇanā	335
9. Dhammakathikasuttādivaṇṇanā	336

(15) 5. Ābhāvagga

1. Ābhāsuttādivaṇṇanā	336
7. Dutīyakālasuttādivaṇṇanā	336

4. Catutthapaṇṇāsaka

(16) 1. Indriyavagga

1. Indriyasuttādivaṇṇanā	337
6. Kappasuttādivaṇṇanā	337

Mātikā	Piṭṭhaṅka
9. Bhikkhunīsuttavaṇṇanā	338
10. Sugatavinayasuttavaṇṇanā	338

(17) 2. Paṭipadāvagga

1. Saṅkhittasuttavaṇṇanā	339
2. Vitthārasuttavaṇṇanā	340
3. Asubhasuttavaṇṇanā	340
4. Paṭhamakhamasuttādivaṇṇanā	342
7. Mahāmoggallānasuttādivaṇṇanā	342
9. Sasaṅkhārasuttavaṇṇanā	343
10. Yuganaddhasuttavaṇṇanā	344

(18) 3. Sañcetaniyavagga

1. Cetanāsuttavaṇṇanā	345
2. Vibhattisuttavaṇṇanā	347
3. Mahākoṭṭhikasuttādivaṇṇanā	351
5. Upavāṇasuttādivaṇṇanā	351
7. Rāhulasuttavaṇṇanā	351
8. Jambālīsuttavaṇṇanā	352
9. Nibbānasuttavaṇṇanā	353
10. Mahāpadesasuttavaṇṇanā	354

(19) 4. Brāhmaṇavagga

1. Yodhājīvasuttavaṇṇanā	357
4. Abhayasuttavaṇṇanā	357
5. Brāhmaṇasaccasuttavaṇṇanā	358
6. Ummaggasuttavaṇṇanā	359
7. Vassakārasuttavaṇṇanā	359
8. Upakasuttavaṇṇanā	360

Mātikā			Piṭṭhaṅka
9. Sacchikaraṇīyasuttavaṇṇanā	361
10. Uposathasuttavaṇṇanā	361

(20) 5. Mahāvagga

1. Sotānugatasuttavaṇṇanā	361
2. Ṭhānasuttavaṇṇanā	362
3. Bhaddiyasuttavaṇṇanā	364
4. Sāmugiyasuttavaṇṇanā	364
5. Vappasuttavaṇṇanā	364
6. Sālhasuttavaṇṇanā	366
7. Mallikādevīsuttavaṇṇanā	368
8. Attantapasuttavaṇṇanā	369
9. Taṇhāsuttādivaṇṇanā	382

5. Pañcamapaṇṇāsaka

(21) 1. Sappurisavagga

1. Sikkhāpadasuttādivaṇṇanā	386
-----------------------------	-----	-----	-----

(23) 3. Duccaritavaggavaṇṇanā	386
--------------------------------------	-----	-----	-----

(24) 4. Kammavagga

1. Saṃkhittasuttavaṇṇanā	387
2. Vitthārasuttavaṇṇanā	388
3. Soṇakāyanasuttādivaṇṇanā	388
10. Samaṇasuttādivaṇṇanā	389

(25) 5. Āpattibhayavagga

1. Saṃghabhedakasuttavaṇṇanā	393
2. Āpattibhayasuttādivaṇṇanā	393

Mātikā		Piṭṭhaṅka	
4. Seyyāsuttādivaṇṇanā	394
8. Paṭhamavohārasuttavaṇṇanā	395

(26) 6. Abhiññāvagga

1. Abhiññāsuttādivaṇṇanā	395
4. Mālukyaputtasuttādivaṇṇanā	396

Aṅguttaraṭṭikāya dutiyabhāge mātikā niṭṭhitā.

Suttantapiṭaka

Dukādinipāta

Āṅuttaraṭīkā

Namo tassa Bhagavato Arahato Sammāsambuddhassa.

Dukanipāta

1. Paṭhamapaṇṇāsaka

1. Kammakāraṇavagga 1. Vajjasuttavaṇṇanā

1. Dukanipātassa paṭhame **pahārasādhanatthanti** daṇḍappahārassa sukhassiddhi-attham. Kañjito nibbattam kañjiyam¹, āraṇālam, yam bilaṅgantipi vuccati, tam yattha siṅcati, sā kañjiya-ukkhalikā bilaṅgathālikā, taṃsadisam kāraṇam **bilaṅgathālikam**. **Sīsakaṭṭhāram uppatetvāti** ayogulappavesappamānam chiddam katvā. **Saṅkhamuṇḍakammakāraṇanti** saṅkham viya muṇḍakaraṇam kammakāraṇam. **Rāhumukhakammakāraṇanti** rāhumukhavatasūriyasadisakammakāraṇam.

Jotimālikanti jotimālavantam kammakāraṇam. **Hatthapajjotikanti** hatthassa pajjotanakammakāraṇam. **Erakavattakammakāraṇanti** erakavattasadiṣe sarīrato cammavatte uppātanakammakāraṇam. **Cīrakavāsikakammakāraṇanti** sarīrato uppātitavattacīrakehi nivāsāpanakammakāraṇam. Tam karontā yathā gīvato paṭṭhāya vaddhe kantivā kaṭṭiyam ṭhapenti, evam gopphakato paṭṭhāya kantivāpi kaṭṭiyameva ṭhapenti. Aṭṭhakathāyam

1. Kañjikam (Ka)

pana “kaṭṭito paṭṭhaya kantitvā gopphakesu ṭhapenti”ti vuttaṃ,
eṇeyyakakammakāraṇanti eṇimigasadisakammakāraṇaṃ. **Ayavalayāni**
datvāti ayavalayāni paṭimuñcitvā. **Ayasūlāni koṭṭenti**ti kapparaṇṇakakoṭṭisu
 ayasūlāni pavesenti. **Tanti** taṃ tathākatakammakāraṇaṃ sattaṃ.

Baḷisamaṃsikanti balisehi maṃsuppāṇanakammakāraṇaṃ.
Kahāpaṇikanti kahāpaṇamattaso chindanakammakāraṇaṃ. **Koṭṭenti**ti
 chindanti. **Khārāpatacchikanti** tacchetvā khārāpasiñcanakammakāraṇaṃ.
Palighaparivattikanti palighassa viya parivattanakammakāraṇaṃ.
Ekābaddhaṃ karonti ayasūlassa koṭṭanena. **Palālapīṭhakanti** palālapīṭhassa
 viya sarīrassa saṃvellanakammakāraṇaṃ. **Kāraṇikāti** ghātanakārakā.
Palālavatṭim viya katvāti yathā palālapīṭhaṃ karontā palālaṃ vatṭim katvā
 saṃvellanavasena puna veṭhenti, evaṃ karontīti attho. **Chātakasunakhehīti**
 khuddakehi koleyyakasunakhehi. Te hi balavantā javayogā sūrā ca honti.
Sahassabhaṇḍikanti sahasatthavikaṃ.

Yāhanti yaṃ ahaṃ. **Yanti** ca kāraṇavacanaṃ. Tenāha “yena ahan”ti.
Chinnamūlaketī taṇhāmūlassa ucchinnattā sañchinnamūlake.

Vajjasuttavaṇṇanā niṭṭhitā.

2. Padhānasuttavaṇṇanā

2. Dutiye **ubhatobyūḷhasaṅgāmapavesanasadisanti** yuddhatthāya
 ubhatorāsikatacaturāṅginisenāmajjhappavesanasadisam. **Dānañca yuddhañca**
samānamāhūti ettha kathaṃ paṇidamubhayaṃ samānaṃ?
 Jīvitavināsabhīruko hi yujjhitaṃ na sakkoti, bhogakkhayabhīruko dānaṃ
 dātum na sakkoti. “Jīvitañca rakkhissāmi, yujjhissāmi”ti hi vadanto na
 yujjhati, jīvite pana ālayaṃ vissajjtvā “hatthapādādicchedo vā hotu
 maraṇaṃ vā, gaṇhissāmetaṃ issariyaṃ”ti ussahantova yujjhati. “Bhoge ca
 rakkhissāmi, dānañca dassāmi”ti vacantopi na dadāti, bhogesu pana ālayaṃ
 vissajjtvā “mahādānaṃ dassāmi”ti ussahantova deti.

Evam dānañca yuddhañca samaṃ hoti. Kiñca bhiyyo—**appāpi santā bahuke jinanti**, yathā ca yuddhe appakāpi vīrapurisā bahuke bhīrupurise jinanti, evam saddhādisampanno appakampi dānaṃ dadanto bahuvidhaṃ lobhadosa-issāmacchariyadiṭṭhivicikicchādibhedaṃ tappaṭipakkaṃ abhibhavati, bahuñca dānavipākaṃ adhigacchati. Evampi dānañca yuddhañca samānaṃ. Tenāha “**appampi ce saddahāno dadāti, teneva so hoti sukhī paratthā**”ti.

Agārassa hitaṃ kasigorakkhādi agāriyaṃ, taṃ natthi etthāti **anagāriyaṃ**, pabbajjāti āha “**agārassa -pa- anagāriyaṃ pabbajjan**”ti. **Sabbūpadhipaṭinissaggatthāyāti** ettha cattāro upadhī kāmupadhi khandhupadhi kilesupadhi abhisankhārupadhīti. Kāmāpi hi “yaṃ pañca kāmagaṇe paṭicca uppajjati sukhaṃ somanassaṃ, ayaṃ kāmānaṃ assādo”¹ti evam vuttassa sukhassa, tadassādanimitassa vā dukkhassa adhiṭṭhānabhāvato upadhīyati ettha sukhanti iminā vacanattena “upadhī”ti vuccanti. Khandhāpi khandhamūlakassa dukkhassa adhiṭṭhānabhāvato, kilesāpi apāyadukkhassa adhiṭṭhānabhāvato, abhisankhārāpi bhavadukkhassa adhiṭṭhānabhāvato “upadhī”ti vuccanti. Sabbesaṃ upadhīnaṃ paṭinissaggo pahānaṃ etthāti sabbūpadhipaṭinissaggaṃ, nibbānaṃ. Tenāha “**sabbesaṃ khandhūpadhi -pa- nibbānassa atthāyā**”ti.

Padhānasuttavaṇṇanā niṭṭhitā.

3. Tapanīyasuttavaṇṇanā

3. Tatiye **tapanīyāti** ettha kattu-atthe anīyasaddoti āha “**tapantīti tapanīyā**”ti. **Tapantīti** vibādhenti, viheṭṭenti attho. Tapanāṃ vā dukkhaṃ, diṭṭhe ceva dhamme abhisamparāyañca tassa uppādanena ceva anubalappadānena ca hitāti **tapanīyā**. Atha vā tapanti tenāti tapanāṃ anutāpo, vippaṭisāroti attho. Tassa hetubhāvato hitāti **tapanīyā**. **Anusocatīti** vippaṭisārī hutvā katākataṃ anugamma socati. Socanaṃ hi katattā ca hoti akatattā ca. Tathā ceva pāḷiyaṃ vibhattaṃ. Nandayakkhādīnaṃ vatthūni pākaṭānīti tāni

1. Am 2. 213 piṭṭhe.

adassetvā dvebhātikavatthum dassento “**te kirā**”ti-ādimāha. Tattha **teti** dve bhātarō. **Puna kiṃ maggasīti** puna kiṃ icchasi.

Tapanīyasuttavaṇṇanā niṭṭhitā.

5. Upaññātasuttavaṇṇanā

5. Pañcame **imaṃ hi dhammadvayanti** kusalesu dhammesu asantuṭṭhitā padhānasmim̐ anosakkanasaṅkhātāṃ dhammadvayaṃ. **Imināti** “asantuṭṭhitā kusalesu dhammesū”ti vacanena. **Imaṃ dīpetīti** “yāva so uppajjati, na tāvāhaṃ santuṭṭho ahosin”ti etaṃ pariyantaṃ katvā vakkhamānatthaṃ dīpeti. **Padhānasminti** vīriyārambhe. **Imamatthanti** “padhānasmim̐ cā”ti-ādinā vuttamatthaṃ. Vīriyappavāhe vattamāne antarā eva paṭigamanam̐ nivattanam̐ paṭivānam̐, tadassa atthīti paṭivānī, na paṭivānī appaṭivānī, tassa bhāvo **appaṭivānitā**, anosakkanāti āha “**appaṭivānitāti appaṭikkamanā anosakkanā**”ti. Tattha **anosakkanāti** appaṭinivatti.

Āgamanīyapaṭipadāti samathavipassanāsaṅkhātā pubbabhāgapaṭipatti. Sā hi āgacchanti visesamadhigacchanti etāya, āgacchati vā visesādhigamo etāyāti āgamanīyā, sā eva paṭipajjitabbato paṭipadāti āgamanīyapaṭipadā. **Appaṭivānapadhānanti** osakkanārahitappadhānam̐, antarā anosakkivā katavīriyanti attho.

Upaññātasuttavaṇṇanā niṭṭhitā.

6. Saññojanasuttavaṇṇanā

6. Chaṭṭhe saṃyojanānam̐ hitā paccayabhāvenāti **saññojaniyā**, tebhūmakā dhammā. Tenāha “**dasannaṃ saṃyojanānan**”ti-ādi. Saṃyojaniye dhamme assādato anupassati sīlenāti assādānupassī, tassa bhāvo **assādānupassitā**. **Nibbidānupassitāti** etthāpi eseva nayo. **Ukkaṇṭhanavasena**ti saṃyojaniyesu tebhūmakadhammesu nibbindanavasena. Jananam̐ **jāti**, khandhānam̐ pātubhāvoti āha “**jātiyāti khandhanibbattito**”ti, khandhānam̐ tattha tattha bhava aparāparam̐ nibbattitoti attho.

Khandhaparipāko ekabhavapariyāpannānaṃ khandhānaṃ purāṇabhāvo. Ekabhavapariyāpannājīvitindriyappabandhavicchedavasena khandhānaṃ bhedo idha maraṇanti āha “**marañenāti khandhabhedato**”ti. **Antonijjhānaṃ** cittasantāpo. **Paridevo** nāma ñātibyasanādīhi phuṭṭhassa vācāvippalāpo. So ca sokasamuṭṭhānoti āha “**tanmissitalāppitalakkhaṇehi paridevehī**”ti. **Lālappitaṃ** vācāvippalāpo, so ca atthato saddoyeva.

Dukkanti idha kāyikaṃ dukkhaṃ adhippetanti āha “**kāyapaṭipīlanadukkhehi**”ti. **Manovighātadomanassehī**ti manaso vighātakarehi domanassehi. Byāpādasampayogena manaso vihananarasam hi domanassam. Bhuso āyāso **upāyāso** yathā “bhusamādānaṃ upādānaṃ”ti, so ca atthato ñābhbyasanādīhi phuṭṭhassa adhimattacetodukkhappabhāvito dosoyeva. Kāyacittānaṃ hi āyāsanavasena dosasseva pavatti-ākāro upāyāsoti vuccati saṅkhārakkhandhapariyāpanno. Tam cuddasahi akusalacetasikehi añño eko cetasikadhammoti eke. Yam visādoti ca vadanti.

Saññojanasuttavaṇṇanā niṭṭhitā.

7. Kaṇhasuttavaṇṇanā

7. Sattame yathā “kaṇhā gāvī”ti-ādīsu kāḷavaṇṇena samannāgatā “kaṇhā”ti vuccati, na evaṃ kāḷavaṇṇatāya dhammā “kaṇhā”ti vuccanti, atha kho kaṇhābhijātiniabbattihetuto appabhassarabhāvakaraṇato vā “kaṇhā”ti vuccantīti dassento “**na kāḷavaṇṇatāyā**”ti-ādīmāha. **Kaṇhatāyāti** kaṇhābhijātītāya. **Kaṇhābhijātīti** ca apāyā vuccanti manussesu ca dobhaggiyam. **Sarasenāti** sabhāvena. Na hiriyati na lajjatīti ahiriko, puggalo, cittaṃ, taṃsampayuttadhammasamudāyo vā, tassa bhāvo ahirikkanti vattabbe ekassa ka-kārassa lopaṃ katvā **ahirikanti** vuttanti āha “**ahirikanti ahirikabhāvo**”ti. Na ottappatīti anottāpī, puggalo, yathāvuttadhammasamudāyo vā, tassa bhāvo **anottappanti** āha “**anottāpibhāvo**”ti.

Kaṇhasuttavaṇṇanā niṭṭhitā.

8. Sukkasuttavaṇṇanā

8. Aṭṭhame “sukkam vatthan”ti-ādīsu viya na vaṇṇasukkatāya dhammānaṃ sukkatā, atha kho sukkābhijātihetuto pabhassarabhāvakarāṇato cāti dassento “**na vaṇṇasukkatāyā**”ti-ādīmāha. **Sukkatāyā**ti sukkābhijātītāya. Hirī pāpadhamme gūtham viya passantī jigucchatīti āha “**pāpato jigucchanalakkhaṇā hirī**”ti. Ottappaṃ te uṇham viya passantaṃ tato bhāyatīti vuttaṃ “**bhāyanalakkhaṇam ottappaṃ**”ti. Idañca hirottappaṃ aññamaññavippayogī pāpato vimukhabhūtañca, tasmā nesaṃ idaṃ nānākaraṇam—ajjhattasamuṭṭhānā hirī, bahiddhāsamuṭṭhānaṃ ottappaṃ. Attādhipati hirī, lokādhipati ottappaṃ. Lajjāsabhāvasaṇṭhitā hirī, bhayasabhāvasaṇṭhitam ottappaṃ. Sappatissavalakkhaṇā hirī, vajjabhīrukabhayaadassāvilakkhaṇam ottappanti.

Tattha ajjhattasamuṭṭhānaṃ hiriṃ catūhi kāraṇehi samuṭṭhāpeti jātiṃ paccavekkhitvā, vyaṃ, sūrabhāvaṃ, bāhusaccaṃ paccavekkhitvā. Kathaṃ? “Pāpakaraṇam nāmetaṃ na jātisampannānaṃ kammaṃ, hīnajaccānaṃ kevaṭṭādīnaṃ kammaṃ, mādisassa jātisampannassa idaṃ kātuṃ na yuttan”ti evaṃ tāva jātiṃ paccavekkhitvā pāpaṃ akaronto hiriṃ samuṭṭhāpeti. Tathā “pāpakaraṇam nāmetaṃ daharehi kattabbaṃ kammaṃ, mādisassa vaye ṭhitassa idaṃ kātuṃ na yuttan”ti evaṃ vyaṃ paccavekkhitvā pāpaṃ akaronto hiriṃ samuṭṭhāpeti. Tathā “pāpakaraṇam nāmetaṃ dubbalajātikānaṃ kammaṃ, mādisassa sūrabhāvasampannassa idaṃ kātuṃ na yuttan”ti evaṃ sūrabhāvaṃ paccavekkhitvā pāpaṃ akaronto hiriṃ samuṭṭhāpeti. Tathā “pāpakammaṃ nāmetaṃ andhabālānaṃ kammaṃ, na paṇḍitānaṃ, mādisassa paṇḍitassa bahussutassa idaṃ kātuṃ na yuttan”ti evaṃ bāhusaccaṃ paccavekkhitvā pāpaṃ akaronto hiriṃ samuṭṭhāpeti. Evaṃ ajjhattasamuṭṭhānaṃ hiriṃ catūhi kāraṇehi samuṭṭhāpeti, samuṭṭhāpento ca hiriṃ nissāya pāpakammaṃ na karoti.

Kathaṃ bahiddhāsamuṭṭhānaṃ ottappaṃ? “Sace tvaṃ vāpakammaṃ parissasi, catūsu parisāsu garahappatto bhavissasi, tato taṃ sīlavanto sabrahmacārī vivajjissanti”ti paccavekkhitvā bahiddhāsamuṭṭhānaṃ ottappaṃ nissāya pāpakammaṃ na karoti. Evaṃ bahiddhāsamuṭṭhānaṃ ottappaṃ.

Katham attādhipati hirī? Idhekacco kulaputto attānaṃ adhipatiṃ jeṭṭhakaṃ katvā “mādisassa saddhāpabbajitassa bahussutassa dhutadharassa na yuttaṃ pāpakammaṃ kātun”ti pāpaṃ na karoti. Evaṃ attādhipati hirī. Tenāha bhagavā “so attānaṃyeva adhipatiṃ karitvā akusalaṃ pajahati, kusalaṃ bhāveti, sāvajjaṃ pajahati, anavajjaṃ bhāveti, suddhaṃ attānaṃ pariharatī”ti¹.

Katham lokādhipati ottappaṃ? Idhekacco kulaputto lokaṃ adhipatiṃ jeṭṭhakaṃ katvā “sace kho tvaṃ pāpakammaṃ kareyyāsi, sabrahmacārino tāva taṃ jānissanti, mahiddhikā mahānubhāvā loka ca samaṇabrāhmaṇā devatā ca, tasmā te na yuttaṃ pāpaṃ kātun”ti pāpakammaṃ na karoti. Yathāha “mahā kho paṇāyaṃ lokasannivāso, mahantasmim kho pana lokasannivāse santi samaṇabrāhmaṇā iddhimanto dibbacakkhukā paracittaviduno, te dūratopi passanti, āsannāpi na dissanti, cetasāpi cittaṃ jānanti, tepi maṃ evaṃ jānissanti ‘passatha bho imaṃ kulaputtaṃ, saddhā agārasmā anagāriyaṃ pabbajito samāno vokiṇṇo viharati pāpakehi akusalehi dhammehī’ti. Santi devatā iddhimantiniyo dibbacakkhukā paracittaviduniyo, tā dūratopi passanti, āsannāpi na dissanti, cetasāpi cittaṃ jānanti, tāpi maṃ jānissanti ‘passatha bho imaṃ kulaputtaṃ, saddhā agārasmā anagāriyaṃ pabbajito samāno vokiṇṇo viharati pāpakehi akusalehi dhammehī’ti -pa-. So lokaṃyeva adhipatiṃ karitvā akusalaṃ -pa- pariharatī”ti¹. Evaṃ lokādhipati ottappaṃ.

Lajjāsabhāvasaṅghitāti ettha **lajjā**ti lajjanākāro, tena sabhāvena saṅghitā hirī. **Bhayanti** apāyabhayaṃ, tena sabhāvena saṅghitaṃ ottappaṃ. Tadubhayaṃ pāparivajjane pākaṭaṃ hoti. Tattha yathā dvīsu ayogulesu eko sītalo bhavyeṃ gūthamakkhito, eko uṇho āditto. Tesu yathā sītalaṃ gūthamakkhittatā jigucchanto viññujātiko na gaṇhāti, itaraṃ dāhabhayaena, evaṃ paṇḍito lajjāya jigucchanto pāpaṃ na karoti, ottappena apāyabhayaabhīto pāpaṃ na karoti, evaṃ **lajjāsabhāvasaṅghitā hirī, bhayasabhāvasaṅghitaṃ ottappaṃ.**

1. Am 1. 146 piṭṭhe.

Katham sappatissavalakkhaṇā hirī, vajjabhīrukabhayadassāvilakkhaṇam ottappaṃ? Ekacco hi jātimahattapaccavekkhaṇā sathumahattapaccavekkhaṇā dāyajjamahattapaccavekkhaṇā sabrahmacārimahattapaccavekkhaṇāti evaṃ catūhi kāraṇehi tattha gāravena sappatissavalakkhaṇam hirim samuṭṭhāpetvā pāpam na karoti. Ekacco attānuvādabhayaṃ parānuvādabhayaṃ daṇḍabhayaṃ duggatibhayanti evaṃ catūhi kāraṇehi vajjato bhāyanto vajjabhīrukabhayadassāvilakkhaṇam ottappaṃ paccupaṭṭhāpetvā pāpakammaṃ na karoti. Ettha ca ajjhattasamuṭṭhanādītā hirottappānaṃ tatta tattha pākāṭabhāvena vuttā, na pana nesam kadāci aññamaññavippayogo. Na hi lajjanaṃ nibbhayaṃ, pāpabhayaṃ vā alajjanaṃ atthīti. Evamettha vitthārato atthavaṇṇanā veditabbā.

Sukkasuttavaṇṇanā niṭṭhitā.

9. Cariyasuttavaṇṇanā

9. Navame **lokanti** sattalokaṃ. **Sandhārentīti** ācārasandhāraṇavasena dhārenti. **Ṭhapentīti** mariyādāyaṃ ṭhapenti. **Rakkhantīti** ācārasandhāraṇena mariyādāyaṃ ṭhapetvā rakkhanti. **Garucittikāravasena na paññāyethāti** garuṃ katvā citte karaṇavasena na paññāyetha, ayamācāro na labbheyya. **Mātucchāti vāti** ettha **iti**-saddo ādyattho. Tena mātulanīti vā ācariyabhariyāti vā garūnaṃ dārāti vāti ime saṅgaṇhāti. Tattha mātu bhaginī **mātucchā**. Mātulabhariyā **mātulanī**. **Garūnaṃ dārā** mahāpitucūlapitujeṭṭhabhātu-ādīnaṃ garuṭṭhāniyānaṃ bhariyā. **Yathā ajeḷakāti**-ādīsu ayaṃ saṅkhepattho—yathā ajeḷakādayo tīracchānā hirottapparahitā mātāti saññaṃ akatvā bhinnamariyādā sabbattha sambhedena vattanti, evamayaṃ manussaloko yadi lokapāladhammā na bhaveyyum, sabbattha sambhedena vatteyya. Yasmā panime lokapālakadhammā lokaṃ pālenti, tasmā natthi sambhedoti.

Cariyasuttavaṇṇanā niṭṭhitā.

10. Vassūpanāyikasuttavaṇṇanā

10. Dasame **apaññattā**ti ananuññātā, avihitā vā. **Vasseti** vassārattam sandhāya vadati, **utuvasseti** hemantaṃ sandhāya. **Ekindriyaṃ jīvaṃ viheṭṭentā**ti rukkkhalatādīsu jīvasaññitāya evamāhaṃsu. **Ekindriyanti** ca kāyindriyaṃ atthīti maññamānā vadanti. **Samghātaṃ āpādentā**ti vināsaṃ āpādentā. **Samkasāyissantī**ti appossukkā nibaddhavāsaṃ vasissantī. **Aparajjugatāya āsālhiyā upagantabbā**ti ettha aparajju gatāya assāti aparajjugatā, tassā aparajjugatāya atikkantāya, aparasmim divaseti attho, tasmā āsālhipuṇṇamāya anantare pāṭipadadivase upagantabbāti evamettha attho daṭṭhabbo. **Māsagatāya āsālhiyā upagantabbā**ti māso gatāya assāti māsagatā, tassā māsagatāya atikkantāya, māse paripuṇṇeti attho, tasmā āsālhipuṇṇamato parāya puṇṇamāya anantare pāṭipadadivase upagantabbāti attho daṭṭhabbo.

Vassūpanāyikasuttavaṇṇanā niṭṭhitā.

Kammakāraṇavaggavaṇṇanāya līnatthappakāsanā niṭṭhitā.

2. Adhikaraṇavaggavaṇṇanā

11. Dutiyavaggassa paṭhame appaṭisaṅkhāne na kampaṭīti **paṭisaṅkhānabalaṃ**, upaparikkhanapaññāyetaṃ nāmaṃ. Vīriyasīsenā satta bojjaṅge bhāventassa uppannaṃ balaṃ **bhāvanābalaṃ**. Vīriyupatthambhena hi kusalabhāvanā balavatī thirā uppajjati, tathā uppannā balavatī kusalabhāvanā balavanto satta bojjaṅgātipi vuccanti. Atthato vīriyasambojjaṅgasīsenā satta bojjaṅgā hontī. Vuttampi cetam—“tattha katammaṃ bhāvanābalaṃ? Yā kusalānaṃ dhammānaṃ āsevanā bhavanā bahulīkamaṃ, idaṃ vuccati bhāvanābalaṃ. Sattapi bojjaṅgā bhāvanābalaṃ”¹.

Akampiyyatṭhenāti paṭipakkhehi akampaṇīyatṭhena. **Durabhībhavanatṭhenā**ti duratībhavanīyatṭhena. **Anajjhomaddanatṭhenā**ti adhibhavitvā anavamaddanatṭhena.

1. Abhi 1. 126 piṭṭhe.

Etānī etāni yathāvuttāni dvepi balāni. **Etadaggaṃ nāgatanti** “etadaggaṃ bhikkhave dvinnaṃ balānaṃ yadidaṃ bhāvanābalan”ti evamettha etadaggaṃ nāgatanti attho.

12. Dutiye vivekaṃ nissitanti **vivekanissitaṃ**, yathā vā vivekavasena pavattaṃ jhānaṃ “vivekajan”ti vuttaṃ, evaṃ vivekavasena pavatto satisambojjhaṅgo “vivekanissito”ti daṭṭhabbo. Nissayaṭṭho ca vipassanāmaggaṇaṃ vasena maggaphalānaṃ veditaṃ, asatipi vā pubbāparabhāve “paṭiccasamuppādo”ti ettha paccayena samuppādanāni viya avinābhāvidhammabyāpārā nissayanabhāvanā sambhavantīti. “Tadaṅgasamucchedanissaraṇavivekanissitaṃ”ti vatvā paṭippassaddhivivekanissitassa avacanaṃ “satisambojjhaṅgaṃ bhāvetī”ti-ādinā idha bhāvetabbānaṃ sambojjhaṅgaṇaṃ vuttattā. Bhāvitambojjhaṅgassa hi sacchikātabbā balabojjhaṅgā, tesāṃ kiccaṃ paṭippassaddhiviveko. **Ajjhāsayatoti** “nibbānaṃ sacchikarissāmī”ti pavatta-ajjhāsayato. Yadihi hi vipassanākkhaṇe saṅkhārārammaṇaṃ cittaṃ, saṅkhāresu pana ādīnavaṃ dīsvā tappaṭipakkhe nibbāne ninnaṭāya ajjhāsayato nissaraṇavivekanissito hoti uṇhābhīhūtassa puggalassa sītaninnacittatā viya.

Pañcavidhāvivekanissitampīti eke”ti vatvā tatha yathāvuttāvivekattayato aññaṃ vivekadvayaṃ uddharitvā dassetuṃ “**te hī**”ti-ādi vuttaṃ, tatha jhānakkhaṇe tāva kiccato vikkhambhanāvivekanissitaṃ, vipassanākkhaṇe ajjhāsayato paṭippassaddhivivekanissitaṃ bhāvetīti vattabbaṃ “evāhaṃ anuttaraṃ vimokkhaṃ upasampajja viharissāmī”ti tatha ninnajjhāsayatāya. Tenāha “**tasmā tesāṃ matenā**”ti-ādi. Heṭṭhā kasiṇajjhānaggahaṇena āruppānampi gahaṇaṃ daṭṭhabbaṃ, tasmā “etesāṃ jhānānaṃ”ti imināpi tesāṃ saṅgaho veditaṃ. Yasmā pahānavinayo viya virāganīrodhāpi idhāhippetavivekena atthato nibbisitṭhā, tasmā vuttaṃ “**esa nayo virāganissitanti-ādīsū**”ti. Tenāha “**vivekatthā eva hi virāgādayo**”ti.

Vossagga-saddo pariccāgattho pakkhandanatto cāti vossaggassa duvidhatā vuttā. Vossajjanañhi pahānaṃ vissaṭṭhabhāvena nirodhanapakhandanampi

ca. Tasmā vipassanākkhaṇe tadaṅgavasena, maggakkhaṇe samucchadavasena paṭipakkhassa pahānaṃ vossaggo, tathā vipassanākkhaṇe tanninnabhāvena, maggakkhaṇe ārammaṇakaraṇena vissaṭṭhasabhāvataṃ vossaggoti veditabbaṃ. Tenevāha “**tattha pariccāgavossaggo**”ti-ādi. **Ayaṃ satisambojjhaṅgoti** ayaṃ missakavasena vutto satisambojjhaṅgo. **Yathāvuttena pakārenā**ti tadaṅgappahānasamucchadappahānappakārena tanninnatadārammaṇappakārena ca. Pubbe vossaggavacanasseva atthassa vuttatā āha “**sakalena vacanenā**”ti. **Pariṇamantanti** vipassanākkhaṇe tadaṅgatanninnappakārena pariṇamantaṃ. **Pariṇatanti** maggakkhaṇe samucchadatadārammaṇappakārena pariṇataṃ. Pariṇāmo nāma idha paripākoti āha “**paripaccantaṃ paripakkañcā**”ti. Paripāko ca āsevanalābhena laddhasāmatthiyassa kilese pariccajituṃ nibbānaṃ pakkhandituṃ tikkhavisadabhāvo. Tenāha “**ayañhi**”ti-ādi. **Esa nayoti** yvāyaṃ nayo “vivekanissitan”ti-ādinā satisambojjhaṅge vutto, sesesu dhammavicayasambojjhaṅgādīsupi eseva nayo, evaṃ tattha netabbanti attho.

“Vivekanissitan”ti-ādīsu labbhamānamatthaṃ sāmāññato dassetvā idāni idhādhippetamatthaṃ dassento “**idha panā**”ti-ādimāha. Tattha **sabbasaṅkhatehi**ti sabbehi paccayasamuppānādhammehi. **Sabbesanti** saṅkhatadhammānaṃ. **Vivekaṃ ārammaṇaṃ katvāti** nibbānasaṅkhātānaṃ vivekaṃ ārammaṇaṃ katvā. **Taṅca khoti** tadeva satisambojjhaṅgaṃ.

13. Tatiye **cittekaggatthāyāti** cittasamādhānatthāya, diṭṭhadhamme sukhavihārāyāti attho. Cittekaggatāsīsena hi diṭṭhadhammasukhavihāro vutto. Sukkhavipassakakhīṇāsavānaṃ vasena hetānaṃ vuttānaṃ. Te hi samāpajjitvā “ekaggacittā sukhaṃ divasaṃ viharissāmā”ti icceva kaṣiṇaparikkammaṃ katvā aṭṭha samāpattiyo nibbattenti. **Vipassanāpādakatthāyāti**-ādīsū pana sekkhaputhujjanaṃ “samāpattito vuṭṭhāya samāhitena cittaena vipassāmā”ti nibbattentā vipassanāpādakatthāya bhāventi.

Ye pana aṭṭha samāpattiyo nibbattetvā abhiññāpādakajjhānaṃ samāpajjitvā samāpattito vuṭṭhāya “ekopi hutvā bahudhā hoti”ti¹

1. Dī 1. 73; Ma 1. 98; Saṃ 1. 342; Saṃ 1. 247, 251 piṭṭhesu.

vuttanayā abhiññāyo patthentā nibbattenti, te **abhiññāpadakatthāya** bhāventi. Ye aṭṭha samāpattiyo nibbattetvā nirodhasamāpattiṃ samāpajjitvā “sattāhaṃ acittā hutvā diṭṭheva dhamme nirodhaṃ nibbānaṃ patvā sukhaṃ viharissāmā”ti nibbattenti, te **nirodhapādakatthāya** bhāventi. Ye pana aṭṭha samāpattiyo nibbattetvā “aparihīnājjhānā brahmaloke uppajjissāmā”ti nibbattenti, te **bhavavisesatthāya** bhāventi.

Yuttam tāva cittekaggaṭāya bhavavisesatthatā vaya vipassanāpādakatthatāpi catukkajjhānasādhāraṇāti tesam vasena “cattāri jhānāni”ti vacanaṃ, abhiññāpādakatthatā pana nirodhapādakatthatā ca catutthasseva jhānassa āveṇikā, sā katham catukkajjhānasādhāraṇā vuttāti? Paramparādhiṭṭhānabhāvato. Padaṭṭhānapadaṭṭhānampi hi padaṭṭhānanti vuccati kāraṇakāraṇanti yathā “tiṇehi bhattaṃ siddhan”ti.

14. Catutthe **sasakassa uppatanaṃ viya hotīti**

pathavijigucchanasasakassa uppatanaṃ viya hoti. Tatthāyaṃ atthasallāpikā upamā—pathavī kira sasakaṃ āha “he sasakā”ti. Sasako āha “ko eso”ti. Kasmā mameva upari sabba-iriyāpathe kappento uccārapassāvaṃ karonto maṃ na jānāsīti. Suṭṭhu tayā ahaṃ diṭṭho, mayā akkantaṭṭhānaṃ hi aṅgulaggehi phuṭṭhaṭṭhānaṃ viya hoti, vissaṭṭha-udakaṃ appamattakaṃ, karīsaṃ kaṭakaphalamattaṃ, hatthi-assādīhi pana akkantaṭṭhānampi mahantaṃ, passāvopi nesaṃ ghaṭamatto, uccāropi pacchimatto hoti, alaṃ mayhaṃ tayāti uppatitvā aññasmim ṭhāne patito. Tato naṃ pathavī āha “aho dūraṃ gatopi nanu mayhamyeva upari patitosī”ti. So puna taṃ jigucchanto uppatitvā aññattha patito. Evaṃ vassasahassampi uppatitvā patamāno sasako neva pathaviyā antaṃ pāpuṇitum sakkoti. **Na koṭinti** na pubbakoṭim. **Itaresanti** vipañcitaññuneyyapadaparamānaṃ.

15. Pañcame samathehi adhikarīyati vūpasammatīti adhikaraṇaṃ. Aṭṭhārasa bhedakaravatthūni nissāya uppanno vivādoyeva **vivādādhikaraṇaṃ**. “Idha bhikkhū bhikkhum anuvadanti sīlavipattiyā vā”ti-ādinā¹

1. Vi 4. 212 piṭṭhe.

catasso vipattiyo nissāya uppanno anuvādoyeva **anuvādādhikaraṇaṃ**. Pañcapi āpattikkhandhā **āpattādhikaraṇaṃ**. “Sattapi āpattikkhandhā āpattādhikaraṇaṃ”¹ vacanato āpattiyeva **āpattādhikaraṇaṃ**. “Yā saṅghassa kiccayatā karaṇīyatā apalokanakammaṃ ñattikammaṃ ñattidutiyakammaṃ ñatticatutthakammaṃ”¹ evamāgatam catubbidham saṅghakiccam **kiccādhikaraṇanti** veditabbaṃ. Sesamettha uttānameva.

16. Chaṭṭhe **apākaṭaṇāmoti** “selo, kūṭadanto”¹ti-ādinā anabhiññāto. **Yena vā kāraṇenā**ti hetumhi idaṃ karaṇavacanam. Hetu-attho hi kiriyākāraṇam, na karaṇam viya kiriyattho, tasmā nānappakāraguṇavisesādhigamatthā idha upasaṅkamanakiriyāti “annena vasati, ajjhenena vasati”¹ti-ādīsu viya hetu-atthamevetam karaṇavacanam yuttam, na karaṇattham tassa ayujjamānattāti vuttam “yena vā kāraṇenā”¹ti. Avibhāgato satatam pavattitaniratisayasāduvipulāmatarasasaddhammaphalatāya sādupalaniccaphalitamahārukkheṇa bhagavā upamito. Sādupalūpabhogādhippāyaggahaṇeneva hi rukkhassa sādupalatā gahitāti. **Upasaṅkamī**ti upasaṅkanto. Sampattakāmātāya hi kiñci ṭhānam gacchanto taṃtaṃpadesātikkamanena upasaṅkami, upasaṅkantoti ca vattabbatam labhati. Tenāha “**gatoti vuttam hoti**”¹ti, upagatoti attho. **Upasaṅkamivāti** pubbakālakiriyānidhesoti āha “**upasaṅkamanapariyosānadīpanan**”¹ti. **Tatoti** yaṃ ṭhānam patto “upasaṅkamī”¹ti vutto, tato upagataṭṭhānato.

Yathā khamanīyādīni pucchantoti yathā bhagavā “kacci te brāhmaṇa khamanīyam, kacci yāpanīyan”¹ti-ādinā khamanīyādīni pucchanto tena brāhmaṇeṇa saddhim samappavattamodo ahosi pubbhāsītāya, evam sopi brāhmaṇo tadanukaraṇeṇa bhagavatā saddhim samappavattamodo ahosīti yojanā. Tam pana samappavattamodatam upamāya dassetuṃ “**sītodakam viyā**”¹ti-ādi vuttam. Tattha **sammoditanti** saṃsanditam. **Ekībhāvanti** sammodanakiriyāya samānatam. **Khamanīyanti** “idaṃ catucakkaṃ navadvāram sarīrayantam dukkhabahulatāya sabhāvato dussaham, kacci khamitum

1. Vi 4. 212 piṭṭhe.

sakkuṇeyyan”ti pucchati. **Yāpanīyanti** āhārādippaṭibaddhavuttikaṃ cirappabandhasaṅkhātāya yāpanāya **kacci** yāpetuṃ sakkuṇeyyaṃ. Sīsarogādi-ābādhābhāvena **kacci appābādham**. Dukkhaḥīvikābhāvena **kacci appātākaṃ**. Taṃtaṃkiccakaraṇe uṭṭhānasukhatāya **kacci lahuṭṭhānaṃ**. Tadanurūpabalayogato **kacci balaṃ**. Sukhavihārasambhavana **kacci phāsuvihāro** atthīti sabbattha kacci-saddaṃ yojetvā attho veditabbo.

Balappattā pīti **pītiyeva**. Taruṇapīti **pāmojjaṃ**. Sammodaṃ janeti karotīti sammodanikaṃ, tadeva **sammodanīyaṃ**. Sammoditabbato sammodanīyanti imaṃ pana atthaṃ dassetuṃ “**sammodituṃ yuttabhāvato**”ti āha. **Saritabbabhāvato**ti anussaritabbabhāvato. “Saraṇīyan”ti vattabbe dīghaṃ katvā “**sāraṇīyan**”ti vuttaṃ. **Suyyamānasukhatoti** āpāthagatamadhurataṃ āha, **anussariyamānasukhatoti** vimaddaramaṇīyataṃ. **Byañjanaparisuddhatāyāti** sabhāvaniruttibhāvena tassā kathāya vacanacāturiamāha. **Atthaparisuddhatāyāti** atthassa nirupakkilesataṃ. **Anekehi pariyāyehīti** anekehi kāraṇehi.

Abhidūra-accāsannappaṭikkhepena nātidūraṃ naccāsannaṃ nāma gahitaṃ, taṃ pana avakaṃsato ubhinnaṃ pasāritahatthāsamaṅghaṭṭanena daṭṭhabbaṃ. **Gīvaṃ pasāretvāti** gīvaṃ parivaṭṭanavasena pasāretvā.

Etadavocāti etaṃ “ko nu kho bhante hetū”ti-ādipucchāvacaṇaṃ avoca. Teneva “etadavocā”ti padaṃ uddharitvā **duvidhā hi pucchāti**-ādinā pucchāvibhāgaṃ dasseti. Tattha agāre niyutto agāriko, tassa pucchā **agārikapucchā**. Agārikato añño anagāriko pabbajjūpagato, tassa pucchā **anagārikapucchā**. Kiñcāpi aññattha “janako hetu, paggāhako paccayo. Assādhāraṇo hetu, sādāraṇo paccayo. Sabhāgo hetu, asabhāgo paccayo. Pubbakāliko hetu, sahapavatto paccayo”ti-ādinā hetupaccaya vibhajja vuccanti, idha pana “cattāro kho bhikkhave mahābhūtā hetucattāro mahābhūtā paccayo rūpakkhandhassa paññāpanāyā”ti-ādīsu¹viya hetupaccayasaddā samānatthāti dassento “**ubhayampetaṃ kāraṇavevacanamevā**”ti āha. **Visamacariyāti** bhāvanapūmsakaniddeso.

1. Ma 3. 67 piṭṭhe.

Abhikkantāti atikkantā, vigatāti atthoti āha “**khaye dissatī**”ti. Tathā hi “nikkhanto paṭhamo yāmo”ti upari vuttaṃ. **Abhikkantataroti** ativiya kantataro manoramo, tādiso ca sundaro bhaddako nāma hoṭīti āha “**sundare dissatī**”ti. **Koti** devanāgayakkhagandhabbādīsu ko katamo. **Meti** mama. **Pādānī**ti pāde. **Iddhiyāti** imāya evarūpāya deviddhiyā. **Yasasāti** iminā edisena parivārena paricchena ca. **Jalanti** vijjotamāno. **Abhikkantenāti** ativiya kantena kamanīyena abhirūpena. **Vaṇṇenāti** chavivaṇṇena sarīravaṇṇanibhāya. **Sabbā obhāsayaṃ disāti** dasa disā pabhāsento, cando viya sūriyo viya ca ekobhāsam ekālokaṃ karontoti gāthāya attho. **Abhirūpeti** uḷārarūpe sampannarūpe.

“Coro coro, sappo sappo”ti-ādīsu **bhaye āmeditaṃ**. “Vijjha vijjha, pahara paharā”ti-ādīsu **kodhe**. “Sādhu sādhu”ti-ādīsu¹ **pasamsāyaṃ**. “Gaccha gaccha, lunāhi lunāhi”ti-ādīsu **turite**. “Āgaccha āgacchā”ti-ādīsu **koṭūhale**. “Buddho buddhoti cintento”ti-ādīsu² **acchare**. “Abhikkamathāyasmanto, abhikkamathāyasmanto”ti-ādīsu **hāse**. “Kahaṃ ekaputtaka, kahaṃ ekaputtakā”ti-ādīsu³ **soke**. “Aho sukhaṃ aho sukhan”ti-ādīsu⁴ **pasāde**. **Ca**-saddo avuttasamuccayatto. Tena garahā-asammānādīnaṃ saṅgaho daṭṭhabbo. Tattha “pāpo pāpo”ti-ādīsu **garahāyaṃ**. “Abhirūpaka abhirūpakā”ti-ādīsu **asammāne** daṭṭhabbaṃ.

Nayidaṃ āmedītavasena dvikkhattuṃ vuttaṃ, atha kho atthadvayavasenāti dassento “**atha vā**”ti-ādīmāha. “Abhikkantaṃ”ti vacanaṃ apekkhitvā napuṃsakavasena vuttaṃ, taṃ pana bhagavato vacanaṃ dhammassa desanāti katvā tathā vuttaṃ “**bhoto gotamassa dhammadesanā**”ti. Dutiyapadepe eseva nayo. **Dosanāsanatoti** rāgādikilesavidhamanato. **Guṇādhigamanatoti** sīlādiguṇānaṃ sampāpanato. Ye guṇe desanā adhigameti, tesu padhānabhūte tāva dassetuṃ “**saddhājananato paññājananato**”ti vuttaṃ. Saddhāpamukhā hi lokiyā guṇā, paññāpamukhā

1. Ma 1. 267; Saṃ 1. 389; Saṃ 2. 29; Saṃ 3. 374 piṭṭhesu.

2. Khu 4. 310 piṭṭhe.

3. Ma 2. 309; Saṃ 1. 323 piṭṭhesu.

4. Khu 1. 98 99; Dī 3. 183; Vi 4. 339, 340 piṭṭhesu.

lokuttarā. Sīlādi-atthasampattiyā **sāthato**, sabhāvaniruttisampattiyā **sabyañjanato**. Suviññeyyasaddappayogatāya **uttānapadato**, saṅhasukhumabhāvena duviññeyyatthātāya **gambhīratthato**. Siniddhamudumadhurasaddappayogatāya **kaṇṇasukhato**, vipulavisuddha pemaṇiyatthātāya **hadayaṅgamato**. Mānātimānavidhamanena **anattukkaṃsanato**, thambhasārambhanimmaddanena **aparavambhanato**. Hitādhippāyappavattiyā paresaṃ rāgapariḷhādivūpasamanena **karuṇāsītalato**, kilesandhakāraavidhamanena **paññāvadātato**. Karavīkarutamañjutāya **āpātharamaṇīyato**, pubbāparāvīruddha-suvisuddhatthātāya **vimaddakkhamato**. Āpātharamaṇīyatāya eva **suyyamānasukhato**, vimaddakkhamatāya hitajjhāsayappavattitatāya ca **vīmaṃsiyamānahitato**. **Evamādīhīti ādi-**saddena saṃsāracakkani-vattanato, saddhammacakkappavattanato, micchāvādavigamanato, sammāvādapatitthāpanato, akusalamūlasamuddharaṇato, kusalamūlasaṃropanato, apāyadvārapidhānato, saggamokkhadvāravaraṇato, pariyuṭṭhānavūpasamanato anusayasamugghātanatoti evamādīnaṃ saṅgaho daṭṭhabbo.

Adhomukhaṭṭhapitanti kenaci adhomukhaṃ ṭhapitaṃ. **Heṭṭhāmukhajātanti** sabhāveneva heṭṭhāmujotaṃ. **Uparimukhanti** uddhammukhaṃ. **Ugghāṭeyyāti** vivaṭaṃ kareyya. **Hatthe gahetvāti** “puratthābhimukho uttarābhimukho vā gacchā”ti-ādīni avatvā hatthe gahetvā “nissandehaṃ esa maggo, evaṃ gaccheyyā”ti vadeyya. **Kāḷapakkhacātuddasīti** kāḷapakkhe cātuddasī.

Nikkujjitaṃ ādheyyassa anādhārabhūtaṃ bhājanaṃ ādhārabhāvāpādanavasena **ukkujeyya**. Heṭṭhāmukhajātātāya **saddhammavimukhaṃ**, adhomukhaṭṭhapitātāya **asaddhamme patitanti** evaṃ padadvayaṃ yathārahaṃ yojetabbaṃ, na yathā saṅkhyāṃ. Kāmaṃ kāmacchandādayopi paṭicchādakā nīvaraṇabhāvato, micchā diṭṭhi pana savisesaṃ paṭicchādikā satte micchābhinivesanavasenaṭi āha “**micchādiṭṭhigahanapaṭicchannaṃ**”ti. Tenāha bhagavā “micchādiṭṭhiparamāhaṃ bhikkhave vajjaṃ vadāmi”ti¹. Sabbo apāyagāmi maggo **kummaggo** “kucchito maggo”ti katvā. Sammādiṭṭhi-ādīnaṃ ujupaṭipakkhatāya micchādiṭṭhi-ādāyo aṭṭha micchattadhammā **micchāmaggo**. Teneva hi tadubhayappaṭipakkhataṃ sandhāya “**saggamokkhamaggaṃ āvikarontenā**”ti vuttaṃ. Sappi-ādisannissayo

1. Am 1. 35 piṭṭhe.

padīpo na tathā ujjalo, yathā telasannissayoti **telapajjota**ggahaṇaṃ. **Etehi pariyāyehīti** etehi nikkujjitukkujjanappaṭicchannavivaraṇādi-upamopamitabbākārehi.

Pasannakāraṇanti pasannehi kātabbaṃ sakkāraṃ. **Saraṇanti** paṭisaraṇaṃ. Tenāha “**parāyaṇaṇ**”ti. Parāyaṇabhāvo ca anathanisedhanena atthasampañipādanena ca hotīti āha “**aghassa tātā hitassa ca vidhātā**”ti. **Aghassāti** dukkhatoti vadanti, pāpatoti pana attho yutto. Nissakke cetam sāmivacanaṃ. Ettha ca nāyaṃ gami-saddo nī-saddādayo viya dvikammako, tasmā yathā “ajamā gāmaṃ netī”ti vuccati, evaṃ “bhagavantaṃ saraṇaṃ gacchāmi”ti vattum na sakkā. “Saraṇanti gacchāmi”ti pana vattabbaṃ. Iti-saddo cettha luttaniddiṭṭho. Tassacāyamattho—gamanaṅca tadadhippāyena bhajanaṃ jānanaṃ vāti dassento “**iti iminā adhippāyena**”ti-ādīmāha. Tattha **bhajāmīti**-ādīsu purimassa purimassa pacchimaṃ pacchimaṃ atthavacanaṃ. **Bhajanaṃ** vā saraṇādhippāyena upasaṅkamaṇaṃ. **Sevanaṃ** santikāvaccarātā. **Payirupāsanaṃ** vattappaṭivattakaraṇena upaṭṭhānanti evaṃ sabbathāpi anaññasaraṇataṃyeva dīpeti. “Gacchāmi”ti padassa bujjhāmīti ayamattho kathaṃ labbhatīti āha “**yesaṃ hī**”ti-ādi.

Adhigatamagge sacchikatanirodheti padadvayenapi phalaṭṭhā eva dassitā, na maggaṭṭhāti te dassento “**yathānusiṭṭhaṃ paṭipajjamāne cā**”ti āha. Nanu ca kalyāṇaputhujjanopi yathānusiṭṭhaṃ paṭipajjatīti vuccatīti? Kiñcāpi vuccati, nippariyāyena pana maggaṭṭhā eva tathā vattabbā, na itare sampattaniyāmokkamaṇābhāvato. Tathā hi te eva vuttā “**apāyesu apatamāne dhāretī**”ti. Sammattaniyāmokkamaṇena hi apāyavinimuttisambhavo. **Akkhāyatīti** ettha **iti**-saddo ādyattho, pakārattho vā. Tena “yāvata bhikkhave dhammā saṅkhatā vā asaṅkhatā vā, virāgo tesam āggamakkhāyatī”ti¹ suttapadaṃ saṅgaṇhāti, “**vitthāro**”ti vā iminā. Ettha ca ariyamaggo niyyānikatāya, nibbānaṃ tassa tadatthasiddhihetutāyāti ubhayameva nippariyāyena dhammoti vutto. Nibbānaṃ hi āramaṇapaccayabhūtaṃ labhitvā ariyamaggo tadatthasiddhiyā saṃvattati, tathāpi yasmā ariyaphalānaṃ “tāya saddhāya avūpasantāyā”ti-ādivacanaṭo

1. Khu 1. 254; Am 1. 343 piṭṭhesu.

maggena samucchinnānaṃ kilesānaṃ paṭippassaddhippahānakiccatāya niyyānānugūṇatāya niyyānapariyosānatāya ca¹. Pariyattidhammassa pana niyyānikadhammasamadhigamahetutāyāti iminā pariyāyena vuttanayena dhammabhāvo labbhati eva. Svāyamattho pāṭhāruḷho evāti dassento “**na kevalan**”ti-ādimāha.

Kāmarāgo bhavarāgoti evamādibhedo sabbopi rāgo virajjati pahiyati etenāti **rāgavirāgoti maggo kathito**. Ejāsāṅkhātāya taṇhāya antonijjhānalakkhaṇassa sokassa ca taduppattiyaṃ sabbaso parikkhīṇattā **anejamasokanti phalaṃ kathitaṃ. Appaṭikūlanti** avirodhadīpanato kenaci aviruddhaṃ, iṭṭhaṃ paṇṭanti vā attho. Paṇṇarūpena pavattitattā, pakaṭṭhaguṇavibhāvanato vā **paṇṇaṃ**. Sabbadhammakhandhā kathitāti yojanā.

Diṭṭhisīlasamghātenāti “yāyaṃ diṭṭhi ariyā niyyānikā niyyāti takkarassa sammā dukkhakkhayāya, tathārūpāya diṭṭhiyā diṭṭhisāmaññagato viharatī”ti² evaṃ vuttāya diṭṭhiyā, “yāni tāni sīlāni akhaṇḍāni acchiddāni asabalāni akammāsāni bhujissāni viññuppasatthāni aparāmaṭṭhāni samādhisaṃvattanikāni, tathārūpehi sīlehi sīlasāmaññagato viharatī”ti³ ca evaṃ vuttānaṃ sīlānaṃca saṃhatabhāvena, diṭṭhisīlasāmaññenāti attho. **Saṃhatoti** ghaṭito, sametoti attho, ariyapuggalā hi yattha katthaci dūre ṭhitāpi attano guṇasāmaggiyā saṃhatā eva. **Aṭṭha ca puggala dhammasā teti** te purisayugavasena cattāropi puggalavasena aṭṭheva ariyadhammassa pacchakkhadassāvitāya dhammasā. Tīṇi vatthūni saraṇanti gamanena tikkhattuṃ gamanena ca **tīṇi saraṇagamanāni. Paṭivedesīti** attano hadayaḡataṃ vācāya pavedesi.

Saraṇagamanassa visayappabhedaphalasaṃkilesabhedānaṃ viya kattuvibhāvanā tattha kosallāya hotīti saraṇagamanesu atthakosallatthaṃ “**saraṇaṃ, saraṇagamaṇaṃ, yo ca saraṇaṃ gacchati, saraṇagamanappabhedo, saraṇagamanaphalaṃ, saṃkilesa, bhedoti ayaṃ vidhi**

1. Niyyānānugūṇatā niyyānapariyosānatā ca (Ka)

2. Dī 3. 204, 237; Ma 1. 397; Ma 3. 39 piṭṭhesu.

3. Dī 3. 203; Ma 3. 397; Ma 3. 39; Am 2. 256; Vi 5. 168 piṭṭhesu.

veditabbo”ti vuttaṃ tena vinā saraṇagamanasseva asambhavato. Kasmā panettha vodānaṃ na gahitaṃ, nanu vodānavibhāvanāpi tattha kosallāya hotīti? Saccametaṃ, taṃ pana saṃkilesaggahaṇena atthato dīpitaṃ hotīti na gahitaṃ. Yāni hi nesam saṃkilesakāraṇāni aññāṇādīni, tesam sabbena sabbaṃ anuppannānaṃ anuppādanena, uppannānaṃca pahānena vodānaṃ hotīti.

Himsatthassa dhātusaddassa vasenetam padaṃ daṭṭhabbanti **“himsatīti saraṇan”**ti vatvā taṃ pana himsanaṃ kesam, katham, kassa vāti codanaṃ sodhento **“saraṇagatānan”**ti-ādimāha. Tattha **bhayanti** vaṭṭabhayaṃ. **Santāsanti** cittutrāsaṃ. Teneva cetasikadukkhassa gahitattā **dukkhanti** kāyikaṃ dukkhaṃ. **Duggatiparikilesanti** duggatipariyāpannaṃ sabbampi dukkhaṃ. Tayidaṃ sabbaṃ parato **phalakathāya**¹ āvi bhavissati. **Etanti** saraṇanti padaṃ. Evaṃ avisesato saraṇasaddassa padatthaṃ dassetvā idāni visesato dassetuṃ **“atha vā”**ti-ādi vuttaṃ. **Hite pavattanenāti** “sampannasīlā bhikkhave viharathā”ti-ādinā² atthe niyojanaena. **Ahitā nivattanenāti** “pāṇātipāhassa kho pāpako vipāko atisamparāyan”ti-ādinā ādinavadassanādimukhena anathato nivattanena. **Bhayaṃ himsatīti** hitāhitesu appavattippavattihetukaṃ byasanaṃ appavattikaraṇena vināseti buddho. **Bhavakantārā uttāraṇena** maggasaṅkhāto dhammo. Itaro assāsādānena sattānaṃ bhayaṃ himsatīti yojanā. **Kārānanti** dānavasena pūjāvasena ca upanītānaṃ sakkārānaṃ. **Vipulaphalappaṭilābhakaraṇena** sattānaṃ bhayaṃ himsati saṅgho anuttaradakkhiṇeyyabhāvatoti adhippāyo. **Imināpi pariyāyenāti** imināpi vibhajitvā vuttana kāraṇena.

“Sammāsambuddho bhagavā, svakkhāto dhammo, suppaṭipanno saṅgho”ti evaṃ pavatto tattha ratanattaye pasādo tappasādo, tadeva ratanattayaṃ garu etassāti taggaru, tabbhāvo taggarutā, tappasādo ca taggarutā ca tappasādataggarutā. Tāhi **tappasādataggarutāhi**. Vidhutadiṭṭhivicikicchāsammoha-assaddhiyāditāya **vihatakilesa**. Tadeva ratanattayaṃ parāyaṇaṃ gati tāṇaṃ leṇanti evaṃ pavattiyā **tapparāyaṇatākārappavatto**

1. Am-Ṭṭha 2. 19 piṭṭhe.

2. Ma 1. 39, 43 piṭṭhesu.

cittuppādo saraṇagamanam saraṇanti gacchati etenāti. **Tamsamaṅgī**ti tena yathāvuttacittuppādena samannāgato. **Evam upeti**ti evam bhajati sevati payirupāsati, evam vā jānāti buj्jhatīti evamattho veditabbo.

Ettha ca pasādaggahaṇena lokiyasaraṇagamanamāha. Tam hi pasādappadhānam¹. Garutāgahaṇena lokuttaram. Ariyā hi ratanattayaguṇābhiññatāya pāsāṇacchattam viya garum katvā passanti, tasmā tappasādena vikkhambhanavasena vihatakilesa, taggarutāya samucchadavasenāti yojetabbam agāravakaraṇahetūnam samucchindanato. Tapparāyaṇatā panettha taggatikatāti tāya catubbidhampi vakkhamānam saraṇagamanam gahitanti daṭṭhabbam. Avisesena vā pasādagarutā jotitāti pasādaggahaṇena aveccappasādassa itarassa ca gahaṇam, tathā garutāgahaṇenāti ubhayenapi ubhayam saraṇagamanam yojetabbam.

Maggakkhaṇe ijjhatīti yojanā. **Nibbānārammaṇam hutvāti** etena atthato catusaccādhigamo eva lokuttarasaraṇagamananti dasseti. Tattha hi nibbānadhammo sacchikiriyābhisamayavasena, maggadhammo bhāvanābhisamayavasena paṭivijjhiyamānoyeva saraṇagamanattam sādheti, buddhaguṇā pana sāvakagocarabhūtā pariññābhisamayavasena, tathā ariyasamhaguṇā. Tenāha “**kiccato sakalepi ratanattaye ijjhatī**”ti. Ijjhantaṅca saheva ijjhati, na lokiyam viya paṭipāṭiyā asammohappaṭivedhena paṭividdhattāti adhippāyo. Ye pana vadanti “na saraṇagamanam nibbānārammaṇam hutvā pavattati, maggassa adhigatattā pana adhigatameva hoti ekaccānam tevijjādīnam lokiyavijjādayo viyā”ti, tesam lokiyameva saraṇagamanam siyā, na lokuttaram, taṅca ayuttam duvidhassapi icchitabbatā.

Tanti lokiyasaraṇagamanam. **Saddhāpaṭilābho** “sammāsambuddho bhagavā”ti-ādinā. **Saddhāmūlikāti** yathāvuttasaddhāpubbaṅgamā. **Sammādiṭṭhi** buddhasubuddhataṃ, dhammasudhammataṃ, samghasuppaṭipattiṅca lokiyāvabodhavaseneva sammāñāyena dassanato. **Saddhāmūlikā ca sammādiṭṭhī**ti etena saddhūpanissayā yathāvuttalakkhāṇā paññā lokiyasaraṇagamananti dasseti. Tenāha “**diṭṭhijukammanti vuccatī**”ti. Diṭṭhiyeva attano paccayehi uju karīyatīti

1. Pasādappadhānam ṅñāṇappadhānam (Ka)

katvā, diṭṭhi vā uju karīyati etenāti **diṭṭhijukammaṃ**, tathāpavatto cittuppādo. Evañca katvā “tapparāyaṇatākārappavatto cittuppādo”ti idañca vacanaṃ samatthitaṃ hoti, saddhāpubbaṅgamasammādiṭṭhiggahaṇaṃ pana cittuppādassa tappadhānatāyāti daṭṭhabbam. **Saddhāpaṭilābhoti** iminā mātādihi ussāhitadārakādīnaṃ viya ñāṇavippayuttaṃ saraṇagamaṇaṃ dasseti, **sammādiṭṭhī**ti iminā ñāṇasampayuttaṃ saraṇagamaṇaṃ.

Tayidaṃ lokiyaṃ saraṇagamaṇaṃ. Attā sanniyyātīyati appīyati pariccajīyati etenāti **attasanniyyātaṇaṃ**, yathāvuttaṃ diṭṭhijukammaṃ. Taṃ ratanattayaṃ parāyaṇaṃ paṭisaraṇaṃ etassāti tapparāyaṇo, puggalo, cittuppādo vā, tassa bhāvo **tapparāyaṇatā**, yathāvuttaṃ diṭṭhijukammameva. Saraṇanti adhippāyena sissabhāvaṃ antevāsikabhāvaṃ upagacchati etenāti **sissabhāvūpagamaṇaṃ**. Saraṇagamaṇādhippāyeneva paṇipatati etenāti **paṇipāto**. Sabbattha yathāvuttadiṭṭhijukammavaseneva attho veditabbo. **Attapariccajananti** saṃsāradukkhanissaraṇatthaṃ attano attabhāvassa pariccajanaṃ. Esa nayo sesesupi. **Buddhādīnaṃyevāti** avadhāraṇaṃ attasanniyyātanādīsupi tattha tattha vattabbaṃ. Evaṃ hi tadaññanivattanaṃ kataṃ hoti.

Evaṃ attasanniyyātanādīni ekena pakārena dassetvā idāni aparehipi pakārehi dassetuṃ “**apicā**”ti-ādi āraddhaṃ. Tena pariyāyantarehipi attasanniyyātaṇaṃ katameva hoti atthassa abhinnattāti dasseti. **Āḷavakādīnanti ādi**-saddena sātāgirihemavatādīnaṃ saṅgho daṭṭhabbo. Nanu cete āḷavakādayo maggeneva āgatasaraṇagamaṇā, kathaṃ tesāṃ tapparāyaṇatāsaraṇagamaṇaṃ vuttanti? Maggenāgatasaraṇagamaṇehipi “so ahaṃ vicarissāmi -pa- sudhammataṃ¹. Te mayaṃ vicarissāma, gāmā gāmaṃ nagā nagaṃ -pa- sudhammatan”ti² ca tehi tapparāyaṇatākārassa paveditattā tathā vuttaṃ.

So panesa ñāti -pa- vasaṇāti ettha ñātivasaṇa, bhayaṇa, ācariyaṇa, dakkhiṇeyyaṇaṇāti paccekaṃ “vasaṇā”ti padaṃ yojetabbaṃ. Tattha **ñātivasaṇāti** ñātibhāvavaṇa. Evaṃ

1. Saṃ 1. 127; Khu 1. 307 piṭṭhesu.

2. Khu 1. 305 piṭṭhe Suttanipāte.

sesesupi. **Dakkhiṇeyyaṇipātenā**ti dakkhiṇeyyatāhetukena ṇipatanenāti attho. **Itarehī**ti nātibhāvādivasappavattehi tīhi ṇipātehi. **Itarehī**-ādinā saṅkhepato vuttamattham vitthārato dassetum “**tasmā**”ti-ādi vuttam. **Vandatī**ti ṇipātassa lakkhaṇavacanam. **Evarūpanti** diṭṭhadhammikam sandhāya vadati. Samparāyikam hi niyyānikam vā aniyyānikam vā anusāsanim paccāsīsanto dakkhiṇeyyaṇipātameva karotīti adhippāyo. **Saraṇagamanappabhedoti** saraṇagamanavibhāgo.

Ariyamaggo eva lokuttaram saraṇagamananti āha “**cattāri sāmāññaphalāni vipākaphalan**”ti. **Sabbadukkhakkhayoti** sakalassa vaṭṭadukkhassa anuppādanirodho. **Etanti** “cattāri ariyasaccāni, sammappaññāya passatī”ti¹ evam vuttam ariyasaccānam dassanam.

Niccato anupagamanādivasenāti niccanti aggahaṇādivasena. **Aṭṭhānanti** hetuppaṭikkhepo. **Anavakāsoti** paccayappaṭikkhepo. Ubhayenapi kāraṇameva paṭikkhipati. **Yanti** yena kāraṇena. **Diṭṭhisampannoti** maggadiṭṭhiyā samannāgato sotāpanno. **Kaṅci saṅkhāranti** catubhūmakesu saṅkhatasaṅkhāresu ekasaṅkhārampi. **Niccato upagaccheyyā**ti niccoti gaṇheyya. **Sukhato upagaccheyyā**ti “ekantasukhī attā hoti arogo param maraṇā”ti² evam attadiṭṭhivasena sukhato gāham sandhāyetaṃ vuttam diṭṭhivippayuttacittena pana ariyasāvako pariḷāhavūpasamanattham mattahatthiparibhāsito viya cokkhabrāhmaṇo ukkārabhūmim kaṅci saṅkhāram sukhato upagacchati. Atthavāre kaṣiṇādipaññattisaṅghattham “saṅkhāran”ti avatvā “**kaṅci dhamman**”ti vuttam. Imesupi ṭhānesu catubhūmakavaseneva paricchedo veditabbo tebhūmakavaseneva vā. Yam yam hi puthujjano gāhavasena gaṇhāti, tato tato ariyasāvako gāham vinivetheti.

Mātaranti-ādīsu janikā **mātā**, janako **pitā**, manussabhūto khīṇāsavo **arahāti** adhippeto. Kim pana ariyasāvako aññam jīvitā voropeyyāti? Etampi aṭṭhānam, puthujjanabhāvassa pana mahāsāvajjabhāvadassanattham ariyabhāvassa ca phaladassanattham evam vuttam. **Paduṭṭhacittoti** vadhakacittena paduṭṭhacitto. **Lohitam uppādeyyāti**

1. Khu 1. 42 piṭṭhe Dhammapade.

2. Dī 1. 29 piṭṭhe.

jīvamānakasarīre khuddakamakkhikāya pivanamattampi lohitaṃ uppādeyya. **Samghaṃ bhindeyyāti** samānasaṃvāsakaṃ samānasīmāyaṃ ṭhitaṃ samghaṃ “kamma uddesena voharanto anussāvanena salākaggāhenā”¹ti evaṃ vuttehi pañcahi kāraṇehi bhindeyya. **Aññaṃ satthāraṃ** aññaṃ titthakaraṃ “ayaṃ me satthā”ti evaṃ gaṇheyyāti **netāṃ ṭhānaṃ vijjatīti** attho.

Na te gamissanti apāyanti te buddhaṃ saraṇaṃ gatā tannimittāṃ apāyaṃ na gamissanti, devakāyaṃ pana paripūressantīti attho. **Dasahi ṭhānehīti** dasahi kāraṇehi. **Adhigaṇhantīti** adhibhavanti.

Velāmasuttādivasenāti ettha “karīsassa catutthabhāgappamāṇanaṃ caturāsītisahassasaṅkhānaṃ suvaṇṇapātirūpiyapātikaṃsapātīnaṃ yathākkamaṃ rūpiyasuvaṇṇahiraññapūrānaṃ sabbālaṅkārapaṭimaṇḍitānaṃ caturāsītiyā hatthisahassānaṃ caturāsītiyā assasahassānaṃ caturāsīkiyā rathasahassānaṃ caturāsītiyā dhenusahassānaṃ caturāsītiyā kaññāsahassānaṃ caturāsītiyā pallaṅkasahassānaṃ caturāsītiyā vatthakoṭisahassānaṃ aparimāṇassa ca khajjabhojjādibhedassa āhārassa pariccajanavasena sattamāsādhikāni satta saṃvaccharāni nirantaraṃ pavattavelāmamahādānato ekassa sotāpannassa dinnadānaṃ mahapphalataraṃ, tato sataṃ sotāpannānaṃ dinnadānato ekassa sakadāgāmino, tato ekassa anāgāmino, tato ekassa arahato, tato ekassa paccakabuddhassa, tato sammāsambuddhassa, tato buddhappamukhassa saṃghassa dinnadānaṃ mahapphalataraṃ, tato cātuddisaṃ saṃghaṃ uddissa viharakaraṇaṃ, tato saraṇagamaṇaṃ mahapphalataraṃ”ti imamatthaṃ pakāsentassa **velāmasuttassa**² vasena. Vuttaṃ hetāṃ “yaṃ gahapati velāmo brāhmaṇo dānaṃ adāsi mahādānaṃ, yo ekaṃ diṭṭhisampannaṃ bhojeyya, idaṃ tato mahapphalataraṃ”ti-ādi³. **Velāmasuttādīti ādi-saddena aggappasādasuttādīnaṃ**⁴ saṅgho daṭṭhabbo.

Aññaṇaṃ vatthuttayassa guṇānaṃ ajānaṇaṃ tattha sammoho, “buddho nu kho, na nu kho”ti-ādīnaṃ vicikicchā **samsayo. Micchāññaṇaṃ** tassa guṇānaṃ aguṇabhavaparikkappaṇena viparītaggāho. **Ādi-saddena**

1. Vi 5. 349 piṭṭhe.

3. Am 3. 196 piṭṭhe.

2. Am 3. 195 piṭṭhe.

4. Am 1. 343; Khu 1. 254 piṭṭhesu.

anādarāgāravadīnaṃ saṅgaho. **Na mahājutikanti** na ujjalaṃ, aparisuddhaṃ apariyodātanti attho. **Na mahāvippahāranti** anuḷāraṃ. **Sāvajjoti** diṭṭhitaṅghādivasena sadoso. Lokiyaṃ saraṇagamaṇaṃ sikkhāsamādānaṃ viya aggahitakālaparicchedaṃ jīvitapariyantameva hoti, tasmā tassa khandhabhedena bhedoti āha “**anavajjo kālakiriyāyā**”ti. **Soti** anavajjo saraṇagamaṇabhedo. Satipi anavajjatte iṭṭhaphalopi na hotīti āha “**aphalo**”ti. **Kasmā? Avipākattā.** Na hi taṃ akusalanti.

Ko upāsakoti sarūpapucchā, tasmā “kiṃ lakkhaṇo upāsako”ti vuttaṃ hoti. **Kasmāti** hetupucchā. Tena kena pavattinimittena upāsakasaddo tasmim puggale niruḷhoti dasseti. Tenāha “**kasmā upāsakoti vuccati**”ti. Saddassa abhidheyye pavattinimitaṃ tadatthassa tabbhāvākāraṇaṃ. **Kimassa sīlanti** kīdisaṃ assa upāsakassa sīlaṃ, kittakena sīlenāyaṃ sīlasampanno nāma hotīti attho **ko ājīvoti** ko assa sammā-ājīvo. So pana micchājīvassa parivajjanena hotīti sopi vibhajīyatīti. **Kā vipattīti** kā sīlassa, ājīvassa vā vipatti. Anantarassa hi vidhi vā paṭisedho vāti. **Kā sampattīti** etthāpi eseva nayo.

Yo kocīti khattiyādīsu yo koci. Tena saraṇagamaṇamevetthakāraṇaṃ, na jāti-ādivisesoti dasseti. **Upāsanatoti** teneva saraṇagamaṇena tattha ca sakkaccakiriyāya ādaragāravabahuṃānādiyogena payirupāsanato. **Veramaṇiyoti** veraṃ vuccati pāṇātipātādidussīlyaṃ, tassa maṇanato hananato vināsanato veramaṇiyo, pañca viratiyo viratippadhānattā tassa sīlassa. Tenevāha “**paṭivirato hotī**”ti.

Micchāvaṇijjāti na sammāvaṇijjā ayuttavaṇijjā asāruppavaṇijjā **pahāyāti** akaraṇeneva pajahitvā. **Dhammenāti** dhammato anapetena tena aññampi adhammikaṃ jīvikaṃ paṭikkhipati. **Samenāti** avisamena. Tena kāyavisamādiduccaritaṃ vajjetvā kāyasamādinā sucaritena ājīvaṃ dasseti. **Satthavaṇijjāti** āyudhabhaṇḍaṃ¹ katvā vā kāretvā vā

1. Āvudhabhaṇḍaṃ (Ka)

yathākataṃ vā paṭilabhitvā tassa vikkayo. **Sattavaṇijjā**ti manussavikkayo. **Maṃsavavaṇijjā**ti sūnakārādayo viya migasūkarādike posetvā maṃsaṃ sampādetvā vikkayo. **Majjavavaṇijjā**ti yaṃ kiñci majjaṃ yojetvā tassa vikkayo. **Visavaṇijjā**ti visaṃ yojetvā visaṃ gahetvā vā tassa vikkayo. Tattha satthavaṇijjā paroparodhanimittatāya akaraṇīyā vuttā, sattavaṇijjā abhujjissabhāvakaraṇato, maṃsavavaṇijjā vadhahetuto, majjavavaṇijjā pamādaṭṭhānato.

Tassevāti pañcaveramaṇilakkhaṇassa sīlassa ceva pañcamicchavaṇijjālakkhaṇassa ājīvassa ca. **Vipattī**ti bhedo pakopo ca. **Yāyā**ti yāya paṭipattiyā. **Caṇḍā**loti upāsakacaṇḍālo. **Malanti** upāsakamalaṃ. **Paṭikutṭṭhoti** upāsakanihīno. Buddhādīsu kammakammaphalesu ca saddhāvipariyāyo assaddhiyaṃ micchādhimokkho, yathāguttena assaddhiyena samannāgato **assaddho**. Yathāvuttasīlavipattī-ājīvavipattivasena **dussīlo**, “iminā diṭṭhādīnā idaṃ nāma maṅgalaṃ hotī”ti evaṃ bālajanaparikkappitakotūhalasaṅkhātēna diṭṭhasutamutamaṅgalena samannāgato **kotūhalamaṅgaliko**. **Maṅgalaṃ pacceṭī**ti diṭṭhamaṅgalādibhedāṃ maṅgalameva pattiyāyati. **No kammanti** kammassakataṃ no pattiyāyati. **Iti bahiddhā**ti ito sabbaññubuddhasāsanato bahiddhā bāhirakasamaye. **Dakkhiṇeyyaṃ pariyesatī**ti duppaṭipannaṃ dakkhiṇārahasaṅñī gavesati. **Pubbakāraṃ karotī**ti dānamānanādikaṃ kusalakiriyaṃ paṭhamataraṃ karoti. Ettha ca dakkhiṇeyyapariyesanapubbakāre ekaṃ katvā pañca dhammā veditabbā.

Vipattiyaṃ vuttavipariyāyena **sampatti** veditabbā. Ayaṃ pana vireso—catunnampi parisānaṃ ratijanaṇaṭṭhena upāsakova ratanaṃ **upāsakaratanāṃ**. Guṇasobhākittisaddasugandhatāhi upāsakova padumaṃ **upāsakapadumaṃ**. Tathā **upāsakapuṇḍarīko**.

Ādimhīti ādi-atthe. **Koṭiyanti** pariyantakoṭiyaṃ. **Vihāraggenā**ti ovarakakoṭṭhāseṇa, “imasmīṃ gabbhe vasantānaṃ idaṃ nāma phalaṃ pāpuṇāti”ti-ādīnā taṃ taṃ vasanaṭṭhānakoṭṭhāsenāti attho. **Ajjatanti** ajja icceva attho¹.

1. Ajjatagganti vā ajjadagganti vā ajja icceva attho (Ka)

Pāṇehi upetanti iminā tassa saraṇagamanassa āpāṇakoṭikataṃ dassento “**yāva me jīvitam pavattati**”ti-ādīni vatvā puna jīvitenapi taṃ vatthuttayaṃ paṭipūjento saraṇagamanam rakkhāmīti uppannam tassa brāhmaṇassa adhippāyaṃ vibhāvento “**ahañhi**”ti-ādimāha. **Pāṇehi upetanti** hi yāva me pāṇā dharanti, tāva saraṇam upetaṃ. Upento ca na vācāmattena na ekavāram cittuppādamattena, atha kho pāṇānam pariccajanavasenaṃ yāvajīvaṃ upetanti evamettha attho veditabbo.

17-19. Sattame **jāṇussoṇīti** netam tassa mātāpitūhi kataṃ nāmaṃ, apica kho ṭhānantarappaṭilābhaladdhanti dassento āha “**jāṇussoṇīti ṭhānantaram kirā**”ti-ādi. **Ekam ṭhānantaranti** ekam purohitaṭṭhanam. Uṇhīsa-ādikakudhabhaṇḍehi saddhim laddham tathā cassa raññā dinnanti vadanti. Tenāha “**rañño santike ca laddhajāṇussoṇisakkārattā**”ti. Sesamettha uttānameva. Aṭṭhamanavamesu natthi vattabbaṃ.

20-21. Dasame **dinnikkhittanti** duṭṭhu nikkhittam padapaccābhaṭṭham katvā manasiṭhapitam. Pajjati ñāyati attho etenāti **padam**, attham byañjayati pakāsetīti **byañjanam**, padameva. Tenevāha “**uppaṭipāṭiyā -pa- byañjananti vuccati**”ti. Padasamudāyabyatirekena visum pāḷi nāma natthīti āha “**ubhayametam pāḷiyāva nāman**”ti. Pakaṭṭhānam hi vacanappabandhānam āḷiyeva pāḷīti vuccati. Sesamettha ekādasamaṃ ca uttānatthameva.

Adhikaraṇavaggavaṇṇanā niṭṭhitā.

3. Bālavaggavaṇṇanā

22-24. Tatiyassa paṭhamadutiyatatiyāni uttānatthāneva.

25. Catutthe **netabboti** aññato āharitvā bodhetabbo, ñāpetabboti attho.

27. Chaṭṭhe **no cepi paṭicchādetvā karontīti** pāṇātipātādīni karonto sacepi appaṭicchādetvā karonti. **Paṭicchanamevāti** viññūhi

garahitabbabhāvato paṭicchādanārahattā paṭicchannamevāti vuccati. Avīci-
ādayo padesavisesā tatthūpapannā sattā ca nirayaggahaṇena gahitāti āha
“**nirayoti saḥokāsakā khandhā**”ti. Tiracchānayoni nāma visum padesaviseso
natthīti āha “**tiracchānayoniyaṃ khandhāva labbhanti**”ti.

31. Dasame attho phalaṃ tadadhīnavuttitāya vaso etassāti **athvaso**,
hetūti āha “**athvaseti kāraṇāni**”ti. **Araññavanapatthāni**
araññalakkhaṇappattāni vanapatthāni. Vanapattha-saddo hi saṇḍabhūte
rukkhasamūhepi vattatīti araññaggahaṇaṃ. Vanīyati vivekakāmehi bhajīyati,
vanute vā te attasampattiyā vasanattāya yācanto viya hotīti vanam,
paṭiṭṭhahanti ettha vivekakāmā yathādhīppetavisesādhigamenāti pattham,
vanesu pattham gahanaṭṭhāne senāsanam **vanapattham**. **Kiñcāpīti**
anujānanasambhāvanatthe nipāto. Kim anujānāti? Nippariyāyato
araññabhāvaṃ gāmato bahi araññanti. Tenāha “**nippariyāyenā**”ti-ādi. Kim
sambhāveti? Araññakaṅganipphādakattam. Yam hi
āraññakaṅganipphādakam, tam visesato araññanti vattabbanti. Tenāha “**yaṃ**
taṃ pañcadhanusatikan”ti-ādi. **Nikkhamitvā bahi indakhīlāti** indakhīlato
bahi nikkhamitvā, tato bahi paṭṭhāyāti attho. **Bahi indakhīlāti** vā yattha dve
tīṇi indakhīlāni, tattha bahiddhā indakhīlato paṭṭhāya. Yattha taṃ natthi,
tadarahaṭṭhānato paṭṭhāyāti vadanti. **Gāmantanti** gāmasamīpaṃ.
Anupacāraṭṭhānanti niccakiccavasena na upacaritabbaṭṭhānam. Tenāha
“**yattha na kasīyati na vapīyati**”ti.

Attano ca diṭṭhadhammasukhavihāranti etena satthā attano
vivekābhiratiṃ pakāseti. Tattha diṭṭhadhammo nāma ayaṃ paccakkho
attabhāvo, sukhavihāro nāma catunnam iriyāpathavihārānam phāsutā.
Ekakassa hi araññe antamaso uccārapassāvakkiccam upādāya sabbe
iriyāpathā phāsukā honti, tasmā diṭṭhadhamme sukhavihāram
diṭṭhadhammasukhavihāranti evaṃ vā ettha attho daṭṭhabbo.

Pacchimañca janataṃ anukampamānoti kathaṃ araññavāsena pacchimā
janatā anukampitā hoti? Saddhāpabbajitā hi kulaputtā bhagavato

araññavāsaṃ disvā “bhagavāpi nāma araññasenāsanāni na muñcati, yassa nevatthi pariññātabbaṃ na pahātabbaṃ na bhāvetabbaṃ na sacchikātabbaṃ, kimaṅgaṃ pana mayan”ti cintetvā tattha vasitabbameva maññissanti, evaṃ khippameva dukkhassantakarā bhavissanti. Evaṃ pacchimā janatā anukampitā hoti. Etamatthaṃ dassento āha “**pacchime mama sāvake anukampanto**”ti.

32. Ekādasame vijjam bhajantīti **vijjābhāgiyā**, vijjābhāge vijjakoṭṭhāse vattantītipi **vijjābhāgiyā**. **Padam pacchindatīti** maggacittassa patiṭṭham upacchindati, maggacittam patiṭṭhāpetum na detīti attho. **Ubbatṭetvāti** samucchadavasena samūlam uddharitvā. **Aṭṭhasu ṭhānesūti** buddhādīsu aṭṭhasu ṭhānesu. **Rāgassa khayavirāgenāti** rāgassa khayasaṅkhātena virāgena, rāgassa anuppattidhammatāpādanenāti vuttam hoti.

Bālavaggavaṇṇanā niṭṭhitā.

4. Samacittavaggavaṇṇanā

33. Catutthassa paṭhame bhavanti ettha patiṭṭhahantīti bhūmi, asappurisānam bhūmi **asappurisabhūmi**. **Sappurisabhūmiyampi** eseva nayo. Katarā na jānātīti **akataññū**, asamatthasamāsoyam gamakattā “asūriyapassāti”ādīsu viya. Tenāha “**katarā na jānātī**”ti. **Akatavedīti** etthāpi eseva nayo. **Pākaṭam katvā na jānātīti** “idañcidañca mayham iminā katan”ti saṅghamajjhagaṇamajjhādīsu pākaṭam katvā na jānāti, na pakāsetīti vuttam hoti. **Upaṇñātanti** thomanāvasena upagantvā ñātam. Tenāha “**vaṇṇitan**”ti-ādi.

34. Dutiye vassasataparimāṇamāyu assāti **vassasatāyuko**, vassasatāyukattañca vassasatāyukakāle jātasseeva hoti, naññassāti āha “**vassasatāyukakāle jāto**”ti. Vassasatam jīvati silenāti **vassasatajīvī**. **Vassasatanti** ca accantasamyoge upayogavacanam. Tenāha “**sakalam vassasatam jivanto**”ti. Mātāpitūnam mātāva bahūpakāratarāti tassāyeva padhānabhāvena paṭikātabbattā dakkhiṇam aṃsakūṭam vadanti. **Hadayalohitam pāyevāti** khīram

sandhāya vadati. Lohitaṃ hi khīrabhāvena pariṇāmaṃ gacchati. **Tyāssāti** te assa. Sesamettha uttānameva.

35. Tatiye **tenupasaṅkamīti** ettha yenādhippāyena so brāhmaṇo bhagavantam upasaṅkami, taṃ pākātaṃ katvā dassetuṃ “**so hi brāhmaṇo**”ti-ādimāha. **Virajjhanapañhanti** yaṃ pañhaṃ puṭṭho virajjhivā kathesi, aviparītaṃ katvā sampādetuṃ na sakkoti, tādisaṃ pañhanti attho. **Ubhatokoṭikaṃ pañhanti** utohi koṭhi yuttaṃ pañhaṃ. “Kimvādī bhavaṃ gotamo”ti hi puṭṭho “kiriyaṇādimhī”ti vā vadeyya “akiriyaṇādimhī”ti vā, tasmā imassa pañhassa vissajjane “kiriyaṇādimhī”ti ekā koṭi “akiriyaṇādimhī”ti dutiyāti koṭidvayayutto ayaṃ paṇho. **Uggilitunti** dve koṭiyo mocetvā kathetuṃ asakkonto bahi nīharituṃ atthato apanetuṃ na sakkhissati. Dve koṭiyo mocento hi taṃ bahi nīharati nāma. **Niggilitunti** pucchāya dosaṃ datvā hāretuṃ asakkonto pavesetuṃ na sakkhissati. Tattha dosaṃ datvā hārento hi gilitvā viya adassanaṃ gamento paveseti nāma. **Kimladdhikoti** kimdiṭṭhiko. Vadanti etenāti vādo, diṭṭhi. Ko vādo etassāti **kimvādī**. **Kimakkhāyīti** kimabhiddhāyī, kīdisī dhammakathā. Tenāha **kimnāma -pa- pucchati**”ti. Sesamettha uttānameva.

36. Catutthe dakkhiṇaṃ arahantīti **dakkhiṇeyyā**. Āhunaṃ vuccati dānaṃ, taṃ arahantīti **āhuneyyā**.

37. Pañcame kathamayaṃ migāramātā nāma jātāti āha “**sā hī**”ti-ādi. **Sabbajeṭṭhakassa puttassāti** attano puttesu sabbapaṭṭhamam jātassa puttassa. **Ayyakasetṭhinova samānanāmakattāti** migāraseṭṭhinā eva sadisaṇāmakattā. Tassā kira sabbajeṭṭhassa puttassa nāmaggaṇadivase ayyakassa migāraseṭṭhisseva nāmaṃ akaṃsu. **Anibaddhavāso hutvāti** ekasmiṃyeva vihāre nibaddhavāso ahutvā. **Dhuvaparibhogānīti** niyataparibhogāni. Nanu bhagavā kadāci cārikampi pakkamati, kathaṃ tāni senāsanāni dhuvaparibhogena paribhuñjīti āha “**utuvassaṃ cārikaṃ caritvāpī**”ti-ādi. Tattha **utuvassanti** hemantagimhe sandhāya vadati. **Maggam ṭhapetvāti** therassa āgamanamaggaṃ ṭhapetvā. **Uṇhavalāhakāti**

uṇha-utuno paccayabhūtameghamālāsamuṭṭhāpakā devaputtā. Tesam kira tathācittuppadasamakālemeva yathicchitam ṭhānam uṇham pharamānā valāhakamālā nātibahalā ito cito nataṃ chādentī vidhāvati. Esa nayo **sītavalāhakavassavalāhakāsu. Abbhavalāhakā** pana devatā sītuṇhavasseyhi vinā kevalam abbhapaṭalasseva samuṭṭhāpakā veditabbā, kevalam vā vātasseeva. Teneva devatā vātavalāhakā.

Ettha ca yaṃ vassāne ca sisire ca abbhāṃ uppajjati, taṃ utusamuṭṭhānam pākatikameva. Yaṃ pana abbhāmiyeva ati-abbhāṃ sattāhampi candasūriye chādetvā ekandhakāram karoti, yañca cittavesākhamāsesu abbhāṃ, taṃ devatānubhāvena uppannaṃ abbhanti veditabbaṃ. Yo ca tasmim tasmim utumhi uttaradakkhiṇādīpakativāto hoti, ayaṃ utusamuṭṭhāno. Vātepi vanarukkakkhandhādīpadālano ativāto nāma atthi, ayañceva, yo ca aññopi akālavāto, ayañca devatānubhāvena nibbatto. Yaṃ gimhāne uṇham, taṃ utusamuṭṭhānikaṃ pākatikameva. Yaṃ pana uṇhepi ati-uṇham sītakāle ca uppannaṃ uṇham, taṃ devatānubhāvena nibbattaṃ. Yaṃ vassāne ca hemante ca sītam hoti, taṃ utusamuṭṭhānameva. Yaṃ pana sītepi atīsītam, gimhe ca uppannaṃ sītam, taṃ devatānubhāvena nibbattaṃ. Yaṃ vassike cattāro māsē vassaṃ, taṃ utusamuṭṭhānameva, yaṃ pana vasseyeva ativassaṃ, yañca cittavesākhamāsesu vassaṃ, taṃ devatānubhāvena nibbattaṃ.

Tatridaṃ vatthu—eko kira vassavalāhakadevaputto tagarakūṭavāsikhīṇāsavattherassa santikaṃ gantvā vanditvā aṭṭhāsi. Thero “kosi tvan”ti pucchi. Ahaṃ bhante vassavalāhako devaputtoti. Tumhākaṃ kira cittaṃ devo vassatīti. Āma bhanteti. Passitukāmā mayanti. Temissatha bhanteti. Meghasīsaṃ vā gajjitaṃ vā na paññāyati, kathaṃ temissāmāti. Bhante amhākaṃ cittaṃ devo vassati, tumhe paṇṇasālaṃ pavisathāti. Sādhu devaputtāti pāde dhovivā paṇṇasālaṃ pāvisi. Devaputto tasmim pavisanteyeva ekaṃ gītaṃ gāyivā hatthaṃ ukkhipi, samantā tīyojanaṭṭhānaṃ ekameghaṃ ahosi. Thero aḍḍhatinto paṇṇasālaṃ pavitṭhoti.

Kāmaṃ heṭṭhā vuttāpi devatā cātumahārājikāva, tā pana tana tena viśesena vatvā idāni tadaññe paṭhamabhūmike kāmācaradeve sāmāññato gaṇhanto “**cātumahārājikā**”ti āha. Dhataratṭhavirūḷhakavirūpakkhakuverasaṅkhātā cattāro mahārājāno etesanti **cātumahārājikā**, te sinerussa pabbatassa vemajjhe hontī. Tesu pabbataṭṭhakāpi atthi ākāsaṭṭhakāpi. Tesam paramparā cakkavāḷapabbataṃ pattā. Khiḍḍāpadosikā manopadosikā candimā devaputto sūriyo devaputtoti ete sabbepi cātumahārājikadevalokaṭṭhā eva.

Tāvatiṃsāti tāvatiṃsanaṃ devānaṃ nāmaṃ, tepi atthi pabbataṭṭhakā, atthi ākāsaṭṭhakā, tesam paramparā cakkavāḷapabbataṃ pattā. Tathā **yāmādīnaṃ**. Ekadevalokepi hi devānaṃ paramparā cakkavāḷapabbataṃ appattā nāma natthi. Tattha maghena māṇavena saddhiṃ macalagāme kālaṃ katvā tettiṃsa sahapuññakārino ettha nibbattāti taṃ saha-caritaṃ ṭhānaṃ tettiṃsaṃ, tadeva tāvatiṃsaṃ, taṃ nivāso etesanti tāvatiṃsāti vadanti. Yasmā pana sesacakkavāḷesupi chakāmāvacaradevalokā atthi. Vuttampi cetam “sahassaṃ cātumahārājikānaṃ sahasaṃ tāvatiṃsānaṃ”ti¹. Tasmā nāmapaṇṇattiyeesā tassa devalokassāti veditabbā. Dukkato yātā apayātāti **yāmā**. Attano sirisampattiyā tusaṃ itā gatāti **tusitā**. Nimmāne rati etesanti **nimmānaratino**. **Vasavattī devatāti** paranimmitavasavattino devā. Paranimmitesu bhogesu vasaṃ vattenti **paranimmitavasavattino**.

Brūhito parivuddho tehi tehi jhānādīhi viṣiṭṭhehi guṇehīti brahmā, vaṇṇavantatāya ceva dīghāyukatāya ca brahmapārisajjādīhi mahanto brahmāti **mahābrahmā**. Tassa parisāyaṃ bhavā paricārikāti **brahmapārisajjā**. Tasseva purohitaṭṭhāne ṭhitāti **brahmapurohitā**. Ābhassarehi parittā ābhā etesanti **parittābhā**. Appamāṇā ābhā etesanti **appamāṇābhā**. Dīpikāya acci viya etesaṃ sarīrato ābhā chijjivā chijjivā patantī viya sarati vissaratīti **ābhassarā**, yathāvuttappabhāya ābhāsanasilā vā **ābhassarā**. **Subhāti** sobhanā pabhā. **Subhāti** hi ekagghanā niccalā sarīrābhā

1. Am 1. 228 piṭṭhe.

vuccati, sā parittā subhā etesanti **parittasubhā**. Appamāṇā subhā etesanti **appamāṇasubhā**. Subhena okiṇṇā vikiṇṇā, subhena sarīrappabhāvaṇṇena ekagghanā suvaṇṇamañjūsāya ṭhapitasampajjalitakañcanapiṇḍasassirikāti **subhakiṇṇā**. Tattha sobhanāya pabhāya kiṇṇā subhakiṇṇāti vattabbe bhā-saddassa rassattam antimaṇa-kārassa hakārañca katvā “**subhakiṇhā**”ti vuttam. Vipulaphalā **vehapphalā**. **Vipulaphalāti** ca vipulasantasukhavaṇṇādīphalā. Appakena kālena attano ṭhānam na vijahantīti **avihā**. Kenaci na tapanīyāti **atappā**. Akicchena sukkena passitabbā manuññarūpatāyāti **sudassā**. Suparisuddhadassanatāya sammā passanti sīlenāti **sudassī**. Ukkaṭṭhasampattīhi yogato natthi etesaṃ kaniṭṭhā sampattīti **akaniṭṭhā**.

Kāyasakkhīhīti nāmakāyena desanāya sampaṭicchana vasena sakkhibhūtehi. **Halāhalanti** kolāhalaṃ. **Mahaggatacittenti** catutthajjhānapādakena abhiññācittena.

Nanu ca “ajjhantanti kāmabhavo, bahiddhāti rūpārūpabhavo”ti ca ayuttametaṃ. Yasmiṃ hi bhava sattā bahutaraṃ kālaṃ vasanti, so nesaṃ ajjhantaṃ. Yasmiñca appataraṃ kālaṃ vasanti, so nesaṃ bahiddhāti vuttam yuttaṃ. Rūpārūpabhavo ca sattā cīrataraṃ vasanti, appataraṃ kāmabhavo, tasmā “ajjhantanti kāmabhavo, bahiddhāti rūpārūpabhavo”ti kasmā vuttanti āha “**kiñcāpī**”ti-ādi. **Catutthameva koṭṭhāsanti** vivattaṭṭhāyisaṅkhātāṃ catuttham asaṅkhyeyyakappaṃ. **Itaresūti** samvaṭṭasaṃvaṭṭaṭṭhāyivivaṭṭasaṅkhātesu tīsu asaṅkhyeyyakappesu. **Ālayoti** saṅgo. **Patthanāti** “kathaṃ nāma tatrūpapannā bhavissāmā”ti abhipatthanā. **Abhilāsoti** tatrūpapajjitukāmatā. **Tasmāti-ādinā** yathāvuttamatthaṃ nigameti.

Etthāyaṃ adhippāyo—kassacipi kilesassa avikkhambhitattā kena cipi pakārena vikkhambhanamattenapi avimutto¹ kāmabhavo ajjhattaggahaṇassa attānaṃ adhikicca uddissa pavattaggāhassa visesapaccayoti ajjhantaṃ nāma. Tattha bandhanaṃ ajjhattasaṃyojanaṃ, tena saṃyutto **ajjhattasaṃyojano**. Tabbipariyāyato **bahiddhāsaṃyojanoti**.

1. Adhimutto (Ka)

Chandarāgavaseneva ajjhattasaṃyojanaṃ bahiddhāsaṃyojanañca puggalaṃ dassetvā idāni orambhāgiya-uddhambhāgiyasaṃyojanavasenapi dassetuṃ “**orambhāgiyāni vā**”ti-ādimāha. Oraṃ vuccati kāmadhātu, paṭisandhiyā paccayabhāvena taṃ oraṃ bhajantīti **orambhāgiyāni**. Tattha ca kammunā vipākam sattenā ca dukkham saṃyojentīti **saṃyojanāni**, sakkāyadiṭṭhivicikicchāsīlabbataparāmāsakāmarāgapaṭighā. Uddham vuccati rūpārūpadhātu, vuttanāyentaṃ uddham bhajantīti **uddhambhāgiyāni**, saṃyojanāni. Rūparāgarūparāgamānuddhaccāvijjā. Atha vā orambhāgo vuccati kāmadhātu rūpārūpabhavato heṭṭhābhūtattā, tatrūpapattiyā paccayabhāvato orambhāgassa hitānīti **orambhāgiyāni** yathā “vacchāyogo duhako”ti¹. Uddhambhāgo nāma mahaggatabhāvo, tassa hitāni **uddhambhāgiyāni**. Pādesu baddhapāsāṇo viya pañcorambhāgiyasaṃyojanāni heṭṭhā ākaḍḍhamānākārāni honti. Hatthehi gahitarukkhāsākhā viya pañcuddhambhāgiyasaṃyojanāni upari ākaḍḍhamānākārāni. Yesam hi sakkāyadiṭṭhi-ādīni appahīnāni, te bhavaggepi nibbatte etāni ākaḍḍhitvā kāmabhāveyyeva pārenti, tasmā etāni pañca gacchantam vārenti, gataṃ puna ārenti. Rūparāgādīni pañca gacchantam na vārenti, āgantum pana na denti.

Asamucchīnesu orambhāgiyasaṃyojanesu laddhapaccāyeseu uddhambhāgiyāni saṃyojanāni agaṇanūpagāni hontīti labbhamānānampi puthujjanānam vasena avibhajitvā ariyānam yogavasena vibhajitukāmo “**ubhayampi cetan**”ti-ādimāha. Tattha **vattānissitamahājanassāti** puthujjane sandhāya vadati. **Dvedhā paricchīnoti** kāmasugatirūpārūpabhavavasena dvīhi pakārehi paricchīno.

Vacchakasālopamaṃ uttānatthameva. Opammasaṃsandane pana kassaci kilesassa avikkhambhitattā kathañcīpi avimutto kāmabhāvo ajjhattaggahaṇassa visesapaccāyattā imesaṃ sattānam abhantarattāthena **anto** nāma. Rūpārūpabhāvo tabbipariyāyato **bahi** nāma. Tathā hi yassa orambhāgiyāni saṃyojanāni appahīnāni, so ajjhattasaṃyojano vutto. Yassa tāni pahīnāni, so bahiddhāsaṃyojano, tasmā anto asamucchīndabandhanatāya bahi ca pavattamānabhavaṅgasantānatāya **antobaddho**

1. Vacchiyogo rūpakoti (Ka)

bahisayito nāma. Nirantarappavattabhavaṅgasantānavasena hi sayitagohāro. Kāmaṃ nesaṃ bahibandhanampi asamucchinnaṃ, antobandhanassa pana mūlatāya evaṃ vuttaṃ. Tenāha “**saṃyojanaṃ pana tesāṃ kāmāvacarūpanibaddhamevā**”ti. Iminā nayena sesattayepi attho veditabbo.

Ettāvatā ca kirāti kira-saddo arucisaṃsūcanattho. Tenettha ācariyavādassa attano aruccanabhāvaṃ dīpeti. “Sīlavā”ti anāmaṭṭhavisesasāmaññato sīlasaṅkhepena gahitaṃ, tañca catubbidhanti ācariyatthero “**catupārisuddhisīlaṃ uddisitvā**”ti āha. **Tatthāti** catupārisuddhisīlesu. **Jeṭṭhakasīlanti** padhānasīlaṃ. **Ubhayatthāti** uddesaniddesesu, niddese viya uddesevi pātimokkhasaṃvarova therena vutto “sīlavā”ti vuttattāti adhippāyo. Sīlaggaṇaṃ hi pāliyaṃ pātimokkhasaṃvaravaseneva āgataṃ. Tenāha “**pātimokkhasaṃvaroyevā**”ti-ādi. Tattha avadhāraṇena itaresaṃ tiṇṇaṃ ekadesena pātimokkhanatogadhabhāvaṃ dīpeti. Tathā hi anolokiyolokane ājīvahetu ca sikkhāpadavītikkame gilānapaccayassa apaccavekkhitaparibhoge ca āpatti vihitāti. **Tīṇīti** indriyasaṃvarasīlādīni. **Sīlanti vuttatthānaṃ nāma atthīti** sīlapariyāyena tesāṃ katthaci sutte gahitaṭṭhānaṃ nāma kiṃ atthi yathā “pātimokkhasaṃvaro”ti. Ācariyassa sammudhatāya appaṭikkhipanto upacārena pucchanto viya vadati. Tenāha “**ananujānanto**”ti. **Chadvārarakkhāmattakamevāti** tassa sallahukabhāvamāha cittādhiṭṭhānabhāvamattena paṭipākatikabhāvāpattito. Itaradvayepi eseva nayo. **Paccayūppattimattakanti** phalena hetuṃ dasseti. Uppādanahetukā hi paccayānaṃ uppatti. **Idamatthanti** idaṃ payojanaṃ imassa paccayassa paribhuñjanti adhippāyo. **Nippariyāyenāti** iminā indriyasaṃvarādīni tīṇi padhānassa sīlassa paripālanavasena¹ pavattiyā pariyāyasīlāni nāmāti dasseti. Idāni pātimokkhasaṃvarasseva padhānabhāvaṃ byatirekato anvayato ca upamāya vibhāvetuṃ “**yassā**”ti-ādimāha. Tattha **so** pātimokkhasaṃvaro. **Sesāni** indriyasaṃvarādīni.

1. Paripālanaparisoḍhanavasena (Saṃ-Ṭī 2. 458 piṭṭhe.)

Pātimokkhasaṃvarasaṃvutoti yo hi naṃ pāti rakkhati, taṃ makkheti moceti āpāyikādīhi dukkhehīti pātimokkhanti laddhanāmena sikkhāpadasīlena pihitakāyavacīdvāro. So pana yasmā evaṃbhūto tena samannāgato nāma hoti, tasmā vuttaṃ “**pātimokkhasaṃvarena samannāgato**”ti.

Aparo nayo—kilesānaṃ balavabhāvato, pāpakiriyāya ca sukarabhāvato, puññakiriyāya ca dukkarabhāvato bahukkhattum apāyesu patanasīloti pāti, puthujjano. Aniccatāya vā bhavādīsu kammavegakkhitto ghaṭiyantaṃ viya anavaṭṭhānena paribbhamanato gamanato gamanasīloti pāti, maraṇavasena tamhi tamhi sattanikāye attabhāvassa pātanasiḷo vā pāti, sattasantāno, cittameva vā. Taṃ pātim saṃsāradukkhatto makkhetīti **pātimokkham**. Cittassa hi vimokkhena satto vimuttoti vuccati. Vuttaṃ hi “cittavodānā visujjhantī”ti¹, “anupādāya āsavehi cittaṃ vimuttan”ti² ca.

Atha vā avijjādinā hetunā saṃsāre patati gacchati pavattatīti pāti, “avijjānīvaraṇānaṃ sattānaṃ taṇhāsāmyojanānaṃ sandhāvataṃ saṃsaratānaṃ”ti³ hi vuttaṃ, tassa pātino sattassa taṇhādisaṃkilesattayato makkho etenāti **pātimokkho**. “Kaṇṭhekāḷo”ti-ādīnaṃ viyassa samāsasiddhi veditabbā.

Atha vā pāteti vinipāteti dukkheti pāti, cittaṃ. Vuttaṃ hi—

“Cittena nīyate loko, cittena parikassatī”ti⁴.

Tassa pātino makkho etenāti **pātimokkho**, patati vā etena apāyadukkhe saṃsāradukkhe cāti pāti, taṇhādisaṃkilesa. Vuttaṃ hi—

“Taṇhā janeti purisaṃ⁵, taṇhādutiyo puriso”ti⁶ ca ādi.

Tato pātito makkhoti **pātimokkho**.

1. Saṃ 1. 123 piṭṭhe.

3. Saṃ 1. 387 piṭṭhe.

5. Saṃ 1. 35 piṭṭhe.

2. Vi 3. 24 piṭṭhe.

4. Saṃ 1. 36 piṭṭhe.

6. Khu 1. 201, 268; Am 1. 316 piṭṭhesu.

Atha vā patati etthāti pāti¹, cha ajjhattikabāhirāni āyatanāni. Vuttam hi—

“Chasu loko samuppanno, chasu kubbati santavan”²ti.

Tato cha-ajjhattikabāhirāyatanasaṅkhātato pātito mokkhoti **pātimokkho**.

Atha vā pāto vinipāto assa atthīti pāti, saṃsāro. Tato mokkhoti **pātimokkho**.

Atha vā sabbalokādhipatibhāvato dhammissaro bhagavā “pāti”³ti vuccati, muccati etenāti mokkho, patino mokkho patimokkho tena paññattattāti, patimokkho eva **pātimokkho**. Sabbaguṇānaṃ vā mūlabhāvato uttamaṭṭhena pati ca so yathāvuttaṭṭhena mokkho cāti patimokkho, patimokkho eva **pātimokkho**. Tathā hi vuttam “pātimokkhanti ādimetaṃ mukhametaṃ pamukhametan”³ti vitthāro.

Atha vā pa-iti pakāre, atīti accantatthe nipāto, tasmā pakārehi accantaṃ mokkhetīti **pātimokkho**. Idam hi sīlaṃ sayam tadaṅgavasena, samādhisahitaṃ paññāsahitaṃca vikkhambhanavasena, samucchadavasena ca accantaṃ mokkheti mocetīti **pātimokkho**. Pati pati mokkhoti vā patimokkho, tamhā tamhā vītikkamadosato paccekaṃ mokkhoti attho. Patimokkho eva **pātimokkho**. Mokkho vā nibbānaṃ, tassa mokkhassa patibimbabhūtoti patimokkho. Sīlasamvaro hi sūriyassa aruṇuggamaṇaṃ viya nibbānassa udayabhūto tappaṭibhāgo viya yathārahaṃ kilesanibbāpanato patimokkham, patimokkham yeva **pātimokkham**.

Atha vā mokkham pati vattati, mokkhābhimukhanti vā patimokkham, patimokkhameva **pātimokkhanti** evamettha pātimokkhasaddassa attho veditabbo.

Ācāragocarasaṃpannoti kāyikavācasika-avītikkamasāṅkhātena ācārena, navesiyādigocarātādisāṅkhātena gocarena sampanno,

1. Pātīni (Ka)

2. Sam 1. 38; Khu 1. 304 piṭṭhesu.

3. Vi 3. 141 piṭṭhe.

sampanna-ācāragocaroti attho. **Appamattakesū**ti parittakesu anāpattigamanīyesu. “Dukkaṭadubbhāsitamattesū”ti apare. **Vajjesū**ti gārayhesu. Te pana ekantato akusalasabhāvā hontīti āha “**akusaladhammesū**”ti. **Bhayadassī**ti bhayato dassanasīlo, paramāṇumattampi vajjam sineruppamāṇam viya katvā bhāyanasīlo. **Sammā ādiyitvā**ti sammadeva sakkaccaṃ sabbasova ādiyitvā. **Sikkhāpadesū**ti niddhāraṇe bhummanti samudāyato avayavaniddhāraṇam dassento “**sikkhāpadesu taṃ taṃ sikkhāpadaṃ samādiyitvā sikkhatī**”ti atthamāha, sikkhāpadameva hi samādātabbam sikkhitabbañcāti adhippāyo. **Yaṃ kiñci yikkhāpadesū**ti sikkhakoṭṭhāsesu mūlapaññatti-anupaññattisabbatthapaññattipadesapaññatti-ādibhedam yaṃ kiñci sikkhitabbam. Yaṃ paṭipajjitabbam pūretabbam sīlam, taṃ pana dvārasena duvidhamevāti āha “**kāyikaṃ vā vācasikaṃ vā**”ti. Imasmim atthavikappe **sikkhāpadesū**ti ādhāre bhummaṃ sikkhābhāgesu kāssaci visum aggahaṇato. Tenāha “**taṃ sabban**”ti.

Aññataram devaghaṇanti aññataram devanikāyam. **Āgāmī hotīti** paṭisandhivasena āgamanasīlo hoti. **Āgantāti** etthāpi eseva nayo. **Iminā aṅgenā**ti iminā kāraṇena.

Sukkhavipassako yebhuyyena catudhātuvavattānamukhena kammaṭṭhānābhinivesī hotīti āha “**sukkhavipassakassa dhātukammaṭṭhānikabhikkhuno**”ti. Vuttamevattham sampiṇḍetvā nigamento “**paṭhamena aṅgenā**”ti-ādimāha.

Cittassa sukhumabhāvo idha sukhamattabhāvamāpanna daṭṭhabboti āha “**sabbāpi hi tā**”ti-ādi. **Tantivasenā**ti kevalam tantiṭṭhapanavasena, na pana therassa kassaci maggassa vā phalassa vā uppādanatthāya, nāpi sammāpaṭipattiyam yojanatthāyāti adhippāyo.

38. Chaṭṭhe **mahākaccā**noti gihikāle ujjenirañño purohitaputto abhirūpo dassanīyo pāsādiko suvaṇṇavaṇṇo ca. Varaṇā nāma rukkho, tassa avidūre bhavattā nagarampi varaṇasaddena vuccatīti āha “**varaṇā nāma ekaṃ nagaran**”ti. Dvandapadassa paccekam abhisambandho

hotīti hetusaddaṃ paccekaṃ yojetvā dassento “**kāmarāgābhinivesahetū**”ti-ādimāha. Hetusaddena sambandhe sati yo attho sambhavati, taṃ dassetuṃ “**idaṃ vuttaṃ hoti**”ti-ādimāha. Tattha **kāmarāgena-abhiniviṭṭhattā**ti etena kāmarāgābhinivesahetūti imassa atthaṃ dīpeti, tathā **vinibaddhattā**ti-ādīhi kāmarāgavinibaddhahetūti-ādīnaṃ. **Tato mukhoti** tadabhimukho. **Mānanti** ālhakādimānabhaṇḍaṃ. Sesamettha uttānameva.

39. Sattame **madhurāyanti** uttaramadhurāyaṃ. **Gundāvaneti** kaṇhagundāvane, kālapippalivaneti attho. **Jarājīṇṇeti** jarāya jīṇṇe, na byādhi-ādināṃ vasena jīṇṇasadise nāpi akālikena jarāya abhibhūte. **Vayovuddheti** jīṇṇattā eva cassa vayovuddhippattiyā vuddhena sīlādivuddhiyā. **Jātimahallaketi** jātiyā mahantatāya cirarattatāya mahallake, na bhogaparivārādīhīti attho. **Addhagateti** ettha **addha**-saddo dīghakālavācīti āha “**dīghakāladdhānaṃ atikkante**”ti. **Vayoti** purimapadalopenāyaṃ niddesoti āha “**pacchimavayan**”ti, vassasatassa tatiyakoṭṭhāsasaṅkhātāṃ pacchimavayaṃ anuppatteti attho.

Bhavati ettha phalaṃ tadāyattavuttitāyāti **bhūmi**, kāraṇanti āya “**yena kāraṇenā**”ti-ādī. **Paripakkoti** pariṇato, vuddhibhāvaṃ pattoti attho. **Moghajīṇṇoti** anto thirakaraṇānaṃ dhammānaṃ abhāvena tucchajīṇṇo nāma. Bāladārakopi daharoti vuccatīti tato visesanatthaṃ “**yuvā**”ti vuttaṃ. Atikkantapaṭhamavayā eva sattā sabhāvena palitasirā hontīti paṭhamavaye ṭhitabhāvaṃ dassetuṃ “**susukālakeso**”ti vuttaṃ. **Bhadrenāti** laddhakena. Ekacco hi daharopi samāno kāṇo vā hoti kuṇi-ādināṃ vā aññataro, so na bhadrena yobbanena samannāgato nāma hoti. Yo pana abhirūpo hoti dassanīyo pāsādiko sabbasampattisampanno yaṃ yadeva alaṅkāraparihāraṃ icchati, tena tena alaṅkato devaputto viya carati, ayaṃ bhadrena yobbanena samannāgato nāma hoti. Tenevāha “**yena yobbanena samannāgato**”ti-ādī.

Yamhi saccañca dhammo cāti yamhi puggale soḷasahākārehi paṭividdhattā catubbidhaṃ saccaṃ, ññāṇena sacchikatattā navavidhalokuttarammo ca atthi.

Ahiṃsāti desanāmettamam, yamhi pana catubbidhāpi appamaññābhāvanā atthīti attho. **Sāmsamo damoti** sīlañceva indriyasamvaro ca. **Vantamaloti** maggañāṇena nīhaṭamalo. **Dhīroti** dhitisampanno. **Theroti** so imehi thirabhāvakāraṇehi samannāgatattā theroti pavuccatīti attho.

40. Aṭṭhame “**corā balavanto hontī**”ti padaṃ uddharitvā yehi kāraṇehi te balavanto hontī, tesam sabbhāvaṃ dassento “**pakkhasampannā**”ti-ādimāha. Tattha **nivāsaṭṭhānasampannatā** giriduggādisabbhāvato. **Atiyātunti** anto yātum, gantum pavisitunti attho. Tam pana antopavisanaṃ kenaci kāraṇena bahigatassa hotīti āha “**bahiddhā janapadacārikam caritvā**”ti-ādi. **Niyyātunti** bahi nikkhamitum. Tañca bahinikkhamanaṃ bahiddhākaraṇīye sati sambhavatīti āha “**corā janapadam vilumpantī**”ti-ādi. **Anusaññātunti** anusañcaritum. Sesamettha uttānameva.

41. Navame **micchāpaṭipattādhikaraṇahetū**ti ettha **adhi**-saddo anathakoti āha “**micchāpaṭipattiyā karaṇahetū**”ti. **Na ārādhakoti** na sampādako na paripūrako. **Ñāyati** paṭivijjhanavasena nibbānaṃ gacchatīti **ñāyo**, so eva taṃsamaṅginaṃ vaṭṭadukkhapātato dhāraṇaṭṭhena dhammoti **ñāyo dhammo**, ariyamaggo. So panettha saha vipassanāya adhippetoti āha “**sahavipassanakam maggan**”ti. **Ārādhanam** nāma sāmsiddhi, sā pana yasmā sampādanena paripūraṇena icchitā, tasmā vuttaṃ “**sampādetum pūretun**”ti.

42. Dasame **duggahitehī**ti atthato byañjanato ca duṭṭhu gahitehi, **ūnādhikaviparītapadapaccābhaṭṭhādivasena** vilometvā gahitehīti attho. **Uppaṭipāṭiyā gahitehī**ti idaṃ pana nidassanamattam duggahassa **ūnādhikādivasenapi** sambhavato. Tenevāha “**attano duggahitasuttantānamyeva atthañca pāliñca uttaritaram katvā dassenti**”ti.

Samacittavaggavaṇṇanā niṭṭhitā.

5. Parisavaggavaṇṇanā

43. Pañcamassa paṭhame **uddhaccena samannāgatā**ti akappiye kappiyasaññitāya, kappiye akappiyasaññitāya, avajje vajjasaññitāya, vajje

avajjasaññitāya uddhaccappakatikā. Ye hi vinaye apakatañño
 samkilesavodānīyesu dhammesu na kusalā sakiñcanakārino
 vippaṭisārabahulā, tesam anuppannañca uddhaccaṃ uppajjati, uppannañca
 bhīyyobhāvaṃ vepullaṃ āpajjati. Sārābhāvena tucchattā naḷo viyāti **naḷo**,
 mānoti āha “**unnaḷāti uggatanaḷā**”ti. Tenāha “**uṭṭhitatucchamānā**”ti. Māno hi
 seyyassa seyyoti sadisoti ca pavattiyā visesato tuccho. **Cāpallenā**
 capalabhāvena, taṇhāloluppenāti attho. **Mukhakarā**ti mukhena pharusā,
 pharusavādinoti attho.

Vikiṇṇavācāti viṣaṭavacanā samphappalāpitāya apariyantavacanā.
 Tenāha “**asamvatavacanā**”ti-ādi. **Viṣaṭṭhasatinoti** sativirahitā
 paccayavekallena vijjamānāyapi satiyā satikiccaṃ kātum asammatthāya
 evaṃ vuttā. Na sampajānantīti **asampajānā**, tamvoganivattiyam cāyam akāro
 “ahetukā dhammā¹, abhikkhuko āvāso”ti-ādīsu² viyāti āha “**nippaṇṇā**”ti,
 paññārahītāti attho. Pāliyam **vibbhantacittā**ti ubbhantacittā. Samādhivirahena
 laddhokāseṇa uddhaccena tesam samādhivirahānam cittam nānārammaṇesu
 paribbhamati vanamakkāto viya vanasākhāsu. **Pākatindriyā**
 samvārābhāvena gihikāle viya vivāṭa-indriyā. Tenāha “**pakatiyā ṭhitehī**”ti-
 ādi. **Vivāṭehī**ti samvutehi.

44. Dutiye **bhaṇḍanam vuccati kalahassa pubbabhāgoti** kalahassa
 hetubhūtā paribhāsā tamśadisī ca anīṭṭhakiriyā bhaṇḍanam nāma.
Kalahajātāti hatthaparāmāsādivasena matthakappatto kalaho jāto etesanti
 kalahajātāti evamettha attho daṭṭhabbo. **Viruddhavādanti** “ayam dhammo,
 nāyam dhammo”ti-ādinā³ viruddhavādabhūtā pīvādāni.
 Mukhasannissitatāya vācā⁴ idha “mukhan”ti adhippetāti āha “**dubbhāsītā**
vācā mukhasattiyoti vuccantī”ti. Catubbidhampi saṅghakammaṃ
 sīmāparicchinnehi pakatattehi bhikkhūhi ekato kattabbattā **ekakammaṃ**
 nāma. Pañcavidhopi pātimokkhuddeso ekato uddisittabbattā **ekuddeso** nāma.
 Paññattam pana sikkhāpadam sabbehipi lajjīpuggalehi samam
 sikkhitabbabhāvato **samasikkhatā**

1. Abhi 1. 4 piṭṭhe.

3. Vi 4. 211, 213 piṭṭhesu.

2. Vi 4. 84 piṭṭhe.

4. Mukhasannissitā vācā (Ka)

nāma. Pāḷiyaṃ **khīrodakībhūtā**ti yathā khīrañca udakañca aññamaññaṃ saṃsandati, visum na hoti, ekattaṃ viya upeti. Satipi hi ubhayesaṃ kalāpānaṃ paramatthato bhede pacurajanehi pana duviññeyyanānattaṃ khīrodakaṃ samoditaṃ accantameva saṃsaṭṭhaṃ viya hutvā tiṭṭhati, evaṃ sāmaggivasena ekattūpagatacittuppādā viyāti khīrodakībhūtāti evamettha attho daṭṭhabbo. **Mettācakkhūhī**ti mettācittaṃ paccupaṭṭhapetvā olokanacakkhūhi. Tāni hi piyabhāvadīpanato “piyacakkhūni”ti vuccanti.

45. Tatiye **aggavatī**ti ettha **agga**-saddo uttamapariyāyo, tena visiṭṭhassa puggalassa, visiṭṭhāya vā paṭipattiyā gahaṇaṃ idhādhippetanti āha “**aggavatīti uttamapuggalavatī**”ti-ādi. Avigatataṇhatāya taṃ taṃ parikkhārajātaṃ bahuṃ lanti ādiyantīti bahulā, bahulā eva **bāhulikā** yathā “venayiko”ti¹. Te pana yasmā paccayabahubhāvāya yuttappayuttā nāma honti, tasmā āha “**cīvarādibāhullāya paṭipannā**”ti. Sikkhāya ādaragāravābhāvato sithilaṃ adaḷhaṃ gaṇhantīti **sāthalikā**ti vuttaṃ. **Sithilanti** ca bhāvanapumsakaniddeso, sithilasaddena vā samānatthassa sāthalasaddassa vasena sāthalikāti padasiddhi veditabbā. **Avagamanatṭhenā**ti adhogamanatṭhena, orambhāgiyabhāvenāti attho. **Upadhiviveketi** sabbūpadhipaṭinissagatāya upadhivivitte. **Oropitadhurā**ti ujjhittussāhā. **Duvidhampi vīriyanti** kāyikaṃ cetasaikañca vīriyaṃ.

46. Catutthe **idam dukkhanti** dukkhassa ariyasaccassa paccakkhato aggahitabhāvadassanattaṃ vuttaṃ. **Ettakameva dukkhanti** tassa paricchijja aggahitabhāvadassanattaṃ. **Ito uddhaṃ dukkhaṃ natthī**ti anavasesetvā aggahitabhāvadassanattaṃ. **Yathāsabhāvato nappajānantī**ti sarasalakkhaṇappaṭivedhena asammohato nappaṭivijjhanti. Asammohappaṭivedho ca yathā tasmiṃ ñāṇe pavatte pacchā dukkhassa rūpādiparicchede sammoho na hoti, tathā pavatti. **Accantakkhayoti** accantakkhayanimittaṃ nibbānaṃ. **Asamuppattī**ti etthāpi eseva nayo. Yaṃ nibbānaṃ maggassa ārammaṇapaccayaṭṭhena kāraṇabhūtaṃ āgamma tadubhayampi nirujjhati, taṃ tesam asamuppatti nibbānaṃ dukkhanirodhoti vuccati.

1. Am 3. 20; Vi 1. 3; Ma 1. 193 piṭṭhesu.

47. Pañcame visesanassa paranipātena “**parisākaṣaṭo**”ti vuttanti āha “**kaṣaṭaparisa**”ti-ādi. “Kasaṭaparisa”ti hi vattabbe “parisākaṣaṭo”ti vuttaṃ. **Parisāmaṇḍoti** etthāpi eseva nayo. Sesamettha uttānameva.

48. Chaṭṭhe **gambhīrāti** agādhā dukkhogāḷhā. **Pāḷivasenāti** iminā yo dhammapaṭisambhidāya visayo gambhīrabhāvo, tamāha. Dhammapaṭivedhassa hi dukkarabhāvato dhammassa pāḷiyā dukkhogāḷhatāya gambhīrabhāvo. “**Pāḷivasena gambhīrā**”ti vatvā “**sallasuttasadisā**”ti vuttaṃ tassa “animittamanaññātan”ti-ādinā¹ pāḷivasena gambhīratāya labbhanato. Tathā hi tattha tā gāthā duviññeyyarūpā tiṭṭhanti. Duviññeyyaṃ hi ñāṇena dukkhogāḷhanti katvā “gambhīran”ti vuccati. Pubbāparampettha kāsañci gāthānaṃ duviññeyyatāya dukkhogāḷhameva, tasmātaṃ “pāḷivasena gambhīrā”ti vuttaṃ. Imināya nayena “**atthavasena gambhīrā**”ti etthāpi attho vedītabbo. **Mahāvedallasuttassa**² atthavasena gambhīratā suviññeyyāva. Lokam uttaratīti lokuttaro, navavidho appamaṇadhammo. So atthabhūto etesaṃ atthīti **lokuttarā**. Tenāha “**lokuttara-atthadīpakā**”ti.

Sattasuññaṃ dhammamattamevāti sattena attanā suññaṃ kevalaṃ dhammamattameva. **Uggahetabbaṃ pariyāpuṇitabbanti** liṅgavacanavipallāsena vuttanti āha “**uggahetabbe ca pariyāpuṇitabbe cā**”ti. Kavino kammaṃ kavītā. Yaṃ panassa kammaṃ, taṃ tena katanti vuccatīti āha “**kavitāti kavīhi katā**”ti. **Itaranti** kāveyyāti padaṃ, kābyanti vuttaṃ hoti. **Kābyanti** ca kavinā vuttanti attho. Tenāha “**tasseva vevacanan**”ti. **Vicitra-akkkharāti** vicittākārakkharā viññāpanīyā. **Sāsanato bahibhūtāti** na sāsanāvacarā. **Tesaṃ sāvakehīti** buddhānaṃ sāvakāti apaññātānaṃ yesaṃ kesañci sāvakehi. **Na ceva aññamaññaṃ paṭipucchintīti** ye vācenti, ye ca suṇanti, te aññamaññaṃ atthādīṃ nappaṭipucchanti, kevalaṃ vācanasavanamatteneva parituṭṭhā hontī. **Cārikaṃ na vicarantīti** asukasmīṃ ṭhāne atthādīṃ jānantā atthīti pucchanaṭṭhāya cārikaṃ na gacchanti tādisassa puggalassa abhāvato tassa ca pubbāparavirodhato. **Kathaṃ ropetabbanti** kena pakārena nikkhipitabbaṃ. Attho nāma sabhāvato anāsandhito

1. Khu 1. 371 piṭṭhe Suttanipāte.

2. Ma 1. 365 piṭṭhe.

sambandhato pubbāparato ādipariyosānato ca ñāto sammāñāto hotīti āha “**ko attho**”ti-ādi. **Anuttānikatanti** akkharasannivesādinā anuttānikatam.

Kaṅkhāyāti saṁsayassa.

49. Sattame kilesehi āmasitabbato āmisam, cattāro paccayā. Tadeva garu garukātabbam etesam, na dhammoti **āmisagarū**. Tenāha “**lokuttaradhammam lāmakato gahetvā ʘhitaparisā**”ti. Ubhato bhāgato vimuttoti **ubhatobhāgavimutto**. **Dvīhi bhāgehi** dve vāre vimutto. **Paññāya vimuttoti** samathasannissayena vinā aggamaggapaññāya vimutto. Tenāha “**sukkhavipassakakhīṇāsavo**”ti. **Kāyenāti** nāmakāyena. **Jhānaphassam phusitvāti** aṭṭhasamāpattisaññitam jhānaphassam adhigamavasena phusitvā. Pacchā nirodham nibbānam yathā ālocitam¹ nāmakāyena sacchikarotīti **kāyasakkhī**. Na tu vimutto ekaccānam āsavānam aparikkhīṇattā. **Diṭṭhantam pattoti** diṭṭhassa anto anantaro kālo diṭṭhanto, dassanasāṅkhātassa sotāpattimaggañāṇassa anantaram pattoti attho. Paṭhamaphalato paṭṭhāya hi yāva aggamaggā diṭṭhippato. Tenāha “**ime dvepi chasu ʘhānesu labbhanti**”ti.

Saddahanto vimuttoti etena sabbathā avimuttassa saddhāmattena vimuttabhāvadassanena saddhāvimuttassa sekkhabhāvameva vibhāveti. **Saddhāvimuttoti** vā saddhāya avimuttoti attho. **Chasu ʘhānesūti** paṭhamaphalato paṭṭhāya chasu ʘhānesu. **Dhammam anussaratīti** paṭhamamaggapaññāsāṅkhātam dhammam anussarati. **Saddham anussaratīti** etthāpi eseva nayo. Ubhopi hete sotāpattimaggaṭṭhāyeva. **Imam kasmā gaṇhantīti** evam ekantapāsaṁsesu ariyesu gayhamānesu imam ekantaninditam lāmakam dussīlam tasmā gaṇhanti. Sabbesu sabbathā sadisesu labbhamānopi viseso na paññāyati, visabhāge pana sati eva paññāyati paṭabhāvena viya cittapaṭassāti āha “**ekaccesu panā**”ti-ādi. **Ganthitāti** avabaddhā. **Mucchitāti** muccham sammoham āpannā. **Chandarāga-apakaḍḍhanāyāti** chandarāgassa apanayanattham. **Nissaraṇapaññāyāti** tato nissaraṇāvahāya paññāya virahitā.

1. Yathā kāyo cittam (Ka)

Paññādhurenāti vipassanābhinivesena. **Abhiniviṭṭhoti** vipassanāmaggaṃ otiṇṇo. **Tasmim̐ khaṇeti** sotāpattimaggakkaṇe. **Dhammānusārī nāma** paññāsaṅkhātena dhammena ariyamaggasotassa anussaraṇato. **Kāyasakkhī** nāma nāmakāyena sacchikātabbassa nibbānassa sacchikaraṇato. Vikkhambhanasamucchedānaṃ vasena **dvikkhattum̐**. Arūpajjhānehi rūpakāyato, aggamaggena sesakāyatoti **dvīhi bhāgehi**, nissakkavacanañcetam̐. Diṭṭhantaṃ patto, diṭṭhattā vā pattoti **diṭṭhippatto**. Tattha **diṭṭhantaṃ pattoti** dassanasāṅkhātassa sotāpattimaggañāṇassa anantaraṃ pattoti attho. **Diṭṭhattāti** catusaccadassanasāṅkhātāya paññāya nirodhassa diṭṭhattā. Jhānaphassarahitāya sātisayāya paññāya eva vimuttoti **paññāvimutto**. Sesam̐ vuttanayattā suviññeyyameva.

50. Aṭṭhame na samāti **visamā**. Kāyakammādīnaṃ visamattā tato eva tattha pakkhalanaṃ sulabhanti āha “**sapakkkhalanaṭṭhenā**”ti. **Nippakkhalanaṭṭhenāti** pakkhalanā bhāvena. **Uddhammānīti** dhammato apetāni. **Ubbinayānīti** etthāpi eseva nayo.

51. Navame **adhammikāti** adhamme niyuttā. Tenāha “**niddhammā**”ti, dhammarahitāti attho.

52. Dasame **gaṇhantīti** pavattenti. **Na ceva aññamaññaṃ saññāpentī** mūlato paṭṭhāya taṃ adhikaraṇaṃ yathā vūpasammati, evaṃ aññamaññaṃ itarītare na sammā jānāpentī. Saññāpanatthaṃ sannipāte sati tattha uttapaṭṭakaraṇena saññattiyā bhavitabbaṃ, te pana saññāpanatthaṃ na sannipatanti. **Na pekkhāpentīti** taṃ adhikaraṇaṃ mūlato paṭṭhāya aññamaññaṃ na pekkhāpentī. Asaññattiyeva attanā gahitapakkhassa balaṃ etesanti **asaññattibalā**. **Na tathā mantentīti** sandiṭṭhiparāmāsī-ādhānaggāhiduppaṭinissaggibhāvena tathā na mantenti. Tenāha “**thāmasā**”ti-ādi. **Uttānatthoyeva** kaṇhapakkhe vuttappaṭipakkhena gahetabbattā.

Parisavaggavaṇṇanā niṭṭhitā.

Paṭhamo paṇṇāsako niṭṭhito.

2. Dutiyapaṇṇāsaka

(6) 1. Puggalavaggavaṇṇanā

53. Dutiyapaṇṇāsakassa paṭhame hitaggahaṇena mettā vuttā hoti, na karuṇā, anukampāgahaṇena pana karuṇāti **cakkavattinā saddhim gahitattā** “**lokānukampāyā**”ti na vuttam. Nippariyāyato lokānukampā nāma sammāsambuddhādhiṇāti. **Dveti** manussadevasampattivasena dve sampattiyo. Tā dve, nibbānasampatti cāti **tisso**.

54. Dutiye bahuso loke na ciṇṇā na pavattā manussāti **āciṇṇamanussā**. Kadācideva hi nesaṃ loke nibbatti abhūtapubbā bhūtāti **abbhutamanussā**.

55. Tatiye **dasasu cakkavāḷasahassesu anutāpaṃ karoti** tassa ekabuddhakhettabhāvato.

56. Catutthe **thūpassa yuttāti** dhātuyo pakkhipitvā thūpakaraṇassa yuttā.

57. Pañcame **attano ānubhāvenāti** sayambhuñāṇena. **Buddhāti** buddhavanto.

58. Chaṭṭhe **pahīnattā na bhāyatīti** attasinehābhāvato na bhāyati. Sakkāyadiṭṭhiggahaṇaṅcetha nidassanamattaṃ, attasinehassa paṭighassa tadekaṭṭhasammohassa ca vasena bhāyanaṃ hotīti tesampi pahīnattā na bhāyati, aññathā sotāpannādīnaṃ abhayena¹ bhavitabbaṃ siyā. **Sakkāyadiṭṭhiyā balavattāti** ettha ahaṃkārasammohanatādīnampi balavattāti vattabbaṃ.

59. Sattame **assājānīyoti** likhanti, **usabhājānīyoti** pana pāḥhoti.

61. Navame **tatthāti** antarāpaṇe. **Ekoti** dvīsu kinnaresu eko. Ambilikāphalaṅca addasāti ānetvā sambandho. **Ambilikāphalanti**

1. Bhayena (Ka)

tintiṇīphalanti vadanti, caturambilanti apare. **Dve attheti** pāliyaṃ vutte dve atthe.

62. Dasame yathā-āraddhe kicce vattamāne antarā eva paṭigamanam paṭivānaṃ, natthi etassa paṭivānanti **appaṭivāno**. Tattha asaṃkocappatto. Tenāha “**anukkaṇṭhito**”ti-ādi.

63. Ekādasame **sannivāsanti** saha vāsaṃ. Yathā asappurisā saha vasantā aññaṃaññaṃ agāravena anādariyaṃ karonti, tappaṭikkhepena sappurisānaṃ sagāravappaṭipattidassanaparamidaṃ suttaṃ daṭṭhabbaṃ.

64. Dvādasame dvīsupi **pakkhesūti** vivādāpannānaṃ bhikkhūnaṃ dvīsupi pakkhesu. **Saṃsaramānāti** pavattamānā. **Diṭṭhipaḷāsoti** diṭṭhisannissayo paḷāso yugaggāho. **Āghātentoti** āhananto bādhento. **Anabhirādhanavasenāti** yassa uppajjati, tassa tadaññesaṅga atthassa anabhirādhanavasena. **Sabbampetanti** vacīsaṃsārobbhi sabbampetaṃ. Attano citta parisāya ca citteti ānetvā sambandho.

Puggalavaggavaṇṇanā niṭṭhitā.

(7) 2. Sukhavaggavaṇṇanā

65. Dutiyaṃ paṭhame **sabbakāmanipphattimūlakaṃ sukhanti** anavasesa-upabhogaparibhogavatthunipphattihetukaṃ kāmasukhaṃ. **Pabbajjāmūlakaṃ sukhanti** pabbajjāhetukaṃ pavivekasukhaṃ.

66. Dutiye **kāmeti** pañca kāmaguṇe, sabbepi vā tebhūmake dhamme. Vuttaṃ hetam “sabbepi tebhūmakā dhammā kamaṇīyaṭṭhena kāmā”ti¹. **Nekkhammaṃ vuccati pabbajjā** gharabandhanato nikkhantattā. Nibbānameva vā—

“Pabbajjā paṭhamaṃ jhānaṃ, nibbānaṅga vipassanā.
Sabbepi kusalā dhammā, nekkhammanti pavuccare”ti²—

hi vuttaṃ.

1. Khu 7. 1, 2 piṭṭhesu.

2. Itivuttaka-Ṭṭha 331 piṭṭhe.

67. Tatiye upadhī vuccanti pañcupādānakkhandhā, tannissitaṃ sukhaṃ **upadhisukhaṃ**. Tappaṭipakkhato **nirupadhisukhaṃ lokuttarasukhaṃ**.

68. Catutthe vaṭṭapariyāpannaṃ sukhaṃ **vaṭṭasukhaṃ**. Nibbānārammaṇaṃ sukhaṃ **vivaṭṭasukhaṃ**.

69. Pañcame **saṃkilesanti** saṃkiliṭṭhaṃ. Tenāha “**vaṭṭagāmisukhaṃ**”ti. **Vivaṭṭasukhanti** maggaphalasaḥagataṃ sukhaṃ.

70. Chaṭṭhe ariyānameva sukhaṃ **ariyasukhaṃ**, ariyañca taṃ sukhañcātipi **ariyasukhaṃ**. Anariyānameva sukhaṃ **anariyasukhaṃ**, anariyañca taṃ sukhañcātipi **anariyasukhaṃ**.

71. Sattame **tanti** cetasikasukhaṃ.

72. Aṭṭhame saha pītiyā vattatīti **sappītikaṃ**, pītisaḥagataṃ sukhaṃ. Sabhāvato virāgato ca natthi etassa pītīti **nippītikaṃ sukhaṃ**. Aṭṭhakathāyaṃ panettha jhānasukhameva uddhaṭaṃ, tathā ca “lokiyasappītikasukhato lokiyanippītikasukhaṃ aggaṃ”ti vuttaṃ. Lokiyanippītikampi hi aggaṃ labbhatevāti bhūmantaraṃ bhinditvā aggabhāvo veditabbo.

73. Navame sātasaḥbhāvameva sukhaṃ **sātasukhaṃ**, na upekkhāsukhaṃ viya asātasaḥbhāvaṃ. Kāmaṃ cettha kāyaviññāṇasaḥagatampi sātasukhameva, aṭṭhakathāyaṃ pana “tisu jhānesu sukhaṃ”teva vuttaṃ.

74. Dasame samādhisampayuttaṃ sukhaṃ **samādhisukhaṃ**. Nasamādhisampayuttaṃ sukhaṃ **asamādhisukhaṃ**.

75. Ekādasame suttantakathā esāti “**sappītikaṃ jhānavayan**”ti vuttaṃ.

77. Terasame rūpajjhānaṃ rūpaṃ uttarapadalopena, taṃ ārammaṇaṃ tassāti **rūpārammaṇaṃ**. Catutthajjhānaggahaṇaṃ pana yadassa paṭiyogī, tena samāyogakkhamadassanaparaṃ. **Yaṃ kiñci rūpanti** yaṃ kiñci rupanalakkhaṇaṃ rūpaṃ. Tappaṭikkhepena **arūpaṃ** veditabbaṃ.

Sukhavaggavaṇṇanā niṭṭhitā.

(8) 3. Sanimittavaggavaṇṇanā

78-79. Tatiyassa paṭhame nimīyati ettha phalaṃ avasesapaccayeti pakkhipīyati viyāti **nimittam**, kāraṇanti āha “**sanimittāti sakāraṇā**”ti. **Dutiyaḍḍisūti** dutiyasuttāḍḍisu. **Eseva nayoti** iminā nidānādipadānampi kāraṇapariyāyameva dīpeti. Nidadāti phalanti **nidānam**, hinoti phalaṃ patiṭṭhāti etenāti **hetu**, saṅkharoti phalanti **saṅkhāro**, paṭicca etasmā phalaṃ etīti **paccayo**, ruppanti niruppanti phalaṃ etthāti **rūpanti** evaṃ nidānādipadānampi hetupariyāyatā veditabbā.

84. Sattame **paccayabhūtāyāti** sahaḍḍatādipaccayabhūtāya.

87. Dasame samecca sambhuyya paccayehi katoti saṅkhato saṅkhato dhammo ārammaṇaṃ etesanti **saṅkhatārammaṇā**. **Maggakkhaṇe honti nāma** pahīyantīti katvā. **Nāhesunti** ettha “vuccantī”ti ajjhāharitabbaṃ. **Yāva arahattā desanā desitā** taṃtaṃsuttapariyosāne “na hontī”ti vuttattā.

Sanimittavaggavaṇṇanā niṭṭhitā.

(9) 4. Dhammavaggavaṇṇanā

88. Catutthassa paṭhame **phalasaṃmādhīti** catūsipi ariyaphalesu saṃmādhī. Tathā **phalapaññā** veditabbā.

89. Dutiye sampayuttadhamme pariggaṇhātīti **paggāho**. Na vikkhipatīti **avikkhepo**.

90. Tatiye namaṇaṭṭhena **nāmaṃ**. Ruppanaṭṭhena **rūpaṃ**. Sammasanacārassa adhippetattā “**cattāro arūpakkhandaḥ**”tveva vuttaṃ. Tenāha “**dhammakotṭhāsaparicchedaññaṃ nāma kathitaṃ**”ti.

91. Catutthe vijānaṇaṭṭhena **vijjā**. Vimuccanaṭṭhena **vimutti**.

92. Pañcame bhavo nāma sassataṃ sadā bhāvato, sassatavasena uppajjanadiṭṭhi **bhavadiṭṭhi**. Vibhavo nāma ucchedo vināsanatṭhena, vibhavavasena uppajjanadiṭṭhi **vibhavadiṭṭhi**. **Uttānatthāneva** hetṭhā vuttanayattā.

95. Aṭṭhame dukkhaṃ vaco etasmim vippaṭikūlagāhimhi vipaccanikasāte anādare puggaleti dubbaco, tassa kammaṃ dovacassaṃ, tassa dubbacassa puggalassa anādariyavasena pavattā cetanā. Tassa bhāvo **dovacassatā**. **Tassa bhāvoti** ca tassa yathāvuttassa dovacassassa atthibhāvo, atthato dovacassameva. Vitthārato panesā “tattha katamā dovacassatā? Sahadhammike vuccamāne dovacassāyan”ti **abhidhamme**¹ āgatā. Sā atthato saṅkhārakkhandho hoti. Catunnaṃ vā khandhānaṃ etenākārena pavattānaṃ etaṃ adhivacananti vadanti.

Pāpayogato pāpā assaddhādayo puggalā etassa mittāti pāpamitto, tassa bhāvo **pāpamittatā**. Vitthārato panesā “tattha katamā pāpamittatā? Ye te puggalā assaddhā dussilā appassutā maccharino duppaññā. Yā tesāṃ sevanā nisevanā samsevanā bhajanā sambhajanā bhatti sambhatti taṃsampavaṅkatā”ti¹ evaṃ āgatā. Sāpi atthato dovacassatā viya daṭṭhabbā. Yāya hi cetanāya puggalā pāpasampavaṅko nāma hoti, sā cetanā cattāropi vā arūpino khandhā tadākārappavattā **pāpamittatā**.

96. Navame sukhaṃ vaco etasmim padakkhiṇagāhimhi anulomasāte sādare puggaleti **subbacoti**-ādinā, kalyāṇā saddhādayo puggalā etassa mittāti **kalyāṇamittoti**-ādinā vuttavipariyāyena attho veditabbo.

97. Dasame pathavīdhātu-ādayo sukhadhātikāmadhātu-ādayo ca etāsveva antogadhāti etāsu kosalle dassite tāsupi kāsallaṃ dassitameva hotīti “**aṭṭhārasa dhātuyo**”ti vuttaṃ. **Dhātūti jānananti** iminā aṭṭhārasannaṃ dhātūnaṃ sabhāvaparicchedikā savanadhāraṇasammasanappaṭivedhapaññā vuttā. Tattha dhātūnaṃ savanadhāraṇapaññā sutamayā, itarā bhavanāmayā. Tatthāpi sammasanapaññā

1. Abhi 3. 258 piṭṭhe.

lokiyā. Vipassanā hi sā, itarā lokuttarā. Lakkhaṇādivasena aniccādivasena ca manasikaraṇaṃ manasikāro, tattha kosallaṃ **manasikāra**kusalatā.

Aṭṭhārasannaṃyeva dhātūnaṃ sammasanappaṭivedhapaccavekkhaṇapaññā manasikārakusalatā, sā ādimajjhapariyosānavasena tidhā bhinnā. Tathā hi sammasanapaññā tassā ādi, paṭivedhapaññā majjhe, paccavekkhaṇapaññā pariyosānaṃ.

98. Ekādasame āpattiyova āpattikkhandhā, tā pana antarāpattīnaṃ aggaḥaṇena pañca, tāsāṃ gahaṇena satta hontīti āha “**pañcannañca sattannañca āpattikkhandhānaṃ**”ti. **Jānananti** “imā āpattiyo, ettakā āpattiyo, evañca tāsāṃ apajjanaṃ hotī”ti jānanaṃ. Evaṃ tippakārena jānanaḥapaññā hi āpattikusalatā nāma. Āpattito vuṭṭhāpanappayogatāya kammabhūtā vācā kammavācā, tathābhūtā anussāvanavācā. “Imāya kammavācāya ito āpattito vuṭṭhānaṃ hoti, hontañca paṭhame, tatiye vā anussāvane yya-kāraṃ patte, ‘saṃvarissāmi’ti vā pade pariyosite hotī”ti evaṃ taṃtaṃāpattīhi vuṭṭhānaparicchedajānanaḥapaññā **āpattivuṭṭhānakusalatā**. **Vuṭṭhānanti** ca yathāpannāya āpattiyā yathā tathā anantarāyatāpādanaṃ. Evaṃ vuṭṭhānaggaḥaṇeneva desanāyapi saṅgaho siddho hoti.

Dhammavaggavaṇṇanā niṭṭhitā.

(10) 5. Bālavaggavaṇṇanā

99. Pañcamassa paṭhame **anāgataṃ bhāraṃ vaha**tīti attano asampattaṃ bhāraṃ vahati, atherova samāno therehi vahitabbaṃ bījanaggāhadhammajjhesaṇādhāraṃ vahatīti evamettha attho daṭṭhabbo. **Aṭṭhakathāyaṃ**¹ pana yasmā sammajjanādinavavidhaṃ pubbakiccaṃ āṇatteneva kātappaṃ, pātimokkhañca āṇatteneva uddisitappaṃ, tasmā taṃ sabbaṃ vinā āṇattiyā karonto anāgataṃ bhāraṃ vahatīti nāmāti dassetuṃ “**sammajjanīpadīpo**”ti-ādi vuttaṃ. Yaṃ hi “**anujānāmi bhikkhave uposathāgāraṃ sammajjitun**”ti-ādinā nayena **pāliyaṃ**² āgataṃ. Aṭṭhakathāsu ca—

1. Vi-Ṭṭha 3. 341 piṭṭhe.

2. Vi 3. 158 piṭṭhe.

“Sammajjanī padīpo ca, udakaṃ āsanena ca.
Uposathassa etāni, ‘pubbakaraṇaṃ’ti vuccati.

Chandapārisuddhi-utukkhānaṃ, bhikkhugaṇaṇā ca ovādo.
Uposathassa etāni, ‘pubbakiccan’ti vuccatī”¹—

evaṃ dvīhi nāmehi navavidhaṃ pubbakiccaṃ dassitaṃ, taṃ akatvā uposathaṃ kātuṃ na vaṭṭati. Tasmā “anujānāmi bhikkhave therena bhikkhunā navam bhikkhuṃ aṇāpetun”² vacanato therena aṇattena agilānena bhikkhunā uposathāgāraṃ sammajjitabbaṃ, pānīyaṃ paribhojanīyaṃ upaṭṭhapetabbaṃ, āsanaṃ paññāpetabbaṃ, padīpo kātabbo, akaronto dukkaṭaṃ āpajjati.

Therenapi patirūpaṃ ṇatvā aṇāpetabbaṃ, aṇāpentenapi yaṃ kiñci kammaṃ karonto vā sadā kālameva eko vā bhāranittheraṇako vā sarabhāṇakadhammakathikādīsu vā aññataro na uposathāgārasammajjanatthaṃ aṇāpetabbo, avasesā pana vārena aṇāpetabbā. Sace aṇatto sammajjanim tāvakālikampi na labhati, sākhabhaṅgaṃ kappiyaṃ kāretvā sammajjitabbaṃ, tampi alabhantassa laddhakappiyaṃ hoti. Padīpakaraṇepi vuttanayeneva aṇāpetabbo, aṇāpentena ca “amukasmim nāma okāse telaṃ vā kapallikā vā atthi, taṃ gahetvā karohī”³ti vattabbo. Sace telādīni natthi, pariyesitabbāni. Pariyesitvā alabhantassa laddhakappiyaṃ hoti. Apica kapāle aggi jāletabbo. Āsanapaññāpanāṇattiyampi vuttanayeneva aṇāpetabbo, aṇattena ca sace uposathāgāre āsanāni natthi, saṃghikāvāsato āharitvā paññāpetvā puna āgaritabbāni, āsanesu asati kaṭasārakepi taṭṭikāyopi paññāpetuṃ vaṭṭati, tāsopi asati sākhabhaṅgāni kappiyaṃ kāretvā paññāpetabbāni. Kappiyakāraṇaṃ alabhantassa laddhakappiyaṃ hoti.

Chandapārisuddhīti ettha uposathakaraṇatthaṃ sannipatite saṃghe bahi uposathaṃ katvā āgatena sannipātaṭṭhānaṃ gantvā kāyasāmaggiṃ adentena chando dātabbo. Yopi gilāno vā kiccappasuto vā, tena pārisuddhiṃ dentena chando dātabbo. Kathaṃ dātabbo? Ekassa

1. Vi-Ṭṭha 3. 344 piṭṭhe.

2. Vi 3. 158 piṭṭhe.

bhikkhuno santike “chandaṃ dammi, chandaṃ me hara, chandaṃ me ārocehī”ti ayamatto kāyena vā vācāya vā ubhayena vā viññāpetabbo. Evaṃ dīno hoti chando. Akatūposathena pana gilānena vā kiccappasutena vā pārisuddhi dātabbā. Kathaṃ dātabbā? Ekassa bhikkhuno santike “pārisuddhiṃ dammi, pārisuddhiṃ me hara, pārisuddhiṃ me ārocehī”ti ayamatto kāyena vā vācāya vā ubhayena vā viññāpetabbo. Evaṃ dinnā hoti pārisuddhi. Taṃ pana dentena chandopi dātabbo. Vuttaṃ hetam Bhagavatā “anujānāmi bhikkhave tadahuposathe pārisuddhiṃ dentena chandampi dātum, santi saṃghassa karaṇīyan”ti¹. Tattha pārisuddhidānaṃ saṃghassapi attanopi uposathakaraṇaṃ sampādeti, na avasesaṃ saṃghakiccaṃ. Chandadānaṃ saṃghasseva uposathakaraṇaṃ sesakiccaṃ sampādeti, attano pana uposatho akatoyeva hoti, tasmā pārisuddhiṃ dentena chandopi dātabbo.

Utukkhānanti “hemantādīnaṃ utūnaṃ ettakaṃ atikkantaṃ, ettakaṃ avasiṭṭhan”ti evaṃ utūnaṃ ācikkhanaṃ. **Bhikkhugaṇanāti** “ettakā bhikkhū uposathagge sannipatitā”ti bhikkhūnaṃ gaṇanā. Idampi ubhayaṃ katvāva uposatho kātabbo. **Ovādoti** bhikkhunovādo. Na hi bhikkhūnihi yācitaṃ ovādaṃ anārocetvā uposathaṃ kātum vaṭṭati. Bhikkhuniyo hi “sve uposatho”ti āgantvā “ayaṃ uposatho cātuddaso, pannaraso”ti pucchitvā puna uposathadivase āgantvā “bhikkhunisaṃgho ayya bhikkhusaṃghassa pāde vandati, ovādūpasaṅkamaṇaṃ yācati, labhatu kira ayya bhikkhunisaṃgho ovādūpasaṅkamaṇaṃ”ti evaṃ ovādaṃ yācanti. Taṃ ṭhapetvā bālagilānagamiye añño sacepi āraññaṃ hoti, appaṭiggahetuṃ na labhati, tasmā yena so paṭiggahito, tena bhikkhunā uposathagge pātimokkhuddesako bhikkhu evaṃ vattabbo “bhikkhunisaṃgho bhante bhikkhusaṃghassa pāde vandati, ovādūpasaṅkamaṇaṃ yācati, labhatu kira bhante bhikkhunisaṃgho ovādūpasaṅkamaṇaṃ”ti.

Pātimokkhuddesakena vattabbaṃ “atthi koci bhikkhu bhikkhunovādako sammato”ti. Sace hoti koci bhikkhu bhikkhunovādako sammato, tato tena so vattabbo “itthannāmakō

1. Vi 3. 164 piṭṭhe.

bhikkhu bhikkhunovādako sammato, haṃ bhikkhunisaṃgho upasaṅkamatū”ti. Sace natthi, tato tena pucchitabbaṃ “ko āyasmā ussahati bhikkhuniyo ovaditun”ti. Sace koci ussahati, sopi ca aṭṭhahi aṅgehi samannāgato, taṃ tattheva sammannitvā ovādappaṭiggāhako vattabbo “itthannāmo bhikkhu bhikkhunovādako sammato, taṃ bhikkhunisaṃgho upasaṅkamatū”ti. Sace pana na koci ussahati, pātimokkhuddesakena vattabbaṃ “natthi koci bhikkhu bhikkhunovādako sammato, pāsādikena bhikkhunisaṃgho sampādetū”ti. Ettāvata hi sikkhattayasaṅghitaṃ sakalaṃ sāsaṇaṃ ārocitaṃ hoti. Tena bhikkhunā “sādhū”ti sampāṭicchitvā pāṭipade bhikkhunīnaṃ ārocetabbaṃ. Pātimokkhampi “na bhikkhave anajjhīṭṭhena pātimokkhaṃ uddisitabbaṃ, yo uddiseyya, āpatti dukkaṭṭassā”ti¹ vacanato anāṇatthena na uddisitabbaṃ. “Therādheyyaṃ pātimokkhaṃ”ti² hi vacanato saṃghatthero vā pātimokkhaṃ uddiseyya, “anujānāmi bhikkhave yo tattha bhikkhu byatto paṭibalo, tassādheyyaṃ pātimokkhaṃ”ti² vacanato navakataro vā therena āṇatto. Dutiyādīni uttānatthāneva.

109. Ekādasame **na kukkucāyitabbaṃ kukkucāyatīti** na kukkucāyituṃ yuttakaṃ kukkucāyati. Sūkaramaṃsaṃ labhitvā “acchamaṃsaṃ”ti kukkucāyati, “sūkaramaṃsaṃ”ti jānantopi “acchamaṃsaṃ”ti kukkucāyati, na paribhuñjatīti vuttaṃ hoti. Evaṃ migamaṃsaṃ “dīpimaṃsaṃ”ti, kāle santeyeva “kālo natthī”ti, appavāretvā “pavāritomhi”ti, patte rajasmim apatiteyeva “patitan”ti, attānaṃ uddissa macchamaṃse akateyeva “maṃ uddissa katan”ti kukkucāyati. **Kukkucāyitabbaṃ na kukkucāyatīti** kukkucāyituṃ yuttaṃ na kukkucāyati. Acchamaṃsaṃ labhitvā “sūkaramaṃsaṃ”ti na kukkucāyati, “acchamaṃsaṃ”ti jānantopi “sūkaramaṃsaṃ”ti na kukkucāyati, madditvā vītikkamatīti vuttaṃ hoti. Evaṃ dīpimaṃsaṃ migamaṃsanti -pa- attānaṃ uddissa macchamaṃse kate “maṃ uddissa katan”ti na kukkucāyatīti evamettha attho daṭṭhabbo. Aṭṭhakathāyaṃ pana “na kukkucāyitabbanti saṃghabhogassa apaṭṭhapanāṃ avicāraṇaṃ na kukkucāyitabbaṃ nāma, taṃ kukkucāyati. Kukkucāyitabbanti tasseva paṭṭhapanāṃ vicāraṇaṃ, taṃ na kukkucāyatī”ti ettakameva vuttaṃ.

1. Vi 3. 155 piṭṭhe.

2. Vi 3. 156 piṭṭhe.

tattha **saṃghabhogassā**ti saṃghassa catupaccayaparibhogatthāya dinnakhattavatthutaḷākādikassa, tato uppannadhaññahiraññādikassa ca saṃghassa bhogassa. **Apatṭhapananti** asaṃvidahanam. Tenāha “**avicāraṇan**”ti, **tassevā**ti yathāvuttasseva saṃghabhogassa.

Bālavaggavaṇṇanā niṭṭhitā.

Dutiyapaṇṇāsako niṭṭhito.

3. Tatiyapaṇṇāsaka

(11) 1. Āsāduppajahavaggavaṇṇanā

119. Tatiyapaṇṇāsakassa paṭhame dukkhena pajahitabbāti **duppajahā**. **Duccajāti**-ādīsupi eseva nayo. Dvinnam āsānam duccajabhāvo katham jānitabboti paṭhamam tāva lābhāsāya duccajabhāvaṃ vibhāveti “**lābhāsāya**”ti-ādinā. **Ubhatobyūḥanti** yuddhatthāya ubhato sannipatitam. **Pakkhandantīti** anuppavisanti. **Jīvitāsāya duppajahattāti**-ādinā jīvitāsāya duccajabhāvaṃ vibhāveti.

120. Dutiye **dullabhāti** na sulabhā. **Ḥṇam demīti saññaṃ karotīti** evaṃ saññaṃ karonto viya hotīti attho. Ettha ca “pubbakārīti paṭhamam upakārassa kāraḷo. Kataññū katavedīti tena katham ñatvā pacchā kāraḷo. Tesu pubbakārī ‘ḥṇam demī’ti saññaṃ karoti pacchā kāraḷo ‘ḥṇam jīrāpemi’ti saññaṃ karotī”ti ettakameva idha vuttam. Puggalapaṇṇattisaṃvaṇṇanāyaṃ¹ pana—

“Pubbakārīti paṭhamameva kāraḷo. Katavedīti katham vedeti, viditam pākātam karoti. Te agāriyānagāriyehi dīpetabbā. Agārikesu hi mātāpitaro pubbakārino nāma, puttadhītaro pana mātāpitaro paṭijaggantā abhivādanādīni tesam kurumānā katavedino nāma. Anagāriyesu ācariyupajjhāyā pubbakārino nāma, antevāsikasaddhivihārikā ācariyupajjhāye paṭijaggantā abhivādanādīni ca tesam kurumānā katavedino nāma. Tesam āvibhāvattāya upajjhāyaposakasoṇattherādīnam vatthūni kathetabbāni.

Aparo nayo—parena akateyeva upakāre attani katham upakāram anapekkhi tvā kāraḷo pubbakārī seyyathāpi mātāpitaro ceva ācariyupajjhāyā ca. So dullabho sattānam taṇhābhībhūtattā. Parena katassa upakārassa

1. Abhi-Ṭṭha 3. 54 piṭṭhe.

anurūpappavattiṃ attani kataṃ upakāraṃ upakārato jānanto vediyanto kataññukatavedī seyyathāpi mātāpitu-ācariyupajjhāyesu sammāpaṭipanno. Sopi dullabho sattānaṃ avijjābhūhūtattā. Apica akāraṇavacchalo pubbakārī, sakāraṇavacchalo kataññukatavedī. ‘Karissati me’ti evamādikāraṇanirapekkhakiriyo pubbakārī, ‘karissati me’ti evamādikāraṇasāpekkhakiriyo kataññukatavedī. Tamojotiparāyaṇo pubbakārī, jotijotiparāyaṇo kataññukatavedī. Desetā pubbakārī, paṭipajjitā kataññukatavedī. Sadevake loke arahamā sammāsambuddho pubbakārī, ariyasāvako kataññukatavedī”ti vuttam.

Tattha kāraṇena vinā pavattahitacitto **akāraṇavacchalo**. Anāgatamhi payojanaṃ apekkhamāno “karissati me”ti-ādinā cittaṇa paṭhamaṃ gahitaṃ tādisaṃ kataṃ upādāya kataññū eva nāma hoti, na pubbakārīti adhippāyena **“karissati meti evamādikāraṇasāpekkhakiriyo kataññū katavedī”**ti vuttam. **Tamojotiparāyaṇo** puññaphalāni anu-ajīvanto eva puññāni karotīti **“pubbakārī”**ti vutto. Puññaphalaṃ upajīvanto hi kataññupakkhe tiṭṭheti.

121. Tatiye **tittoti** suhito pariyosito niṭṭhitakiccatāya nirussukko. Guṇapāripūriyā hi paripuṇṇo yāvadattho idha titto vutto. **Tappetāti** aññesampi tittikaro. **Paccekabuddho ca tathāgatasāvako ca khīṇāsavo tittoti** ettha paccekabuddho navalokuttaradhammehi sayam titto paripuṇṇo, aññaṃ pana tappetuṃ na sakkoti. Tassa hi dhammakathāya abhisamayo na hoti, sāvakānaṃ pana dhammakathāya aparimāṇānaṃ devamanussānaṃ abhisamayo hoti. Evaṃ santepi yasmā te dhammaṃ desetā na attano vacanaṃ katvā kathenti, buddhānaṃ vacanaṃ katvā kathenti, sotuṃ nisinnaparisāpi “ayaṃ bhikkhu na attanā paṭividdham dhammaṃ katheti”ti cittikāraṃ karoti. Iti so cittikāro buddhānaṃyeva hoti. Evaṃ tattha sammāsambuddhova tappetā nāma. Yathā hi “asukassa nāma idañcidañca dethā”ti raññā

ānatte kiñcāpi ānetvā¹ denti, atha kho rājāva tattha dāyako. Yehipi laddhaṃ hoti, te “raññā amhākaṃ ṭhānantaraṃ dinnam, issariyavibhavo dinno”tveva gaṇhanti, na “rājapurisehi”ti evaṃsampadamidaṃ veditabbaṃ.

122. Catutthe **duttappayā**ti atappayā, na sakkā kenaci tappetuṃ. Yo hi upaṭṭhākakulaṃ vā ñātikulaṃ vā nissāya vasamāno cīvare jiṇṇe tehi dinnam cīvaraṃ nikkhipati, na paribhuñjati. Punappunaṃ dinnampi gahetvā nikkhipateva. Yo ca teneva nayena laddhaṃ laddhaṃ vissajjeti, parassa deti, punappunaṃ laddhampi tatheva karoti. Ime dve puggalā sakaṭehipi paccaye upanentena tappetuṃ na sakkāti duttappayā.

123. Pañcame **na vissajjeti**ti attano akatvā parassa na deti, atireke pana sati na nikkhipati, parassa deti. Tenevāha “**sabbarānyeva paresaṃ na deti**”ti-ādi. Idaṃ vuttaṃ hoti “yo bhikkhu upaṭṭhākakulā vā ñātikulā vā jiṇṇacīvaro sāṭakaṃ labhitvā cīvaraṃ katvā paribhuñjati na nikkhipati, aggaḷaṃ datvā pārupantopi punapi diyyamāne sahasā nappaṭigggaṇhāti. Yo ca laddhaṃ laddhaṃ attanā paribhuñjati, paresaṃ na deti. Ime dvepi sukkena sakkā tappetunti sutappayā”ti.

124. 127. Chaṭṭhasattamādīni uttānatthāneva.

Āsāduppajahavaggavaṇṇanā niṭṭhitā.

(12) 2. Āyācanavaggavaṇṇanā

131. **Saddo bhikkhū**ti saddhāya samannāgato bhikkhu. Yo bhikkhu sārīputtamoggallānehi sadisabhāvaṃ pattheti, so yehi guṇehi sārīputtamoggallānā etadagge ṭhapitā, te guṇe attano abhikaṅkheyyāti āha “**yādiso sārīputtatthero paññāyā**”ti-ādi. **Ito uttari patthento micchā pattheyyāti** sārīputtamoggallānānaṃ ye paññādayo guṇā upalabbhanti, tato uttari patthento micchā pattheyya. Aggasāvakaḡaṇaparamā hi sāvakaḡaṇamariyādā. Tesam

sāvakaḡuṇānaṃ yaḡidaṃ aggasāvakaḡuṇā, na tato paraṃ sāvakaḡuṇā nāma atthi. Tenevāha “**yaṃ natthi, tassa patthitattā**”ti. Sesamettha uttānameva.

135. Pañcame yassa ḡuṇā khatā upahatā ca, so **khato upahato** nāma hotīti āha “**ḡuṇānaṃ khatattā**”ti-ādi. **Khatattāti** chinnattā. **Upahattattāti** naṡṡhattā. Tenāha “**chinnagūṇaṃ naṡṡhagūṇanti attho**”ti. Apuññassa pasavo nāma atthato paṡṡilābhoti āha “**pasavatīti paṡṡilabhatī**”ti, attano santāne uppādetīti attho. **Ananupavisitvāti** ñāṇena anogāhetvā. Sesamettha chaṡṡṡhādīni ca suviññeyyāneva.

Āyācanavaggavaṇṇanā niṡṡṡhitā.

(13) 3. Dānavaggavaṇṇanā

142. Tatiyassa paṡṡhame dīyatīti **dānaṃ**, deyyadhammasetaṃ adhivacanaṃ. Dīyati anenāti vā **dānaṃ**, pariccāgacetaṇāyetaṃ adhivacanaṃ. Ayaṃ duvidhopi attho idhāṃippetoti āha “**diyyanakavasena dānāni**”ti-ādi. Tattha **diyyanakavasena**ti dātabbavasena. **Amatapattipattipadanti** amatappattihetubhūtaṃ sammāpaṡṡipadaṃ.

143-151. Dutiyādīni ca suviññeyyāneva.

Dānavaggavaṇṇanā niṡṡṡhitā.

(14) 4. Santhāravaggavaṇṇanā

152. Catutthassa paṡṡhame āṃisassa ca dhammassa ca alābhena attano parassa ca antare sambhavantassa chiddassa vivarassa bhedassa santharaṇaṃ¹ pidhanaṃ saṅgaṇhanaṃ santhāro². Ayaṃ hi lokasannivāso alabbhamānena āṃisena dhammena cāti dvīhi chiddo. Tassa taṃ chiddaṃ yathā na

1. Sandharaṇaṃ (Ka)

2. Sandhāro (Ka)

paññāyati, evaṃ piṭhassa viya paccattharaṇena āmisena dhammena ca santharaṇaṃ saṅgaṇhanaṃ santhāroti vuccati. Ettha ca āmisena saṅgaho **āmisasanthāro** nāma. Taṃ karontena mātāpitūnaṃ bhikkhugatikassa veyyāvaccakarassa rañño corānañca aggaṃ aggahetvāpi dātuṃ vaṭṭati. Āmasitvā dinnehi rājāno ca corā ca anattampi karonti, jīvitakkhayampi pāpenti. Anāmasitvā dinnena attamanā honti, coranāgavatthu-ādīni cettha vatthūni kathetabbāni. Tāni samantapāsādikāya **vinayaṭṭhakathāya**¹ vitthāritāni. Sakkaccaṃ uddesadānaṃ pāḷivaṇṇanā dhammakathākathananti evaṃ dhammena saṅgaho **dhammasanthāro** nāma.

153-163. Dutiyādīni uttānatthāneva.

Santhāravaggavaṇṇanā niṭṭhitā.

(15) 5. Samāpattivaggavaṇṇanā

164. Pañcamassa paṭhame “ito pubbe parikammaṃ pavattaṃ, ito paraṃ bhavaṅgaṃ majjhe samāpatti”ti evaṃ saha parikammaṃ appanāparicchedappajānanā paññā **samāpattikusalatā**. Vuṭṭhāne kusalabhāvo **vuṭṭhānakusalatā**. Pageva vuṭṭhānaparicchedakaññānti evamettha attho daṭṭhabbo.

165. Dutiye ujuno bhāvo **ajjavaṃ**, ajimhatā akuṭilatā avaṅkatāti attho. **Abhidhammepi**² vuttaṃ “tatha katamo ajjavo? Yā ajjavatā ajimhatā akuṭilatā avaṅkatā, ayaṃ vuccati ajjavo”ti. **Anajjavañca** ajjavappaṭikkhepena veditabbaṃ. Gomuttavaṅkatā candalekhāvaṅkatā naṅgalakoṭivaṅkatāti hi tayo anajjavā. Ekacco hi bhikkhu paṭhamavaye majjhimapacchimavaye ca ekavīsatiyā anesaṅsu chasu ca agocaresu carati, ayaṃ gomuttavaṅkatā nāma ādito paṭṭhāya yāva pariyosānā paṭipattiyā vaṅkabhāvato. Eko paṭhamavaye pacchimavaye ca catupārisuddhisīlaṃ pūreti, lajjī kukkuccako sikkhākāmo hoti, majjhimavaye purimasadiso, ayaṃ candalekhāvaṅkatā nāma paṭipattiyā

1. Vi-Ṭṭha 2. 68 piṭṭhe.

2. Abhi 1. 260 piṭṭhe.

majjhaṭṭhāne vaṅkabhāvāpattito. Eko paṭhamavayepi majjhimavayepi catupārisuddhisīlam pūreti, lajjī kukkuccako sikkhākāmo hoti, pacchimavaye purimasadiso, ayam naṅgalakoṭivāṅkatā nāma pariyosāne vaṅkabhāvāpattito. Eko sabbampetaṃ vaṅkataṃ pahāya tīsu vayesu pesalo lajjī kukkuccako sikkhākāmo hoti, tassa yo so ujubhāvo, idaṃ ajjavaṃ nāma sabbattha ujubhāvasiddhito.

Maddavanti ettha “lajjavan”tipi paṭhanti. Evaṃ panettha attho—“tattha katamo lajjavo? Yo hiriyati hiriyitabbena hiriyati pāpakānaṃ akusalānaṃ dhammānaṃ samāpattiyā, ayam vuccati lajjavo”ti evaṃ vutto lajjibhāvo lajjavaṃ nāma. Idaṃ panettha nibbacanaṃ—lajjatīti lajjo, hirimā, tassa bhāgo lajjavaṃ, hirīti attho. Lajjā etassa atthīti lajjī yathā “mālī māyī”ti, tassa bhāvo lajjibhāvo, sā eva lajjā.

166. Tatiye **adhivāsanakhantī**ti ettha adhvāsanam vuccati khamanam. Tam hi paresam dukkaṭam duruttaṅca paṭivirodhākaraṇena attano upari āropetvā vāsanato “adhivāsanam”ti vuccati. Adhvāsanalakkhaṇā khanti adhvāsanakhanti. Sucisīlatā **soraccam**. Sā hi sobhanakammaratātā. Suṭṭhu vā pāpato oratabhāvo viratatāti āha “**suratabhāvo**”ti. Teneva **abhidhammepi**¹—

“Tattha katamaṃ soraccam? Yo kāyiko avītikkamo vācasiko avītikkamo kāyikavācasiko avītikkamo, idaṃ vuccati soraccam, sabbopi sīlasamvaro soraccam”ti—

āgato.

167. Catutthe sakhilo vuccati saṅhavāco, tassa bhavo **sākhalyam**, saṅhavācatā. tenāha “**saṅhavācāvasena sammodamānabhāvo**”ti. Saṅhavācāvasena hi sammodamānassa puggalassa bhāvo nāma saṅhavācatā. Teneva **abhidhamme**¹—

“Tattha katamaṃ sākhalyam? Yā sā vācā aṅḍakā kakkasā parakaṭukā parābhisaṅganī kodhasāmantā asamādhisaṃvattanikā,

1. Abhi 1. 260 piṭṭhe.

tathārūpiṃ vācam pahāya yā sā vācā nelā kaṇṇasukhā pemaṇiyā hadayaṅgamā porī bahujanakantā bahujamanāpā, tathārūpiṃ vācam bhāsītā hoti, yā tattha saṇhavācatā sakhilavācatā aphaṇṇasavācatā, idaṃ vuccati sākhalāyān”ti vuttam.

Tattha **aṇḍakā**ti sadose savāṇe rukkhe niyyāsapiṇḍo, ahicchattādīni vā uṭṭhitāni aṇḍakānīti vadanti, pheggurukkhassa pana kuthitassa aṇḍāni viya uṭṭhitā cuṇṇapiṇḍiyo vā gaṇṭhiyo¹ vā aṇḍakā. Idha pana byāpajjanakakkasādisabhāvato kaṇṭakappaṭibhāgena² vācā aṇḍakāti vuttā. Padumaṇālam viya sotam ghaṇṇasayamānā pavisaṇṭi **kakkasā** daṭṭhabbā. Kodhena nibbattā tassa parivārabhūtā **kodhasāmantā**. Pure saṃvaddhanārī **porī**. Sā viya sukumārā mudukā vācā porī viyāti porī. **Saṇhavācatā**ti-ādinā tam vācam pavattamānaṃ dasseti.

168. Pañcame “**avihimsāti karuṇāpubbabhāgo**”ti ettakameva idha vuttam, dīghanikāyaṭṭhakathāya **saṅgītisuttavaṇṇanāyam**³ pana “avihimsāti karuṇāpi karuṇāpubbabhāgopi”ti vuttam. **Abhidhammepi**⁴ “tattha katamā avihimsā? Yā sattesu karuṇā karuṇāyanā karuṇāyitattam karuṇācetovimutti, ayam vuccati avihimsā”ti āgatam. Etthāpi hi yā kāci “karuṇā”ti vuttā, karuṇācetovimutti pana appanāppattāva.

Sucisaddato bhāve yakāram ikārassa ca ukārādesam katvā ayam niddesoti āha “**socabyam sucibhāvo**”ti. Ettha ca **socabyanti** sīlavasena sucibhāvoti vuttam. Dīghanikāyaṭṭhakathāya **saṅgītisuttavaṇṇanāyam**³ pana “soceyyanti mettāya ca mettāpubbabhāgassa ca vasena sucibhāvo”ti vuttam. Teneva **abhidhammepi** “tattha katamam socabyam? Yā sattesu metti mettāyanā mettāyitattam mettācetovimutti, idaṃ vuccati socabyan”ti niddeso kato. Etthāpi hi “metti”ti-ādinā yā kāci mettā vuttā, mettācetovimutti pana appanāppattāva.

1. Taṇḍuyo (Ka) Mūlaṭṭi 1. 185 piṭṭhe passitabbam.

3. Dī-Ṭṭha 3. 164 piṭṭhe.

2. Aṇḍakappakatibhāvena (Ka)

4. Abhi 2. 89 piṭṭhe.

169-171. Chaṭṭhasattama-aṭṭhamāni heṭṭhā vuttanayāneva.

172. Navame kāmāṃ sampayuttadhammesu thirabhāvopi balaṭṭho eva, paṭipakkhehi pana akampanīyatam sātisayam balaṭṭhoti vuttam “**mutṭhassacce akampanenā**”ti-ādi.

173. Dasame paccanīkadhammasamanato **samatho**, samādhīti āha “**samathoti cittekaggatā**”ti. Aniccādinā vividhenākārena dassanato passanato **vipassanā**, paññāti āha “**saṅkhārapariggāhakañāṇan**”ti.

174. Ekādasame **dussīlyanti** samādinnessa sīlassa bhedakaro vītikkamo. **Diṭṭhivipattīti** “atthi dinnan”ti-ādinayappavattāya sammādiṭṭhiyā dūsikā micchādiṭṭhīti āha “**diṭṭhivipattīti micchādiṭṭhī**”ti.

175. Dvādasame **sīlasampadāti** sabbabhāvato tassa anūnatāpatti paripuṇṇabhāvo sīlasampadā. Paripūraṇattho hettha sampadāsaddo tenevāha “**paripuṇṇasīlatā**”ti. **Diṭṭhisampadāti** atthikadiṭṭhi-ādisammādiṭṭhipāripūribhāvena pavattam ñāṇam. Tañca kammassakatāsammādiṭṭhi-ādivasena pañcavidham hotīti āha “**tena kammassakatā**”ti.

176. Terasame **sīlavisuddhīti** visuddhim pāpetum samattham sīlam cittavisuddhi-ādi-uparivissuddhiyā paccayo bhavitum samattham visuddhasīnti vuttam hoti. Suvisuddhameva hi sīlam tassā padaṭṭhānam hoti. Tenāha “**sīlavisuddhīti visuddhisampāpakam sīlan**”ti. Etthāpi **visuddhisampāpakanti** cittavisuddhi-ādi-uparivissuddhiyā sampāpakanti attho daṭṭhabbo. **Abhidhamme**¹ panāyam “tattha katamā sīlavisuddhi? Kāyiko avītikkamo vācasiko avītikkamo kāyikavācasiko avītikkamo, ayam vuccati sīlavisuddhī”ti evam vibhattā.

Diṭṭhivissuddhīti visuddhim pāpetum samattham dassanañāṇam dassanavisuddhi, panamatthavisuddhim nibbānañca pāpetum upanetum samattham kammassakatañāṇādi sammādassananti attho. Tenāha “**visuddhisampāpikā -pa- pañcavidhāpi vā sammādiṭṭhī**”ti. Etthāpi **visuddhisampāpikāti** ñāṇadassanavisuddhiyā

1. Abhi 1. 264 piṭṭhe.

dassananibbānasaṅkhātāya paramatthavisuddhiyā ca sampāpikāti evamattho daṭṭhabbo. **Abhidhamme**¹ panāyaṃ “tattha katamā diṭṭhivissuddhi? Kammassakatañāṇaṃ saccānulomikaṃ ñāṇaṃ maggassa maggasamaṅgissa ñāṇaṃ phalasmaṅgissa ñāṇaṃ”ti evaṃ vuttaṃ.

Ettha ca idaṃ sakusalakammaṃ no sakaṃ, idaṃ pana kammaṃ sakanti evaṃ byatirekato anvayato ca kammassakatajānanañāṇaṃ **kammassakatañāṇaṃ**. Tividhaduccaritaṃ hi attanā katampi parena katampi no sakakammaṃ nāma hoti atthabhañjanato, sucaritaṃ sakakammaṃ nāma atthajananato. Vipassanāñāṇaṃ pana vacīsaccaṅca anulometi, paramatthasaccaṅca na vilometīti **saccānulomikañāṇanti** vuttaṃ. Vipassanāñāṇaṃ hi lakkhaṇāni paṭivijjhanatthaṃ ārambhakāle “aniccaṃ dukkhaṃ anattā”ti pavattaṃ vacīsaccaṅca anulometi, tatheva paṭivijjhanato paramatthasaccaṃ nibbānaṅca na vilometi na virādheti ekanteneva sampāpanato.

177. Cuddasame **diṭṭhivissuddhīti** paṭhamamaggasammādiṭṭhi vuttā. **Yathādiṭṭhissa ca padhānanti** taṃsampayuttameva vīriyaṃ. Teneva **Dīghanikāyaṭṭhakathā yaṃ**² “diṭṭhivissuddhīti ñāṇadassanaṃ kathitaṃ. Yathādiṭṭhissa ca padhānanti taṃ sampayuttameva vīriyaṃ”ti vuttaṃ. Ettha hi **ñāṇadassananti** ñāṇabhūtaṃ dassanaṃ. Tena dassanamaggaṃ vadati. **Taṃsampayuttameva vīriyanti** paṭhamamaggasampayuttavīriyamāha. Apica **diṭṭhivissuddhīti** sabbāpi maggasammādiṭṭhi. **Yathādiṭṭhissa ca padhānanti** taṃsampayuttameva vīriyaṃ. Teneva **dīghanikāyaṭṭhakathāyaṃ**² “apica purimapadena catumaggañāṇaṃ, pacchimapadena taṃsampayuttaṃ vīriyaṃ”ti vuttaṃ.

Atha vā **diṭṭhivissuddhīti** kammassakatañāṇādisaṅkhātā sabbāpi sammādiṭṭhi vuttā. **Yathādiṭṭhissa ca padhānanti** yo cetasiko vīriyārambho -pa- sammāvāyāmoti. Ayameva pāliyaṃ sameti. **Abhidhamme**¹ hi diṭṭhivissuddhi kho panāti yā paññā pajānanā -pa- amoho dhammavicayo sammādiṭṭhi. Yathādiṭṭhissa ca padhānanti yo cetasiko vīriyārambho -pa- sammāvāyāmo”ti evamayaṃ duko vibhatto. Teneva **Abhidhammaṭṭhakathāyaṃ**³ “yā paññā pajānanāti-ādīhi heṭṭhā vuttāni kammaṃsā katañāṇādīneva cattāri ñāṇāni vibhattāni. ‘Yo cetasiko

1. Abhi 1. 264 piṭṭhe.

2. Dī-Ṭṭha 3. 166 piṭṭhe.

3. Abhi-Ṭṭha 1. 434 piṭṭhe.

vīriyārambho'ti-ādīhi padehi niddiṭṭhaṃ vīriyaṃ gahitaṃ paññāya lokiyaṭṭhāne lokiyam, lokuttaraṭṭhāne lokuttaran'ti vuttaṃ.

Idhāpi visuddhisampāpikā catumaggasammādiṭṭhi, pañcavidhāpi vā sammādiṭṭhi diṭṭhivisuddhīti adhippāyena “**diṭṭhivisuddhīti visuddhisampāpikā sammādiṭṭhiyevā**”ti vuttaṃ.

Heṭṭhimamaggasampayuttaṃ vīriyanti idaṃ pana “yathādiṭṭhissa ca padhānanti paṭhamamaggasampayuttaṃ vīriyanti vuttan'ti adhippāyena vadati. Ettha ca taṃtaṃbhāṇakānaṃ matabhedenāyaṃ vaṇṇanābhedoti na aṭṭhakathāvacaṇānaṃ aññamaññavirodho saṅkitabbo. Atha yathādiṭṭhissa ca padhānanti heṭṭhimamaggasampayuttameva vīriyaṃ kasmā vuttanti āha “**taṃ hi tassā diṭṭhiyā anurūpattā**”ti-ādi. Tatha **tassā diṭṭhiyāti** heṭṭhimamaggasampayuttāya diṭṭhiyā. **Yathādiṭṭhissāti** anurūpadiṭṭhissa kalyāṇadiṭṭhissa nibbattitappakāradīṭṭhissa vā nibbattetabbapadhānānurūpadiṭṭhissa yathādiṭṭhippavattakiriyassa vāti evampettha atthaṃ saṃvaṇṇayanti.

178. Pannarasame samattaṃ tussanaṃ titti santuṭṭhi, natthi etassa santuṭṭhīti asantuṭṭhi, asantuṭṭhissa bhāvo **asantuṭṭhitā**. Yā kusalānaṃ dhammānaṃ bhāvanāya asantuṭṭhassa bhīyyokamyatā, tassā etaṃ adhivacaṇaṃ. Tāya hi samaṅgibhūto puggalo sīlaṃ pūretvā jhānaṃ uppādeti, jhānaṃ labhitvā vipassanaṃ ārabhati, āradhāvippassako arahattaṃ aggahetvā antarā vosānaṃ nāpajjati, “alamettāvataṃ katamettāvataṃ”ti saṅkocaṃ na pāpuṇāti. Tenāha “**aññātra arahattamaggā kusalesu dhammesu asantuṭṭhibhāvo**”ti. Tatra **aññātra arahattamaggāti** arahattamaggasampattaṃ vināti attho. “Appaṭivānitā ca padhānasmin”ti idaṃ heṭṭhā vuttanayattā uttānatthamevāti na vibhattaṃ.

179. Soḷasame muṭṭhā naṭṭhā sati etassāti muṭṭhassati, tassa bhāvo **muṭṭhassaccanti** āha “**muṭṭhassaccanti muṭṭhassatibhāvo**”ti. **Muṭṭhassatibhāvoti** ca satippaṭipakkho dhammo, na satiyā abhāvamattaṃ. **Asampajaññanti** “tatha katamaṃ asampajaññaṃ? Yaṃ aññāṇaṃ adassanaṃ -pa- avijjālaṅghī moho akusalamūlan”ti¹ evaṃ vuttā avijjāyeva. Tathā hi vijjāpaṭipakkho avijjā vijjāya pahātabbato, evaṃ sampajaññappaṭipakkho

1. Abhi 1. 162 piṭṭhe.

asampajaññaṃ. Yasmā pana sampajaññappaṭipakkhe sati tassa vasena ñāssa abhāvo hoti, tasmā vuttam **“aññānabhāvo”**ti.

180. Sattarasame **apilāpanalakkhaṇā satī**ti udake lābu viya yena cittaṃ ārammaṇe pilavitvā viya tiṭṭhati, na ogāhati, taṃ pilāpanaṃ. Na pilāpanaṃ apilāpanaṃ, taṃ lakkhaṇaṃ sabhāvo etissāti apilāpanalakkhaṇā.

Samāpattivaggavaṇṇanā niṭṭhitā.

Tatiyapaṇṇāsako niṭṭhito.

1. Koghapeyyāla

181. Ito paresu kodhavaggādīsu **upanandhanalakkhaṇoti** kujjhanavasena **“akkocchi maṃ avadhi maṃ”**ti¹ ādinā citta-pariyonandhanalakkhaṇo. Pubbakālikaṃ kodhaṃ upanayhati bandhati, kujjhanākāraṃ pabandhati ghaṭeti. Āghātavattunā cittaṃ bandhanti viya hotīti aparakālo kodho upanāho. Suṭṭhu kataṃ kāraṇaṃ upakāro sukatakāraṇaṃ, tassa pubbakāritālakkaṇassa guṇassa makkhanaṃ udakapuñchaniyā viya sarīrānugatassa udakassa puñchanaṃ vināsaṃ lakkhaṇametassāti **sukatakāraṇamakkhanalakkhaṇo**. Tathā hi so paresaṃ guṇānaṃ makkhanaṭṭhena makkhoti vuccati. Bahussutepi puggale ajjhotthariṃsu, **“īdisassa ca bahussutassa aniyatā gahitā, tava ca mama ca ko viseso”**ti-ādinā nayena uppajjamāno yugaggāhī palāsoti āha **“yugaggāhalakkhaṇo palāso”**ti. Tattha yugaggāho nāma samadhuraggāho, asamampi attanā samaṃ katvā gaṇhanaṃ. Palāsatiṭi **palāso**, paresaṃ guṇe ḍaṃsitvā dantehi viya chinditvā attano guṇehi same karotiṭi attho.

Usūyanalakkhaṇāti paresaṃ sakkārādīni khiyyanalakkhaṇā. Maccherassa bhāvo **macchariyaṃ**. Tañca āvāsamacchariyādivasena pañcavidhanti āha **“pañcamaccherabhāvo macchariyaṃ”**ti. **Maccharāyanalakkhaṇanti** attano

1. Khu 1. 13 piṭṭhe Dhammapade.

sampattiyā parehi sādharmaṇabhāve asahanalakkhaṇaṃ.

Katappaṭicchādanalakkhaṇāti katapāpappaṭicchādanalakkhaṇā.

Kerāṭikabhāvena uppajjamānaṃ sāṭheyanti āha “**kerāṭikalakkhaṇaṃ sāṭheyān**”ti. Aññathā attano pavedanapuggalo kerāṭiko nekatikavāṇijoti vadanti kerāṭiko hi puggalo ānandamaccho viya hoti.

187. **Yathābhatam nikkhitto evam nirayeti** yathā ābhatam kañci āharitvā ṭhapito, evam attano kammunā nikkhitto niraye ṭhapitoyevāti attho.

2. Akusalapeyyāla

191.200. Dukkassa vaḍḍhi etesanti **dukkhavaḍḍhikā**. Ye hi dukkham vaḍḍhenti, punappunaṃ uppādentī, dukkhassa vaḍḍhi tesam atthīti evam vuttaṃ. **Sukhavaḍḍhikā**ti etthāpi eseva nayo.

3. Vinayapeyyāla

201. **Atthavaseti** vuddhivisesse ānisaṃsavisesse. Tesam pana sikkhāpadapaññattikāraṇattā āha “**dve kāraṇāni sandhāyā**”ti atthoyeva vā **atthavaso**, dve atthe dve kāraṇānīti vuttaṃ hoti. Atha vā attho phalaṃ tadadhīnavuttitāya vaso etassāti **atthavaso**, kāraṇanti evampettha attho daṭṭhabbo. Yathā “anabhijjhā dhammapadan”ti vutte anabhijjhā eko dhammakotṭhāsoti attho hoti, evamidhāpi **sikkhāpadanti** sikkhākotṭhāso sikkhāya eko padesoti ayamettha attho daṭṭhabboti āha “**sikkhāpadam paññattanti sikkhākotṭhāso ṭhapito**”ti.

Samghasutthu nāma samghassa sutṭhubhāvo “sutṭhu devā”ti¹ āgataṭṭhāne viya “sutṭhu bhante”ti vacanasampannicchanabhāvo. Tenāha “**samghasutṭhutāyāti samghassa sutṭhubhāvāyā**”ti-ādi. **Dummaṅkūnaṃ puggalānaṃ niggaḥāyāti** dummaṅkū nāma dussīlapuggalā. Ye maṅkutaṃ āpādiyamānāpi dukkhena āpajjanti, vītikkaṃaṃ karontā vā katvā

1. Vi-Ṭṭha 1. 188 piṭṭhe.

vā na lajjanti, tesam niggaṭṭhāya. Te hi sikkhāpade asati “kiṃ tumhehi diṭṭhim, kiṃ sutam, kiṃ amhehi kataṃ, katarasmim vatthusmim katamam āpattim ropetvā amhe niggaṭṭhā”ti saṅgham viheṭhessanti, sikkhāpade pana sati tesam saṅgho sikkhāpadam dassetvā dhammena vinayena satthusāsanena niggaṭṭhessati. Tena vuttam “dummaṅkūnam puggalānam niggaṭṭhāyā”ti.

Pesalānam bhikkhūnam phāsuvihārāyāti pesalānam piyasīlānam bhikkhūnam phāsuvihārathāya. Piyasīlā hi bhikkhū kattabbākattabbaṃ sāvajjānavajjam velam mariyādam ajānantā sikkhattayapāripūriyā ghaṭamānā kilamanti, ubbāḷhā honti, kattabbākattabbaṃ pana sāvajjānavajjam velam mariyādañca ṇatvā sikkhattayapāripūriyā ghaṭentā na kilamanti, na ubbāḷhā honti. Tena tesam sikkhāpadapaññāpanā phāsuvihārāya saṃvattati. Yo vā dummaṅkūnam puggalānam niggaṭṭho, sveva etesam phāsuvihāro. Dussīlapuggale nissāya hi uposatho na tiṭṭhati¹, pavāraṇā na tiṭṭhati¹, saṅghakammāni nappavattanti, sāmaggī na hoti, bhikkhū anekaggā uddesaparipucchākammaṭṭhānādīni anuyuñjituṃ na sakkonti. Dussīlesu pana niggaṭṭhesu sabbopi ayam upaddavo na hoti, tato pesalā bhikkhū phāsu viharanti. Evaṃ “pesalānam bhikkhūnam phāsuvihārāyā”ti ettha dvidhā attho veditabbo.

“Na vo aham cunda diṭṭhadhammikānaṃyeva āsavānam saṃvarāya dhammam desemī”ti² ettha vivādamūlabhūtā kilesā āsavāti āgatā.

“Yena devūpapatyassa, gandhabbo vā vihaṅgamo.

Yakkhattam yena gaccheyyam, manussattañca abbaje.

Te mayham āsavā khīṇā, viddhastā vinaḷikatā”ti³—

ettha tebhūmakam kamman avasesā ca akusalā dhammā. Idha pana parūpavādavipparisāravadhabandhanādayo ceva apāyadukkhabhūtā ca nānappakārā upaddavā āsavāti āha “**diṭṭhadhamme imasmim yeva attabhāve vītikkamapaccayā paṭiladdhabbānan**”ti-ādi. Yadi hi bhagavā sikkhāpadam na paññāpeyya, tato asaddhammapparisēvana-adinnādānapāṇātipātādi hetu ye uppajjeyyūṃ parūpavādādayo diṭṭhadhammikā nānappakārā anattā, ye ca

1. Tiṭṭhati (Ka)

2. Di 3. 107 piṭṭhe.

3. Am 1. 348 piṭṭhe.

tannimittameva nirayādīsu nibbattaṣa
 pañcavidhabandhanakammakāraṇādivasena mahādukkhānubhavanappakārā
 anattā, te sandhāya idaṃ vuttam **“diṭṭhadhammikānam āsavānam
 samvarāya samparāyikānam āsavānam paṭighātāyā”**ti. Diṭṭhadhammo
 vuccati paccakkho attabhāvo, tatha bhavā **diṭṭhadhammikā**. Samparetabbato
 pecca gantabbato samparāyo, paraloko, tatha bhavā **samparāyikā**.

Akusalaverānanti paṇātipātādipañcaduccaritānam. Tāni verakāraṇattā
 “verāni”ti vuccanti, puggalesu pana uppajjamānāni verāni. **Te evavā
 dukkhadhammāti** heṭṭhā vuttā vadhabandhanādayo. **Tesaṃ
 pakkhupacchedanattāyāti** tesaṃ pāpicchānam pakkhupacchedāya
 gaṇabhojanasadisam sikkhāpadam paññattam. **Paṇḍitamanussānanti**
 lokiyaparikkhakajanānam. Te hi sikkhāpadapaññattiyā sati
 sikkhāpadapaññattim ṇatvā vā yathāpaññattam paṭipajjamāne bhikkhū disvā
 vā “yāni vata loka mahājanassa rajjanadussanamuyhanattānāni, tehi ime
 samaṇā sakyaputtiyā ārakā viharanti, dukkaram vata karonti, bhāriyam vata
 karontī”ti pasādam āpajjanti vinayapiṭake potthakam disvā
 micchādiṭṭhikatavedibrahmaṇo viya. **Uparūparipasādabhāvāyāti** bhiyyo
 bhiyyo pasāduppādanattam. Yepi hi sāsane pasannā kulaputtā, tepi
 sikkhāpadapaññattim vā ṇatvā yathāpaññattam paṭipajjamāne bhikkhū vā
 disvā “aho ayyā dukkarakārino, ye yāvajīvam ekabhattam brahmacariyam
 vinayasamvaram anupālentī”ti bhiyyo bhiyo pasīdanti.

Saddhammassa ciraṭṭhitatthanti pariyattisaddhammo
 paṭipattisaddhammo adhigamasaddhammoti tividhassapi saddhammassa
 ciraṭṭhitattam. Tatha piṭakattayasāṅgahitam sabbampi buddhavacanam
pariyattisaddhammo nāma. Terasa dhutaguṇā cuddasa khandhakavattāni dve
 asīti mahāvattāni silasamādhivipassanāti ayam **paṭipattisaddhammo** nāma.
 Cattāro ariyamaggā cattāri ca sāmāññaphalāni nibbānañcāti ayam
adhigamasaddhammo nāma. So sabbo yasmā sikkhā padapaññattiyā sati
 bhikkhū sikkhāpadañca tassa vibhaṅgañca tadatthajotanattam aññañca
 budhavacanam pariyaṇanti, yathāpaññattañca paṭipajjamānā paṭipattim
 pūretvā paṭipattiyā adhigantabbam lokuttaradhammam adhigacchanti, tasmā
 sikkhāpadapaññattiyā ciraṭṭhitiko hoti.

Pañcavidhassapi vinayassāti tadaṅgavinayādivasena pañcappakārassa vinayassa. **Vinayaṭṭhakathāyam**¹ pana sikkhāpadapaññattiyā sati saṃvaravinayo ca pahānavinayo ca samathavinayo ca paññattivinayo cāti catubbidhopi vinayo anuggahito hoti upattambhito supatthambhito. Tena vuttam “**vinayānuggahāyā**”ti. Tattha **saṃvaravinayoti** silasaṃvaro satisaṃvaro ñāṇasaṃvaro khantisaṃvaro vīriyasaṃvaroti pañcavidhopi saṃvaro yathāsakaṃ saṃvaritabbānaṃ vinetabbānaṃcā kāyaduccaritādīnaṃ saṃvaraṇato saṃvaro, vinayanato vinayoti vuccati. **Pahānavinayoti** tadaṅgappahānaṃ vikkhambhanappahānaṃ samucchedappahānaṃ paṭippassaddhippahānaṃ nissaraṇappahānanti pañcavidhampi pahānaṃ yasmā cāgaṭṭhena pahānaṃ, vinayanaṭṭhena vinayo, tasmā pahānavinayoti vuccati. **Samathavinayoti** satta adhikaraṇasamathā. **Paññattivinayoti** sikkhāpadameva. Sikkhāpadapaññattiyā hi vijjamānāya eva sikkhāpadasambhavato sikkhāpadasaṅkhāto paññattivinayoti sikkhāpadapaññattiyā anuggahito hoti.

202-230. **Bhikkhūnaṃ pañcāti**

nidānapārājikasamghādisesāniyatavitthāruddesavasena pañca bhikkhūnaṃ uddesā. **Bhikkhunīnaṃ cattāro**ti bhikkhūnaṃ vuttesu aniyatuddesaṃ ṭhapetvā avasesā cattāro.

Ehibhikkhūpasampadāti “ehi bhikkhū”ti vacanamattena paññatta-upasampadā. Bhagavā hi ehibhikkhubhāvāya upanissayasampannaṃ puggalaṃ disvā rattapaṃsukūlantarato suvaṇṇavaṇṇaṃ dakkhiṇahatthaṃ nīharitvā brahmaghosaṃ nicchārento “ehi bhikkhu, cara brahmacariyaṃ sammā dukkhassa antakiriyaṃ”ti vadati. Tassa saheva bhagavato vacanena gihiliṅgaṃ antaradhāyati, pabbajjā ca upasampadā ca ruhati, bhaṇḍu kāśāvavasano hoti ekaṃ nivāsetvā ekaṃ pārupitvā ekaṃ aṃse ṭhapetvā vāma-aṃsakūṭe āsattanīluppalavaṇṇamattikāpatto.

“Ticīvaraṅca patto ca, vāsi sūci ca bandhanaṃ.

Parissāvanena aṭṭhete, yuttayogassa bhikkhuno”ti²—

1. Vi-Ṭṭha 1. 190 piṭṭhe.

2. Dī-Ṭṭha 1. 184; Ma-Ṭṭha 2. 116; Ma-Ṭṭha 3. 231; Ma-Ṭṭha 2. 380; Vi-Ṭṭha 1. 205; Apadāna-Ṭṭha 1. 76; Buddhavaṃsa-Ṭṭha 333; Jātaka-Ṭṭha 1. 78; Mahāniddeśa-Ṭṭha 409 piṭṭhesu.

evaṃ vuttehi aṭṭhahi parikkhārehi sarīre paṭimukkehiyeva vassasatikatthero viya iriyāpathasampanno buddhācariyako buddhupajjhāyako sammāsambuddhaṃ vandamānoyeva tiṭṭhahi.

Saraṇagamanūpasampadāti “buddhaṃ saraṇaṃ gacchāmi”ti-ādinā nayena tikkhattuṃ vācaṃ bhinditvā vuttehi tīhi saraṇagamanehi anuññāta-upasampadā. **Ovādūpasampadā**ti ovādappaṭiggahaṇa-upasampadā. Sā ca “tasmātiha te kassapa evaṃ sikkhitabbaṃ ‘tibbaṃ me hirottappaṃ, paccupaṭṭhitāṃ bhavissati thesesu navesu majjhimesū’ti. Evaṃ hi te kassapa sikkhitabbaṃ. Tasmātiha te kassapa evaṃ sikkhitabbaṃ ‘yaṃ kiñci dhammaṃ suṇissāmi kusalūpasamhitaṃ sabbaṃ taṃ aṭṭhiṃ katvā manasi karitvā sabbacetasā samannāharitvā ohitasoto dhammaṃ suṇissāmi’ti, evaṃ hi te kassapa sikkhitabbaṃ. Tasmātiha te kassapa evaṃ sikkhitabbaṃ ‘sātasahagatā ca me kāyagatāsati na vijahissati’ti, evaṃ hi te kassapa sikkhitabbaṃ”ti¹ iminā ovādappaṭiggahaṇena mahākassapattherassa anuññātapasampadā.

Pañhabyākaraṇūpasampadā nāma sopākassa anuññāta-upasampadā. Bhagavā kira pubbārāme anucaṅkamantaṃ sopākasāmaṇeraṃ “uddhumātakasaññāti vā sopāka rūpasaññāti vā ime dhammā nānatthā nānābyañjanā, udāhu ekatthā byañjanaṃeva nānan”ti dasa asubhanissite pañhe pucchi. So byākāsi. Bhagavā tassa sādhuṅkāraṃ datvā “kativassosi tvaṃ sopākā”ti pucchi. Sattavassohaṃ bhagavāti. Sopāka tvaṃ mama sabbaññutaññāṇena saddhiṃ saṃsanditvā pañhe byākāsīti āradhacitto upasampadaṃ anujāni. Ayaṃ pañhabyākaraṇūpasampadā.

Ñatticatuttha-upasampadā nāma bhikkhūnaṃ etarahi upasampadā. **Garudhammūpasampadā**ti garudhammappaṭiggahaṇena upasampadā. Sā ca mahāpajāpatiyā aṭṭhagarudhammappaṭiggahaṇena anuññātā. **Ubhatosaṃghe upasampadā** nāma bhikkhuniyā bhikkhunisaṃghato ñatticatutthena, bhikkhusaṃghato ñatti catutthenāti imehi dvīhi kammehi anuññātā aṭṭhavācīkūpasampadā. **Dūtena upasampadā** nāma aḍḍhakāsiyā gaṇikāya anuññātā upasampadā.

1. Saṃ 1. 420 piṭṭhe.

Ñattikammaṃnava ṭhānāni gacchatīti katamāni nava ṭhānāni gacchati? Osāraṇaṃ, nissāraṇaṃ, uposatho, pavāraṇā, sammuti, dānaṃ, paṭiggahaṃ, paccukkaḍḍhanaṃ, kammalakkhaṇaññeva navamanti evaṃ vuttāni nava ṭhānāni gacchati. Tattha “suṇātu me bhante saṃgho, itthannāmo itthannāmassa āyasmato upasampadāpekkho, anusitṭho so mayā, yadi saṃghassa pattakallaṃ, itthannāmo āgaccheyya, āgacchāhīti vattabbo”¹ti evaṃ upasampadāpekkhassa osāraṇā **osāraṇā** nāma.

“Suṇantu me āyasmantā, ayaṃ itthannāmo bhikkhu dhammakathiko, imassa neva suttaṃ āgacchati, no suttavibhaṅgo, so atthaṃ asallakkhetvā byañjanacchāyāya atthaṃ paṭibāhati. Yadāyasmantānaṃ pattakallaṃ, itthannāmaṃ bhikkhuṃ vuṭṭhāpetvā avasesā imaṃ adhikaraṇaṃ vūpasameyyāma”²ti evaṃ ubbāhikavinicchaye dhammakathikassa bhikkhuno nissāraṇā **nissāraṇā** nāma.

“Suṇātu me bhante saṃgho, ajjuposatho pannaraso. Yadi saṃghassa pattakallaṃ, saṃgho uposathaṃ kareyyā”³ti evaṃ uposathakammavasena ṭhapitā ñatti **uposatho** nāma.

“Suṇātu me bhante saṃgho, ajja pavāraṇā pannarasī. Yadi saṃghassa pattakallaṃ, saṃgho pavāreyyā”⁴ti evaṃ pavāraṇākammavasena ṭhapitā ñatti **pavāraṇā** nāma.

“Suṇātu me bhante saṃgho, itthannāmo itthannāmassa āyasmato upasampadāpekkho. Yadi saṃghassa pattakallaṃ, ahaṃ itthannāmaṃ anusāseyyan”⁵ti, “yadi saṃghassa pattakallaṃ, itthannāmo itthannāmaṃ anusāseyyā”⁶ti, “yadi saṃghassa pattakallaṃ, ahaṃ itthannāmaṃ antarāyike dhamme puccheyyan”⁷ti, “yadisāṃghassa pattakallaṃ, itthannāmo itthannāmaṃ antarāyike dhamme puccheyyā”⁸ti, “yadi saṃghassa pattakallaṃ, ahaṃ itthannāmaṃ vinayaṃ puccheyyan”⁹ti, “yadi saṃghassa pattakallaṃ, ahaṃ itthannāmena vinayaṃ puṭṭho vissajjeyyan”¹⁰ti, “yadi saṃghassa pattakallaṃ, itthannāmo itthannāmena vinayaṃ

1. Vi 3. 131 piṭṭhe.

puṭṭho vissajjeyyā”ti evaṃ attānaṃ vā paraṃ vā sammannitum ṭhapitā utti **sammuti** nāma.

“Suṇātu me bhante saṃgho, idaṃ cīvaraṃ itthannāmassa bhikkhuno nissaggiyaṃ saṃghassa nissaṭṭhaṃ. Yadi saṃghassa pattakallaṃ, saṃgho imaṃ cīvaraṃ itthannāmassa bhikkhuno dadeyyā”ti, “yadāyasmantānaṃ pattakallaṃ, āyasmantā imaṃ cīvaraṃ itthannāmassa bhikkhuno dadeyyūn”ti evaṃ nissaṭṭhacīvarapattādīnaṃ dānaṃ **dānaṃ** nāma.

“Suṇātu me bhante saṃgho, ayaṃ itthannāmo bhikkhu āpattiṃ sarati vivarati uttāniṃ karoti deseti. Yadi saṃghassa pattakallaṃ ahaṃ itthannāmassa bhikkhuno āpattiṃ paṭiggaṇḥeyyaṃ”ti, “yadāyasmantānaṃ pattakallaṃ, ahaṃ itthannāmassa bhikkhuno āpattiṃ paṭiggaṇḥeyyaṃ”ti, tena vattabbo “passasī”ti. Āma passāmīti. “Āyatiṃ saṃvareyyāsī”ti evaṃ āpattipāṭiggaho **paṭiggaho** nāma.

“Suṇantu me āyasmantā āvāsikā, yadāyasmantānaṃ pattakallaṃ, idāni uposathaṃ kareyyāma, pātimokkhaṃ uddiseyyāma, āgame kāle pavāreyyāmā”ti, te ce bhikkhave bhikkhū bhaṇḍanakāraḥ kalahakāraḥ saṃghe adhikaraṇakāraḥ taṃ kālaṃ anuvaseyyum, āvāsikena bhikkhunā byattena paṭibalena āvāsikā bhikkhū ñāpetabbā “suṇantu me āyasmantā āvāsikā, yadāyasmantānaṃ pattakallaṃ, idāni uposathaṃ kareyyāma, pātimokkhaṃ uddiseyyāma, āgame juṇhe pavāreyyāmā”ti evaṃ katā pavāraṇā **paccukkaḍḍhanā** nāma.

Sabbeheva ekajjhaṃ sannipatitabbaṃ, sannipatitvā byattena bhikkhunā paṭibalena saṃgho ñāpetabbo “suṇātu me bhante saṃgho, amhākaṃ bhaṇḍana-jātānaṃ kalaha-jātānaṃ vivādāpannānaṃ viharataṃ bahu assāmaṇakaṃ ajjhāciṇṇaṃ bhāsita-parikkantaṃ. Sace mayaṃ imāhi āpattihi aññamaññaṃ kāressāma, siyāpi taṃ adhikaraṇaṃ kakkhaḷattāya vāḷattāya bhedāya saṃvatteyya. Yadi saṃghassa pattakallaṃ, saṃgho imaṃ adhikaraṇaṃ tiṇavatthārakena vūpasameyya ṭhapetvā thullavajjaṃ ṭhapetvā ghipaṭisaṃyuttan”ti evaṃ tiṇavatthārakasamathe katā sabbapaṭhamā sabbasaṅgāhikañatti **kammalakkhaṇaṃ** nāma.

Ñattidutiyakammaṃ satta ṭhānāni gacchatīti katamāni satta ṭhānāni gacchati? Osāraṇaṃ, nissāraṇaṃ, sammuti, dānaṃ, uddharaṇaṃ, desanaṃ, kammalakkhaṇāññeva sattamanti evaṃ vuttāni satta ṭhānāni gacchati. Tattha vaḍḍhassa licchavino pattanikkujjanavasena khandhake vuttā **nissāraṇā**, tasseva patta-ukkujjanavasena vuttā **osāraṇā** ca veditabbā. Sīmāsammuti ticīvarena avippavāsasammuti santhasammuti bhattuddesaka senāsanaggāhāpaka bhaṇḍāgārika cīvarappaṭiggāhaka cīvarabhājaka yāgubhājaka phalabhājaka khajjabhājaka-appamattakavissajjaka sāṭiyaggāhāpaka pattaggāhāpaka ārāmikapesakasāmaṇerapesakasammutīti etāsaṃ sammutīnaṃ vasena **sammuti** veditabbā. Kathinacīvaradāna-matakacīvaradānavasena **dānaṃ** veditabbaṃ. kathinuddhāraṇavasena **uddhāro** veditabbo. Kuṭivattuvihāravatthudesanāvasena **desanā** veditabbā. Yā pana tiṇavattthārasamathe sabbasaṅgāhikañattiñca ekekasmim pakkhe ekekaṃ ñattiñcāti tissopi ñattiyo ṭhapetvā puna ekasmim pakkhe ekā, ekasmim pakkhe ekāti dvepi ñattidutiyakammavācā vuttā, tāsāṃ vasena **kammalakkhaṇaṃ** veditabbaṃ.

Ñatticatutthakammaṃ satta ṭhānāni gacchatīti katamāni sattaṭhānāni gacchati? Osāraṇaṃ, nissāraṇaṃ, sammuti, dānaṃ, niggahaṃ, samanubhāsanāṃ, kammalakkhaṇaṃñeva sattamanti evaṃ vuttāni satta ṭhānāni gacchati. Tattha tajjanīyakammādīnaṃ sattannaṃkammānaṃ vasena **nissāraṇā**, tesāmyeva ca kammānaṃpaṭippassambhanavasena **osāraṇā** veditabbā. Bhikkhunovādakasammutivasena **sammuti** veditabbā. Parivāsadānaṃnattadānavasena **dānaṃ** veditabbaṃ. Mūlāyapaṭikkassanakammavasena **niggaho** veditabbo. Ukkhittānuvattakā, aṭṭha yāvattatīyakā, ariṭṭho, caṇḍakālī ca imete yāvattatīyakāti imāsaṃ ekādasannaṃ samanubhāsanānaṃ vasena **samanubhāsanā** veditabbā. Upasampadakamma-abbhānakammavasena **kammalakkhaṇaṃ** veditabbaṃ.

Dhammasammukhatāti-ādīsu yena dhammena yena vinayena yena satthusāsanena saṅgho kammaṃ karoti, ayaṃ **dhammasammukhatā vinayasammukhatā satthusāsanasammukhatā**. Tattha **dhammoti** bhūtavatthu. **Vinayoti** codanā ceva sāraṇā ca. **Satthusāsanāṃ** nāma ñattisampadā ceva anusāvanasampadā ca. Yāvatikā bhikkhū kammappattā, te āgatā honti,

chandārahānaṃ chando āhaṭo hoti, sammukhībhūtā nappaṭikkosanti, ayaṃ
saṃghasammukhatā. Yassa saṃgho kammaṃ karoti, tassa sammukhībhāvo
puggalasammukhatā. Sesamettha vuttanayattā uttānatthameva.

Iti manorathapūraṇiyā aṅguttaranikāyaṭṭhakathāya

Dukanipātavaṇṇanāya anuttānatthadīpanā samattā.

Tikanipāta

1. Paṭhamapaṇṇāsaka

1. Bālavagga 1. Bhayasuttavaṇṇanā

1. Tikanipātassa paṭhame **bhayanti** bhīti cetaso byadhotti āha “**cittutrāso**”ti. **Upaddavoti** antarāyo. Tassa pana vikkhepakāraṇattā vuttaṃ “**anekaggatākāro**”ti. **Upasaggoti** upasajjanam, devatopapīḷādinā appaṭikāravighātāpatti. Sā pana yasmā paṭikārābhāvena vihaññamānassa kiñci kātuṃ asamatthassa oṣīdanakāraṇam, tasmā vuttaṃ “**tattha tattha lagganākāro**”ti. **Yathāvutte divase anāgacchantesūti** vañcetvā āgantum niyamatadivase anāgacchantesu. **Dvāre aggim datvāti** bahi anikkhamanattāya dvāre aggim datvā.

Nalehi channapaṭicchannāti nalehi tiṇacchadanasaṅkhepena upari chādetvā tehiyeva dārukuṭikaniyāmena paritopi chādītā. **Eseva nayoti** iminā tiṇehi channatam sesasambhārānam rukkhamayatañca atidisati.

Viveputteti antabhāvopalakkaṇam. Te hi nippitikā avinītā asmyatā yaṃ kiñci kārino¹. Sesamettha uttānameva.

Bhayasuttavaṇṇanā niṭṭhitā.

2. Lakkhaṇasuttavaṇṇanā

2. Dutiye lakkhīyati bālo ayanti ñāyati etenāti lakkhaṇam, kamman lakkhaṇametassāti **kammalakkhaṇoti** āha “**kāyadvārādipavattam kamman**”ti-ādi. Apadīyanti dosā etena rakkhīyanti, lūyanti chijjanti vāti apadānam, sattānam sammā, micchā vā pavattappayogo. Tena sobhatīti

1. Nakārino (Ka)

apadanasobhanī. Tenāha “paññā nāmā”ti-ādi. Attano caritenevāti attano cariyāya eva. Sesamettha uttānameva.

Lakkhaṇasuttavaṇṇanā niṭṭhitā.

3-4. Cintīsuttādivaṇṇanā

3-4. Tatiye **etehī**ti duccintitacintitādīhi. Etena lakkhaṇasaddassa saraṇatthatamāha. **Tānevāti** lakkhaṇāni eva. **Assāti** bālassa. Bālo ayanti nimīyati sañjānīyati etehīti **bālanimittāni**. Apadānaṃ vuccati vikhyātaṃ kammaṃ, duccintitacintitādīni ca bāle vikhyātāni asādhāraṇabhāvena. Tasmā “**bālassa apadānāni**”ti. Abhiḥhādīhi duṭṭhaṃ dūsitāṃ cintitāṃ duccintitāṃ, taṃ cintetīti **duccintitacintī**. Lobhādīhi duṭṭhaṃ bhāsitaṃ musāvādādīṃ bhāsatīti **dubbhāsitabhāsī**. Tesāmyeva vasena kattabbato dukkaṭakammaṃ paṇātipātādīṃ karotīti **dukkaṭakammakārī**. Tenāha “**cintayanto**”ti-ādi. **Vuttānusārenāti** “bālo ayan”ti-ādinā vuttassa atthavacanassa “paṇḍito ayanti etehi lakkhīyati”ti-ādinā anussaraṇena. **Manosucaritādīnaṃ vasenāti** “cintayanto anabhiḥhābyāpādasammādassanavasena sucintitameva cintetī”ti-ādinā manosucaritādīnaṃ tiṇṇaṃ sucaritānaṃ vasena yojetabbāni. Catutthaṃ vuttanayattā uttānatthameva.

Cintīsuttādivaṇṇanā niṭṭhitā.

5-10. Ayonisosuttādivaṇṇanā

5-10. Pañcame **kati nu kho anussatiṭṭhānāni**ti-ādi chakke āvibhavissatīti. **Evaṃ cintitanti** ayoniso cintitāṃ. **Apañhameva pañhanti kathesīti** apañhameva pañho ayanti maññamāno vissajjesi. **Dasavidhaṃ byañjanabuddhiṃ aparihāpetvāti**—

“Sithilaṃ dhanitaṅca dīgharassaṃ,
Garukaṃ lahukaṅca niggahītaṃ.
Sambandhaṃ vavatthitaṃ vimuttaṃ,
Dasadhā byañjanabuddhiyā pabhedo”¹—

evaṃ vuttaṃ dasavidhaṃ byañjanabuddhiṃ aparihāpetvā.

Tattha ṭhānakaraṇāni sithilāni katvā uccāretabbaṃ akkharaṃ **sithilaṃ**, tāniyeva dhanitāni asithilāni katvā uccāretabbaṃ akkharaṃ **dhanitaṃ**. Dvimattakālaṃ **dīghaṃ**, ekamattakālaṃ **rassaṃ**. **Garukanti** dīghameva, yaṃ vā “āyasmato buddharakkhitattherassā”^{ti} saṃyogaparaṃ katvā vuccati, **lahukanti** rassameva, yaṃ vā “āyasmato buddharakkhitattherassā”^{ti} evaṃ visāmyogaparaṃ katvā vuccati. **Niggahītanti** yaṃ karaṇāni niggahetvā avissajjetvā avivaṭena mukhena sānunaṣikaṃ katvā vattabbaṃ. **Sambandhanti** yaṃ parapadena sambandhitvā “tuṇhassā”^{ti} vuccati. **Vavatthitanti** yaṃ parapadena asambandhaṃ katvā vicchiditvā “tuṇhī assā”^{ti} vuccati. **Vimuttanti** yaṃ karaṇāni aniggahetvā vissajjetvā vivaṭena mukhena sānunaṣikaṃ akatvā vuccati. **Dasadhā byañjanabuddhiyā pabhedoti** evaṃ sithilādivasena byañjanabuddhiyā akkharuppādakacittassa dasappakārena pabhedo. Sabbāni hi akkharāni cittasamuṭṭhānāni yathādhippetatthabyañjanato byañjanāni ca.

“Aṭṭhānaṃ vo etaṃ āvuso sārīputtā”^{ti}-ādi pañcake āvibhavissati. “Kati nu kho ānanda anussatiṭṭhānāni”^{ti}-ādi pana chakke āvi bhavissati. Chaṭṭhādīsu natthi vattabbaṃ.

Ayonisosuttādivaṇṇanā niṭṭhitā.

Bālavaggavaṇṇanā niṭṭhitā.

2. Rathakāravagga 1. Nātasuttavaṇṇanā

11. Dutiyaṃ paṭhame nātoyeva paññātoti āha “**nāto paññāto**”^{ti}. Kassa ananulomiketi āha “**sāsanassā**”^{ti}, sāsanassa ananulomike appatirūpeti attho. Idāni ananulomikasaddassa nibbacaṇaṃ dassento “**na anulometi ananulomikaṇ**”^{ti}

1. Dī-Ṭṭha 1. 159; Ma-Ṭṭha 2. 108; Vi-Ṭṭha 4. 247; Vinayasaṅgaha-Ṭṭha 397 piṭṭhesu.

āha. **Sāsanassāti** vā sāsananti attho. Sāsanam na anulometīti ananulomikanti evamettha sambandho daṭṭhabbo. **Sabhāgavisabhāganti** līngato sabhāgavisabhāgam. **“Piyapuggale”ti āhāti** līngasabhāgehi avisesetvā āha. **Ummādaṃ pāpuṇīti** so kira sīlam adhiṭṭhāya pihitadvāragabbhe sayanapiṭṭhe nisīditvā bhariyam ārabha mettam bhāvento mettāmukhena uppanna rāgena andhīkato bhariyāya santikam gantukāmo dvāram asallakkhetvā bhittim bhinditvāpi nikkhamitukāmatāya bhittim paharanto sabbarattim bhittiyuddhamakāsi. Sesamettha suviññeyyameva.

Ñātasuttavaṇṇanā niṭṭhitā.

2. Sāraṇīyasuttavaṇṇanā

12. Dutiye **catupārisuddhisīlampi pabbajjānissitamevāti** iminā pabbajjūpagatasamanantameva catupārisuddhisīlampi samādinnameva hotīti dasseti. **Maggasannissitāneva hontīti** maggādhigamatthāya paṭipajjitabbattā kaṣiṇaparikkammādīni maggasannissitāneva hontī, tasmā maggaggahaṇeneva tesampi gahaṇam veditabbam tehi vinā maggādhigamassa asambhavatoti adhippāyo.

Aggamaggādhigamena asamhappaṭivedhassa sikhāpattattā maggadhammesu viya phaladhammesu sātisayo asamhohoti **“sayam abhiññā”**ti vuttam, sāmam jānitvāti attho. Tathā jānanā panassa sacchikaraṇam attapaccakkhikiriyāti **“sacchikatvā”**ti vuttam. Tenāha **“attanāva abhivisiṭṭhāya paññāya paccakkham katvā”**ti. Tathā sacchikiriyā cassa attani paṭilābhoti “upasampajjā”ti vuttanti āha **“paṭilābhitvā”**ti.

Sāraṇīyasuttavaṇṇanā niṭṭhitā.

3. Āsamsasuttavaṇṇanā

13. Tatiye **santoti** ettha **santa-saddo** “dīgham santassa yojanan”ti-ādīsu¹ kilantabhāve āgato. “Ayañca vitakko ayañca

1. Khu 1. 22 piṭṭhe Dhammapade.

vicāro santā honti samitā”ti-ādīsu¹ niruddhabhāve. “Adhigato kho myāyaṃ dhammo gambhīro duddaso duranubodho santo paṇīto”ti-ādīsu² santañāṇagocaratāyaṃ. “Upasantassa sadā satimato”ti-ādīsu³ kilesavūpasame. “Santo have sabbhi pavedayanti”ti-ādīsu⁴ sādhusu. “Pañcime bhikkhave mahācorā santo saṃvijjamānā”ti-ādīsu⁵ atthibhāve. Idhāpi atthibhāveveyevāti āha “**santoti atthi upalabbhanti**”ti. Tattha **atthī** lokasaṅketavasena saṃvijjanti. Atthibhāvo hettha puggalasambandhena vuttatā lokasamaññāvaseneva veditabbo, na paramatthavasena. Atthīti cetam nipātapadam daṭṭhabbam “atthi imasmim kāye kesā”ti-ādīsu⁶ viya.

Saṃvijjamānāti upalabbhamānā. Yaṃ hi saṃvijjati, taṃ upalabbhati. Tenāha “**saṃvijjamānāti tasseva vevacanan**”ti. **Anāsoti** patthanārahito. Tenāha “**apatthano**”ti. Āsaṃsati patthetīti **āsaṃso**. Veṇuvettādivilīvehi suppādibhājanakārakā **vilīvakārakā**. Migamacchādīnaṃ nisādanato **nesādā**, māgavikamacchabandhādayo. Rathesu cammena nahanakaraṇato **rathakārā**, cammakārā. **Pu**-iti karīsassa nāmaṃ, taṃ kusenti apanentīti **pukkusā**, pupphacchaddakā.

Dubbaṇṇoti virūpo. **Okoṭimakoti** ārohābhāvena heṭṭhimako, rassakāyoti attho. Tenāha “**lakuṇḍako**”ti. Lakuviya ghaṭikā viya ḍeti pavattatīti hi **lakuṇḍako**, rasso. Kaṇati nimīlatīti **kāṇo**. Taṃ panassa nimīlanam ekena akkhinā dvīhipi cāti āha “**ekakkhikāṇo vā ubhayakkhikāṇo vā**”ti. Kuṇanam kuṇo, hatthavekallam. Taṃ etassa atthīti **kuṇī**. **Khañjo** vuccati pādavikalo. Heṭṭhimakāyasaṅkhāto sarīrassa pakkho padeso hato assāti **pakkhahato**. Tenāha “**pīṭhasappī**”ti. Padīpe padīpane etabbam netabbanti **padīpeyyam**, telādi-upakaraṇam.

Āsam na karotīti rajjābhiseke kaniṭṭho patthanam na karoti jeṭṭhe sati kaniṭṭhassa anadhikārattā. Abhisekam arahatīti abhisekāraho, **na abhisekāraho** kāṇakuṇi-ādidosasamannāgato.

1. Abhi 2. 268 piṭṭhe.

2. Dī 2. 32; Ma 1. 224; Ma 2. 291; Saṃ 1. 138; Vi 3. 5, 7, 8 piṭṭhesu.

3. Khu 1. 111 piṭṭhe Udāne.

4. Khu 1. 36 piṭṭhe Dhammapade.

5. Vi 1. 114 piṭṭhe.

6. Ma 1. 72 piṭṭhe.

Sīlassa duṭṭhu nāma natthi, tasmā abhāvattho idha du-saddoti āha “**nissīlo**”ti. “Pāpaṃ pāpena sukaraṃ”ti-ādīsu¹ viya pāpa-saddo nihīnapariyāyoti āha “**lāmakadhammo**”ti. Sīlavipattiyā vā **dussīlo**, diṭṭhivipattiyā **pāpadhammo**. Kāyavācāsaṃvarabhedenā vā **dussīlo**, manosaṃvarabhedenā, satisaṃvarādibhedenā vā **pāpadhammo**, asuddhappayogatāya **dussīlo**, asuddhāsayatāya **pāpadhammo**. Kusalasīlavirahena **dussīlo**, akusalasīlasamānāgamena **pāpadhammo**. **Asucīhīti** aparisuddhehi. **Saṅkāhi saritabbasamācāroti** “imassa maññe idaṃ kamman”ti evaṃ parehi saṅkāya saritabbasamācāro. Tenāha “**kiñcidevā**”ti-ādi. **Atthanāyeva vā saṅkāhi saritabbasamācāroti** etenapi kammasādhanatāmyeva saṅkassarasaddassa dasseti. Atthano saṅkāya paresaṃ samācārakiriyaṃ sarati āsaṅkati vidhāvatītipi **saṅkassarasamācāroti** evamettha kattusādhanatāpi daṭṭhabbā. Tassa hi dve tayo jane kathente disvā “mama dosaṃ maññe kathenti”ti tesaṃ samācāraṃ saṅkāya sarati dhāvati.

Evampatiṇṇoti salākaggahaṇādīsu “kittakā vihāre samaṇā”ti gaṇanāya āraddhāya “ahampi samaṇo ahampi samaṇo”ti paṭiṇṇaṃ datvā salākaggahaṇādīni tarotīti samaṇo ahanti evaṃsamaṇappaṭiṇṇo. **Sumbhakapattadhareti** mattikāpattadhare. **Pūtinā kammenāti** saṅkiliṭṭhakammena, nigguṇatāya vā guṇasāravirahitattā **antopūti**. Kasambukacavaro jāto sañjāto assāti **kasambujātoti** āha “**sañjātarāgādikacavaro**”ti. Atha vā kasambu vuccati tintakuṇapakasaṭaṃ udakaṃ, imasmim ca sāsane dussīlo nāma jigucchantīyattā tintakuṇapa-udakasadiṣo, tasmā kasambu viya jātoti **kasambujāto**. **Lokuttaradhamma-upanissayassa natthitāyāti** yattha paṭiṭṭhitena sakkā bhaveyya arahattaṃ laddhum, tassā paṭiṭṭhāya bhinnattā vuttam. **Mahāsīlasmiṃ paripūrakātāyāti** yattha paṭiṭṭhitena sakkā bhaveyya arahattaṃ pāpuṇitum, tasmim paripūrakāritāya.

Āsaṃsasuttavaṇṇanā niṭṭhitā.

1. Khu 1. 150; Vi 4. 360 piṭṭhesu.

4. Cakkavattisuttavaṇṇanā

14. Catutthe **catūhi saṅgahavatthūhīti** dānapiyavacana-atthacariyāsamānattatāsankhātehi catūhi saṅgahakāraṇehi. **Cakkam vattetīti** āṇācakkam pavatteti. **Cakkanti** vā idha ratanacakkam veditabbam. Ayam hi cakkasaddo sampattiyam, lakkhaṇe, rathaṅge, iriyāpathe, dāne, ratanadhammakhuracakkādīsu ca dissati. “Cattārimāni bhikkhave cakkāni, yehi samannāgatānaṃ devamanussānaṃ”ti-ādīsu¹ hi sampattiyam dissati. “Pādātalesu cakkāni jātāni”ti ettha² lakkhaṇe. “Cakkamva vahatho padan”ti ettha³ rathaṅge. “Catucakkam navadvāraṇaṃ”ti ettha⁴ iriyāpathe. “Dadam bhujja mā ca pamādo, cakkam vattaya sabbapāṇinan”ti ettha⁵ dāne. “Dibbam cakkaratanaṃ pāturaḥosī”ti ettha⁶ ratanacakke. “Mayā pavattitam cakkam”ti ettha⁷ dhammacakke. “Icchāhatassa posassa, cakkam bhamati matthake”ti ettha⁸ khuracakke. “Khurapariyantena cakkenā”ti ettha⁹ paharaṇacakke. “Asanivicakkan”ti ettha¹⁰ asanimaṇḍale. Idha panāyam ratanacakke daṭṭhabbo.

Kittāvatā panāyam cakkavattī nāma hoti? Ekaṅguladvaṅgulamattampi cakkaratanaṃ ākāsaṃ abbhuggantvā pavattati. Sabbacakkavattīnaṃ hi nisinnāsanato uṭṭahitvā cakkaratanasamīpaṃ gantvā hatthisoṇḍasadisapanāḷim suvaṇṇabhiṅgāraṃ ukkhipitvā udakena abbhukkiritvā “abhivijjīnātu bhavaṃ cakkaratanaṃ”ti vacanasamanantameva vehāsaṃ abbhuggantvā cakkaratanaṃ pavattatīti. Yassa pavattisamakālemeva so rājā cakkavattī nāma hoti.

Dhammoti dasakusalakammaphadhammo, dasavidham vā cakkavattivattam. Dasavidhe vā kusalahamme arahite vā rājadhamme niyuttoti **dhammiko**. Tena ca dhammena sakalalokaṃ rañjetīti **dhammarājā**. Dhammena vā laddharajjattā **dhammarājā**. Cakkavattī hi dhammena nāyena rajjam adhigacchati, na adhammena. **Dasavidhena cakkavattivattenāti** dasappabhedena cakkavattīnaṃ vattena.

1. Am 1. 341 piṭṭhe.	2. Di 2. 14; Dī 3. 121 piṭṭhesu.	3. Khu 1. 13 piṭṭhe.
4. Sam 1. 15 piṭṭhe.	5. Khu 5. 173 piṭṭhe.	6. Dī 2. 141 piṭṭhe.
7. Khu 1. 368 piṭṭhe.	8. Khu 5. 132 piṭṭhe.	9. Dī 1.49 piṭṭhe.
10. Dī 3. 36 piṭṭhe.		

kiṃ pana taṃ dasavidhaṃ cakkavattivattanti? Vuccate—

“Katamaṃ pana taṃ deva ariyaṃ cakkavattivattanti. Tena hi tvaṃ tāta dhammaṃyeva nissāya dhammaṃ sakkaronto dhammaṃ garuṃ karonto mammaṃ mānento dhammaṃ pūjento dhammaṃ apacāyamāno dhammaddhajo dhammaketu dhammādhipateyyo dhammikam rakkhāvaraṇaguttiṃ saṃvidahassu antojanasmiṃ balakāyasmim khattiyesu anuyantesu brāhmaṇagahapatikesu negamajānapadesu samaṇabrāhmaṇesu migapakkhīsu. Mā ca te tāta vijite adhammakāro pavattittha. Ye ca te tāta vijite adhanā assu, tesaṃca dhanamanuppadeyyāsi. Ye ca te tāta vijite samaṇabrāhmaṇā madappamādā paṭiviratā khantisoracce niviṭṭhā ekamattānaṃ damenti, ekamattānaṃ samenti, ekamattānaṃ parinibbāpenti. Te kālena kālaṃ upasaṅkamtivā paripuccheyyāsi pariggaṇheyyāsi ‘kiṃ bhante kusalaṃ kiṃ akusalaṃ, kiṃ sāvajjaṃ kiṃ anavajjaṃ, kiṃ sevitabbaṃ kiṃ na sevitabbaṃ, kiṃ me kariyamānaṃ dīgharattaṃ ahitāya dukkhāya assa, kiṃ vā pana me kariyamānaṃ dīgharattaṃ hitāya sukhāya assā’ti. Tesam sutvā yaṃ akusalaṃ, taṃ abhinivajjeyyāsi, yaṃ kusalaṃ, taṃ samādāya vatteyyāsi. Idaṃ kho tāta taṃ ariyaṃ cakkavattivattan”ti—

evam **cakkavattisutte**¹ āgatanayena antojanasmiṃ balakāye ekam, khattiyesu ekam, anuyantesu ekam, brāhmaṇagahapatikesu ekam, negamajānapadesu ekam, samaṇabrāhmaṇesu ekam, migapakkhīsu ekam, adhammakārappaṭikkhepo ekam, adhanānaṃ dhanānuppādānaṃ ekam, samaṇabrāhmaṇe upasaṅkamtivā pañhapucchanaṃ ekanti evamevaṃ taṃ cakkavattivattaṃ dasavidhaṃ hoti. Gaha patike pana pakkhijāte ca visuṃ katvā gaṇhantassa dvādasavidhaṃ hoti.

Aññathā vattitum adento so dhammo adhiṭṭhānaṃ etassāti tadadhiṭṭhānaṃ. Tena **tadadhiṭṭhānena cetasā. Sakkarontoti** ādarakiriyaṃvasena karonto. Tenāha “**yathā**”ti-ādi. **Garuṃkarontoti** pāsāṇacchattaṃ viya garukaraṇavasena garuṃ karonto.

1. Dī 3. 50 piṭṭhe.

Tenevāha “**tasmim̄ gāravuppattiyā**”ti. **Dhammādhipatibhūtāgatabhāvenā**ti iminā yathāvuttadhammassa jeṭṭhakabhāvena purimataraṃ attabhāvesu sakkaccaṃ samupacitabhāvaṃ dasseti. **Dhammavaseneva ca sabbakiriyānaṃ karaṇenā**ti etena ṭhānanisajjādīsu yathāvuttadhammaninnaṇaṇapabbhārabhāvaṃ dasseti. **Assā**ti rakkhāvaraṇaguttiyā. **Paraṃ rakkhantoti** aññaṃ diṭṭhadhammikādi-anatthato rakkhanto. Teneva pararakkhasādhanena khanti-ādiguṇena attānaṃ tato eva rakkhati. **Mettacittatā**ti mettacittatāya. **Nivāsanapā rupanagehādīni** sītuṇhādippaṭibāhanena **āvaraṇaṃ**.

Antojanasminti abhantarabhūte puttadārādijane. **Sīlasaṃvare patiṭṭhāpentoti** iminā rakkhaṃ dasseti. **Vatthagandhamālādīni cassa dadamānoti** iminā āvaraṇaṃ, itarena guttiṃ. **Sampadānenapīti pi**-saddena sīlasaṃvaresu patiṭṭhāpanādīnaṃ sampiṇḍeti. Esa nayo paresupi pisaddaggahaṇe. Nigamo nivāso etesanti **negamā**. Evaṃ **jānapadā**ti āha “**tathā nigamavāsino**”ti-ādi.

Rakkhāvaraṇaguttiyā kāyakammādīsu saṃvidahanāṃ ṭhapanāṃ nāma tadupadesoyevāti vuttaṃ “**kathetvā**”ti. **Etesūti** pāḷiyaṃ vuttasu samaṇādīsu. **Paṭivattetuṃ na sakkā** khīṇānaṃ kilesānaṃ puna anuppajjanato. Sesamettha suviññeyyameva.

Cakkavattisuttavaṇṇanā niṭṭhitā.

5. Sacetanasuttavaṇṇanā

15. Pañcame isayo patanti sannipatanti etthāti **isipatananti** āha **buddhapaccekabuddhasaṅkhātānaṃ**”ti-ādi. **Sabbūpakaraṇāni sajjetvā**ti sabbāni rukkhassa chedanatacchanādisādhanāni upakaraṇāni raññā āṇattadivaseyeva sajjetvā. Nānā karīyati etenāti **nānākaraṇaṃ**, nānābhāvoti āha “**nānattan**”ti. **Nesanti** saralopenāyaṃ niddesoti āha “**na esan**”ti. Tathā **atthesanti** etthāpīti āha “**atthi esan**”ti. Pavattanatthaṃ abhisāṅkharaṇaṃ **abhisāṅkhāro**, tassa **gati** vegasā pavatti. Taṃ sandhāyāha “**payogassa gamanan**”ti.

Sagaṇḍāti khuddānakhuddakagaṇḍā. Tenāha “**uṇṇatoṇataṭṭhānayuttā**”ti. **Sakasāvā**ti sakasaṭā. Tenāha “**pūṭisārenā**”ti-ādi. **Evam** guṇapatanena patitāti yathā taṃ cakkam nābhi-aranemīnam sadosatāya na pahitṭhāsi, evamekacce puggalā kāyavaṅkādivasena sadosatāya guṇapatanena patitā sakaṭṭhāne na tiṭṭhanti. Ettha ca pharusavācādayopi apāyagamanīyā sotāpattimaggeneva pahīyantīti daṭṭhabbā.

Sacetasuttavaṇṇanā niṭṭhitā.

6. Apaṇṇakasuttavaṇṇanā

16. Chaṭṭhe virajjhanakiriyā nāma pacchā samādātabbatāya apaṇṇakappayogasamādānā viya hoti, avirajjhanakiriyā pana pacchā asamādātabbatāya anūnāti taṃsamaṅgipuggalo apaṇṇako, tassa bhāvo **apaṇṇakatā**ti āha “**apaṇṇakapaṭipadanti aviraddhapāṭipadan**”ti-ādi. Yasmā sā adhippetatthasādhanena ekamsikā vaṭṭato niyyānāvahā, tattha ca yuttiyuttā¹ asārāpagatā aviruddhatāya apaccanīkā anulomikā anudhammabhūtā ca, tasmā vuttam “**ekamsapaṭipadan**”ti-ādi. **Na takkaggāhena vā nayaggāhena vā**ti takkaggāhena vā paṭipanno na hoti nayaggāhena vā apaṇṇakapaṭipadam paṭipanno. Tattha **takkaggāhena vā**ti ācariyam alabhitvā “evam me sugati, nibbānam vā bhavissati”ti attano takkaggahaṇamattena. **Nayaggāhenā**ti paccakkhato adisvā nayato anumānato gahaṇena. **Evam gahetvā paṭipannoti** takkamattena, nayaggāhena vā paṭipanno. Paṇḍitasatthavāho viya sampattīhi na parihāyatīti yojanā.

Yam sandhāya vuttanti parihānañca aparihānañca sandhāya **jātake**² vutaṃ. Ayam panettha gāthāya atthayojanā—**apaṇṇakam ṭhānam** aviraddhakāraṇam niyyānikakāraṇam **eke** bodhisattappamukhā paṇḍitamanussā gaṇhiṃsu. Ye pana te bālasatthavāhaputtappamukhā **takkikā āhu**, te **dutiyam**

1. Atthayuttiyuttā (?)

2. Khu 5. 1 piṭṭhe.

sāparādham anekamsikam ṭhānam aniyyanikam kāraṇam aggahesum, te kaṇhapaṭipadam paṭipannā. Tattha sukkapaṭipadā aparihānīpaṭipadā, kaṇhapaṭipadā parihānīpaṭipadā, tasmā ye sukkapaṭipadam paṭipannā, te aparihīnā sotthibhāvaṃ pattā. Ye pana kaṇhapaṭipadam paṭipannā, te parihīnā anayabyasanam āpannāti imamattham bhagavā anāthapiṇḍikassa gahapatino vatvā uttari idamāha “**tedaññāya medhāvī, tam gaṇhe ya’dapaṇṇakan**”ti.

Tattha **etadaññāya medhāvī**ti medhāti laddhanāmāya visuddhāya uttamāya paññāya samannāgato kulaputto etaṃ apaṇṇakam ṭhānam dutiyañcāhi dvīsu atakkaggāhatakkaggāhasaṅkhātesu ṭhānesu guṇadosam vuddhihāniṃ atthānattham ṇātvāti attho. **Tam gaṇhe ya’dapaṇṇakanti** yaṃ apaṇṇatam ekamsikam suttapaṭipadā-aparihānīyapaṭipadāsāṅkhātam niyyānikakāraṇam, tadeva gaṇheyya. Kasmā? Ekamsikādibhāvatoyeva¹. Itaram pana na gaṇheyya. Kasmā? Anekamsikādibhāvatoyeva².

Yavanti tāya sattā amissitāpi samānajātītāya missitā viya hontīti **yonī**. Sā pana atthato aṇḍādi-uppattiṭṭhānavisiṭṭho khandhānam bhāvaso pavattivisesoti āha “**kandhakotṭhāso yonī nāmā**”ti. **Kāraṇam yonī nāma**, yonīti³ tam tam phalam anupacitañāṇasambhārehi duravagādhabhedatāya missitam viya hotīti. Yato ekatthanayena so evāyanti bālānam micchāgāho. **Passāvamaggo yonī nāma** yavanti tāya sattā yonisambandhena missitā hontīti. **Maggahitā** anuṭṭhānena, punappunam āsevanāya **paripunnā**.

“**Cakkhutopi**”ti-ādimhi pana cakkhuvīññāṇādivīthīsu tadanugatamanovīññāṇavīthīsu ca kiñcāpi kusalādīnam pavatti atthi, kāmāsavādayo eva pana vaṇato yūsam viya paggharanaka-asucibhāvena sandanti, tasmā te eva “**āsavā**”ti vuccanti. Tattha hi paggharanaka-asucimhi āsavasaddo niruḷhoti. **Dhammato yāva gotrabhūti** tato param maggaphalesu appavattanato vuttam. Ete hi ārammaṇakaraṇavasena dhamme gacchantā tato param na gacchanti. Nanu tato param bhavaṅgādīnīpi gacchantīti ce? Na, tesampi pubbe ālambitesu

1. Ekamsakāribhāvatoyeva (Ka) Jātaka-Ṭṭha 1. 121 piṭṭhe pana passitabbam.

2. Anekamsakāribhāvatoyeva (Ka)

3. Yavati (?)

lokiyadhammesu sāsavabhāvena antogadhattā tato paratābhāvato. Ettha ca gotrabhuvacanena gotrabhuvodānaphalasangamāpattipurecārikaparikammāni vuttānīti veditabbāni. Paṭhamamaggapurecārikameva vā gotrabhu avadhini dāssanabhāvena gahitaṃ, tato paraṃ pana maggaphalasangamānatāya aññesu maggesu maggavīthiyaṃ samāpattivīthiyaṃ nirodhānantaraṅca pavattamānesu phalesu nibbāne ca āsavānaṃ pavatti nivāritāti veditabbaṃ. **Savantīti** gacchanti, ārammaṇakaraṇavasena pavattantīti attho. Avadhi-attho ā-kāro, avadhi ca mariyādābhividdhāto duvidho. Tattha mariyādāṃ kiriyāṃ bahi katvā pavattati yathā “āpāṭaliputtāṃ vuṭṭho devo”ti. Abhividdhi pana kiriyāṃ byāpetvā pavattati yathā “ābhavaggaṃ bhagavato yaso pavattati”ti. Abhividdhi-attho cāyamā-kāro idha gahitoti vuttāṃ “**antokaraṇattho**”ti.

Madirādayoti ādi-saddena sindhavakādāmbarikāpotikādīnaṃ¹ saṅgaho daṭṭhabbo. **Ciraparivāsiyattho** ciraparivutṭhatā purāṇabhāvo. **Avijjānāhosīti-ādīti** ettha **ādi**-saddena “purimā bhikkhave koṭi na paññāyati bhavataṇhāyā”ti idaṃ **suttam**² saṅgahitaṃ. Avijjāsavasavāsavānaṃ ciraparivutṭhatāya dassitāya tabbhāvabhāvino kāmāsavassa cirapativutṭhatā dassitāva hoti. Aññesu ca yathāvutte dhamme okāsaṅca ārammaṇaṃ katvā pavattamānesu mānādīsu vijjamānesu attattaniyādiggāhavasena abhibyāpanaṃ madakaraṇavasena āsavasadisatā ca etesaṃyeva na aññesanti etesveva āsavasaddo niruḥhoti daṭṭhabbo. **Āyataṃ** anādikālikattā. **Pasavantīti** phalanti. Na hi kiñci saṃsāradukkhāṃ atthi, yaṃ āsavehi vinā uppajjeyya. **Purimāni cetthāti** etesu catūsu atthavikappesu purimāni tīṇi. **Yatthāti** yesu suttābhiddhammappadesesu. **Tattha yujjanti** kilesesuyeva yathāvuttassa atthattayassa sambhavato. **Pacchimaṃ kammepīti** pacchimaṃ “āyataṃ vā saṃsāradukkhāṃ savanti pasavanti”ti vuttanibbacanaṃ kammepi yujjati dukkhappasavanassa kilesakammāsādhāraṇattā.

Diṭṭhadhammā vuccanti paccakkhabhūtā khandhā, diṭṭhadhamme bhavā **diṭṭhadhammikā**. **Vivādāmūlabhūtāti** vivādassa mūlakāraṇabhūtā kodhūpanāhamakkhapalāsa-
issāmacchariyamāyāsāṭheyayathambhasārambhamānātimānā. **Yena devūpa**

1. Sītukādampaṭīkāpotikādīnaṃ (Ka)

2. Am 3. 348 piṭṭhe.

patyassāti yena kammakilesappakārena āsavena devesu upapatti nibbatti assa mayhanti sambandho. **Gandhabbo vā vihaṅgamo** ākāsacārī assanti¹ vibhattim vipariṇāmetvā yojetabban̄. Ettha ca yakkhagandhabbavinimuttā sabbā devatā devaggahaṇena gahitā. Naḷo vuccati mūlaṃ, tasmā **vinalīkatāti** vigatanaḷā vigatamūlā katāti attho. **Avasesā ca akusalā dhammāti** akusalakammato avasesā akusalā dhammā āsavāti āgatāti sambandho.

Paṭighātāyāti paṭisedhanāya. **Parūpavāda -pa- upaddavāti** idaṃ yadi bhagavā sikkhāpadaṃ na paññāpeyya, tato asaddhammappaṭisevana-adinnādānapāṇātipātādihetu ye uppajjeyyūṃ parūpavādādayo diṭṭhadhammikā nānappakārā anattā, ye ca tannimittameva nirayādīsu nibbattassa pañcavidhabandhanakammakāraṇādivasena mahādukkhānubhavādippakārā anattā, te sandhāya vuttam̄.

Te paneteti ete kāmarāgādikilesatebhūmakakammaparūpavādādi-uppaddavappakārā āsavā. **Yatthāti** yasmiṃ vinayādipāḷippadese. **Yathāti** yena duvidhādippakārena avasesesu suttantesu tidhā āgatāti sambandho. Nirayaṃ gamentīti **nirayagāminiyā**. **Chakkanipāteteti** chakkanipāte āhuneyyasutte². Tattha hi āsavā chadhā āgatā.

Sarasabhedoti khaṇikanīrodho. **Khīṇākāroti** accantāya khīṇatā. Āsavā khīyanti pahīyanti etenāti **āsavakkhayo**, maggo. Āsavānaṃ khayante uppajjanato **āsavakkhayo**, phalaṃ. Āsavakkhayena pattabbato āsavā khīyanti etthāti **āsavakkhayo**, nibbānaṃ. **Visuddhimagge**³ vitthārito, tasmā tattha, taṃsamvaṇṇanāya ca vuttanayena veditabbo.

Tathāti iminā visuddhimagge vitthāritataṃ upasaṃharati. Kusalappavattim āvaranti nivārentīti **āvaraṇīyā**. **Purimappavattivasenāti** niddokkamanato pubbe kammaṭṭhānassa pavattivasena. **Ṭhapetvāti** hatthagataṃ kiñca ṭhapento viya kammaṭṭhānaṃ satisampajaññavasena ṭhapetvā kammaṭṭhānameva manasikaronto niddaṃ okkamati, jhānasamāpanno viya yathāparicchinneneva

1. Ahanti (Ka)

2. Am̄ 2. 340 piṭṭhe.

3. Visuddhi 2. 139, 140 piṭṭhesu.

kālena pabujjhamāno kammaṭṭhānaṃ ṭhapitaṭṭhāne gaṇhantoyeva pabujjhatināma. Tena vuttam “**tasmā -pa- nāma hoti**”ti. **Mūlakammaṭṭhāneti** ādito paṭṭhāya parihariyamānakammaṭṭhāne. **Pariggahakammaṭṭhānavasenāti** sayanaṃ upagacchantena pariggahamānakammaṭṭhānamanasikāravasena. So pana dhātumanasikāravasena icchitabboti dassetuṃ “**ayam hi**”ti-ādi vuttam.

Apaṇṇakasuttavaṇṇanā niṭṭhitā.

7. Attabyābādhasuttavaṇṇanā

17. Sattame byābādhanam dukkhāpananti āha “**attabyābādhyāti attadukkhāyā**”ti. Maggaphalacittuppādāpi kāyasucaritādisaṅgaho evāti āha “**avāritānevā**”ti.

Attabyābādhasuttavaṇṇanā niṭṭhitā.

8. Devalokasuttavaṇṇanā

18. Aṭṭhame **itīti padasandhibyañjanasiliṭṭhatāti** purimapadānaṃ pacchimapadehi atthato sahitatāya byañjanānaṃ vākyānaṃ siliṭṭhatāya dīpane nipāto.

Devalokasuttavaṇṇanā niṭṭhitā.

9. Paṭhamapāpaṇikasuttavaṇṇanā

19. Navame **ugghāṭetvāti** āsanadvārañceva bhaṇḍapasibbake ca vivarivā. **Nādhitṭhāti** taṃtaṃkayavikkaye attanā voyogaṃ nāpajjati. **Divākāleti** majjhanhikasamaye. **Assāmiko hoti** tīsupi kālesu laddhabbalābhassa alabhanato. Apativātābādham **rattiṭṭhānam**. Chāyudakasampannam **divāṭṭhānam**. **Vipassanāpi vattati** vipassanākammikoyeva. Tenapi hi navadhā indriyānaṃ tikkhattam āpādentena samādhinimittam gahetabbanam, vipassanānimittam samāhitākārasallakkhaṇāya.

Paṭhamapāpaṇikasuttavaṇṇanā niṭṭhitā.

10. Dutiyapāṇikasuttavaṇṇanā

20. Dasame **visiṭṭhadhuroti** visiṭṭhadhurasampaggāho vīriyasampanno. Ñānavīriyāyattā hi atthasiddhiyo. Tenāha “**uttamadhuro**”ti-ādi. **Vikkāyikabhaṇḍanti** vikkayetabbabhaṇḍam. **Nikkhattadhanenāti**¹ nidahitvā ṭhapitadhanavasena. **Vaḷañjanakavasenāti** divase divase dānūpabhogavasena vaḷañji tabbadhanavasena. **Upabhogaparibhogabhaṇḍenāti** upabhogaparibhogūpakaraṇena. **Nipatantīti** nipātentī, attano dhanaggahena nipātavuttike karontī. Tenāha “**nimantentī**”ti.

Ñānathāmenāti ñāṇassa thirabhāvena. **Ñānaparakkamenāti** ñāṇasahitena vīriyena. Diṭṭhadhammikasamparāyikaparamatthabhedam hi yena sutena ijjhati, taṃ sutam nāma. Ukkaṭṭhaniddesena dassento “**ekanikāya -pa-bahussutā**”ti āha. **Āgatoti** suppvattibhāvena svāgato. Tenāha “**paguṇo pavattito**”ti. Abhidhamme āgatā kusalādikkhandhādibhedabhinnā dhammā suttantapiṭakepi otarantīti² “**dhammadharāti suttantapiṭakadharā**”icceva vuttam. Na hi ābhidhammikabhāvena vinā nipariyāyato suttantapiṭakaññutā sambhavati. **Dvemātikāroti** bhikkhubhikkhunimātikāvasena dvemātikādharāti vadanti, “vinayābhidhammamātikādharā”ti yuttam. **Paripucchatīti** sabbabhāgena pucchitabbam pucchati. Tenāha “**atthānattham kāraṇākāraṇam pucchati**”ti. **Pariggaṇhātīti** vicāreti.

Na evam attho **daṭṭhabboti** evam desanānukkamena attho na gahetabbo. Añño hi desanākkamo veneyyajjhāsayasasena pavattanato, añño paṭipattikkamo. **Heṭṭhimena vā paricchodoti** sīlasamādhipaññāsāṅkhātesu tīsu bhāgesu katthaci heṭṭhimanayena desanāya paricchadam veditabbam sīlena, katthaci uparimena bhāgena paññāya, katthaci dvīhipi bhāgehi sīlapaññāvasena. Idha pana sutte uparimena bhāgena paricchedo veditabboti vatvā taṃ dassento “**tasmā**”ti-ādimāha. Yasmā vā bhagavā veneyyajjhāsayasasena paṭhamam kalyāṇamittam dassento arahattam pavedetvā “tayidam arahattam imāya āraddhavīriyatāya hotī”ti dassento vīriyārambham pavedetvā “svāyam viriyārambho iminā

1. Nikkhattavasenāti (Ka)

2. Ovadantīti (Ka)

kalyāṇamittasannissayena bhavatī”ti dassento nissayasampattiṃ pavedeti heṭṭhā dassitanidassanānurūpanti daṭṭhabbāṃ.

Dutiyapāpaṇikasuttavaṇṇanā niṭṭhitā.

Rathakāravaggavaṇṇanā niṭṭhitā.

3. Puggalavagga 1. Samiddhasuttavaṇṇanā

21. Tatiyassa paṭhame **ruccatī**ti kāyasakkhi-ādīsu puggalesu ativiya sundaratarapaṇītataraabhāvena te cittassa abhiruci-uppādako katamoti pucchati. **Saddhindriyaṃ dhuraṃ ahoṣi** saddhādhuraṃ maggavuttānanti katvā, sesindriyāni pana kathanti āha “**sesāni**”ti-ādi. **Paṭividdhamaggovā**ti tīhipi therehi attano attano paṭividdha arahattamaggo eva kathito, tasmā na sukaraṃ ekamsena byākātum “ayaṃ -pa- paṇītatara cā”ti. **Bhummantareneva kathesi** “tīsupi puggalesu aggamaggatṭhova paṇītatara”ti.

Samiddhasuttavaṇṇanā niṭṭhitā.

2. Gilānasuttavaṇṇanā

22. Dutīye **hitānī**ti bhabyāni. **Vuddhikarānī**ti ārogyādivuddhikarāni. **Anucchavikanti** upaṭṭhānakiriyāya anurūpaṃ. **Vātāpamārarogenā**¹ vātārogena ca apamārarogena ca, vātanidānena vā apamārarogena. **Niṭṭhappattagilānoti** “iminā rogena na cirasseva marissatī”ti niṭṭham pattho gilāno. **Khipitakaṃ** nāma vamathurogo. **Kacchū**ti thullakacchu-ābādho. **Tiṇapupphakajaro** visamavātasamphassajarogo. **Yesanti** yesaṃ rogānaṃ. **Paṭijagganenā**ti paṭikāramattena. **Phāsukanti** byādhivūpasamanena sarīrassa phāsubhāvo. Byādhinidānasamuttānājanānena **paṇḍito**, paṭikārakiriyāya yuttakāritāya **dakkho**, utṭhānavīriyasampattiyā **analaso**.

1. Vātāpamārādīnā rogenāti (Aṭṭhakathāyaṃ)

Padaparamo puggalo kathito sammattaniyāmokkamanassa ayoggabhāvato. Alabhantova tathāvatappaveditaṃ dhammavinayaṃ savanāya okkamati niyāmaṃ kusalesu dhammesu sammattaṃ paccakabodhiṃ. **Yanti**¹ yato. **Ovādaṃ labhitvāti** ābhisamācārikavattaṃ ovādamattaṃ. Ettakopi hi tassa hitāvahoti. **Tannissitovāti** vipañcitaññunissihova hoti. **Punappunaṃ desetabbova** sammattaniyāmokkamanassa yoggabhāvato.

Gilānasuttavaṇṇanā niṭṭhitā.

3. Saṅkhārasuttavaṇṇanā

23. Tatiye vividhehi ākārehi ābādhanato byābādhova byābajjhaṃ, kāyikaṃ cetasaikaṃ dukkhaṃ. Saha byābajjhena vattatīti **sabyābajjhaṃ**. Tenāha “**sadukkhā**”ti. **Cetanārāsinti** pubbacetanādirāsinaṃ. Cetanaṃ punappunaṃ pavattento “**rāsinaṃ karoti piṇḍaṃ karotī**”ti ca vutto. **Sadukkhanti** nirantaradukkhāṃ. Tenāha “**sābādhaṃ nirassādan**”ti. **Atthīti** ujukaṃ dukkhavedanā natthīti avattabbattā vuttaṃ. Anīṭṭhasabhāvattā anīṭṭhārammaṇattā ca dukkhapakkhikāva sā daṭṭhabbā. Na hi akusalavipākā iṭṭhā nāma atthi, kusalavipākā pana upekkhāvedanā tattha appāvasarā. **Aṭṭhakathāyaṃ** pana nirayassa dukkhabahulattā dukkhassa ca tattha balavatāya sā abbohārikaṭṭhāne ṭhitāti vuttaṃ. **Upamaṃ katvā āhaṭo** viseso viya sāmāññassa yathā ayopiṇḍirohino viya rūpānanti. **Paṭibhāga-upamāti** paṭibimba-upamā.

Te aggahetvāti heṭṭhimabrahmaloke aggahetvā. **Vomissakasukhadukkhanti** vimissakasukhadukkhāṃ pītimissakabhāvato. **Kammanti** pāpakammaṃ. Kammasīsenā phalaṃ vadati. Kāmañcetta “abyābajjhaṃ lokaṃ upapajjati”ti āgataṃ, “abyābajjhā phassā phusanti”ti pana vacanena lokuttaraphassāpi saṅgayhantīti “**tīṇi sucaritāni lokiyalokuttaramissakāni kathitāni**”ti vuttaṃ.

Saṅkhārasuttavaṇṇanā niṭṭhitā.

1. Idaṃ padaṃ pālīyaṃ aṭṭhakathāyaṃ na dissati.

4. Bahukārasuttavaṇṇanā

24. Catutthe **avassayaṃ gatoti** vaṭṭadukkhaparimuttiyā avassayo mayhanti saraṇagamanakkamena upagato hoti. **Satantikanti** sapariyattidhammaṃ. **Aggahitasaraṇapubbassāti** aggahitapubbasaraṇassa. **Akatābhinivesassa vasena vuttanti** tasmim attabhāve na kato saraṇagamanābhiniveso yenāti akatābhiniveso, tassa vasena vuttaṃ. Kāmaṃ pubbepi saraṇadāyako ācariyo vutto, pabbajjādāyakopi saraṇadāyakova. Pubbe pana upāsakabhāvāpādakavasena saraṇadāyako adhippeto. Idamā pana gahitapabbajjassa saraṇagamaṇaṃ. Pabbajjā hi savisesaṃ saraṇagamaṇanti pabbajjādāyako puna vutto. **Eteti** pabbajjādāyakādayo. **Duvidhena paricchinnāti** lokiyadhammasampāpako lokuttaradhammasampāpakoti dvippakārena paricchinnā, katābhinivesa-akatābhinivesavasena vā. **Uparīti** paṭhamamaggato upari. **Neva sakkotīti** ācariyena katassa upakārasa mahānubhāvattā tassa patikāraṃ nāma kātuṃ na sakkoti.

Bahukārasuttavaṇṇanā niṭṭhitā.

5. Vajirūpamasuttavaṇṇanā

25. Pañcame **aru-**iti purāṇaṃ duṭṭhavaṇaṃ vuccati. Ka-kāro padasandhikaroti arukūpamaṃ cittaṃ etassāti **arukūpamacitto** appamattakassapi dukkhassa asahanato. Sesapadadvayepi eseva nayo. **Ittarakālobhāsenāti** parittameva kālo ñāṇobhāsavirahena. **Lagatīti** kodhāsaṅgavasena kuppanto puggalo sammukhā, “kiṃ vadasī”ti-ādinā parammukhā ca upanayhanavasena lagati, na taṇhāsaṅgavasena. **Kuppatīti** kujjhati. **Byāpajjatīti** vipannacitto hoti. **Thaddhabhāvaṃ āpajjati** īsakampi muduttābhāvato. **duṭṭhārukoti** maṃsalohitānaṃ duṭṭhabhāvena pakatibhāvaṃ jahitvā ṭhito duṭṭhavaṇo. “Duṭṭhārutā”tipi paṭhanti, tatthāpi tākāro padasandhikaro.

Tassāti duṭṭhārukassa. **Savananti** asucivisandanaṃ. **Uddhumātassa viyāti** kodhena uddham uddham dhumātakassa viya kodhūpāyāsassa avissajjanato.

Caṇḍikatassāti kupitassa. Ettha ca kiñcāpi heṭṭhimamaggavajjhāpi kilesā tehi anuppattidhammataṃ āpāditattā samucchinnā, tathāpi tasmim̃ santāne aggamaggassa anuppannattā tattha appahīnāpi kilesā atthevāti katvā tesam̃ ñāṇānam̃ vijjūpamatā vuttā, na tehi maggehi pahīnānam̃ kilesānam̃ atthibhāvatoti daṭṭhabbam̃.

Vajirūpamasuttavaṇṇanā niṭṭhitā.

6. Sevitabbasuttavaṇṇanā

26. Chaṭṭhe **upasaṅkamitabboti** kālena kālam̃ upasaṅkamitabbo. **Allīyitabboti** chāyāya viya vinā bhāvanāya nillīyitabbo. **Punappunam̃ upāsītabboti** abhiṅhaso upanisīditabbo. **Anuddayā**ti mettāpubbabhāgo. **Upasaṅkमितुṃ vaṭṭatī**ti “etassa sīlena abhivuddhi bhavissatī”ti upakārattham̃ upasevanādi vaṭṭati.

Na **paṭihaññissatī**ti “apehi, kim̃ etenā”ti paṭikkhepābhāvato piyasīlattā na paṭihaññissati. **Phāsu bhavissatī**ti dvīsu hi sīlavantesu ekena sīlassa vaṇṇe kathite itaro anumodati. Tena tesam̃ kathā phāsu ceva hoti pavattinī ca. Ekasmim̃ pana dussīle satī dussīlassa sīlakathā dukkathā, neva sīlakathā hoti, na phāsu hoti na pavattinī. Dussīlassa hi sīlakathā aphāsu bhavissati. Sīlakathāya vuttamattham̃ samādhīpaññākathāsūpi atidisati “**samādhīpaññākathāsūpi eseva nayo**”ti. Dve hi samādhilābhino samādhīkatham̃ sappaññā ca paññākatham̃ kathentā rattim̃ vā divasam̃ vā atikkamantampi na jānanti.

Tattha tattha paññāya anuggahessāmīti tasmim̃ tasmim̃ anuggahetabbe paññāya sodhetabbe vaḍḍhetabbe ca adhikasīlam̃ nissāya uppannapaññāya anuggahessāmīti attho. Tañca anuggaṇhanam̃ sīlassa asappāyānupakāradhamme vajjetvā tappaṭipakkhasevanena hotīti āha “**sīlassa asappāye**”ti-ādi. Sīlassa asappāyānupakāradhammā nāma anācārāgocarādayo, tappaṭipakkhato upakāradhammā veditabbā. **Tasmim̃**

tasmim̐ ṭhāneti taṃtaṃsikkhākoṭṭhāsapadaṭṭhāne. **Anuggaṇhāti nāmāti** abhinnaṃ asaṃkiliṭṭhaṃ katvā anuggaṇhāti nāma. **Khāraparissāvaneti** rajakānaṃ ūsakhārādikhāraparissāvanapaṭe. **Hāyatīti** silādinā parihāyati. **Seṭṭhaṃ puggalanti** silādiguṇehi seṭṭhaṃ uttaritaraṃ uttamaṃ puggalaṃ.

Sevitabbasuttavaṇṇanā niṭṭhitā.

7. Jigucchitabbasuttavaṇṇanā

27. Sattame **abbhuggacchatīti** ettha atisaddāpekkhāya “nan”ti sāmi-atthe upayogavacananti āha “**assā**”ti “taṃ kho pana bhavantaṃ”ti-ādīsu viya. **Pāpako kitti-saddoti** lāmakabhāvena kathetabbasaddo. **Gūthakūpo viya dussīlyanti** etena dussīlassa gūthasadisattameva dasseti. **Vacananti** aniṭṭhavacanaṃ. **Purimanayenevāti** “gūthakūpo viya dussīlyan”ti-ādinā pubbe vuttanayena. **Sucimittoti** silācārasuddhiyā sucimittō. Saha ayanti pavattantīti **sahāyāti** āha “**sahagāmino**”ti.

Jigucchitabbasuttavaṇṇanā niṭṭhitā.

8. Gūthabhāṇīsuttavaṇṇanā

28. Aṭṭhame **gūthabhāṇīti** gūthasadisavacanattā gūthabhāṇī. Yathā hi gūthaṃ nāma mahājanassa aniṭṭhaṃ hoti, evameva imassa puggalassa vacanaṃ devamanussānaṃ aniṭṭhaṃ hoti. **Duggandhakathanti** kilesāsucisaṃkiliṭṭhatāya gūthaṃ viya duggandhavāyanakathaṃ¹. **Pupphabhāṇīti** supupphasadisavacanattā pupphabhāṇī. Yathā hi phullāni vassikāni vā adhimuttikāni vā mahājanassa iṭṭhāni kantāni honti, evameva imassa puggalassa vacanaṃ devamanussānaṃ iṭṭhaṃ hoti kantāni. **Pupphāni viyāti** campakasumanādisugandhapupphāni viya. **Sugandhakathanti** sucigandhavāyanakathaṃ kilesaduggandhābhāvato. **Madhubhāṇīti** ettha “mudubhāṇī”tipi paṭhanti. Ubhāyatthāpi hi madhuravacanoti attho. Yathā

1. Vissagandhavāyanakathaṃ (Ka)

hi catumadhuraṃ nāma madhuraṃ paṇītaṃ, evameva imassa puggalassa vacanaṃ devamanussānaṃ madhuraṃ hoti. **Madhurakathanti** kaṇṇasukhatāya pemaṇiyatāya ca saddato atthato ca madhurasabhāvakathaṃ. **Attahetu vāti** attano vā hatthapādādicchedanatarāṇahetu. **Parahetu vāti** etthāpi eseva nayo. Tenāha “attano vā”ti-ādi.

“Nelaṅgoti kho bhante sīlānametaṃ adhivacanaṃ”ti **sutte**¹ āgatattā vuttaṃ “**ettha vuttasīlaṃ viyā**”ti. **Pūreti** guṇānaṃ pāripūriyaṃ. **Sukumārāti** aphaṇṇasatāya mudukā komalā. **Purassāti** ettha **pura**-saddo tannivāsivācako daṭṭhabbo “gāmo āgato”ti-ādīsu viya. Tenāha “**nagaravāsīnaṃ**”ti. Manāṃ appāyati vaḍḍhetīti **manāpā**. Tenāha “**cittavuddhikarā**”ti.

Gūthabhāṇīsuttavaṇṇanā niṭṭhitā.

9. Andhasuttavaṇṇanā

29. Navame **andhoti**-ādīsu pālīpadesu paṭhamo diṭṭhadhammikabhoga-saṃharaṇapaṇṇācakkhuno ca samparāyikatthasādhanapaṇṇācakkhuno ca abhāvā “andho”ti vuccati dutiyopi, tatiyo pana dvinnampi bhāvā “dvicakkhū”ti vuccati. **Paṇṇācakkhūti** āyakosallabhūtā paṇṇācakkhu. Tenāha “**phātim kareyyā**”ti. **Adhamuttameti** adhame ceva uttame ca. **Paṭipakkhavasenāti** paṭipakkhassa atthitāvasena. **Sukkasappaṭibhāgāti** sukkadhammehi pahāyakehi sappaṭibhāgāti jāneyya. **Kaṇḥāsappaṭibhāgāti** kaṇhadhammehi pahātabbehi sappaṭibhāgāti jāneyya.

Tathājātikāti yādisehi saputtadāraparijanasaṇṇāti mittabandhavaggaṃ attānaṃ sukheti pīṇeti, tādisā bhogāpi na santi. **Puñṇāni ca na karotīti** samaṇabrāhmaṇakapaṇaddhikayācakānaṃ santappanavasena puñṇāni na karoti. **Ubhayatthāti** ubhayasmiṃ loke, ubhayasmiṃ vā attheti viḅḅahoti dassento “**idhaloke**”ti-ādīmāha. **Ubhayenāti** vuttamatthaṃ yojetvā dassetuṃ “**kathan**”ti-ādi vuttaṃ. **Yasmiṃ ṭhāneti**

1. Saṃ 2. 482 piṭṭhe.

yasmimyeva ṭhāne. **Na socatī**ti sokahetūnaṃ tattha abhāvato na socati.

Andhasuttavaṇṇanā niṭṭhitā.

10. Avakujjasuttavaṇṇanā

30. Dasame **avakujjapañño**ti nikkujjapañño. Tenāha “**adhomukhapañño**”ti. **Pubbapaṭṭhānā**ti paṭhamārambho. **Sanniṭṭhānanti** kathāpariyosānaṃ. **Appanā**ti desanāya niṭṭhāpanaṃ. Aneke vā anusandhiyoti yojetabbaṃ. **Samādhi vā**ti-ādīsu lokuttaradhammā paramatthato sāsanaṃti tadatthopādakasaṃmādhī tassa ādīti vutto, tadāsannattā vipassanā, tassa mūlabhāvena ekadesattā maggo.

Sāsanaṃ pāripūrisuddhiyo nāma satthārā desitanīyāmeneva siddhā, tā panettha kathentassa vasena gahetabbāti dassetuṃ “**anūnaṃ katvā desentī**”ti, “**niggaṇṭhiṃ katvā desentī**”ti ca vuttaṃ. Tattha **nijjaṭanti** niggumbaṃ anākulaṃ. **Niggaṇṭhinti** gaṇṭhiṭṭhānarahitaṃ suviññeyyaṃ katvā.

Ākiṇṇānīti ākiritvā saṃkiritvā ṭhapitānīti attho. Tenāha “**pakkhittānī**”ti. **Ucchaṅgo viya ucchaṅgapañño puggalo daṭṭhabboti** ucchaṅgasadisapaññatāya ucchaṅgapañño. Evaṃ paññā viya puggalopi ucchaṅgo viya hoti tasmim dhammānaṃ aciraṭṭhānatoti adhippāyena vuttaṃ. Yathā ca ucchaṅgasadisā paññā, evaṃ nikkujjakumbhasadisā paññā evāti daṭṭhabbā.

Samvidahanapaññāyāti “evaṃ kate idaṃ nāma bhavissatī”ti evaṃ taṃtaṃ atthakiccaṃ saṃvidhātumsamatthatāya vicāraṇapaññāyā rahito. **Seyyoti** seṭṭho pāsamsa. **Pubbabhāgapaṭipadanti** cittavisuddhi-ādikaṃ ariyamaggassa adhigamāya pubbabhāgapaṭipattim.

Avakujjasuttavaṇṇanā niṭṭhitā.

Puggalavaggavaṇṇanā niṭṭhitā.

4. Devadūtavagga 1. Sabrahmakasuttavaṇṇanā

31. Catutthassa paṭhame **sabrahmakānī**ti saseṭṭhakāni. **Yesanti** yesaṃ kulānaṃ. **Puttānanti** puttehi. Pūjitasaddayogena hi idaṃ karaṇatthe sāmivacanaṃ. **Tenāti** āhārādinaṃ. **Paṭijaggitā gopitā**ti yathākālaṃ tassa tassa dātabbassa dānena veyyāvaccassa ca karaṇena paṭijaggitā ceva uppannānatthappaharaṇena gopitā ca honti. **Tesanti** mātāpitūnaṃ. **Brahmādibhāvasādhanatthanti** tesāṃ guṇānaṃ atthitāya loke brahmā nāma vuccati, ācariyo nāma vuccati, āhuneyyo nāma vuccati, te mātāpitūnaṃ puttakaṃ paṭilabhanṭīti dassanavasena nesāṃ brahmādibhāvasādhanatthaṃ “bahukārā”¹ti vatvā taṃ tesāṃ bahukārataṃ nānākārato dassetuṃ “**āpādakā**”²ti-ādi vuttaṃ. Mātāpitāro hi puttānaṃ jīvitassa āpādakā, sarīrassa posakā, ācārasamācārānaṃ sikkhāpakā, sakalassapi imassa lokassa dassetāro. Tenāha “**puttānaṃ hī**”²ti-ādi. Itthārammaṇaṃ tāva te dassentu, anitthārammaṇaṃ kathanti? Tampi dassetabbameva vajjanīyabhāvajanāpanatthaṃ.

Avijahitā hontīti tāsāṃ bhāvanāya brahmānaṃ brahmaloke uppannattā avijahitā honti bhāvanā. **Lobhanīyavayasmim** paṭhamayobbane ativiya mudubhāvappattadassanatthaṃ **satavihataggahaṇaṃ**. **Pāṭiyekanti** visuṃ. **Iminā karaṇenāti** iminā yathāvuttena puttesu pavattitehi atikkamena mettādisamuppattisaṅkhātena karaṇena.

Tharusippanti asisattikuntakalāpādi-āyudhasippaṃ. **Muddāgaṇanāti** aṅgulisaṃkocanādinā hatthamuddāya gaṇanā. **Ādisaddena pāṇādīnaṃ**² saṅgaho. **Pacchācariyā nāma** mātāpitūnaṃ santike uggahitagaḥṭṭhavattasseva puggalassa yathāsakaṃ hatthācariyādīnaṃ sippaggāhāpananti katvā sabbapaṭhamaṃ ācariyā nāmāti yojetabbaṃ. Ānīya hutāṃ **āhutaṃ**. Pakārehi hutāṃ **pāhutaṃ**. **Abhisāṅkhatanti** tasseva vevacanaṃ.

Namo kareyyāti sāyaṃ pātāṃ upaṭṭhānaṃ gantvā “idaṃ mayhaṃ uttamapuññakkhettaṃ”²ti namakkāraṃ kareyya. **Tāya naṃ pāricariyāyāti** ettha **nanti** nipātamattaṃ, yathāvuttaparicaraṇenāti attho. Atha vā

1. Bahupakārāti (Ka)

2. Pāṭhanādīnaṃ (?)

pāricariyāyāti bharaṇakiccakaraṇakulavaṃsappatitṭhāpanādinā pañcavidha-upaṭṭhānena. Vuttaṃ hetam—

“Pañcahi kho gahapatiputta ṭhānehi puttana puratthimā disā mātāpitaro paccupaṭṭhātabbā ‘bhato ne bharissāmi, kiccaṃ nesaṃ karissāmi, kulavaṃsaṃ ṭhappessāmi, dāyajjaṃ paṭipajjāmi, atha vā pana petānaṃ kālakatānaṃ dakkhiṇaṃ anuppadassāmi’ti. Imehi kho gahapatiputta pañcahi ṭhānehi puttana puratthimā disā mātāpitaro paccupaṭṭhitā pañcahi ṭhānehi puttaṃ anukampanti, pāpā nivārenti, kalyāṇe nivesenti, sippaṃ sikkhāpentī, patirūpena dārena saṃyojenti, samaye dāyajjaṃ niyyādentī”ti¹.

Apica yo mātāpitaro tīsu vatthūsu abhippasanne katvā sīlesu vā patiṭṭhāpetvā pabbajjāya vā niyojetvā upaṭṭhahati, ayaṃ mātāpitūpaṭṭhākānaṃ aggoti veditabbo. Sā paṇāyaṃ pāricariyā puttassa ubhayalokahitasukhāvahāti taṃ dassetuṃ “**idheva naṃ pasaṃsanti, pecca sagge pamodatī**”ti vuttaṃ. **Pasaṃsanti** “ayaṃ puggalo mattheyyo pettheyyo saggasaṃvattaniyaṃ paṭipadaṃ pūreti”ti idheva naṃ pasaṃsanti. **Āmodati** ādito paṭṭhāya modappattiyā. **Pamodati** nānappakāramodasampavattiyā.

Sabrahmakasuttavaṇṇanā niṭṭhitā.

2. Ānandasuttavaṇṇanā

32. Dutiye **tathājātikoti** tathāsabhāvo. **Cittekaggatālābhoti** cittekaggatāya adhigamo. Rūpameva kilesuppattiyā kāraṇabhāvato **rūpanimittam**. Esa nayo sesesupi. **Sassatādinimittanti** sassatucchedabhāvanimittam. **Puggalanimittanti** puggalābhinivesananimittam. **Dhammanimittanti** dhammārammaṇasaṅkhātāṃ nimittam. “Siyā nu kho bhante”ti therena puṭṭho bhagavā “siyā”ti avoca lokuttarasamādhippaṭilābhaṃ sandhāya. So hi nibbānaṃ santaṃ paṇīnti ca passati. Tenāha “**idhānandā**”ti-ādi.

1. Dī 3. 154 piṭṭhe.

Nibbānaṃ santanti samāpattiṃ appetvāti nibbānaṃ santanti ābhujitvā phalasaṃpattiṃ appetvā. **Divasaṃpīti**-ādinā asaṅkhatāya dhātuyā accantasantaṇṇātibhāvaṃ dasseti. **Aṭṭhavidheti** “santaṃ paṇītaṃ sabbasaṅkhārasamatho sabbūpādhipaṇinissaggo taṇhakkhayo virāgo nirodho nibbānaṃ”ti evaṃ aṭṭhavidhe ābhogasaṅgāhite samannāhāre. Niddhāraṇe cetāṃ bhumaṃ. **Imasmiṃ ṭhāne -pa- labbhantevā**ti “idhānanda bhikkhuno evaṃ hoti”ti āgate imasmiṃ suttappadesa ekopi ābhogasaṃnāhāro cepi sabbe aṭṭhapi ābhogasaṃnāhārā labbhanteva samannāharataṃ atthāvahattā.

Ñāṇena jānitvāti vipassanāñāsahitena magaṇṇāṇena jānitvā. **Parāni ca oparāni ca** cakkhādīni āyatanāni. **Santatāyā**ti paṭippassaddhitāya. **Kāyaduccaritādidhūmavirahito**ti kāyaduccaritādi eva santāpanaṭṭhena dhūmo, tena virahito. **Anīgho**ti apāpo. **Jātijarāgahaṇeneva byādhimaraṇampi gahitamevā**ti tabbhāvabhāvatoti vuttaṃ.

Ānandasuttavaṇṇanā niṭṭhitā.

3. Sāriputtasuttavaṇṇanā

33. Tatiye “sāriputta mayā saṅkhittena desitaṃ dhammaṃ tādiseṇapi na sukaraṃ viññātun”ti iminā adhippāyeneva vadanto therassa ṇāṇaṃ sabbamatikkamaṃ. **Aññātāro ca dullabhā**ti hi iminā sāmaññavacanena sāriputtattherampi antogadhaṃ katvā dassento tenapi attano desanāya duppaṭividdhabhāvaṃ dasseti.

Sammāti hetunā kāraṇena. Tenāha “**upāyenā**”ti-ādi. **Mānābhisamayā**ti mānassa dassanābhisamayā. Pahānābhisamayoti ca dassanābhisamayoti ca pariññābhisamayoti vutto. Arahattamaggo hi pariññākiccasiddhiyā kiccavasena mānaṃ passati, asammohappaṭivedhavasenāti vuttaṃ hoti, ayamassa dassanābhisamayoti. Tena daṭṭho pana pahānābhisamayoti ca. Dassanābhisamayena hi pariññābhisamayameva pahīyati. Diṭṭhavisena diṭṭhasattānaṃ jīvitaṃ viya ayamassa

pahānābhisamayo. **Atṭhakathāyaṃ** pana pahānābhisamayassa dassanābhisamayanānantariyakattā “pahānābhisamayena” icceva vuttaṃ. Pahānābhisamaye hi gahite dassanābhisamayo gahitova hoti.

Antamakāsi dukkhassāti arahattamaggena mānassa pahīnattā ye ime “kāyabandhanassa anto jīrati¹, haritantāṃ vā”² evaṃ vuttantimamariyādanto ca “antamidāṃ bhikkhave jīvikānaṃ”³ evaṃ vuttalāmakanto ca “sakkāyo eko anto”⁴ evaṃ vuttakoṭṭhāsanto ca “esevanto dukkhassa sapaccayasāṅkhāyā”⁵ evaṃ vuttakoṭṭhāsanto cāti cattāro antā, tesu sabbasseva vaṭṭadukkhassa aduṃ catutthakoṭṭhāsāṅkhātāṃ antamakāsi, paricchedaṃ parivaṭṭumaṃ akāsi, antimasamudayamatāvasesaṃ dukkhamasīti vuttaṃ hoti. Tenāha “**vaṭṭadukkhassa antamakāsi**”⁶ti.

Nanu ca “pahānaṃ”⁷ti imassa niddese nibbānaṃ āgataṃ, idha paṭippassaddhippahānasāṅkhātāṃ arahattaphalaṃ vuttaṃ, tasmā niddesenāyaṃ vaṇṇanā virujjhatīti āha “**niddese panā**”⁸ti-ādi. **Tattha tāni padāni āgatāni**ti tasmim niddese “pahānaṃ vūpasamaṃ paṭinissaggaṃ”⁹ti-ādīni⁶ padāni āgatāni.

Dhammatakkapurejavanti iminā tasmim catutthajjhānavimokkhe thatvā jhānaṅgāni vipassitvā adhigataṃ arahattavimokkhaṃ vadati. Arahattavimokkhassa hi maggasampayuttasammāsaṅkappasaṅkhāto dhammatakkopurejavo hoti.

Sāriputtasuttavaṇṇanā niṭṭhitā.

4. Nidānisuttavaṇṇanā

34. Catutthe **piṇḍakaraṇatthāyāti** āyūhanavasena rāsikaraṇatthāya. **Abhinnānīti** ekadesenapi akhaṇḍitāni. Bhinnakālato paṭṭhāya hi bījaṃ bījakiccāya na upakappati. **Apūtīnīti** udakate manena pūtibhāvaṃ na upagatāni. Pūtibījaṃ hi bījatthāya na upakappati. Tenāha “**pūtibhāvena abījattaṃ appattāni**”¹⁰ti. **Na vātena na ca ātapa**

1. Vi 4. 277 piṭṭhe.

3. Saṃ 2. 76; Khu 1. 255 piṭṭhe.

5. Ma 3. 310 piṭṭhe.

2. Ma 1. 246 piṭṭhe.

4. Saṃ 2. 128 piṭṭhe.

6. Khu 8. 157 piṭṭhe.

hatānīti vātena ca ātapena ca na hatāni, nirojataṃ na pāpitāni. Nirojaṃ hi kasaṭabijaṃ bijatthāya na upakappati. **Sārādānī**¹ taṇḍulasārassa ādānato sārādāni. Nissāraṃ hi bijaṃ bijatthāya na upakappati. Tenāha “**gahitasārānī**”ti, patiṭṭhitasārānīti attho. **Sannicayabhāvena sukhaṃ sayitānī**ti cattāro māse koṭṭhapakkhittaniyāmeneva sukhasayitāni.

Kammavibhattīti kammavibhāgo. Diṭṭhadhammo vuccati paccakkhabhūto paccuppanno attabhāvo, tattha veditabbaphalaṃ kammaṃ **diṭṭhadhammavedanīyaṃ**. Paccuppannabhavato anantaraṃ veditabbaphalaṃ kammaṃ **upapajjavedanīyaṃ**. **Aparapariyāyavedanīyanti** diṭṭhadhammānantarabhavato aññasmiṃ attabhāvapariyāye attabhāvaparivatte veditabbaphalaṃ kammaṃ. Paṭipakkhehi anabhibhūtātāya paccayavisesena paṭiladdhavisēsātāya ca balavabhāvappattā tādisassa pubbābhisāṅkhārassa vasena sātisayā hutvā pavattā paṭhamajavanacetanā tasmimīeva attabhāve phaladāyini **diṭṭhadhammavedanīyakammaṃ nāma**. Sā hi vuttākārena balavatī javanasantāne guṇavisesayuttesu upakārānupakāravasappavattiyā āyevanālābhena appavipākatāya ca paṭhamajavanacetanā itaradvayaṃ viya pavattasantānuparamāpe kkaṃ okāsalābhāpekkhañca kammaṃ na hotīti idheva pupphamattaṃ viya pavattivipākamattaṃ phalaṃ deti. **Tathā asakkontanti** kammaṃ vipākadānaṃ nāma upadhippayogādipaccayantarasaṃvāyeneva hotīti tadabhāvato tasmimīeva attabhāve vipākaṃ dātuṃ asakkontaṃ. **Ahosikammanti** ahosi eva kammaṃ, na tassa vipāko ahosi atthi bhavissati cāti evaṃ veditabbaṃ kammaṃ.

Atthasādhikāti dānādipaṇātipātādi-atthassa nipphādikā. Kā pana sāti āha “**sattamajavanacetanā**”ti. Sā hi sannipphāpakacetanā vuttanayena paṭiladdhavisēsā purimajavanacetanāhi laddhāsevanā ca samānā anantarattabhāve vipākadāyini **upapajjavedanīyakammaṃ nāma**. **Purima-upamāyayevā**ti migaluddakopamāyayeva.

Sati saṃsārappavattiyāti iminā asati saṃsārappavattiyāṃ ahosikammappakkhe tiṭṭhati vipaccanokāsassa abhāvatoti dīpeti. **Yaṃ**

1. Sārādānānīti (Ka)

garukanti yaṃ akusalaṃ mahāsāvajjaṃ, kusalañca mahānubhāvaṃ kammaṃ. Kusalaṃ vā hi hotu akusalaṃ vā, yaṃ garukaṃ mātughātādikammaṃ vā mahaggatakammaṃ vā, tadeva paṭhamāṃ vipaccati. Tenāha “**kusalākusalesu panā**”ti-ādi. **Yaṃ bahulanti** yaṃ bahulaṃ abhiṅhaso kataṃ samāsevitāṃ. Tenāha “**kusalākusalesu pana yaṃ bahulaṃ hoti**”ti-ādi. **Yadāsannaṃ nāma** maraṇakāle anussaritaṃ kammaṃ, āsannaṃ kate pana vattabbameva natthīti āha “**yaṃ pana kusalākusalesu āsannamarañe**”ti-ādi. **Anussaritunti** paribyaṭṭabhāvena anussarituṃ.

Tesaṃ abhāveti tesaṃ yaṃgarukādīnaṃ tiṇṇaṃ kammānaṃ abhāve. **Yattha katthaci vipākaṃ detīti** paṭisandhijanakavasena vipākaṃ deti. Paṭisandhijanakavasena hi garukādikammacatukkaṃ vuttaṃ. Tatha garukaṃ sabbapaṭhamāṃ vipaccati, garuke asati bahulīkataṃ, tasmim̐ asati yadāsannaṃ, tasmim̐ asati “kaṭattā vā panā”ti vuttaṃ purimajātīsu katakammaṃ vipaccati. Bahulāsannapubbakatesu ca balābalaṃ jānitabbaṃ. Pāpato pāpantaraṃ kalyāṇaṃ, kalyāṇato kalyāṇantaraṃ pāpaṃca bahulīkataṃ. Tato mahatova¹ pubbakatādi-appaṃca bahulānussaraṇena vipaṭisārādijananato, paṭipakkhassa aparipuṇṇatāya āradhaviṇṇatāya kammaṃ kammasesassa vā aparapariyāyavedaniyassa aparikkhīṇatāya santatiyā pariṇāmaṃvisevatoti tehi tehi kāraṇehi āyūhitaphalaṃ paṭhamāṃ vipaccati. **Mahānāradakassapajātaka**² videharaṇṇo senāpati alāto, bijako dāso, rājakaṇṇā rucā ca ettha nidassanaṃ. Tathā hi vuttaṃ bhagavatā—

“Tatrānanda yvāyaṃ puggalo idha pāṇātipātī -pa- micchādiṭṭhi. Kāyassa bhedaṃ paraṃ marañā apāyaṃ duggatiṃ vinipātaṃ nirayaṃ upapajjati, pubbe vāssa taṃ kataṃ hoti pāpakammaṃ dukkhavedaniyaṃ, pacchā vāssa taṃ kataṃ hoti pāpakammaṃ dukkhavedaniyaṃ maraṇakāle vāssa hoti micchādiṭṭhi samattā samādinna, tena so kāyassa bhedaṃ paraṃ marañā apāyaṃ duggatiṃ vinipātaṃ nirayaṃ upapajjati”ti—

1. Mahatāva (?)

2. Khu 6. 257 piṭṭhe.

ādi. Sabbaṃ **mahākammavibhaṅgasuttaṃ**¹ vitthāretabbaṃ. Kiṃ bahunā. Yaṃ taṃ Tathāgatassa mahākammavibhaṅgañāṇaṃ, tassevāyaṃ visayo, yadidaṃ tassa tassa kammassa tena tena kāraṇena pubbāparavipākatā samatthīyati.

Idāni janakādikammacatukkaṃ vibhajanto **“janakaṃ nāmā”**ti-ādimāha. **Pavattiraṃ na janetī**ti pavattivipākaṃ na janeti. Paṭhamanaye janakakammassa paṭisandhivipākamattasseva vuttatā tassa pavattivipākadāyakattampi anujānanto **“aparo nayo”**ti-ādimāha. Tattha paṭisandhidānādivasena vipākasantānassa nibbattaṃ **janakaṃ**. Sukhadukkhasantānassa nāmarūpappabandhassa vā cirataraṃ pavattihetubhūtaṃ **upatthambhakaṃ**. Tenāha **“sukhadukkhaṃ upatthambheti, addhānaṃ pavatteti”**ti. **Upapīlakaṃ** sukhadukkhapbandhe pavattamāne saṅikaṃ saṅikaṃ hāpeti. Tenāha **“sukhadukkhaṃ pīleti bādheti, addhānaṃ pavattitiraṃ na deti”**ti.

Vātakāḷako mahallako core ghātetiraṃ na sakkotīti so kira mahallakakāle ekappahārena sīsaṃ chinditiraṃ na sakkoti, dve tayo vāre paharanto manusse kilameti, tasmā te evamāhaṃsu. **Anulomikaṃ khantiraṃ paṭilabhitvā**ti sotāpattimaggassa orato anulomikaṃ khantiraṃ labhitvā. **Taruṇavacchāya gāviyā madditvā jīvitakkhayaṃ pāpitoti** ekā kira yakkhinaṃ dhenuvesena āgantvā ure paharivā māresi, taṃ sandhāyetaṃ vuttiraṃ. Nagare bhavo **nāgariyo**.

Ghātetvāti upacchinditvā. Kammassa upacchindanaṃ nāma tassa vipākappaṭibāhanamevāti āha **“tassa vipākaṃ paṭibāhitvā”**ti. Tañca attano vipākuppattiyā okāsakaraṇanti vuttiraṃ **“attano vipākassa okāsaṃ karoti”**ti. Vipaccanāya katokāsaṃ kammaṃ vipakkameva nāma hotīti āha **“evaṃ pana kammaṃ kate okāse taṃ vipākaṃ uppannaṃ nāma vuccati”**ti. Upapīlakaṃ aññassa vipākaṃ upacchindati, na sayāṃ attano vipākaṃ deti. Upaghātaṃ pana dubbalakammaṃ upacchinditvā attano vipākaṃ uppādetīti ayametesāṃ viseso. Kiñci bahvābādhatādipaccayūpasannipātena vipākassa vibādhaṃ upapīlakaṃ, tathā vipākasseva upacchedakaṃ. Upaghātakammaṃ pana upaghātetvā attano vipākassa okāsakaraṇena

1. Ma 3. 257 piṭṭhe.

vipaccane sati janakameva siyā. Janakādibhāvo nāma vipākaṃ pati icchitabbo, na kammaṃ patīti vipākasappa upaghātakatā yuttā viya dissati, vīmaṃsitabbaṃ.

Aparo nayo—yasmim kamme kate paṭisandhiyaṃ pavatte ca vipākakataṭṭārūpānaṃ uppatti hoti, taṃ **janakaṃ**. Yasmim pana kate aññaṇa janitassa iṭṭhassa vā aniṭṭhassa vā phalassa vibādha-kavicchedakapaccayānuppattiyā upabrūhanapaccayuppattiyā janakasāmatthiyānurūpaṃ parisuddhiciratarappabandhā hoti, taṃ **upatthambhakaṃ**. Janakena nibbattaṃ kusalaphalaṃ vā akusalaphalaṃ vā yena paccanīkabhūtena rogadhātuvisamatādinimittatāya vibādhayati, taṃ **upapīlakaṃ**. Yena pana kammunā janakasāmatthiyavasena ciratarappabandhārahampi samānaṃ phalaṃ vicchedakapaccayuppattiyā upahaññati vicchijjati, taṃ **upaghātakanti** ayamettha sāro.

Tattha keci dutiyassa kusalabhāvaṃ itthattamāgatassa appābādhadīghāyukatāsaṃvattanavasena, pacchimānaṃ dvinnāṃ akusalabhāvaṃ bahvābādha-appāyukatāsaṃvattanavasena vaṇṇenti. Tathā ca vuttaṃ majjhimanikāye **cūlakammavibhaṅgasuttavaṇṇanāyaṃ**¹—

“Cattāri hi kammāni upapīlakaṃ upacchedakaṃ janakaṃ upatthambhakaṃ. Balavakammena hi nibbattaṃ pavatte upapīlakaṃ āgantvā atthato evaṃ vadati nāma ‘sacāhaṃ paṭhamataraṃ jāneyyaṃ, na te idha nibbattitūṃ dadeyyaṃ, catūsuyeva taṃ apāyesu nibbattāpeyyaṃ. Hotu, tvaṃ yattha katthaci nibbatta, ahaṃ upapīlaka-kammaṃ nāma, taṃ piḷetvā nirojaṃ niyūsaṃ kasaṭaṃ karissāmi’ti. Tato paṭṭhāya taṃ tādisaṃ karoti. Kim karoti? Parissāyaṃ upaneti, bhoge vināseti.

Tattha dāra-kassa mātukucchiyaṃ nibbattakālato paṭṭhāya mātu assādo vā sukhaṃ vā na hoti², mātāpitūnaṃ piḷāva uppajjati. Evaṃ parissāyaṃ upaneti. Dāra-kassa pana mātukucchimhi nibbattakālato paṭṭhāya gehe bhogā udakaṃ patvā loṇaṃ viya rājādīnaṃ vasena nassanti,

1. Ma-Ṭṭha 4. 177 piṭṭhe.

2. Assāso vā passāso vā sukhaṃ na hoti (Ka)

kumbhadohanadhenuyo khīraṃ na denti, sūratā¹ goṇā caṇḍā honti, kāṇā honti, khañjā honti, gomaṇḍale rogo patati, dāsādayo vacanaṃ na karonti, vāpitaṃ sassam na jāyati, gehagataṃ gehe, araññagataṃ araññe nassati, anupubbena ghāsacchādanamattaṃ dullabhaṃ hoti, gabbhaparihāro na hoti, vijātakāle mātu thaññaṃ chijjati, dārako parihāraṃ alabhanto pīḷito nirojo niyūso kasaṭo hoti. Idaṃ upapīlakakammaṃ nāma.

Dīghāyukakammena pana nibbattassa upacchedakakammaṃ āgantvā āyūṃ chindati. Yathā hi puriso aṭṭhusabhagamaṇaṃ katvā saraṃ khipeyya, tamañño dhanuto muttamattaṃ muggarena paharivā tattheva pāteyya, evaṃ dīghāyukakammena nibbattassa upacchedakakammaṃ āyūṃ chindati. Kim karoti? Corānaṃ aṭaviṃ paveseti, vālamacchodakaṃ otāreti, aññataraṃ vā pana sapaṛissayaṭhānaṃ upaneti. Idaṃ upacchedakakammaṃ nāma. ‘Upaghātaṇaṃ’ tipī etasseva nāmaṃ. Paṭisandhinibbattaṃ pana kammaṃ janakakammaṃ nāma. Appabhogakulādīsu nibbattassa bhogasampadādikaraṇena upatthambhakakammaṃ upatthambhakakammaṃ nāma.

Parittakammenapi nibbattaṃ etaṃ pavatte pāṇātipātādiviratikammaṃ āgantvā atthato evaṃ vadati nāma ‘sacāhaṃ paṭhamataraṃ jāneyyaṃ, na te idha nibbattitūṃ dadeyyaṃ, devalokeyeva taṃ nibbattāpeyyaṃ, hotu, tvaṃ yattha katthaci nibbatta, ahaṃ upatthambhakakammaṃ nāma upatthambhaṃ te karissāmī’ ti upatthambhaṃ karoti. Kim karoti? Paṛissayaṃ nāseti, bhoge uppādeti.

Tattha dāraṇassa mātukucchiyaṃ nibbattakālato paṭṭhāya mātāpitūnaṃ sukhaṃ eva sātameva hoti. Yepi pakatiyā manussāmanussapaṛissayā honti, te sabbe apagacchanti. Evaṃ paṛissayaṃ nāseti. Dāraṇassa pana mātukucchimhi nibbattakālato paṭṭhāya gehe bhogānaṃ pamāṇaṃ na hoti, nidhikumbhiyo puratopi pacchatopi gehaṃ pariṭṭamānā pavisanti.

mātāpitaro parehi ṭhapitadhanassapi lammukhībhāvaṃ gacchanti,
 dhenuyo bahukhīrā honti, goṇā sukhasilā honti, vappaṭṭhāne sassāni
 sampajjanti, vaḍḍhiyā vā sampayuttaṃ, tāvakālikam vā dinnam dhanam
 acoditā sayameva āharitvā denti, dāsādayo subbacā¹ honti, kammantā
 na parihāyanti, dārako gabbhato paṭṭhāya parihāram labhati,
 komārikavejjā sannihitāva honti. Gahapatikule jāto seṭṭhiṭṭhānam,
 amaccakulādīsu jāto senāpatiṭṭhānādīni labhati. Evaṃ bhoge uppādeti.
 So aparissayo sabhogo ciram jīvati. idam upatthambhakakammaṃ
 nāma. Imesu catūsu purimāni dve akusalāneva, janakam kusalampi
 akusalampi, upatthambhakam kusalamevā²ti.

Ettha vibādhūpaghātā nāma kusalavipākamhi na yuttāti adhippāyena
 “dve akusalānevā²ti vuttam. Devadattādīnam pana nāgādīnam ito
 anuppadinnayāpanakapetānañca narakādīsu
 akusalavipākūpatthambhanūpapīlanūpaghātakāni santīti² catunnampi
 kusalākusalabhāvo na virujjhati. Evañca katvā yā bahūsu ānantariyesu
 katesu ekena gahitappaṭṭisandhikassa itaresam tassa anubalappadāyitā vuttā,
 sāpi samatthikā hoti.

Suttantapariyāyena ekādasa kammāni vibhajitvā idāni
 abhidhammapariyāpanam dassento **“atthekaccāni pāpakāni
 kammasamādānāni”**ti-ādīnā **vibhaṅgapāḷim**³ dasseti. Tattha
gatisampattiṭṭhānāni gatisampattiyā paṭibāhitāni nivāritāni paṭisedhitāni.
 Sesapadesupi eseva nayo. Tattha ca **gatisampattīti** sampannagati devaloko ca
 manussaloko ca. **Gativipattīti** vipannagati cattāro apāyā. **Upadhisampattīti**
 attabhāvasamiddhi. **Upadhivipattīti** hīna-attabhāvatā. **Kālasampattīti**
 surājasumanussakālasaṅkhāto sampanna kālo. **Kālavipattīti**
 durājadummanussakālasaṅkhāto vipannakalo. **Payogasampattīti**
 sammāpayogo. **Payogavipattīti** micchāpayogo.

1. subbatā (Ka)

2. Na santīti (Ka)

3. Abhi 2.351 piṭṭhe.

Idāni yathāvuttapāḷiyā atthaṃ dassento “**tatthā**”ti-ādimāha. Tattha **aniṭṭhārammaṇānubhavanārahe kamme vijjamāneyevā**ti iminā aniṭṭhārammaṇānubhavananimittakassa pāpakammasa sabbhāvaṃ dasseti. **Taṃ kammani** taṃ pāpakaṃ kammaṃ. Ekaccassa hi aniṭṭhārammaṇānubhavananimittaṃ bahupāpakammaṃ vijjamānampi gativipattiyaṃ ṭhitasseva vipaccati. Yadi pana so ekena kalyāṇakammena gatisampattiyaṃ devesu vā manussesu vā nibbatteyya, tādise ṭhāne akusalassa vāro natthi, ekantaṃ kusalassevāti taṃ kammaṃ gatisampattiyaṭṭhānaṃ na vipaccati. **Patibāhitaṃ hutvā**ti bādhitāṃ hutvā. **Attabhāvasamiddhiyanti** sarīrasampattiyaṃ. **Kiliṭṭhakammassā**ti hatthimeṇḍa-assabandhakagopālakādikammasa. **Palāyitabbayuttakāleti** hatthi-ādipaccatthikasamāgamakāle. **Lañjamdetū**ti evaṃ me bādhatāṃ paresāṃ vase na hotīti deti. **Corikayuttakāleti** pakkhabalādīnaṃ labbha mānakāle. **Antarakappeti** pariyoṣānappatte antarakappe.

Abhidhammanayena soḷasa kammāni vibhajitvā **paṭisambhidāmaggapariyāyena**¹ dvādasa kammāni vibhajitvā dassetuṃ “**aparāniṭṭhā**”ti-ādimāha. Tattha atītabhavesu katassa kammassa atītabhavesuyeva vipakkavipākaṃ gahetvā “ahosi kammaṃ ahosi kammavipāko”ti vuttanti āha “**yaṃ kammaṃ atīte āyūhitaṃ**”ti-ādi. **Vipākavāraṇti** vipaccanāvasaraṃ vipākavāraṃ. “Vipākavāraṃ labhati”ti iminā vuttamevatthaṃ “**paṭisandhiṃ janesī**”ti-ādinā vibhāveti. Tattha **paṭisandhiṃ janesī**ti iminā ca paṭisandhidāyakaṃ kammassa pavattivipākadāyitāpi vuttā hoti. Pavattivipākasseva pana dāyakaṃ rūpajanakasīsenā vadati. Tasseva atītassa kammassa diṭṭhadhammavedanīyassa upapajjavedanīyassa ca paccayavekallena atītavesuyeva avipakkavipākaṃ, atīteyeva parinibbutassa diṭṭhadhammavedanīya-upapajjavedanīya-aparapariyāyavedanīyassa kammassa avipakkavipākaṃ gahetvā “ahosi kammaṃ nāhosi kammavipāko”ti vuttanti āha “**yaṃ pana vipākavāraṃ na labhī**”ti-ādi.

Atītasseva kammassa avipakkavipākassa paccuppannabhava paccayasampattiyaṃ vipaccamānaṃ vipākaṃ gahetvā “ahosi kammaṃ atthi kammavipāko”ti vuttanti āha “**yaṃ pana atīte āyūhitaṃ**”ti-ādi. Atītasseva

1. Khu 9. 271 piṭṭhe.

kammasa atikkantavipākakālassa ca paccuppannabhava parinibbāyantassa ca avipaccamānavipākaṃ gahetvā “ahosi kammaṃ natthi kammavipāko”ti vuttanti āha “**aladdhavipākavāraṃ**”ti-ādi. Atītasseva kammasa vipākārahassa avipakkavipākassa anāgatabhave paccayasampattiyā vipaccitabbaṃ vipākaṃ gahetvā “ahosi kammaṃ bhavissati kammavipāko”ti vuttanti dassento “**yaṃ pana atīte āyūhitaṃ**”ti-ādimāha. Atītasseva kammasa atikkantavipākakālassa ca anāgatabhave parinibbāyitabbassa avipaccitabbavipākāṅca gahetvā “ahosi kammaṃ na bhavissati kammavipāko”ti vuccanti āha “**yaṃ anāgate vipākavāraṃ na labhissatī**”ti-ādi. Evaṃ tāva atītakammaṃ atītapaccuppannānāgatavipākāvīpākavasena chadhā dassitaṃ.

Idāni paccuppannabhava katassa diṭṭhadhammavedanīyassa idheva vipaccamānaṃ vipākaṃ gahetvā “atthi kammaṃ atthi kammavipāko”ti vuttanti dassento “**yaṃ pana etarahi āyūhitaṃ**”ti-ādimāha. **Yaṃ pana etarahi vipāka vāraṃ na labhatī**ti-ādinā tasseva paccuppannassa kamassa paccayavekallena idha avipaccamānaṅca diṭṭheva dhamme parinibbāyantassa idha avipaccamānaṅca vipākaṃ gahetvā “atthi kammaṃ natthi kammavipāko”ti vuttanti dasseti. Paccuppannasseva kammasa upapajjavedanīyassa aparapariyāyavedanīyassa ca anāgatabhave vipaccitabbavipākaṃ gahetvā “atthi kammaṃ bhavissati kammavipāko”ti vuttanti āha “**yaṃ pana etarahi āyūhitaṃ anāgate vipākavāraṃ labhissatī**”ti-ādi. Paccuppannasseva kammasa upapajjavedanīyassa paccayavekallena anāgatabhave avipaccitabbaṅca anāgatabhave parinibbāyitabbassa aparapariyāyavedanīyassa avipaccitabbaṅca vipākaṃ gahetvā “atthi kammaṃ na bhavissati kammavipāko”ti vuttanti āha “**yaṃ pana vipākavāraṃ na labhissatī**”ti-ādi.

Evaṅca paccuppannakammaṃ paccuppannānāgatavipākāvīpākavasena catudhā dassetvā idāni anāgatabhave katassa kammasa anāgate vipaccitabbavipākaṃ gahetvā “bhavissati kammaṃ bhavissati kammavipāko”ti vuttanti dassento “**yaṃ panānāgate āyūhissatī**”ti-ādimāha. Tasseva anāgatassa kammasa paccayavekallena avipaccitabbaṅca anāgatabhave parinibbāyitabbassa avipaccitabbaṅca vipākaṃ gahetvā “bhavissati kammaṃ na bhavissati kammavipāko”ti vuttanti āha “**yaṃ pana vipākavāraṃ na**

labhissati”ti-ādi. Evaṃ anāgatakammaṃ anāgatavipākāvīpākavasena dvidhā dassitaṃ. **Evanti**-ādinā yathāvuttadvādasakammāni nigameti.

Idāni sabbesu yathāvuttappabhedesu kammesu yāni abhidhammanayena vibhattāni soḷasa kammāni, yāni ca paṭisambhidāmaggapariyāyena vibhattāni dvādasa kammāni, tāni sabbāni suttantikapariyāyena vibhatesu ekādasavidhesuyeva kammesu antogadhāni, tāni ca diṭṭhadhammavedanīya-upapajjavedanīya-aparapariyāyavedanīyesu tīsuyeva antogadhānīti dassento **“iti imāni cevā”**ti-ādimāha. Tattha **attano thānā osakkivāti** attano yathāvuttadvādasasoḷasappabhedasaṅkhātāthānato parihāpetvā, taṃ taṃ pabhedam hitvāti vuttaṃ hoti. **Ekādasā kammāniyeva bhavantīti** taṃsabhāvānaṃyeva kammānaṃ dvādasadhā soḷasadhā ca vibhajitvā vuttattā evamāha. Yasmā ekādasadhā vuttakammāni diṭṭhadhammavedanīyāni vā siyumaṃ upapajjavedanīyāni vā aparapariyāyavedanīyāni vā, tasmā vuttaṃ **“tīṇiyeva kammāni hontī”**ti.

Tesaṃ saṅkamaṇaṃ natthīti tesaṃ diṭṭhadhammavedanīyādīnaṃ saṅkamaṇaṃ natthi, saṅkamaṇaṃ upapajjavedanīyādibhāvāpatti. Tenāha **“yathāthāneyeva tiṭṭhantī”**ti, attano diṭṭhadhammavedanīyādiṭṭhāneyeva tiṭṭhantīti attho. Diṭṭhadhammavedanīyameva hi paṭhamajavanacetanā, upapajjavedanīyameva sattamajavanacetanā, majjhe pañca aparapariyāyavedanīyamevāti natthi tesaṃ aññamaññaṃ saṅgaho, tasmā attano attano diṭṭhadhammavedanīyādisabhāveyeva tiṭṭhanti. Teneva bhagavatā **“diṭṭhe vā dhamme, upapajja vā, apare vā pariyāye”**ti tayo vikappā dassitā. Tenevāha **“diṭṭhadhammavedanīyaṃ kamman”**ti-ādi. Tattha **“diṭṭhe vā dhamme”ti satthā na vadeyyāti** asati niyāme na vadeyya. Yasmā pana tesaṃ saṅkamaṇaṃ natthi, niyatasabhāvā hi tāni, tasmā satthā **“diṭṭhe vā dhamme”**ti-ādimavoca.

Sukkapakkheti “alobho nidānaṃ kammānaṃ samudayāyā”ti-ādinā āgate kusalapakkhe. **Niruddheti** ariyamaggādhigamena anuppādanīrodhena niruddhe. **Tālavatthu viya katanti** yathā tāle chinne thitaṭṭhāne kiñci na hoti, evaṃ kamme pahīne kiñci na hotīti attho. **Tālavatthūti** vā matthakacchinno tālo vutto pattaphalamakulasūci-ādināṃ abhāvato. Tato eva so **avirūḷidhammo**. Evaṃ pahīnakammo sattasantāno.

Tenāha “**matthakacchinnatālo viyā**”ti. **Anu-abhāvaṃ kataṃ** pacchato dhammappavattiyā abhāvato. Tenāha “**yathā**”ti-ādi. **Appavattikatakālo viyāti** bījānaṃ sabbaso appavattiyā katakālo viya. **Chinnamūlakānanti** kilesamūlassa sabbaso chinnattā chinnamūlakānaṃ. Kilesā hi khandhānaṃ mūlāni.

Vedanīyanti veditabbaṃ. **Aññaṃ vatthu natthīti** aññaṃ adhiṭṭhānaṃ natthi. Sugatisaññitāpi heṭṭhimantena saṅkhāraddukkhatto anapagatattā duggatiyo evāti vuttaṃ “**sabbā duggatiyo**”ti, evaṃ vā ettha attho daṭṭhabbo. Lobho etassa kāraṇabhūto atthīti **lotam**, lobhanimittaṃ kammaṃ. Tathā **dosanti** etthāpi. Tenāha “**lobhadosasīsena lobhajañca dosajañca kammameva niddiṭṭhan**”ti. **Vaṭṭavivaṭṭanti** vaṭṭaṅca vivaṭṭaṅca.

Nidānasuttavaṇṇanā niṭṭhitā.

5. Hatthakasuttavaṇṇanā

35. Pañcame **āḷaviyanti** āḷaviraṭṭhe, na āḷavinagare. Tenāha “**āḷaviyanti** **Āḷaviraṭṭhe**”ti. **Athāti** avicchedatthe nipāto. Tattha bhagavato nisajjāya avicchinnāya evāti attho. Tenāha “**evan**”ti-ādi. **Hatthato hatthaṃ gatattāti** āḷavakassa yakkhassa hatthato sammāsambuddhassa hatthaṃ, tato rājapurisānaṃ hatthaṃ gatattā.

Māghassāti māghamāsassa. Evaṃ **phaggunassāti** etthāpi. **Khurantarehi kaddamo uggantvā tiṭṭhatīti** kaddamo khurantarehi uggantvā tiṭṭhati. **Catūhi disāhi vāyanto vāto verambhoti vuccati** verambhavātasadisattā.

Pañcadvārakāyanti pañcadvārānusārena pavattaṃ viññāṇakāyaṃ. **Khobhayamānāti** kilesakhobhavasena khobhayamānā cittaṃ saṅkhotam karontā. **Cetasikāti** manodvārikacittasannissitā. Tenāha “**manodvāram khobhayamānā**”ti. **So rāgoti** taṃsadiso rāgo. Bhavati hi taṃsadise tabbohāro yathā “**sā eva tittirikā, tāni eva osadhāni**”ti. Yādiso hi ekassa puggalassa uppajjanakarāgo, tādiso eva tato aññassa rāgabhāvasāmaññato. Tena vuttaṃ

“**tathārūpo rāgo**”ti-ādi. Icchitālābhena rajanīyesu vā niruddhesu vatthūsu domanassuppattiyā dosapariḷāhānaṃ sambhavo veditabbo.

Na **limpati** anupalittacittattā. **Sītibhūto** nibbutasabbapariḷāhattā. **Āsattiyo vuccanti taṇhāyo** tattha tattha āsañjanaṭṭhena. **Darathanti** pariḷāhajātaṃ. **Cetasoti** sāmivacanaṃ.

Hatthakasuttavaṇṇanā niṭṭhitā.

6. Devadūtasuttavaṇṇanā

36. Chaṭṭhe **devadūtānī**ti liṅgavipallāsaṃ katvā vuttanti āha “**devadūtā**”ti, ubhayalingaṃ vā etaṃ padaṃ, tasmā napūmsakalingavasena pāḷiyāṃ vuttassa pulliṅgavasena atthadassanaṃ katam. **Devoti maccūti**¹ abhibhavanaṭṭhena sattānaṃ attano vase vattāpanato maccurājā “devo”ti vuccati. Yathā hi devo pakatisatte abhibhavati, evaṃ maccu sabbasatte abhibhavati, tasmā devo viyāti devo. **Tassa dūtā**”ti vatvā idānissa dūte tesam dūtabhāvaṅca vibhāvetuṃ “**jiṇṇabyādhimatahi**”ti-ādi vuttam. Tena codanathena devassa dūtā viyāti devadūtāti dasseti. “Ahaṃ asukaṃ pamaddituṃ āgamiṣāmi, tuvaṃ tassa kese gahetvā mā vissajjehi”ti maccudevassa āṇākarā dūtā viyāti hi dūtāti vuccanti.

Idāni saddhātabbaṭṭhena devā viya dūtāti devadūtāti dassento “**devā viya dūtā**”ti-ādimāha. Tattha **alaṅkatappaṭiyattāyāti** idaṃ attano dibbānubhāvaṃ āvikatvā ṭhitāyāti dassanattamaṃ vuttam. **Devatāya byākaraṇasadisameva hoti** na cirasseva jarābyādhimaraṇassa sambhavato. **Visuddhidevānanti** khīṇāsavabrahmaṇaṃ. Te hi carimabhava bodhisattānaṃ jiṇṇādibhedam dassenti, tasmā antimabhavikabodhisattānaṃ visuddhidevehi upaṭṭhāpitabhāvaṃ upādāya tadaññesampi tehi anupaṭṭhāpitānampi tathā voharitabbatā pariyāyasiddhāti veditabbā.

1. Devo vuccati maccūti (Ka)

Disvāvāti visuddhidevehi dassite disvāva. Tatoyeva hi te visuddhidevānaṃ dūtā vuttā.

Kasmā āraddhanti kevalaṃ devadūte eva sarūpato adassetvāti adhippāyo. Devānaṃ dūtānaṃ dassanūpāyattā tathā vuttanti dassento “**devadūtā -pa- samanuyuñjati**”ti āha. Tattha **devadūtā -pa- dassanatthanti** devadūtānaṃ anuyuñjanaṭṭhānūpagassa kammaṣṣa dassanatthaṃ.

Ekacce therāti andhakādike viññāṇavādino ca sandhāya vadati. Nerayike niraye pārenti tato niggantumaṃ appadānavasena rakkhantīti **nirayapālā**. Atha vā nirayapālatāya¹ nerayikānaṃ nirayadukkhena pariyaṇaddhāya alaṃ samatthāti **nirayapālā**. Tanti “natthi nirayapālā”ti vacanaṃ. **Paṭisedhitamevāti** “atthi nirayesu nirayapālā atthi ca kāraṇikā”ti-ādinā nayena **abhidhamme**² paṭisedhitameva. Yadi nirayapālā nāma na siyumaṃ, kamma kāraṇāpi na bhavēyya. Sati hi kāraṇike kamma kāraṇāya bhavitabbanti adhippāyo. Tenāha “**yathā hī**”ti-ādi. Etthāha “kiṃ panete nirayapālā nerayikā, udāhu anerayikā”ti. Kiṃ cettha—yadi tāva nerayikā nirayasamvattaniyena kammaṇa nibbattā, sayampi nirayadukkhamaṃ paccanubhaveyyumaṃ, tathā sati aññesaṃ nerayikānaṃ ghātanāya asamatthā siyumaṃ, “ime nerayikā ime nirayapālā”ti vavatthānaṇca na siyā. Ye ca ye ghātentī, tehi samānarūpabalappamaṇehi itaresaṃ bhayasantaṣā na siyumaṃ. Atha anerayikā, nesaṃ tattha kathaṃ sambhavotiṃ? Vuccate—anerayikā nirayapālā anirayagatisamvattaniyakammaṇibbattito. Nirayūpapattisamvattaniyakammato hi aññeneva kammaṇa te nibbattanti rakkhasajātikattā. Tathā hi vadanti sabbatthivādino—

“Kodhā kurūrakammaṇtā, pāpābhīrucino tathā.

Dukkhitesu ca nandanti, jāyanti yamarakkhasā”ti³.

Tattha yadeke vadanti “yātanādukkhamaṃ paṭisaṃvedēyyumaṃ, atha vā aññamaññaṃ ghāteyyūn”ti-ādi, tayidaṃ asāraṃ⁴ nirayapālānaṃ

1. Nirayavāsaṃ (Ka), nirayapātānaṃ (?) Anuṭṭi 3. 149 piṭṭhe passitabbaṃ.

2. Abhi 4. 430 piṭṭhe.

3. Majjhimāgamaṭṭikāya devadūtasuttavaṇṇanāyampi.

4. Ākāsaromaṭṭhanaṃ (Anuṭṭi 3. 149 piṭṭhe.)

nerayikabhāvasseva abhāvato. Yadipi anerayikā nirayapālā, ayomayāya pana ādittāya sampajjalitāya sajotibhūtāya nirayabhūmiyā parikkamamānā¹ katham dāhadukkham nānubhavantīti? Kammānubhāvato. Yathā hi iddhimanto cetovasippattā Mahāmoggallānādayo nerayike anukampantā iddhibalena nirayabhūmiṃ upagatā dāhadukkhena na bādhiyanti, evaṃsampadamidaṃ daṭṭhabbāṃ.

Iddhivisayassa acinteyyabhāvato ce? Idampi taṃsamānaṃ kammavipākassa acinteyyabhāvato. Tathārūpena hi kammunā te nibbattā yathā nirayadukkhena abādhitā eva hutvā nerayike ghātenti, na cettakena bāhiraṃvisayābhāvo yujjati iṭṭhāniṭṭhatāya paccekaṃ dvārapurisesupi vibhattasabhāvattā. Tathā hi ekaccassa dvārassa purisassa ca iṭṭham ekaccassa aniṭṭham, ekaccassa ca aniṭṭham ekaccassa iṭṭham hoti. Evañca katvā yadeke vadanti “natthi kammavasena tejasā parūpatāpanan”ti-ādi, tadapāhataṃ hoti². Yaṃ pana vadanti “anerayikānaṃ tesam katham tattha sambhavo”ti niraye nerayikānaṃ yātanāsabbhāvabhāvato. Nerayikasattayātanāyoggaṃ hi attabhāvaṃ nibbattentaṃ kammaṃ tādisanikantivinaṃmitaṃ nirayaṭṭhāne eva nibbatteti. Te hi³ nerayikehi adhikatarabalārohapariṇāhā ativiya bhayānakadassanā kurūratapayogā ca honti. Eteneva tattha nerayikānaṃ vibādhakakākasunakhādīnampi nibbattiyā atthibhāvo samvaṇṇitoti daṭṭhabbo.

Kathamaññagatikehi aññagatikabādhananti⁴ ca na vattabbāṃ aññatthāpi tathā dassanato. Yaṃ paneke vadanti “asattasabhāvā eva niraye nirayapālā niraye sunakhādayo cā”ti, tampetesaṃ matimattaṃ aññattha tathā adassanato. Na hi kāci atthi tādīsī dhammappavatti, yā asattasabhāvā, sampatisattehi appayojitā ca atthakiccaṃ sādhentī diṭṭhapubbā. Petānaṃ pānīyanivāraṇānaṃ daṇḍādihattānañca purisānaṃ sabbhāve asattabhāve ca visesakāraṇaṃ natthīti (tādīsānaṃ sabbhāvekiṃ⁵ pāpakānaṃ vattabbāṃ.)⁶ Supinopaghātopi atthakiccasamatthatāya appamāṇaṃ

1. Parivattamānā (Ka)

3. Te ca (Anuṭī 3. 150 piṭṭhe.)

5. Ko (Ka)

2. Tadapāyaṃ na hoti (Ka)

4. Aññagatikavibādhitā (Ka)

6. () Etthantare pāṭho Anuṭī 3. 150 piṭṭhe natthi.

dassanādimattenapi tadatthasiddhito. Tathā hi supine āhārūpabhogādinā na atthasiddhi, iddhinimmānarūpaṃ panettha laddhaparihāraṃ iddhivisayassa acinteyyabhāvato. Idhāpi kammavipākassa acinteyyabhāvato ce? Tam na, asiddhattā. Nerayikānaṃ kammavipāko nirayapālāti siddhametaṃ, vuttanayena pālito ca tesaṃ sattabhāvo eva siddho. Sakkā hi vattuṃ sattaśāṅkhātā nirayapālasaṅgāni dhammappavatti sābhisandhikaparūpaghāti atthakiccasabbhāvato ojaḥrādi rakkhasasantati viya. Abhisandhipubbakatā cettha na sakkā paṭikkhipituṃ tathā tathā abhisandhiyā ghātanato. Tato eva na saṅghātapabbatehi anekantikātā. Ye pana vadanti “bhūtavisesā eva te vaṇṇasaṅghānādivisesavanto bheravākārā narakapālāti samaṅgāni labhanti”ti, tadasiddhaṃ ujukameva pāliyaṃ “atthi niraye nirayapālā”ti vādassa patiṭṭhāpitattā.

Apica yathā ariyavinaye narakapālānaṃ bhūtamattatā asiddhā, tathā paññattimattavādinopi¹ bhūtamattatā asiddhā sabbaso rūpadhammānaṃ atthibhāvasseva appaṭijānanato. Na hi tassa bhūtāni nāma paramatthato santi. Yadi paramatthaṃ gahetvā voharati, atha kasmā cakkhurūpādāni paṭikkhipatīti? Tiṭṭhatesā anavaṭṭhitatakkānaṃ appahīnavipallāsānaṃ vādavīmamsā. Evaṃ attheva niraye nirayapālāti niṭṭhamettha gantabbaṃ. Sati ca nesaṃ sabbhāve asatipi bāhire visaye narake viya desādiniyamo hotīti vādo na sijjhati, sati eva pana bāhire visaye desādiniyamoti daṭṭhabbaṃ.

Devadūtasarāpanavasena satte yathūpacite puññakamme yamehi niyametīti yamo, tassa yamassa vemānikapetānaṃ rājabhāvato rañño. Tenāha “**yamarājā nāma vemānikapetarājā**”ti. **Kammavipākanti** akusalakammavipākānaṃ. Vemānikapetā hi kaṇhasukkavasena missakānaṃ kammaṃ katvā vinipātikadevatā viya sukkena kammunā paṭisandhiṃ gaṇhanti. Tathā hi maggaphalabhāginopi honti, pavattiyaṃ pana kammānurūpaṃ kadāci puññaphalaṃ, kadāci apuññaphalaṃ paccanubhavanti. Yesānaṃ pana ariyamaggo uppajjati, tesaṃ maggādhiyamato paṭṭhāya puññaphalameva uppajjatīti daṭṭhabbaṃ. Apuññaphalaṃ pubbe viya kaṭukaṃ na hoti, manussattabhāve

1. Viññattimattavādinopi (Ka)

ṭhitānaṃ viya mudukameva hotīti apare. **Dhammiko rājāti** ettha tassa dhammikabhāvo dhammadevaputtassa viya uppattiniyato dhammavasena¹ veditabbo. **Dvāresūti** Avīcimahānarakassa catūsu dvāresu. **Khīṇāsavā brāhmaṇā nāma** ukkaṭṭhaniddesena.

Anuyogavattanti anuyoge kate vattitabbavattam. **Āropentoti** kārāpento, attano puccham uddissa paṭivacanam dāpento pucchati. Parassa hi adhippāyam nātum icchanto tadupagam payogam karonto pucchati nāma. **Laddhinti** gāham. **Paṭiṭṭhāpentoti** tattha niccakālam² kārāpento. **Kāraṇam pucchantoti** yuttim pucchanto. **Samanubhāsati**ti yathānuyuttamattham vibhūtam katvā katheti.

Jiṇṇanti jarāpattiyā jiṇṇam. Ekacco daharakālato paṭṭhāya paṇḍurogādina abhibhūtakāyatāya jiṇṇasadiso hoti, ayam na tathā jarāpattiyā jiṇṇoti dasseti. **Gopānasī viya vaṅkanti** vaṅkagopānasī viya vaṅkam. Na hi vaṅkabhāvassa nidassanattham avaṅkagopānasī gayhati. **Bhagganti** bhaggasarīram kaṭiyam bhaggakāyattā. Tenāha “**imināpissa vaṅkabhāvameva dīpeti**”ti. **Daṇḍapaṭisaraṇanti** ṭhānagamanesu daṇḍo paṭisaraṇam etassāti daṇḍapaṭisaraṇam tena vinā vattitum asamatthattā. Tenāha “**daṇḍadutiyan**”ti. **Jarāturanti** jarāya patthatasamkilantakāyam. Sabbaso kimihataṃ viya mahākhallāṭam sīsamassāti **mahākhallāṭasīsam**. **Sañjātavalinti** samantato jātavalikam. **Jarādhammoti** jarāpakatiko. Tenāha “**jarāsabhāvo**”ti. Sabhāvo ca nāma tejodhātuyā uṇhatā viya na kadāci vigacchatīti āha “**aparimutto jarāyā**”ti-ādi.

Atthato evam vadati nāma, vācāya avadantopi atthāpattito evam vadanto viya hoti viññūnanti attho. **Taruṇo ahoṣim** yobbanena samannāgato. Ūrūnam balaṃ etassa atthīti **ūrubalī**. Tena dūrepi gamanāgamanalaṅghanādisamatthataṃ dasseti, **bāhubalīti** pana iminā hattheti kātabbakiccasamatthataṃ, **javaggahaṇena** vegasā pavattisamatthataṃ. **Antarahitāti** naṭṭhā. Ettha ca **na kho panāhanti**-ādi jarāya devadūtabhāvavadassanam. Tenāha “**tenesa devadūto nāma jāto**”ti.

1. Uppattiniyamitadhammavasena (Ka)

2. Niccalam (Ka)

Ābādhassa atthitāya **ābādhikam**. Vividham dukkham ādahaṭṭi¹ byādhi, visesena vā ādhiyati etenāti byādhi, byādhi samjāto etassāti **byādhitam**. Esa nayo **dukkhitanti** etthāpi.

Dutiyam devadūtanti etthāpi vuttanayeneva attho veditabbo. **Byādhinā abhihatoti** byādhinā bādhito, upaddutoti attho.

Viparibhinnavaṇṇoti viparibhinnanīlavaṇṇo. Tam hi yattha yattha gahitapubbakam, tattha tattha paṇḍuvaṇṇam, maṁsussadaṭṭhāne rattavaṇṇam, yebhuyyena ca nīlasāṭakapārutam viya hoti. Tena vuttam “viparibhinnanīlavaṇṇo”ti.

“**Ko labhati, ko na labhati**”ti nirayupagasseva vassenāyam vicāraṇāti “**yena tāva bahu pāpam katan**”ti-ādi āradham. **Bahu pāpam katanti** bahuso pāpam katan. Tena pāpassa bahulikaraṇamāha. **Bahūti** vā mahantaṁ. Mahatthopi hi bahusaddo dissati “bahu vata katan assa”ti-ādīsu, garukanti vuttam hoti. So garukam bahulam vā pāpam katvā ṭhito niraye nibbattatiyeva, na yamapurisehi yamassa santikam nīyatīti. **Parittanti** pamāṇaparittatāya kālaparittatāya ca parittam. Purimasmiṁ atthe agarūti attho, dutiyasmiṁ abahulanti. Yathāvuttamattham upamāya vibhāvetum “**yathā hī**”ti-ādi vuttam. **Kattabbameva karontīti** daṇḍameva karontī. **Anuvijjivāti** vīmaṁsitvā. **Vinicchayaṭṭhānanti** aṭṭakaraṇaṭṭhānam. **Parittapāpakammāti** dubbalapāpakammā. **Attano dhammatāyāti** parehi asāriyamānepi attano dhammatāya saranti. Te hi pāpakammasa dubbalabhāvato katūpacitassa ca okāsārahakusalakammasa balavabhāvato attano dhammatāyapi saranti. **Sāriyamānāpīti** “idaṁ nāma tayā katan puññakamman”ti parehi sāriyamānāpi.

Ākāsacetiyanti girisikhare abbhokāse vivaṭaṅgaṇe katacetiyan. **Rattapaṭenāti** rattavaṇṇena paṭena **pūjesi** paṭakam katvā. **Aggijālasaddanti** paṭapaṭāyantam narake aggijālasaddam sutvāva. **Attanā pūjitapaṭam anussārīti** tadā paṭākāya vātappahārasadde nimittassa gahitattā “mayā tadā ākāsacetiye pūjitarattapaṭasaddo viyā”ti attano pūjitapaṭam anussari.

1. Ādadhātīti (Ka)

Sumanapupphakumbhenāti kumbhaparimāṇena sumanapuppharāsinā. “Dasādhikam nāḷisahassakumbhan”ti keci, “pañca-ambaṇan”ti apare. **Tihipi** na sarati balavatā pāpakammena byāmahito. **Tuṇhī ahoṣī**ti “kammāraho ayan”ti tattha paṭikāram apassanto tuṇhī ahoṣi.

Ekapakkhacchadanamattāhīti majjhimappamāṇassa gehassa ekacchadanappamāṇehi. **Suttāhatam karitvā**ti kālasuttam pātetvā. Yathā ratho sabbaso pajjalito hoti ayomayo, evam yugādayopissa pajjalitā sajotibhūtā eva hontīti āha “**saddhim -pa- rathe yojetvā**”ti. **Mahākūṭāgārappamāṇanti** sattabhūmakamahākūṭāgārappamāṇam.

Vibhattoti sattānam sādharmaṇena pāpakammunā vibhatto. **Hīnam kāyanti** hīnam sattanikāyam, hīnam vā attabhāvam. **Upādāneti** catubbidhe upādāne. Atthato pana taṇhādīṭṭhiggāhoti āha “**taṇhādīṭṭhiggahane**”ti. Sambhavati jarāmaraṇam etenāti **sambhavo**, upādānanti āha “**jātiyā ca maraṇassa ca kāraṇabhūte**”ti. **Anupādāti** anupādāya. Tenāha “**anupādiyitvā**”ti. **Sakalavaṭṭadukkham atikkantā**ti carimacittanirodhena vaṭṭadukkhasa kilesānampi asambhavato sabbam vaṭṭadukkham atikkantā.

Devadūtasuttavaṇṇanā niṭṭhitā.

7. Catumahārājasuttavaṇṇanā

37. Sattame amā saha vattanti tasmim tasmim kicceti **amaccā**, sahitā. Parisati bhavāti **pārisajjā**, parivāraṭṭhāniyā parisāpariyāpannā. Tenāha “**paricārikadevatā**”ti¹. **Tātāti** ālapanam. **Evanti** “kacci bahū manussā”ti-ādinā vuttākārena. **Aṭṭha vāreti** ekasmim aḍḍhamāse catukkhattum, tathā itarasminti evam aṭṭha vāre. **Adhiṭṭhahantī**ti adhiṭṭhanti. **Paṭijāgarontī**ti paṭi paṭi jāgaronti. Puñṇam karontā hi sattā jāgaronti nāma kātabbakiccappasutattā, itare pana supanti nāma sahitaparavitvimuttattā. Cātuddasi-uposathassa anugamanam viya pannarasi-uposathassa paccuggamanam na labbhati divasābhāvato.

1. Parivāradevatāti (Ka)

Tatoti tato tato. **Taṃ upanissāyāti** tā tā gāmanigamarājadhāniyo upanissāya. **Adhivatthāti** āramavanarukkhādīsu adhivatthā devatā. **Teti** te devā. **Sandhāya kathetīti** bhagavā katheti. **Vuttanti** aṭṭhakathāyaṃ vuttaṃ.

Niccaṃ nibaddhaṃ uposatho saṃvacchare saṃvacchare paṭi paṭi haritabbato pavattetabbato **pāṭihāriyapakkho nāma. Guṇaṅgehīti** uposathaṅgehi.

Vutthavāsoti vusitabrahmacariyavāso. **Kattabbakiccanti** dukkhādīsu pariññātādikiccaṃ. **Otāretvāti** chaḍḍetvā. **Parikkhīṇabhavasamyojanoti** sabbaso khīṇabhavabandhano. **Kāraṇena jānitvāti** vipassanāpaññāsahitāya maggapaññāya cattāri ariyasaccāni jānitvā.

Jānantoti “arahantānaṃ anukaraṇappaṭipatti esā, yadidaṃ sammadeva uposathānuṭṭhānaṃ”ti evaṃ uposathakammaṃ guṇaṃ jānanto. **Evarūpenāti** yādiso bhagavato uposathabhāvo vihito, evarūpena arahantānukaraṇena uposathakammaṃ. **Sakkā** pahitatto vipassanaṃ ussukkāpetvā khīṇāsavasampattiṃ pāpuṇitum. **Aṭṭhamaṃ uttānatthameva** sattame vuttanayattā.

Catumahārājasuttavaṇṇanā niṭṭhitā.

9. Sukhumālasuttavaṇṇanā

39. Navame **niddukkhoti** kāyikacetāsikadukkhavirahito. Sadukkhe hi savighāte sukhumālattā anavasārā, tasmā sukhito niddukkhatāya sukhumālo nāma. Yāvassa sukhumālattā paramukkamsagatāti āha “**paramasukhumālo**”ti. Ativiya sukhumālotti attho. Antamatītaṃ **accantaṃ**. Sabbadā sukhumālotti āha “**satataniddukkho**”ti. **Cariyakāleti** bodhicariyāya caraṇakāle. **Tenāti** bodhisattena. Aññattha pana **padumanti** rattaṃ kamalaṃ. **Puṇḍarikanti** setaṃ vuccati. **Itarāti** itarapokkharāṇiyo. “**Bodhisattassa kirā**”ti-ādikaṃ

pokkharāṇīnaṃ¹ uppattidassanaṃ. **Kuddālakammakāreti** khaṇake. **Pokkharāṇiṭṭhānānīti** pokkharāṇikhaṇanayoggaṭṭhānāni. **Gaṇhāpesīti** khaṇāpesi. Pokkharāṇisaddo cettha tādise jalāsaye niruḷho daṭṭhabbo paṅkajādisaddā viya. Sopānabāhukānaṃ matthakaṭṭhānaṃ **uṇhīsanti** adhippetam. **Udakasecananāḷikāti** udakacchaṭāvissajjananāḷiyantāni². **Pañcavidhāti** vaṇṇavasena jātivasena ca.

Kho panassāti nipātamattaṃ. Kāsika-saddo ativiya saṅhe sukhome mahagghavatthe niruḷho, aññasmimpi tathājātike ruḷhivasena pavattatīti daṭṭhabbam. Tenāha “**akāsikaṃ³ candanan**”ti. Hemante vāso hemantaṃ, hemantaṃ arahatīti **hemantiko**, pāsādo. “**Itaresupi eseva nayo**”ti vatvā tadeva nesam arahataṃ dassetuṃ “**tattha hemantiko**”ti-ādi vuttaṃ. **Sajālānīti** sajālavātapānāni, **udakayantānīti** udakadhārāvissandanakayantāni. **Pāsādamatthaketi** pāsādassa upari-ākāsatale. **Bandhitvāti** payojitayante sukkhamahimsacammaṃ bandhitvā. **Yantaṃ parivattetvāti** yathāpayojitaṃ yantaṃ pāsāṇāropanatthañceva puna tesam vissajjanatthañca parivattetvā. **Tasmim̐ vissajjentīti** chadanapiṭṭhe baddhasukkhamaḥimsacamme vissajjenti.

Sahassathāmanti purisasahassabalaṃ, purisasahassena vahitabbabhāravahaṃ. **Pallaṅke nisinnovāti** ratanamayapallaṅke yathānisinno eva. **Uppatanākārapattanti** uppatitvā ṭhitaṃ viya. **Jiyaṃ pothentassāti** jiyāghātaṃ karontassa. **Jiyappahārasaddoti** jiyāghātasaddo. **Yante baddhanti** yantabaddhaṃ katvā ṭhapitaṃ. **Saddantareti** thāmamajjhimassa purisassa saddasavanaṭṭhāne. Gāvutassa catuttho bhāgo kosotipi vuccati dvisahassadaṇḍappamāṇaṭṭhānaṃ.

Sabbaṭṭhānānīti mahāpurisassa tāni tāni sabbāni vasanaṭṭhānāni. **Sikhābaddhoti** purisasabhāvasseva visesato dassanametaṃ. Na **uppilāvitabhāvatthanti** uppilāvitabhāvasaṅkhātaṃ atthaṃ na kathesīti attho. Tassa hi bodhimūleyeva setughāto. **Tenevāti**

1. Pokkharāṇiyam̐ (ka) 2. Udakadhārāvissajjananāḷiyantāni (?) 3. Kāsikaṃ (Ka)

appamādalakkhaṇassa dīpanato eva. **Attānaṃ atikkamivā**ti attano jarāpattim acintetvā aṭṭiyati. **Na panesa maggena pahīno** tadā maggassa anadhigatattā. **Sikkhaṃ paṭikkhipivā**ti yathāsamādinnaṃ sikkhaṃ pahāya.

Aviparītabyādhi-ādisabhāvāvāti ekantena byādhi-ādisabhāvā eva. **Evam jigucchāvihārenā**ti evaṃ sakalasseva vaṭṭadukkhassa jigucchanavīhārena viharantassa. **Evam jigucchananti** evaṃ parassa jigucchanam. **Param ajigucchamaṇoti** karuṇāyanena evaṃ param ajigucchanto. **Abhibhosmī**ti abhibhavitā asmi. **Ussāho ahūti** caturaṅgasamannāgataṃ vīriyameva catubbidhasammappadhānavīriyaṅca ahosi, yena maggabrahmacariyaparāyaṇo jāto.

Sukhumālasuttavaṇṇanā niṭṭhitā.

10. Ādhipateyyasuttavaṇṇanā

40. Dasame abhibhavitvā pavattanaṭṭhena adhipati yaṃ kiñci jeṭṭhakaṃ na kāraṃ attānaṃ adhipatīti katvā attā eva adhipati, tato āgataṃ **attādhipateyyam**. Tenāha “attānaṃ”ti-ādi. **Lokanti** sattalokaṃ. So ca kho iddhiyādiguṇavisesayutto adhippeto adhipatibhāvassa adhippetattā. **Navavidhaṃ lokuttaradhamanti** ukkaṭṭhaniddesena vuttam. **Iti bhavoti** evaṃ sampattibhavo, tattha evaṃ abhivuddhīti. **Sampattibhavassa hetūti** taṃtaṃsampattibhavassa tattha ca abhivuddhiyā hetu. Jātinimittassa kammabhavassa katūpacitattā **jāti antopaviṭṭhā**. **Jārādīsupi eseva nayo** hetusiddhiyā phalasiddhito.

Asallīnanti na saṅkocappattam. **Upaṭṭhitā**ti kāyādisabhāvasallakkhaṇavasena upaṭṭhitā. **Asammutṭhā** sammosābhāvato. **Asāraddhoti** sārābhassa sārābhahetūnaṅca vikkhambhanena asāraddho. **Ekaggaṃ** anekaggaḥbhāvassa dūrasamussāpitattā. **Nimmalaṃ katvā**ti rāgādimalānaṃ apanayanena malarahitaṃ katvā. **Gopāyatīti** saṅkilesānatthato rakkhati. **Ayanti** evaṃpaṭipanno bhikkhu. **Suddhamattānaṃ pariharati** asuddhabhāvassa kilesassapi abhāvato.

Atikkamitvā maññasīti asakkhim katvā maññasī. Tāya taṇhāya nibbattoti tammayo, taṇhāvasiko. Tassa bhāvo tammayatā, tassā **tammayatāya** abhāvena. **Na hāyati** paññādiguṇavepullappattiyā.

Ādhipateyyasuttavaṇṇanā niṭṭhitā.

Devadūtavaggavaṇṇanā niṭṭhitā.

5. Cūlavagga 1. Sammukhībhāvasuttavaṇṇanā

41. Pañcamassa paṭhame sammukho bhavati yena so sammukhībhāvo, purato vijjāmānatā, tasmā **sammukhībhāvā**. **Puññakammanti** dānasankhātariṃ puññakammaṃ. **Dve dhammā sulabhā** bāhirattā yathāsakaṃ paccayasamavāyena labbhanato. **Saddhā pana dullabhā** pacurajanassa anavaṭṭhitakiccattā. Tenevāha “**puthujjanassā**”ti-ādi.

Sammukhībhāvasuttavaṇṇanā niṭṭhitā.

2. Tiṭhānasuttavaṇṇanā

42. Dutiye macchariyameva malaṃ macchariyamalaṃ, cittassa malīnasabhāvāpādanato vigataṃ macchariyamalaṃ catthāti **vigatamacchariyamalaṃ**. Gedhābhāvena koci kiñci dentopi tattha āsattiṃ na vissajjeti, ayaṃ pana na tādisoti āha “**vissaṭṭhacāgo**”ti. **Malīnahatthova** cittavisuddhiyā abhāvato. **Dhotahatthova** dhotahatthena kātabbakiccasāadhanato. Tena vuttaṃ “citte suddhe visujjhanti, iti vuttaṃ mahesinā”ti. **Yācituṃ yutto** yācakānaṃ manorathapūraṇato. **Yācayogo** payogāsahehi yācakehi suṭṭhu yuttabhāvato. Taṃsamaṅgī eva tattha rato nāma, na cittamattenevāti āha “**dānaṃ -pa- rato nāma hotī**”ti.

“**Uccā bhante**”ti vatvā ayaṃ maṃ uccato vadatīti cinteyyāti puna “**nāti-uccā tumhe**”ti āha, sarīrenāti adhippāyo. **Mecakavaṇṇassāti** nilobhāsassa. **Pucchīti** bhikkhū pucchi. **Bhūmiyaṃ lekhaṃ likhanto** acchīti

paṭhamam mañce nipajjitvā uṭṭhāya bhūmiyam lekham likhanto acchi “akhīṇāsavoti maññanā hotū”ti. Tathā hi rājā khīṇāsavassa nāma -pa-nivatti. **Dhajapaggahitāvāti** paggahitadhajāva. **Silācetiyaṭṭhānanti** thūpārāmassa ca mahācetiyaassa ca antare silāya katacetiyaṭṭhānam. **Cetiyaṃ -pa- aṭṭhāsi** sāvakaassa taṃ kuṭāgāranti katvā.

Pacchābhāgenāti dhammakathikassa therassa piṭṭhipassena. **Gonasoti** maṇḍalasappo. Dhammassavanantarāya bahūnam saggamaggappaṭilābhantarāyo bhaveyyāti adhippāyena “**dhammassavanantarāyam na karissāmī**”ti cintesi. **Visaṃ vikkhambhetvāti** vipassanātejena visavegam vikkhambhetvā. **Gāthāsahassanti** gāthāsahassavantam. **Paṭṭhānagāthāyāti** paṭṭhāpanagāthāya, ādigāthāyāti attho. **Paṭṭhāna -pa- avasānagātham eva vavatthapesi**, na dvinnam antare vuttam kilantakāyattā. **Sarabhānam** sāyanhadhammakathā. **Paggaṇhātīti** paccakkham karontī gaṇhāti, sakkaccam suṇātīti attho. Dhammakathanadivase dhammakathikānam akilamanattham saddhā upāsakā siniddhabhojanam madhupānakañca denti sarassa madhurabhāvāya sappimadhukatelādiñca bhesajjam. Tenāha “**ariyavaṃsam kathessāmī**”ti-ādi. **Catūhi dāṭhāhi daṃsitvāti** dalhadatṭhabhāvadassanam. **Carissāmīti** sammānessāmī, sakkaccam suṇissāmīti attho. **Nimmathetvāti** nimmadditvā, apanetvāti attho.

Titṭhānasuttavaṇṇanā niṭṭhitā.

3. Atthavasasuttavaṇṇanā

43. Tatiye attho nāma phalam, tam etassa vasoti **atthavaso**, hetu, attho etassa atthīti attho, so evāti āha “**tayo atthe tīṇi kāraṇāni**”ti. Dhammadesanā nāma ukkaṭṭhaniddesena catunnam ariyasaccānam pakāsanāti āha “**catusaccadhammam pakāsetī**”ti. **Aṭṭhakatham** ñāṇena paṭisamvedīti pālipadānam attham vivaraṇañāṇena paṭi paṭi samvedanasīlo “ayam imassa bhāsitassa attho”ti. Etena atthapaṭisambhidābyāpāramāha. **Pālidhammam paṭisamvedīti** pāligatim pālim padavivaraṇam paṭi paṭi samvedanasīlo. Etena dhammapaṭisambhidābyāpāramāha.

Atthavasasuttavaṇṇanā niṭṭhitā.

4. Kathāpavattisuttavaṇṇanā

44. Catutthe **pavattinī**ti yāva adhippetatthanigamanā avicchedena pavattinī. Paṭighātābhāvena **appaṭihatā**. **Niyyānikā** sappāṭihīrakā.

Kathāpavattisuttavaṇṇanā niṭṭhitā.

5. Paṇḍitasuttavaṇṇanā

45. Pañcame **paṇḍitapaññattānī**ti paṇḍitehi paṭhamam paññattāni. **Kathitānī**ti seyyaso kathitāni. **Mahāpurisehī**ti buddhabodhisattehi. **Karuṇāti** karuṇācetovimutti vuttā. **Pubbabhāgoti** tassa upacāro. **Damoti indriyasamvaro** “manacchaṭṭhānam indriyānam damanan”ti katvā. **Attadamananti** cittadamanam. **Puṇṇovāde**¹ “sakkhissasi kho tvaṃ puṇṇa iminā damūpasamenā”ti āgatattā **damoti vuttā khantipi**. **Ālavake** ālavakasutte “saccā damā cāgā”ti² evam **vuttā paññāpi** imasmim sutte “damo”ti vattum vaṭṭati. **Rakkhanam gopanam paṭijaggananti** mātāpitūnam manussāmanussakatūpaddavato rakkhanam, byādhi-ādi-anatthato gopanam, ghāsacchādanādīhi veyyāvaccakaraṇena paṭijagganam. **Santo nāma** sabbakilesadarathapariḷāhūpasamena upasantakāyavacīsamācārātaya ca. **Uttamaṭṭhena santānanti** matteyyatādīhi seṭṭhaṭṭhena santānam.

Idha imesamyeva tiṇṇam ṭhānānam karaṇenāti imasmim sutte āgatānam tiṇṇam ṭhānānam karaṇena nibbattanena. **Etāni -pa- kāraṇānī**ti mātupaṭṭhānam pitupaṭṭhānanti etāni dve uttamapurisānam kāraṇāni. Uttamakiccakaraṇena hi mātāpitu-upaṭṭhākā “uttamapurisā”ti vuttā. Tenāha “mātāpitu -pa- vutto”ti. Anupaddavabhāvena³, **khemam**.

Paṇḍitasuttavaṇṇanā niṭṭhitā.

1. Ma 3. 313 piṭṭhe.

2. Sam 1. 217; Khu 1. 307 piṭṭhesu.

3. Anupaddutabhāvena (Ka)

6. Sīlavantasuttavaṇṇanā

46. Chaṭṭhe **lokiyalokuttaramissakanti** ettha “manussā puññaṃ pasavanti”ti avisesena vuttatā bhāvanāmayassapi puññaṃ saṅgaṇhanato lokuttarassapi sambhavo daṭṭhabbo.

Sīlavantasuttavaṇṇanā niṭṭhitā.

7. Saṅkhatalakkhaṇasuttavaṇṇanā

47. Sattame samecca sambhūya paccayehi kataṃ **saṅkhatam**. **Nimittānī** sañjānanassa nimittāni. Hetupaccayasamavāye uppajjanam **uppādo**, attalābho. **Vayoti** bhaṅgo. **Ṭhitassā**ti uppādakkhaṇato uddham ṭhitikkhaṇapattassa. Sā panassa avatthā uppādāvatthāya bhinnāti katvā aññathattham jarāti ca vuttā. Yasmā dhammo uppajjamāno eva bhijjati, tathā sati uppādabhaṅgā samānakkhaṇā siyum, na ca tam yujjati, tasmā uppādāvatthāya bhinnā bhaṅgābhimukhāvatthā jarāti veditabbā. Ye pana “saṅkhārānam ṭhiti natthi”ti vadanti, tesam tam micchā. Yathā hi tasseva dhammassa uppādāvatthāya bhinnā bhaṅgāvatthā icchitā, aññathā “aññam uppajjati, aññam nirujjhati”ti āpajjati, evam uppajjamānassa bhaṅgābhimukhā dhammā icchitabbā. Sā ca ṭhitikkhaṇo. Na hi uppajjamāno bhijjatīti sakkā viññātunti.

Saṅkhatanti tebhūmakā dhammā paccayasamuppannattā. Yadi evam maggaphaladhammā kathanti āha “**maggaphalāni panā**”ti-ādi. Lakkhaṇakathā hi yāvadeva sammasanatthā. **Uppādakkhaṇe uppādo**, na ṭhānabhaṅgakkhaṇesu. Kasmā? Uppāda-uppādakkhaṇānam aññamaññam paricchinnattā. Yathā hi upādasaṅkhātena vikārena uppādakkhaṇo paricchinno, evam uppādakkhaṇenapi uppādo paricchinno. sesadvayepi eseva nayo. Dhammappavattimattatāyapi kālassa lokasamaññavaseneva vuttam. **Lakkhaṇam na saṅkhatam, saṅkhatam na lakkhaṇanti** nesam bhedadassanam. Avatthāvato hi avatthā bhinnāvāti. **Paricchinnanti** ettha uppādavayehi tāva saṅkhatam paricchinnam hotu, jarāya pana tam katham paricchinnanti vuccati? Na vuccati paricchedo pubbantāparantamattena, atha kho sabhāvabhedenāti nāyam doso. **Saṅkhatam** dhammajātam **paricchinnam** tabbantam

dhammajātaṃ saṅkhatanti paññāyati evaṃ tesāṃ abhāvena nibbānametanti lakkhitabbato sañjānitabbato. Idāni “**yathā hī**”ti-ādinaṃ yathāvuttamattham upamāhi vibhāveti.

Saṅkhatalakkhaṇasuttavaṇṇanā niṭṭhitā.

8. Asaṅkhatalakkhaṇasuttavaṇṇanā

48. Aṭṭhame **asaṅkhatassā**ti vuttanayena na saṅkhatassa. Tenāha “**paccayehī**”ti-ādi. Yathā uppādādīnaṃ bhāvena saṅkhatadhammajātaṃ saṅkhatanti paññāyati, evaṃ tesāṃ abhāvena nibbānaṃ asaṅkhatanti paññāyati.

Asaṅkhatalakkhaṇasuttavaṇṇanā niṭṭhitā.

9. Pabbatarājasuttavaṇṇanā

49. Navame idha **sāla**-saddo rukkhasāmaññapariyāyo, na rukkhavisesapariyāyoti āha “**mahāsālāti mahārukkhā**”ti. **Kulajetṭhakanti** tasmim kule jetṭhabhūtaṃ sāmibhūtaṃ. **Sīlāmayo** na paṇsumayo missako ca. Gāmaṃ gāmūpacāraṇca ṭhapetvā sabbaṃ araññanti āha “**araññasminti agāmakatṭhāne**”ti. Mahanto pabbato seloti yojanā.

Pabbatarājasuttavaṇṇanā niṭṭhitā.

10. Ātappakaraṇīyasuttavaṇṇanā

50. Dasame **sarīrasambhavānanti** sarīre sambhūtānaṃ. **dukkhānanti** anitṭhānaṃ. **Bahalānanti** nirantarappavattiyā aviraḷānaṃ. **Tāpanavasenā**ti dukkhāpanavasena. **Tibbānanti** kurūrānaṃ. Tāsaṃ yathāvuttānaṃ adhivāsanaṃ pahātabbadukkhavedanaṃ pajahanaṃ nāma khamanamevāti āha “**khamanatthāyā**”ti. **Āṇāpetvāti** “ātappaṃ karaṇīyan”ti buddhānaṃ vidhāya. **Lokiyalokuttaramissakā kathitā** sasambhārānaṃ maggadhammaṃ kathitattā.

Ātappakaraṇīyasuttavaṇṇanā niṭṭhitā.

11. Mahācorasuttavaṇṇanā

51. Ekādasame mahābalavacoro **mahācoroti** āha “**mahanto balavacoro**”ti. **Balavacoroti** ca mahāthāmatāya mahāparivāratāya mahācoriyakammasamatthatāya ca veditabbo. Mahataṃ gāmanigamānaṃ viluppanaṃ **mahāvilopo**. **Taṃ taṃ kāraṇaṃ pakkhipivā**ti taṃ taṃ akaraṇameva kāraṇaṃ katvā tappaṭibaddhāya kathāya pakkhipivā. **Atthaṃ kathayissantī**ti tassa tassa atthaṅca kathayissantī. **Harantā**ti apanentā pariharantā. **Dasavattukāyā**ti “sassato loko”ti¹ ādidasavattusannissitāya. **Antaṃ gahetvā ṭhitadiṭṭhiyā**ti tameva sassatādi-antaṃ gahetvā avissajjetvā ṭhitadiṭṭhiyā.

Mahācorasuttavaṇṇanā niṭṭhitā.

Cūlavaggavaṇṇanā niṭṭhitā.

Paṭhamapaṇṇāsako niṭṭhito.

1. Ma 1. 212 piṭṭhe.

2. Dutiyapaṇṇāsaka

(6) 1. Brāhmaṇavagga

1. Paṭhamadvebrāhmaṇasuttavaṇṇanā

52. Brāhmaṇavaggassa paṭhame **jarājīṇṇā**ti jarāvasena jīṇṇā, na byādhi-
ādīnaṃ vasena jīṇṇasadisattā jīṇṇā. **Vayovuddhā**ti vayaso vuddhippattiyā
vuddhā, na silādivuddhiyā. **Jātimahallakā**ti jātiyā mahantatāya
cirarattaññutāya jātimahallakā. **Tayo addhe atikkantā**ti paṭhamo majjhimo
pacchimoti tayo addhe atītā. **Tatīyaṃ vāyaṃ anuppattā**ti tato eva
pacchimaṃ vāyaṃ anuppattā. **Akatabhayaparittāṇā**ti ettha **bhayaparittāṇanti**
duggatibhayato parittāyakaṃ puññaṃ, taṃ akataṃ etehīti
akatabhayaparittāṇā. **Patitṭhākamma**nti sugatisaṅkhātappatitṭhāvahaṃ
kammaṃ. **Upasamharīyatī**ti sampāpīyati. “Upanīyatī”ti vuttaṃ, kiṃ kena
upanīyatīti āha “**ayaṃ hi jātiyā jaraṃ upanīyatī**”ti-ādi. **Ayanti** loko. Jāto na
jātabhāveneva tiṭṭhati, atha kho tato paraṃ jaraṃ pāpīyati, jarāya byādhiṃ
pāpīyati. Evaṃ parato paraṃ dukkhameva upanīyati.

Tāyanaṭṭhenati rakkhanaṭṭhena. **Nilīyanaṭṭhena**ti nilīnaṭṭhānabhāvena.
Patitṭhānaṭṭhenati patiṭṭhānabhāvena. **Avassayanaṭṭhena**ti
avassayitabbabhāvena. **Uttamagativasenā**ti paramagatibhāvena.

Paṭhamadvebrāhmaṇasuttavaṇṇanā niṭṭhitā.

2. Dutiyadvebrāhmaṇasuttavaṇṇanā

53. Dutīye bhajitabbaṭṭhena paresaṃ bhājitabbaṭṭhena **bhājanaṃ**,
bhaṇḍakaṃ.

Dutiyadvebrāhmaṇasuttavaṇṇanā niṭṭhitā.

3. Aññatarabrāhmaṇasuttādivaṇṇanā

54.55. Tatiye yesaṃ rāgādīnaṃ appahānena purisassa attabyābādhādīnaṃ sambhavo, pahānena asambhavoti evaṃ rāgādīnaṃ pahāyako ariyadhammo mahānubhāvatāya mahānisamsatāya ca samam passitabboti **sandiṭṭhiko**. Iminā nayena sesesu padesupi yathārahaṃ nīharitvā vattabbo. Saddattho pana **visuddhimaggasamvaṇṇanāsu**¹ vuttanayena veditabbo. Catutthaṃ uttānatthameva.

Aññatarabrāhmaṇasuttādivaṇṇanā niṭṭhitā.

5. Nibbutasuttavaṇṇanā

56. Pañcame na kālantare pattabbanti yadā saccappaṭivedho, tadā eva laddhabbattā na kālantare pattabbaṃ. Maggaññāṇena upanetabbattā upaneyyaṃ. Upaneyyameva **opaneyyikanti** āha “**paṭipattiyā upagantabban**”ti.

Nibbutasuttavaṇṇanā niṭṭhitā.

6. Palokasuttavaṇṇanā

57. Chaṭṭhe **ācariyapācariyānanti** ācariyānampi ācariyānaṃ. **Nirantaraphuṭo nerayikasattehi** nirayagāmikammassa kārakānaṃ bahubhāvā. **Ubhayampetanti** yathāvuttaṃ atthadvayaṃ. **Ghananivāsanti** gāmānaṃ ghanasannivāsataṃ. **Ekanteneva adhammoti** ayonisomanasikārahetukattā anattahetutāya ca niyameneva adhammo. **Na adhammarāgoti adhippetoti** paraparikkhāresu rāgo viya na mahāsāvajjoti katvā vuttaṃ. Tathā hi sakasakaparikkhāraṃvisayo rāgo visamalobho viya na ekantato apāyuppattijanako. Paraparikkhāresu uppajjamānassa mahāsāvajjatāya **adhammarāgatā**. **Lobhassa samakālo nāma natthi** kāyaduccaritādīnaṃ viya ayonisomanasikārasamuṭṭhānattā. **Esāti** eso pāpadhammo. **Samalobho** visamalakkhaṇābhāvato. Tato hi taṃsamuṭṭhāno payogo

1. Visuddhi-Ṭī 1. 267 piṭṭhe.

micchācāroti na vuccati. **Avatthupaṭisevanasaṅkhātenā**ti yaṃ lokiyasādhusamanuññātaṃ rāgassa vatthuṭṭhānaṃ, tato aññasmiṃ vatthusmiṃ paṭisevanasaṅkhātena.

Vividhasassānanti sālivīhi-ādinānappakārasassānaṃ. **Dussassanti** paccayadūsenā dūsitāṃ sassāṃ. **Sampajjamāneti** nipphajjanato pageva gabbhaparivuddhikāle¹. **Pāṇakā**ti sakabhāḍipāṇakā. **Patantīti** sassānaṃ matthake patanti. **Salākāmattameva sampajjatīti** vadḍhitvā gabbhaṃ gaheṭuṃ asamatthaṃ sampajjati. **Teti vāla-amanussā**. **Laddhokāsā**ti yakkhāhipatīhi anuññātattā laddhokāsā.

Palokasuttavaṇṇanā niṭṭhitā.

7. Vacchagottasuttavaṇṇanā

58. Sattame **mahāvīpākanti** uḷārāphalaṃ bahuvipākaṃ. **Dhammo nāma** kathitakathā “atthaṃ dahati vidahatī”ti katvā. **Anudhammo nāma** paṭikathanā “taṃ anugato dhammo”ti katvā. Saha dhammenāti sahadhammo, so eva **sahadhammiko**. Dhamma-saddo cettha kāraṇapariyāyoti āha “**sakāraṇo**”ti. **Vādassā**ti vacanassa. **Anupāto** anupacchā pavatti.

Paripanthe tiṭṭhatīti **pāripanthiko**. Panthe ṭhatvā paresāṃ sāpateyyaṃ chindanato **pantadūhanacoro**. Yadi paccavekkhaṇāñānaṃ, kathaṃ taṃ asekkhanti āha “**asekkhassa pavattattā**”ti. **Itarānī**ti silakkhandhādīni. **Sayampīti pi**-saddo “asekkhassa pavattā cā”ti imamattaṃ sampiṇḍeti.

Nibbisevanoti visevanarahito vigatavilomabhāvo. **Na upaparikkhantīti** na vicārenti. Jātiṃ nibbattim yāti upagacchatīti **jātiyo**, jātoti attho. Tenāha “**yattha katthaci kulajāte**”ti.

Kevalīti kevalavā, pāripūrimāti attho. Tenāha “**paripuṇṇabhāvena yutto**”ti. **Etam** kevalīti padaṃ. **Abhiññāpāranti** abhijānassa pāraṃ. Pariyantāṃ gatattā **pāragū**. Esa nayo sesapadesupī.

1. Gabbhaparivuddhikāle (Ka)

Khettavinicchayasavanenāti “imehi silādiguṇasampannā sadevake loke puññassa khettaṃ, tadañño na khettaṃ”ti evaṃ khettavinicchayasavanena rahitā.

Vacchagottasuttavaṇṇanā niṭṭhitā.

8. Tikkaṇṇasuttavaṇṇanā

59. Aṭṭhame **durāsada**ti durupasaṅkamanā. **Garahā muccissatī**ti mayi evaṃ kathente samaṇo gotamo kiñci kathessati, evaṃ me vacanamattampi na laddhanti ayaṃ garahā muccissatī. **Paṇḍitā**ti paṇḍiccena samannāgatā. **Dhīrā**ti dhitisampannā. **Byattā**ti paravādamaddanasamatthena veyyattiyena samannāgatā. **Bahussutā**ti bāhusaccavanto. **Vādinoti** vādimaggakusalā. **Sammatā**ti bahuno janassa sādhusammatā. **Paṇḍitādi-ākāraparicchedanti** tesāṃ tevijjānaṃ paṇḍitākārādi-ākāraparicchedaṃ. Ākārasaddo kāraṇapariyāyo, paricchedasaddo parimāṇatthoti āha “**ettakena kāraṇenā**”ti.

Yathāti yenākārena, yena kāraṇenāti attho. Tenāha “**yathāti kāraṇavacanan**”ti. “**Dvīhipi pakkhehi**”ti vatvā te pakkhe sarūpato dassento “**mātito ca pitito cā**”ti āha. Tesāṃ pakkhānaṃ vasenassa sujātataṃ dassetuṃ “**yassa mātā**”ti-ādi vuttaṃ. Janakajanikābhāvena vināpi loke mātāpitusaṃāññā dissati, idha pana sā orasaputtavaseneva icchitāti dassetuṃ “**saṃsuddhagahaṇiko**”ti vuttaṃ. Gabbhaṃ gaṇhāti dhāretīti **gahaṇī**, gabbhāsayasāññito mātukucchippadeso. Yathābhuttassa āhārassa vipācānavasena gaṇhanato achāḍḍanato¹ **gahaṇī**, kammajatejodhātu.

Pitā ca mātā ca pitaro, pitūnaṃ pitaro pitāmahā, tesāṃ yugo **pitāmahayugo**, tasmā “yāva sattamā pitāmahayugā pitāmahadvandā”ti evamettha attho daṭṭhabbo. **Aṭṭhakathāyaṃ** pana dvandaṃ aggahetvā “yuganti āyuppamāṇaṃ vuccatī”ti vuttaṃ. **Yuga**-saddassa ca atthakathā dassitā

1. Chādanato (Ka)

“**pitāmahoyeva pitāmahayugan**”ti. **Pubbapurisāti** purisaggahaṇaṅcettha ukkaṭṭhaniddesavasena katanti daṭṭhabbāṃ. Evaṃ hi “mātito”ti pālīvacanaṃ samatthitaṃ hoti. **Akkhittoti** akkhepo. **Anavakkhittoti** saddhathālipākādīsu¹ anavakkhitto na chaḍḍito. **Jātivādenāti** hetumhi karaṇavacananti dassetuṃ “**kena kāraṇenā**”ti-ādi vuttaṃ. Ettha ca “ubhato -pa- pitāmahayugā”ti etena brāhmaṇassa yonidosābhāvo dassito saṃsuddhagahaṇikatākittanato. “Akkhitto”ti iminā kiriyāparādhābhāvo. Saṃsuddhajātikāpi hi sattā kiriyāparādhena khepaṃ pāpuṇanti. “Anupakkuṭṭho”ti iminā ayuttasaṃsaggābhāvo. Ayuttasaṃsaggaṃ hi paṭicca sattā suddhajātikā kiriyāparādharahitāpi akkosāṃ labhanti.

Tanti garahāvacanāṃ. **Mante parivatteti** vede sajjhāyati, pariyāpuṇātīti attho. **Mante dhāretīti** yathā-adhīte² mante asammuṭṭhe katvā hadaye ṭhapeti.

Oṭṭhapahatakaraṇavasenāti atthāvadharāṇavasena.

Sanighaṇḍukeṭubhānanti ettha vacanīyavācakahāvena atthaṃ saddaṅca khaṇḍati bhindati vibhajja dassetiṃ nikhāṇḍu, so eva idha kha-kārassa gha-kāraṃ katvā “**nighaṇḍū**”ti vutto. Kiṭṭati gameti kiriyādivibhāgaṃ, taṃ vā anavasesapariyādānato gamento pūretiṃ **keṭutaṃ**. **Vevacanappakāsakanti** pariyāyasaddadīpakāṃ, ekekassa attassa anekapariyāyavacanavibhāvakanti attho. Nidassanamattaṅcetaṃ anekesampi akkānaṃ ekasaddavacanīyatāvibhāvanavasenāpi tassa ganthassa pavattattā. Vacībhedaḍḍilakkhaṇā kiriyā kappīyati vikappīyati etenāti kiriyākappo, so pana vaṇṇapadasambandhapadattādivibhāgato bahukappoti āha “**kiriyākappavikappo**”ti. Idaṅca mūlakiriyākappaganthaṃ sandhāya vuttaṃ. So hi mahāvisayo satahassaparimāṇo namācariyādīppakaraṇaṃ³. Ṭhānakaraṇādivibhāgato nibbacanavibhāgato ca akkharā pabhedīyanti etetiṃ **akkharappabhedo**, sikkhāniruttiyo. **Etesanti** catunnaṃ vedānaṃ.

1. Sabbathālipākādīsu (Ka)

2. Yathāṭhite (Ka)

3. Nayacariyādīpakaraṇaṃ (Dī-Ṭī 1. 291 piṭṭhe)

Padanti catubbidham, pañcavidham vā padam, tam padam kāyatīti **padako**, teyeva vā vede padaso kāyatīti **padako**. **Tadavasesanti** vuttāvasesam vākyam. Ettāvatā saddabyākaraṇam vatvā puna “byākaraṇan”ti atthabyākaraṇamāha. Tam tam saddam tadatthañca byākaroti byācikkhati etenāti **byākaraṇam**, saddasattham. Āyatim hitam tena loko na yatati na ihatīti **lokāyatam**. Tam hi gantham nissāya sattā puññakiriyāya cittampi uppādentī.

Asīti mahāsāvakati aññāsikoṇḍañño, vappo, bhaddiyo, mahānāmo, assaji, nāḷako, yaso, vimalo, subāhu, puṇṇaji, gavampati, uruvelakassapo, naḍikassapo, gayākassapo, sārīputto, mahāmoggallāno, mahākassapo, mahākaccāno, mahākoṭṭhiko, mahākappino, mahācundo, anuruddho, kaṅkhārevato, ānando, nandako, bhagu, nandiyo, kimilo, bhaddiyo, rāhulo, sīvali, upāli, babbo upaseno, khadiravaniyarevato, puṇṇo mantāniputto, puṇṇo sunāparantako, soṇo kuṭikaṇṇo, soṇo koḷiviso, rādho, subhūti, aṅgulimālo, vakkali, kāḷudāyī, mahā-udāyī, pilindavaccho, sobhito, kumārakassapo, raṭṭhapālo, vaṅgīso, sobhiyo, selo, upavāṇo, megghiyo, sāgato, nāgito, lakuṇḍakabhaddiyo, piṇḍolo bhāradvājo, mahāpanthako, cūḷapanthako, bākulo, kuṇḍadhāno, dārucīriyo, yasojo, ajito, tissametteyyo, puṇṇako, mettagu, dhotako, upasīvo, nando, hemako, todeyyo, kappo, jatukaṇṇī bhadrāvudho, udayo, posalo, mogharājā, piṅgiyoti ete asīti mahāsāvaka nāma.

Kasmā panete eva therā “mahāsāvaka”ti vuccantīti? Abhinīhārassa mahantabhāvato. Tathā hi dve aggasāvakaṇi mahāsāvakesu anthogadhā. Te hi sāvakaṇi pāramiñāṇassa matthakappattiyā sāvakesu aggadhammādhigamena aggaṭṭhāne ṭhitāpi abhinīhāramahantatāsāmaññena “mahāsāvaka”tipi vuccanti, itare pana pakatisāvakehi sātisayam mahābhinīhārā. Tathā hi te padumattarassa bhagavato kāle katapaṇidhānā, tato eva sātisayam abhiññāsamāpattīsu vasino pabhinnappaṭisambhidā ca. Kāmaṇi sabbepi arahanto sīlavissuddhi-ādike sampādetvā

catūsu satipaṭṭhānesu suppaṭiṭṭhitacittā satta bojjaṅge yathābhūtaṃ bhāvetvā maggapaṭipāṭiyā anavaśesato kilese khepetvā aggaphale paṭiṭṭhahanti, tathāpi yathā saddhāvimuttato diṭṭhippattassa, paññāvimuttato ca ubhatobhāgavimuttassa pubbabhāgabhāvanāvīśesasiddho maggabhāvanāvīśeso, evaṃ abhinīhāramahantattapubbayogamahantattāhi sasantāne sātīsayassa guṇavīśesassa nipphāditattā sīlādīhi guṇehi mahantā sāvakaṭi mahāsāvaka. Tesuyeva pana ye bodhipakkhiyadhammesu pāmokkhabhāvena dhurabhūtānaṃ sammādiṭṭhisāṅkappādīnaṃ sātīsayāṃ kiccānubhāvanipphattiyā kāraṇabhūtāya tajjābhinihārābhinihaṭāya sakkaccaṃ nirantaraṃ cirakālasambhāvitāya sammāpaṭipattiyā yathākkamaṃ paññāya samādhismiṅca ukkaṭṭhapāramippattiyā savīśesaṃ sabbaguṇehi aggabhāve ṭhitā, te sārīputtamoggallānā. Itare aṭṭhasattati therā sāvaka-pāramiyā matthake sabbasāvakaṇaṃ aggabhāvena aṭṭhitattā “mahāsāvaka”īceva vuccanti. Pakatisāvaka pana abhinīhāramahantattābhāvato pubbayogamahantattābhāvato ca “satthusāvaka”īceva vuccanti. Te pana aggasāvaka viya mahāsāvaka viya ca na parimitā, atha kho anekasatā anekasahassā.

Vayatīti **vayo**, ādimajjhapariyosānesu kattaci aparīkilamanto¹ avitthāyanto te ganthe santāneti paṇetīti attho. Dve paṭisedhā pakatīṃ gamentīti dassetuṃ “**avayo na hotī**”ti vatvā tattha avayaṃ dassetuṃ “**avayo nāma -pa- na sakkotī**”ti vuttaṃ.

Idhāti imasmīṃ sutte. **Etanti** “viviceva kāmehi”ti-ādivacanaṃ. Tatiyavijjādhiḡamāya paṭipattikkamo **visuddhimagge**² sātīsayāṃ vitthārito, tathā idha avattukāmatāya **bhayabheravasuttā**dīsu³ viya saṅkhepato ca vattukāmatāya “**dvinnāṃ vijjānaṃ**”īceva vuttaṃ.

Vijjāti pubbenivāsappaṭicchādakassa mohakkhandhassa vijjanaṭṭhenapi⁴ vijjā. **Moho paṭicchādakaṭṭhena tamoti vuccati** tamo viyāti katvā. Kātabbato karaṇaṃ, obhāsova karaṇaṃ **obhāsakaraṇaṃ**, attano paccayehi obhāsabhāvena nibbattetaḡbaṭṭhenāti attho. **Ayaṃ**

1. Aparīkkhalattā (Ka) Dī-Ṭī 1. 292 piṭṭhe passitabbaṃ.

3. Ma 1. 20 piṭṭhe.

2. Visuddhi 1. 134 piṭṭhe.

4. Vijānaṭṭhenapi (Ka)

atthoti ayameva adhippetattho. **Pasaṃsāvacaṇanti** tasseva atthassa thomanāvacaṇaṃ paṭipakkhavidhamanapavattivisesānaṃ bodhanato. **Yojanāti** pasaṃsāvasena vuttapadānaṃ atthadassanavasena vuttapadassa ca yojanā. **Avijjā vihatāti** etena vijjanatthena vijjāti ayampi attho dīpitoti daṭṭhabbam. **Yasmā vijjā uppannāti** etena vijjāpaṭipakkhā avijjā, paṭipakkhatā cassā pahātabbabhāvena vijjāya ca pahāyakabhāvenāti dasseti. **Itarasmimpi padadvayeti** “tamo vihato, āloko uppanno”ti padadvayepi. **Eseva nayoti** yathāvuttayojanaṃ atidisati. Tatthāyaṃ yojanā—evaṃ adhigatavijjassa tamo vihato viddhasto. Kasmā? Yasmā āloko uppanno ñāṇāloko pātubhūtoti. **Pesitattassāti** yathādhippetatthasiddhipattim vissaṭṭhacittassa, paṭhamavijjādhigamāya pesitacittassāti vuttaṃ hoti.

Vipassanāpādakanti iminā tassa jhānacittassa nibbedhabhāgiyatamāha. Vipassanā tividhā vipassakapuggalabhedena. Mahābodhisattānaṃ hi paccakabodhisattānaṃca vipassanā cintāmayaññāsaṃvaḍḍhitattā¹ sayambhuññābhūtā, itaresaṃ sutamayaññāsaṃvaḍḍhitattā paropadesasambhūtā. Sā “ṭhapetvā nevasaññānāsaññāyatanam avasesarūpārūpajjhānānaṃ aññatarato vuṭṭhāyā”ti-ādinā anekadhā arūpamukhavasena catudhātuvavatthāne vuttānaṃ tesam tesam dhātupariggahamukhānaṃ aññataramukhavasena ca anekadhāva **visuddhimagge**² nānāyato vibhāvitā. Mahābodhisattānaṃ pana catuvīsatiakoṭisatasahassamukhena pabhedagamanato nānāyamaṃ sabbaññūtaññāsaṃnissayassa ariyamaggaññāsaṃ adhiṭṭhānabhūtaṃ pubbabhāgaññāgabbhaṃ gaṇhāpentaṃ paripākaṃ gacchantam paramagambhīraṃ saṅhasukhumataram anaññasādhāraṇam vipassanāññānaṃ hoti, yaṃ aṭṭhakathāsu “mahāvajiraññānaṃ”ti vuccati. Yassa ca pavattivibhāgena catuvīsatiakoṭisatasahassappabhedassa pādakabhāvena samāpajjiyamānā catuvīsatiakoṭisatasahassasaṅkhā devasikaṃ satthu vaḷaṅjanakasamāpattiyo vuccanti, svāyaṃ buddhānaṃ vipassanācāro paramatthamañjūsāyaṃ **visuddhimaggasaṃvaṇṇanāyaṃ**³ dassito, atthikehi tato gahetabboti. Idha pana sāvakaṇaṃ vipassanācāraṃ sandhāya “vipassanāpādakan”ti vuttaṃ.

1. Cintāmayaññāsaṃvaḍḍhitā (Ka)

2. Visuddhi 1. 342 piṭṭhe.

3. Visuddhi-Ṭī 1. 260 piṭṭhe.

Kāmaṃ heṭṭhimamaggañāṇānīpi āsavānaṃ khepanañāṇāni eva, anavasesato pana tesam khepanam aggamaggañāṇenevāti āha “**arahattamaggañāṇatthāyā**”ti. **Āsavavināsanatoti** āsavānaṃ nissesam samucchindanato. Āsavānaṃ khaye ñāṇam āsavakkhayañāṇanti dassento “**tatra cetam ñāṇan**”ti vatvā “**khaye**”ti ādhāre bhummaṃ, na visayeti dassento “**tattha pariyāpannattā**”ti āha. **Abhinīharatīti** abhimukhaṃ nīharati, yathā maggābhisamayo hoti, savanaṃ tadabhimukhaṃ pavatteti. **Idam dukkhanti** dukkhassa ariyasaccassa tadā bhikkhunā paccakkhato gahitabhāvadassanaṃ. **Ettakam dukkhanti** tassa paricchijja gahitabhāvadassanaṃ. **Na ito bhiiyoti** tassa anavasesato gahitabhāvadassanaṃ. Tenāha “**sabbampi dukkhasaccan**”ti-ādi. **Sarasalakkhaṇapaṭivedhenāti** sabhāvasaṅkhātassa lakkhaṇassa asammohato paṭivijjanena. Asammohapaṭivedhoti ca yathā tasmiṃ ñāṇe pavatte pacchā dukkhasaccassa sarūpādiparicchede sammoho na hoti, tathā pavatti. Tenevāha “**yathābhūtam pajānātī**”ti. Dukkhaṃ samudeti etasmāti **dukkhasamudayo**. **Yam thānam patvāti** yaṃ nibbānaṃ maggassa ārammaṇapaccayaṭṭhena kāraṇabhūtam āgama. **Patvāti** ca tadubhayavato puggalassa pavattiyāti katvā vuttaṃ. **Patvāti** vā pāpuṇanahetu. **Appavattinti** appavattinimittam. Te vā na pavattanti etthāti appavatti, nibbānaṃ. **Tassāti** dukkhanirodhassa. **Sampāpakanti** sacchikiriyāvasena sammadeva pāpakaṃ.

Kilesavasenāti āsavaṅkhātakilesavasena. Yasmā āsavānaṃ dukkhasaccapariyāyo tappariyāpannattā sesasaccānañca taṃsamudayādipariyāyo¹ atthi, tasmā vuttaṃ “**pariyāyato**”ti. Dassento saccānīti yojanā. Āsavānañcetha gahaṇam “āsavānaṃ khayañāṇāyā”ti āraddhattā. Tathā hi “kāmāsavāpi cittaṃ vimuccatī”ti-ādinā āsavavimuttisīseneva sabbakilesavimutti vuttā. “**Idam dukkhanti yathābhūtam pajānātī**”ti-ādinā missakamaggo idha kathitoti “**saha vipassanāya koṭippattam maggam kathesī**”ti vuttaṃ. **Jānato passatoti** iminā pariññāsacchikiriyābhāvanābhisamayā vuttā. **Vimuccatīti** iminā pahānābhisamayo vuttoti āha “**iminā maggakkhaṇam dassetī**”ti.

1. Taṃsamuṭṭhānādipariyāyo (Ka)

Jānato passatoti vā hetuniddeso. Yaṃ jānanahetu kāmāsavāpi cittaṃ vimuccatīti yojanā. Dhammānaṃ hi samānakālikānampi paccayapaccayuppannatā sahaajātakotiyaṃ labbhati. Bhavāsavaggahaṇeneva ettha bhavarāgassa viya bhavadiṭṭhiyāpi samavarodhoti diṭṭhāsavassapi saṅgaho daṭṭhabbo.

Khīṇā jātīti-ādīhi padehi. **Tassāti** paccavekkhaṇāṇassa. **Bhūminti** pavattiṭṭhānaṃ. Yenādhippāyena “katamā panassā”ti-ādinā codanā katā, taṃ vivaranto “**na tāvassā**”ti-ādimāha. Tattha **na tāvassa atītā jāti khīṇā** maggabhāvanāyāti adhippāyo. Tattha kāraṇamāha “**pubbeva khīṇattā**”ti. Na anāgatā assa jāti khīṇāti yojanā. **Na anāgatāti** ca anāgatabhāvasāmaññaṃ gahetvā lesena codeti. Tenāha “**anāgate vāyāmābhāvato**”ti. Anāgataviseso panettha adhippeto, tassa khepane vāyāmo labbhateva. Tenāha “**yā pana maggassā**”ti-ādi. **Ekacatupañcavokārabhavesūti** bhavattayaggahaṇaṃ vuttanayena anavasesato jātiyā khīṇabhāvadassanattaṃ. **Tanti** yathāvuttaṃ jātiṃ. **Soti** khīṇāsavo bhikkhu.

Brahmacariyavāso nāma idha maggabrahmacariyassa nibbattanamevāti āha “**parivutthan**”ti. Sammādiṭṭhiyā catūsu saccesu pariññādikkiccasāadhanavasena pavattamānāya sammāsaṅkappādīnampi dukkhasacce pariññābhisamayānuguṇā pavatti, itaresu ca saccesu nesam pahānābhisamayādivasena pavatti pākaṭā eva. Tena vuttaṃ “**catūsu saccesu catūhi maggehi pariññāpahānasacchikiriyābhāvanābhisamayavasenā**”ti. **Puthujjanakalyāṇakādayoti ādi**-saddena sattasekhaṃ saṅgaṇhāti.

Itthattāyāti ime pakārā itthaṃ, tabbhāvo itthattaṃ, tadatthanti vuttaṃ hoti. Te pana pakārā ariyamaggabyāpārabhūtā¹ pariññādayo idhādhippetāti āha “**evamsoḷasavidhakkiccabhāvāyā**”ti. Te hi maggaṃ paccavekkhato maggānubhāvena pākaṭā hutvā upaṭṭhahanti, pariññādīsu ca pahānameva padhānaṃ tadatthattā itaresanti āha “**kilesakkhayāyavā**”ti. Pahānakilesapaccavekkhaṇavasena vā etaṃ vuttaṃ. Dutiyavikappe

1. Ariyapuggalabyāpārabhūtā (Ka)

itthattāyāti nissakke sampadānavacananti āha “**itthabhāvato**”ti. **Aparanti** anāgataṃ. Ime pana carimakattabhāvasaṅkhātā pañcakkhandhā. **Pariññātā tiṭṭhantī** etena tesam appatiṭṭhataṃ dasseti. Apariññāmūlakā hi patiṭṭhā. Yathāha “kabaḷīkāre ce bhikkhave āhāre atthi rāgo, atthi nandī, atthi taṇhā, patiṭṭhitaṃ tattha viññāṇaṃ virūḷhaṃ”ti-ādi¹. Tenevāha “**chinnamūlakā rukkhā viyā**”ti-ādi.

Yassāti puthujjanassa. Tassa hi sīlaṃ kadāci vaḍḍhati, kadāci hāyati. Sekkhāpi pana sīlesu paripūrakārinova, asekkhesu vattabbameva natthi. Tenāha “**khīṇāsavassā**”ti-ādi. **Vasippattanti** vasībhāvappattam. **Sutṭhu samāhitanti** aggaphalasangāhānaṃ sammadeva samāhitaṃ. **Dhitisampannanti** aggaphaladhitiyā samannāgataṃ. **Maccumjahitvā ṭhitanti** āyatim punabbhavābhāvato vuttam. Kathaṃ punabbhavābhāvoti āha “**sabbe pāpadhamme pajahitvā ṭhitan**”ti. Sabbassapi ñe yyadhammassa catusaccantogadhattā vuttam “**buddhanti catusaccabuddhan**”ti. **Buddhasāvakaṃ**ti sāvakabuddhā namassanti², pageva itarā pajā. Itarā hi pajā sāvakepi namassanti. Iti ettakena ṭhānena sammāsambuddhassa vasena gāthānaṃ atthaṃ vatvā idāni sāvakassapi vasena atthaṃ yojetvā dassetuṃ “**atha vā**”ti-ādi vuttam. **Sāvakopi gotamo** mukhanibbattena sampattena sambandhena, yato sabbepi ariyasāvakaṃ bhagavato orasaputtāti vuccantīti.

Nivussatīti **nivāso**, nivuttho khandhasantānoti āha “**nivutthakkhandhaparamparan**”ti. **Aveti, avedīti** pāṭhadvayenapi pubbenivāsañāṇassa kiccāsiddhaṃyeva dasseti. Ekattakāya-ekattasaññibhāvasāmaññāto vehapphalāpi ettheva saṅgahaṃ gacchantīti “**chakāmāvacare nava brahmaloke**”iceva vuttam. Itare pana apacurabhāvato na vuttā. Ekaccānaṃ avisayabhāvato ca avacanaṃ daṭṭhabbaṃ. Jāti khīyati etenāti **jātikkhayo**, arahattanti āha “**arahattaṃ patto**”ti. “Abhiññāyā”ti vattabbe yakāralopena “abhiññā”ti niddeso katoti āha “**jānitvā**”ti. **Kiccavosānenāti** catūhi maggehi kattabbassa soḷayavidhassa kiccassa pariyosānena. **Vositoti** pariyosito, niṭṭhitoti attho. **Moneyyena samannāgatoti** kāyamoneyyādīhi samannāgato.

1. Saṃ 1. 325; Abhi 4. 114; Khu 7. 19 piṭṭhesu. 2. Sāvakaṃ buddhaṃ namassanti (Ka)

Lapitaṃ lapatīti **lapitalāpano**. **Attapaccakkhato** ñatvāti iminā tesam vijjānaṃ paṭiladdhabhāvaṃ dīpeti.

Tikaṇṇasuttavaṇṇanā niṭṭhitā.

9. Jāṇussoṇisuttavaṇṇanā

60. Navame **deyyadhammassetaṃ nāma**nti yāgaṃ karontena dātabbadeyyadhamam sandhāya vadati tadaññassa pāḷiyam deyyadhammaggaṇeneva gahitattā. **Matakabhattanti** mataka uddissa dātabbabhattam, pitupiṇḍanti vuttam hoti. **Varapurisānanti** visiṭṭhapurisānam, uttamapurisānanti attho. **Sabbametaṃ dānanti** yathāvuttabhedaṃ paññasaddhādīdānam.

Jāṇussoṇisuttavaṇṇanā niṭṭhitā.

10. Saṅgāravasuttavaṇṇanā

61. Dasame jiṇṇānam hatthisālādīnam paṭisaṅkharaṇam puna pākatikakaraṇam jiṇṇapaṭisaṅkharaṇam, tassa kāraṅko **jiṇṇapaṭisaṅkharaṅakāraṅko**. **Bāhirasamayeti** satthusāsanato bāhire aññatitthiyasamaye. **Sabbacatumkēnā**ti-ādīsu sabbesu dvipadacatuppadādibhedesu paṇesu ekekasmiṃ cattāro cattāro paṇe vadhitvā yajitabbarā yaññam sabbacatumkēnam nāma. Sesesupi iminā nayena attho veditabbo. **Yassa vā tassa vā**ti nissakke sāmivacananti āha “**yasmā vā tasmā vā**”ti. **Evamassāyanti** ettha **assū**ti nipātamattanti āha “**evam santepi ayan**”ti.

Vaḍḍhentoti paṭṭhapento. Maggabrahmacariyassa ogadham mūlam paṭiṭṭhābhūtam **brahmacariyogadham**. Tenāha “**arahattamaggasaṅkhātassā**”ti-ādī. Ukkatṭhaniddesena cettha arahattamaggasseva gahaṇam katanti daṭṭhabbarā. **Uttamam paṭiṭṭhābhūtam** ārammaṇūpanissayabhāvena.

Appēhi veyyāvaccakarādīhi attho etissāti **appatṭhā** ttha-kārassa ṭṭha-kāram katvā. Tenāha “**yattha bahū**”ti-ādī. **Yatthā**ti yassam

paṭipadāyaṃ. Appo samārambho etassāti **appasamārambho**. **Pāsaṃsāti** pasāsaṃsārahā. **Etānyeva kathāpessāmīti** eteneva brāhmaṇena kathāpessāmi.

Soppenāti niddāya. **Pamādenāti** jāgariyādīsu ananuyuñjanato sativippavāsalakkhaṇena pamādena. **Paccanīkapaṭiharaṇavasena**ti paṭipakkhāpanayanavasena. Tathā hi bhagavato ca sāsanaṃ ca paṭipakkhā titthiyā, tesāṃ haraṇato paṭihāriyaṃ. Te hi diṭṭhaharaṇavasena diṭṭhippakāsane asamatthabhāvena ca iddhi-ādesanānusāsānīhi haritā apanītā hontīti. “Paṭi”ti vā ayaṃ saddo “pacchā”ti etassa atthaṃ bodheti “tasmim paṭipaviṭṭhasmim, añño āgañchi brāhmaṇo”ti-ādīsu¹ viya, tasmā samāhite citte vigatūpakkilese katakiccena pacchā haritabbaṃ pavattetabbanti paṭihāriyaṃ, attano vā upakkilesesu catutthajjhānamaggehi haritesu pacchāharaṇaṃ paṭihāriyaṃ, iddhi-ādesanānusāsāniyo ca vigatūpakkilesena katakiccena ca sattahitattaṃ puna pavattetabbā, haritesu ca attano upakkilesesu parasattānaṃ upakkilesaharaṇāni hontīti paṭihāriyāni bhavanti, paṭihāriyameva **pāṭihāriyaṃ**. Paṭihāriye vā iddhi-ādesanānusāsānisamudāye bhavaṃ ekekaṃ **pāṭihāriyanti** vuccati. Paṭihāriyaṃ vā catutthajjhānaṃ maggo ca paṭipakkhaharaṇato, tattha jātaṃ nimittabhūte, tato vā āgatanti **pāṭihāriyaṃ**.

Āgatanimittenāti āgatākārasallakkhaṇavasena. Esa nayo sesesupi. **Eko rājāti** dakkhiṇamadhurādhipati eko paṇḍurājā. **Evampi te manoti** iminā ākārena tava mano pavattoti attho. Kena pakārena pavattoti āha “**somanassito vā**”ti-ādi. Sāmaññajotanaṃ visese avatiṭṭhatīti adhippāyenevaṃ vuttaṃ. “Evaṃ tava mano”ti idaṅca manaso somanassitatādimattadassanaṃ, na pana yena so somanassito vā domanassito vā, taṃdassanaṃ. Somanassaggahaṇena cettha tadekaṭṭhā rāgādayo saddhādayo ca dassito honti, domanassaggahaṇena dosādayo. **Dutiyanti** “itthampi te mano”ti padaṃ. **Itipīti** ettha **iti**-saddo nidassanattho

1. Khu 1. 429; Khu 8. 1 piṭṭhesu.

“atthīti kho kaccāna ayameko anto”ti-ādīsu¹ viya. Tenāha “**imañca imañca atthaṃ cintayamānan**”ti. Pi-saddo vuttatthasampiṇḍanattho.

Kathentānaṃ sutvāti kathentānaṃ saddaṃ sutvā. **Tassa vasenāti** tassa vitakkitassa vasena. **Aṭṭakārakenāti** vinicchayakārakena.

Na ariyānanti ariyānaṃ maggaphalacittaṃ na jānātīti attho. Tam hi tena anadhigatattā cetopariyañāṇenapi na sakkā viññātum, aññaṃ pana cittaṃ jānātiyeva. **Heṭṭhimo uparimassa cittaṃ na jānātīti**-ādīnapi maggaphalacittameva sandhāya vuttānīti veditabbāni. Sotāpannādayopi hi attanā adhigatameva maggaphalaṃ parehi uppāditaṃ sammā cetopariyañāṇena jānītuṃ sakkonti, na attanā anadhigataṃ. Sabbepi ariyā attano phalaṃ samāpajjanti adhigatattāti dassento “**etesu cā**”ti-ādīmāha. Yadi ariyā attanā adhigataphalaṃ samāpajjanti, uparimāpi heṭṭhimaṃ phalaṃ samāpajjanti adhigatattā lokiyasamāpattiyo viyāti kassaci āsankā siyā, tannivattanatthamāha “**uparimo heṭṭhimaṃ na samāpajjati**”ti.

Uparimoti sakadāgāmi-ādi-ariyapuggalo. **Heṭṭhimanti** sotāpattiphalādiṃ. **Na samāpajjati**ti satipi adhigatatte na samāpajjati. Kasmāti ce. Kāraṇamāha “**tesañhi**”ti-ādi, tesam sakadāgāmi-ādīnaṃ heṭṭhimā heṭṭhimā phalasamāpatti tesu tesuyeva heṭṭhimesu ariya puggalesu pavattati, na uparimesūti attho. Iminā heṭṭhimaṃ phalacittaṃ uparimassa na uppajjati dasseti. Kasmāti ce? Puggalantarabhāvūpagamanena paṭippassaddhattā. Etena uparimo ariyo heṭṭhimaṃ phalasamāpattim samāpajjati attanā adhigatattā yathā tam lokiyasamāpattinti evaṃ pavatto hetu byaticāritoti daṭṭhabbaṃ. Na hi lokiyajjhānesu puggalantarabhāvūpagamanaṃ nāma atthi visesābhāvato, idha pana asamugghāṭitakammakilesanirodhanena puthujjanehi viya sotāpannassa sotāpannādīhi sakadāgāmi-ādīnaṃ puggala ntarabhāvūpagamanaṃ atthi. Yato heṭṭhimā heṭṭhimā phaladhammā uparūparimaggadhammehi nivattitā paṭipakkhehi viya abhubhūtā appavattidhammataṃyeva āpannā. Teneva vuttaṃ “**paṭippassaddhattā**”ti.

1. Saṃ 1. 258; Saṃ 2. 110 piṭṭhesu.

Apica kusalakiriyappavatti nāma aññā¹, vipākappavatti ca aññāti¹ anantaraphalattā ca lokuttarakusalānaṃ heṭṭhimato uparimo bhavantaragato viya hoti. Taṃtaṃphalavaseneva hi ariyānaṃ sotāpannādināmalābho. Te sace aññaphalasamaṅginopi honti, sotāpannādināmampi tesam avavatthitaṃ siyā. Tassa tassa vā ariyassa taṃ taṃ phalaṃ sadisanti katvā na uparimassa heṭṭhimaphalasamaṅgitāya lesopi sambhavati, kuto tassā samāpajjananti daṭṭhabbaṃ. Heṭṭhimā ca sotāpannādayo uparimaṃ sakadāgāmiphalaḍḍhiṃ na samāpajjanti anadhigatattā. Na hi anadhigataṃ samāpattiṃ samāpajjitum sakkā, tasmā sabbepi ariyā attanoyeva phalaṃ samāpajjantīti niṭṭhamettha gantabbaṃ.

Pavattentāti pavattakā hutvā, pavattanavasenāti attho. **Evanti** yathānusiṭṭhāya anusāsaniyā vidhivasena paṭisedhavasena ca pavattiākāraparāmasanaṃ. Sā ca sammāvitakkā nāma micchāvitakkānañca pavatti-ākāradassanavasena pavattati. Tattha ānisaṃsassa ādinavassa ca vibhāvanattham **aniccasaññameva**, na niccasaññanti attho. Paṭiyoginivattanattham hi eva-kāraggaṇaṃ. Idhāpi evasaddaggaṇassa attho payojanañca vuttanayeneva veditabbaṃ. **Idam**-gahaṇepi eseva nayo. **Pañcakāmaguṇarāganti** nidassanamattaṃ daṭṭhabbaṃ tadaññarāgassa dosādīnañca pahānassa icchitattā tappahānassa ca tadaññarāgādikhepassa upāyabhāvato. Tathā vuttaṃ duṭṭhalohitavimocanassa pubbaduṭṭhamānsakhepanūpāyatā viya. **Lokuttaradhamamevāti** avadhāraṇaṃ paṭikkhepabhāvato sāvajjadhammanivattanaparam daṭṭhabbaṃ tassa adhigamūpāyānisaṃsabhūtānaṃ tadaññesaṃ anavajjadhammānaṃ nānantariyabhāvato.

Cintāmaṇikavijjāsarikkhakatanti iminā “cintāmaṇī”ti evaṃladdhanāmā loke ekā vijjā atthi, yāya paresaṃ cittaṃ vijānantīti dīpeti. “Tassā kira vijjāya sādḥako puggalo tādise desakāle mantaṃ parijappitvā yassa cittaṃ jānitukāmo, tassa diṭṭhahatthādivisesasañjānanamukhena² cittācāraṃ anuminanto katheti”ti keci, apare “vācaṃ niccharāpetvā tattha akkharasallakkhaṇavasenā”ti vadanti.

1. Aññānīpi (Ka)

2. Diṭṭhahatthādivisesasañjānanamūkhena (Ka)

Idaṅca pana sabbanti “bhavaṃ gotamo anekavihitam iddhividham paccanubhoti”ti-ādinayappavattam sabbampi.

Saṅgāravasuttavaṇṇanā niṭṭhitā.

Brāhmaṇavaggavaṇṇanā niṭṭhitā.

(7) 2. Mahāvagga

1. Titthāyatanasuttavaṇṇanā

62. Dutiyassa paṭhame **tittham nāma dvāsaṭṭhi diṭṭhiyo** tabbinimuttassa kassaci diṭṭhivipphanditassa abhāvato. Ettha hi sattā taranti uppilavanti ummujjanimujjam karonti, tasmā “**titthan**”ti vuccati. Pāragamanasaṅkhātam hi taraṇam diṭṭhigatikānam natthi, tattheva aparāparam nimujjanummujjanavasena pilavanameva tesam taraṇam nāma. **Uppādakāti** pūraṇakassapādayo. Titthe jātā **titthiyā**, yathāvuttam vā diṭṭhigatasāṅkhātam tittham etesam atthīti titthikā, titthikā eva **titthiyā**. **Manorameti** sādupalabharitatāya abhayadisatāya ca manorame. **Imesuyeva tisu ṭhānesūti** yathāvuttesu titthāyatanesu.

Yo yathā jānāti, tassa tathā vuccatīti iminā puggalajjhāsayavasena tathā vuttanti dasseti. **Puggala**-saddo ca tissannampi pakatīnam sādharmaṇo, tasmā purisaggaḥaṇena tato visesanaṃ yathā “aṭṭhapurisapuggalā”ti. **Paṭisaṃviditam karotīti** kevalam jānavasena viditam karoti. **Anubhavati vāti** vipākalakkhaṇappattam anubhavati. **Pubbekatahetūti** antogadhāvadhāraṇam padanti āha “**pubbekatakammapaccayenevā**”ti. **Imināti** “sabham tam pubbekatahetū”ti iminā vacanena. **Kamma vedananti** kusalākusalakammasahajam vedanam. **Kiriyavedananti** “neva kusalākusalā na ca kammavipākā”ti evam vuttam kiriyacittasahajam vedanam. Na kevalaṅca te kammakiriyavedanā eva paṭikkhipanti, atha kho sāsane loka ca pākaṭe vātābādhiroge ca paṭikkhipanti evāti dasseturam “**ye vā ime**”ti-ādimāha. Tattha **pittasamuṭṭhānāti** pittavikārādhikasambhūtā. Anantaradvayepi eseva nayo. **Sannipātikāti** pittādīnam

tiṇṇampi vikārānaṃ sannipātato jātā. **Utupariṇāmajāti** sītādi-utuno vipariṇāmato visamaparivuttito jātā. **Visamaparihārajāti** asappāyāhārayogaṭisevanavasena kāyassa visamaṃ pariharaṇato jātā. **Opakkamikāti** upakkamato nibbattā. **Kammavipākajāti** kammaṃ vipākabhūtakhandhato jātā. Virodhipaccayasamuṭṭhānā dhātūnaṃ vikārāvattā, tampaccayā vā dukkhā vedanā ābādhanatṭhena **ābādho**, so eva rujjanatṭhena **rogo**. Tattha “yo yāpyalakkhaṇo¹, so rogo, itaro ābādho”ti vadanti. Sabbesañca nesamā taṃtaṃdhātūnaṃ visamaṃ āsannakāraṇaṃ, na tathā itarāni. Tatthāpi ca pakopāvattā dhātuyo āsannakāraṇaṃ, na tathā parapaccayāvattāti datṭhabbaṃ. **Aṭṭhamānyeva** kammavipākajānaṃ ābādhaṃ **sampaṭicchanti** “sabbamā taṃ pubbekatahetū”ti vipallāsaggāhena. “**Pubbe**”ti purātanasseva kammaṃ gahitattā upapajjedaniyampi te paṭikkhipantīti vuttamā “**dve paṭibāhitvā**”ti. **Sampaṭicchanti**ti anujānanti.

Attanā katamūlakenāti sāhatthikakammahetu. **Āṇattimūlakenāti** parassa āṇāpanavasena katakammahetu. **Imāti** tisso vedanā. **Sabbe paṭibāhantīti** sabbe roge paṭisedhenti sabbesampi tesamā ekena issareneva nimmitattā tabbhāvībhāvāsambhavato. Esa nayo sesesupi. **Sabbamā paṭibāhantīti** hetupaccayaṭisedhanato sabbamā nisedhenti.

Mātikamā nikkhipitvāti tiṇṇampi vedānaṃ asārabhāvadassanatthamā uddesamā katvā. **Tanti** taṃ mātikamā. **Vibhajitvā dassenti**ti dosadassanavaseneva vibhāgato dassenti. **Laddhipaṭiṭṭhāpanatthanti** attano laddhiyā paṭijānāpanatthamā. **Laddhito laddhim saṅkamantīti** mūlaladdhito aññaladdhim upagacchanti paṭijānanti. **Pubbekatahetuyeva paṭisamvedetīti** kammavedanampi vipākavedanaṃ katvā vadanti. Diṭṭhigatikā hi byāmūlḥaccittā kammantaravipākantarādīni āloḥenti, asaṅkarato saññāpetum na sakkonti. Yathā ca akusalakamme, evamā kusalakammepīti dassenti “**evamā pāṇātipātā**”ti-ādi vuttamā. Tattha **evanti** yathā pubbekatahetu eva pāṇātipātino nāma honti, na idāni sayamkatakāraṇā, evamā pāṇātipātā viramaṇampi pubbekatahetu evāti vicāriyamāno pubbekatavādo akiriyavādo eva sampajjati.

1. Yappalakkhaṇo (Ka)

Kattukamyatāchando na taṇhāchando. **Kattukamyatāti** kātumicchā. **Paccattapurisakāro**ti tena tena purisena kattabbakiccam na hoti pubbekatahetu eva sījjanato. **Ubhayampi taṃ esa na labbhatī** kattabbakaraṇaṃ sucaritapūraṇaṃ, akattabba-akaraṇaṃ duccharitaviratīti idaṃ ubhayampi esa na labhati¹. **Samaṇāpi hi pubbekatakāraṇāyeva hontī**ti pubbekatakāraṇāyeva samaṇāpi hontī, na idāni saṃvarasamādānādinā. **Assamaṇāpi pubbekatakāraṇāyevāti** pubbekatakāraṇāyeva assamaṇāpi hontī, na saṃvarabhedenā.

Yathā pubbekatavāde chandavāyāmānaṃ asambhavato paccattapurisakārānaṃ abhāvo, evaṃ issaranimmānavādepi issareneva sabbassa nimmitabhāvānujānanatoti vuttam “**pubbekatavāde vuttanayeneva veditabbo**”ti. Esa nayo ahetukavādepīti āha “**tathā ahetukavādepī**”ti.

Imesanti-ādinā imesaṃ titthāyatanānaṃ tucchāsārātāya thusakoṭṭanena kuṇḍakamattassapi alābho viya paramatthalesassapi abhāvo, tathā khajjopanakobhāsato tejaso phuliṅgamattassapi abhāvo viya andhavenīkassapi maggassa appaṭilābho viya saddamatthaṃ nissāya micchābhāgena vipallatthatāya **daddarajātake**² sasakasadisatā ca vibhāvitā hoti. **Sārabhāvanti** silasāradisampattiyā sārasambhāvaṃ. **Niyyānikabhāvanti** ekanteneva vaṭṭato niyyānavahabhāvaṃ. **Aniggahitoti** na niggahetabbo. Tenāha “**niggahetuṃ asakkuṇeyyo**”ti. **Asaṃkiliṭṭhoti** saṃkilesavirahito. Tenāha “**nikkilesa**”ti-ādi. **Anupavajjoti** dhammato na upavaditabbo. **Appaṭikuṭṭho** nāma appaṭisedhanaṃ vā siyā anakkosanaṃ vāti tadubhayaṃ dassento “**appaṭibāhito anupakuṭṭho**”ti āha.

Tassa dhammassāti “ayaṃ kho pana bhikkhave”ti-ādinā uddhaṭassa dhammassa. **Pañhaṃ pucchivāti** kathetukamyatāvasena pañhaṃ pucchivā. **Yathāpaṭipāṭiyāti** mātikāya yathānikkhittappaṭipāṭiyā. **Dhātuyoti** sabbhāvadhāraṇaṭṭhena dhātuyo. Tā pana yasmā taṇhādiṭṭhikappanāparikappita atta subha sukhasassatādi pakati ādidhuvādiṭṭhikāyādakā

1. Na labbhati (Ka)

2. Khu 5. 43 piṭṭhe.

viya na icchāsabhāvā diṭṭhi-ādirahitehi vimuccamāna-
 udumbarapupphādilokavohāravatthūni viya ca vācāvattumattā, atha kho
 saccaparamatthabhūtāti āha “**sabhāvā**”ti, saccasabhāvāti attho. Attano
 sabbhāvaṃ dhārentīti hi dhātuyo. **Nijjīvanissattabhāvappakāsakoti**
 bāhiraparikkappitajīvābhāvappakāsako
 lokiyamahājanasaṅkappitasattābhāvappakāsako ca. **Ākaratṭhenāti**
 uppajjanaṭṭhānabhāvena. Uppattiṭṭhānampi hi ākaro āyatananti vuccati yathā
 “kambojo assānaṃ āyatanan”ti. **Manopavicārāti** taṃ taṃ ārammaṇaṃ
 upecca manaso vividhacaraṇākāro. Kehi katthāti āha
 “**vitakkavicārapādehī**”ti-ādi. **Aṭṭhārasasu ṭhānesūti** cha somanassaṭṭhaniyāni,
 cha domanassaṭṭhaniyāni, cha upekkhāṭṭhaniyānīti evaṃ aṭṭhārasasu ṭhānesu.

Patiṭṭhādhatūti sesabhūtattayassa ceva sabbūpādārūpānañca
 patiṭṭhāsabhāvā dhātu. Iminā nayena **ābandhanadhātūti**-ādīsupi attho
 veditabbo. Apica kakkhaḷabhāvasiddho sahaḷādhamaṇaṃ ādhārabhāvo
patiṭṭhā bhāvo. Dravabhāvasiddhaṃ sampiṇḍanaṃ **ābandhanaṃ**.
 Uṇhabhāvasiddhaṃ mudutāpakkatāvahaṃ **paripācanaṃ**.
 Thaddhabhāvāvahaṃ uddhumātanaṃ **vitthambhanaṃ**. Rūpavivitto
 rūpapariyanto ākāsoṭi yesaṃ so paricchedo, tehi so asamphuṭṭhovāti vuttaṃ
 “**ākāsadhātūti asamphuṭṭhadhātū**”ti. Sañjānanavidhurā ārammaṇūpaladdhi
viḷānanadhātu. **Vitthāratopi kathetuṃ vaṭṭati** saṅkhepantogadhattā
 vitthārassa. **Saṅkhepato kathetuṃ na vaṭṭati** kathetabbassa atthassa
 anavaśesapariyādānābhāvato. Tenāha “**vitthāratova vaṭṭati**”ti. **Ubhayathāti**
 saṅkhepato vitthārato ca.

Anipphannāpi ākāsadhatu bhūtāni upādāya gahetabbatāmattena
 “**upādārūpan**”teva vuccati. **Diṭṭhānevāti sallakkhetabbāni**
 upādārūpabhāvasāmaññato. **Tena sahaḷāta vedanā vedanākkhandho**
 samudāye pavattavohārassa avayavepi dissanato yathā “vatthekadese daḍḍhe
 vattham daḍḍhan”ti. “**Phasso ca cetanā ca saṅkhārakkhandho**”ti vuttaṃ
 mahābhūmakattā tesam tappadhānattā ca saṅkhārakkhandhassa.
Arūpakkhandhā nāmaṃ ārammaṇābhimukhaṃ namanato
 nāmādhīnaggahaṇato ca. **Rūpakkhandho rūpaṃ** paribyaṭṭaṃ ruppanaṭṭhena.
Paccayanti nissayabhūtaṃ paccayaṃ. Vibhāgena **dvācattālīsa**.

ekāsīti cittāni “sammāsanacāroyan”ti katvā. **Anukkamena paṭipajjamānoti** evaṃ kaṅkhāvitaraṇavisuddhiyaṃ t̥hito uparimena tissannaṃ visuddhīnaṃ sampādanavasena visuddhibhāvanaṃ ussukkāpento.

Phassāyatananti phassassa uppattiṭṭhānaṃ. **Suvaṇṇādīnanti** suvaṇṇamaṇivajirādīnaṃ. Ākiṇṇaṃ viya hutvā uppajjanti etthāti **ākaro**. Yathā cakkhu vipākaphassassa visesapaccayo, na tathā itaresanti katvā vuttaṃ “**dve cakkhuvīññāṇāni**”ti-ādi. Esa nayo sesavāresupi. Dvattimsāya vipākaphassesu dvipaṇcaviññāṇasahagataphasse t̥hapetvā sesā **dvāvīsati vipākaphassā** veditabbā. **Diṭṭhameva hoti** tena samānayogakkhamattā¹. “**Saṅkhepato tāvā**”ti saṅkhepakathaṃ ārabhitvāpi vitthārakathāpettha vuttanayattā suviññeyyāvāti vuttaṃ “**heṭṭhā -pa- veditabban**”ti.

Somanassassa uppattiṭṭhānabhūtaṃ **somanassaṭṭhāniyaṃ**. Tenāha “**somanassassa kāraṇabhūtan**”ti. **Upavicaratīti** upecca pavattati. Sabhāvato saṅkappato ca somanassādi-uppattihetukā somanassaṭṭhāniyāditātī āha “**iṭṭhaṃ vā hotū**”ti-ādi. **Catutthaṃ diṭṭhamevahoti** tadavinābhāvato.

Ariyasaccānīti purimāpade uttarapadalopenāyaṃ niddesoti āha “**ariyabhāvakarāni**”ti-ādi. **Visuddhimagge**² **pakāsitaṃ**, tasmā na idha pakāsetabbanti adhippāyo. **Sukhāvabodhanatthanti** desiyamānāya vaṭṭakatāya sukkena avabodhanatthaṃ. Tenāha “**yassa hī**”ti-ādi. **Dvādasapadanti** avijjādīhi padehi dvādasapadaṃ. **Paccayavaṭṭanti** paccayappabandhaṃ, **kathetukāmo hoti** paccayākāramukhena saccāni dassetukāmatāya. **Gabbhāvakkantivaṭṭanti** gabbhokkantimukhena vipākavaṭṭaṃ dasseti “gabbhassāvakkanti hotī”ti-ādinā. Kasmā panettha gabbhāvakkantivaseneva vaṭṭaṃ dassitanti āha “**gabbhāvakkantivaṭṭasmim hī**”ti-ādi. **Gabbhāvakkantivaṭṭasminti** mātukucchimhi nibbattanavasena pavattadhammapabandhe. **Dassiteti** desanāvasena dassite. Purimā dve yoniyo itarāhi

1. Samānayogakkhematto (Ka)

2. Visuddhi 2. 126 piṭṭhe.

oḷārikatāya paribyattatarāti vuttaṃ “**gabbhāvakkanti -pa- avabodhetumpi**”ti.

Paccayamattanti channaṃ dhātūnaṃ sādharmaṇaṃ paccayabhāvamattaṃ, na tehi bhāgaso nipphādiyamānaṃ paccayavisesaṃ “kuto panetaṃ channaṃ dhātūnaṃ”ti avibhāgena vuttatā. Tenāha “**idaṃ vuttaṃ hoti**”ti-ādi. **Na mātu na pitu** tāsāṃ dhātūnaṃ imassa sattassa bāhirabhāvato. **Gabbhassāti** ettha gabbhati attabhāvabhāvena vattatīti gabbho, kalalādi-avattho dhammappabandho. Tannissitattā pana sattasantāno gabbhoti vutto yathā mañcanissitā “mañcā ukkuṭṭhiṃ karonti”ti. Tannissayabhāvato mātukucchi gabbhoti vuccati “gabbhe vasati māṇavo”ti-ādīsu¹. Gabbho viyāti vā gabbho. Yathā hi nivāsaṭṭhānatāya sattānaṃ ovarako “gabbho”ti vuccati, evaṃ gabbhaseyyakānaṃ sattānaṃ yāva abhijāti nivāsaṭṭhānatāya mātukucchi “gabbho”ti vuccati. Idha pana paṭhamāṃ vutta-attheneva gabbhoti veditabbo. Tenāha “**gabbho ca nāmā**”ti-ādi.

Nirati-atthena nirayo ca so yathāvuttena atthena gabbho cāti **nirayagabbho**. Esa nayo sesapadesupi. Ayaṃ pana viseso—devamanujādayo viya uddham dīghā ahutvā tiriyaṃ añcitā dīghāti tiracchānā. Te eva khandhakoṭṭhāsabhāvena yoni ca so vuttanayena gabbho cāti **tiracchānayonigabbho**. Pakatṭhato sukhato apetaṃ apagamo petabhāvo, taṃ pattānaṃ² visayoti **pettivisayo**, petayoni. Manassa ussannaatāya sūrabhāvādiguṇehi upacitamānasatāya ukkaṭṭhaguṇacittatāya **manussā**. Dibbanti kāmaguṇādīhi kīḷanti laḷanti jotantīti **devā**. **Gabbhasaddo** vuttanayo eva. **Nānappakāro**ti yathāvuttena tadanantarabhedenā ca nānappakārako. **Manussagabbho adhippeto** supākaṭatāya paccakkhabhāvato. **Okkanti** mātukucchiṃ okkamitvā viya uppativāti katvā. Nibbattaṃ **nibbatti**. **Pātubhāvo** uppattippakāsako ca.

Sannipāto nāma avekallajātihīnavekalleti³ dassetuṃ “**idha mātāpitaro**”ti-ādi vuttaṃ. **Idhāti** imasmīṃ sattaloke.

1. Khu 5. 353 piṭṭhe Jātake.

2. Taṃ petānaṃ (Ka)

3. Sannipāto nāma samodhānaṃ, taṃ vekallāvekallehi (?)

Sannipatitāti samodhānabhāvato sannipatitā samāgatā saṃsiliṭṭhā. **Utunī**ti utumatī sañjātapupphā. Idañca utusamayaṃ sandhāya vuttaṃ, na lokasamaññākarajassa¹ lagganadivasamattaṃ. Mātugāmassa hi yasmim gabbhāsayasaññite okāse dārako nibbattati, tattha mahatī lohitaṭṭakā saṅṭhahitvā aggahitapubbā eva bhijjivā paggharati, vatthu suddham hoti paggharitalohitattā anāmayattā ca. Visuddhe vatthumhi mātāpitūsu ekavāraṃ sannipatitesu yāva satta divasāni khattameva hoti. Suddham vatthu nahānato²

parampi katipayāni divasāni gabbhasaṅṭhahanatāya khattameva hoti parittassa lohitalessa vijjamānattā. Tasmim samaye hatthagāhaveṇiggāhādinaṃ aṅgaparāmasanenapi dārako nibbattatiyeva. Itthisantānēpi hi sattapi dhātū labbhanteva. Tathā hi **pārikāya nābhiparāmasanena**³ sāmassa bodhisattassa, **ditṭhamaṅgalikāya nābhiparāmasanena**⁴ maṇḍabyassa nibbatti ahoṣi. Gandhanato uppannagatiyā nimittūpaṭṭhānena sūcanato dīpanato gandhoti laddhanāmena bhavagāmikammunā abbati pavattatīti **gandhabbo**, tattha uppajjamānakasatto. **Paccupaṭṭhito hotīti** na mātāpitūnaṃ sannipātāṃ olokayamāno samīpe ṭhito paccupaṭṭhito nāma hoti, kammayantayantito pana eko satto tasmim okāse nibbattanako hotīti ayamettha adhippāyo. Tadā hi tatrūpagasatto tatrūpapatti-āvahantakammasaṅkhātēna pellakayantēna tathatthāya pellito upanīto viya hoti.

Viññāṇapaccayā nāmarūpanti ettha viññāṇassa paccayabhāvena gahitattā **“tayo arūpino khandhā”**ti vuttaṃ. Idha pana viññāṇaṃ paccayabhāvena aggahetvā gabbhokkantiyā eva paccayabhāvena gahitattā **“viññāṇakkhandhampi pakkhipitvā”**ti vuttaṃ. Idha pana manussagabbhassa okkantiyā adhippetattā **“gabbhaseyyakānaṃ paṭisandhikkhaṇe”**ti vuttaṃ.

Taṅhāya samudayasaccabhāvena gahitattā **“ṭhapetvā taṅhan”**ti vuttaṃ. **Tasseva pabhāvikā**ti tasseva yathāvuttassa dukkhasaccassa uppādikā.

1. Na lokasamaññācārassa (Ka) Sārattha-Ṭī 2. 13 piṭṭhe passitabbari.

2. Suddhavatthussa tato (mūlapaṇṇāsake mahātaṅhāsāṅkhayasuttaṭṭikāyaṃ)

3. Jātaka-Ṭṭha 6. 91 piṭṭhe.

4. Jātaka-Ṭṭha 4. 378; Ma-Ṭṭha 3. 54; Cariyāpiṭaka-Ṭṭha 151 piṭṭhesu.

Dukkhanirodhoti ettha dukkhaggahaṇena taṇhāpi gahitāti āha “**tesaṃ dvinnampi -pa- dukkhanirodho**”ti. Avisesena hi tebhūmakavaṭṭaṃ idha dukkhanti adhippetāṃ. Atha vā dukkhassa anuppattinirodho tabbhāvikāya taṇhāya anuppattinirodhena vinā na hotīti vuttaṃ “**tesaṃ dvinnampi -pa- dukkhanirodho**”ti. **Anuppattinirodhoti** ca anuppattinirodhanimittāṃ nibbānaṃ dasseti.

“**Tattha vuttanayeneva veditabban**”ti vatvā ubhayattha pāliyā pavatti-ākārabhedāṃ dassetuṃ “**ayaṃ pana viseso**”ti āha. **Tatthāti** visuddhimagge. **Idhāti** imasmiṃ sutte. **Avijjāya tvevāti** avijjāya tu eva. **Asesavirāganirodhāti** ettha accantameva saṅkhāre virajjati etenāti virāgo, maggo, tasmā virāgasāṅkhātena maggena asesanirodhā asesetvā nirodhā samucchindanāti evamettha attho daṭṭhabbo.

Sakalassāti anavasesassa. **Kevalassāti** vā suddhassa, paraparikkappitasattajīvādivirahitassāti attho. **Khīṇākāropi vuccati** “nirujjhanāṃ nirodho”ti iminā atthena. **Arahattampi nirodhoti vuccati** nirodhante uppannattā. **Nibbānampi nirodhoti vuccati** avijjādīnaṃ nirodhassa nimittabhāvato avijjādayo nirujjhanti etthāti nirodhoti katvā. **Khīṇākāradassanavasenāti** avijjādīnaṃ anuppattinirodhena nirujjhanākāradassanavasena. **Nibbānameva sandhāya**, na pana arahattanti adhippāyo. Sabhāvadhammānaṃ niggaho nāma yathāvuttadhammaparicchedato ūnādhikabhāvappakāsanena atāmsabhāvavibhāvaneneva hotīti āha “**niggaṇhanto hī**”ti-ādi.

Titthāyatana-suttavaṇṇanā niṭṭhitā.

2. Bhayasuttavaṇṇanā

63. Dutiye **parittātuṃ samatthabhāvenāti** uppannabhayato rakkhituṃ samatthabhāvena. Natthi ettha mātāputtaṃ aññamaññaṃ tāyituṃ samatthanti amātāputtāni, tāniyeva **amātāputtikāni**. Tenāha “**natthi etthā**”ti-ādi. **Yanti** bhummatthe upayogavacananti āha “**yasmiṃ samaye**”ti. **Mātāpi puttaṃ passituṃ na labhati**, parittātuṃ na samatthanti

adhippāyo. **Puttopi mātaranti** etthāpi eśeva nayo. Cittutrāsoyeva bhayaṃ **cittu trāsabhayaṃ**. Iminā ottappabhayādiṃ nivatteti. Aṭaviggahaṇena aṭavivāsino vuttā “sabbo gāmo āgato”ti-ādīsu viyāti āha “**aṭavīti cettha aṭavivāsino corā veditabbā**”ti. **Teti aṭavivāsino corā. Etaṃ vuttanti** “aṭavisāṅkopo”ti idaṃ vuttam. Thānagamanādi-iriyāpathacakkasamaṅgino iriyāpathacakkasamāruḷhā nāma hontīti āha “**iriyāpathacakkampi vaṭṭatī**”ti. Iriyāpathoyeva pavattanaṭṭhena cakkanti **iriyāpathacakkaṃ**.

Pariyāyantīti parito tena tena disābhāgena gacchanti. Tenāha “**ito cito ca gacchantī**”ti. Mādupemena gantuṃ avisahitvā attano santikaṃ **āgacchantam**. Attasinehassa balavabhāvato mātarampi anapekkhitvā “attānaṃyeva rakhissāmi”ti **gacchantam**. **Ekasmiṃ thāne nilīnanti** vuttanayeneva gantvā ekasmiṃ kheme padese nisinnam. **Kulle vāti-ādīsu** kūlam paratīram vahati pāpetīti **kullo**, taraṇatthāya veḷunaḷādīhi kalāpaṃ katvā baddho. Pattharivā baddho pana **uḷumpo**. Cāṭi-ādi **mattikābhājanam**. **Vuyhamānanti** udakoghena adhosotaṃ nīyamānam.

Yathāvuttāni tīṇi bhayāni samātāputtikāniyeva assutavato puthujjanassa vasena amātāputtikāni dassitānīti āha “**evam pariyaṃyato amātāputtikāni bhayāni dassetvā**”ti.

Bhayasuttavaṇṇanā niṭṭhitā.

3. Venāgapurasuttavaṇṇanā

64. Tatiye **evamṇāmake janapadeti** yattha namaggahaṇena kosalasaddassa ruḷhīsaddataṃ dasseti. Tathā hi kosalā nāma jānapadino rājakumārā, tesam nivāso ekopi janapado ruḷhīsaddena “kosalā”ti vuccati. Akkharacintakā hi īdisesu thānesu yutte viya salīṅgavacanāni¹ icchanti. Ayamettha ruḷhī yathā aññatthāpi “kurūsu viharati, aṅgesu viharatī”ti ca. Tabbisesane pana janapadasadde jātisadde

1. Pāṇinī 1. 2. 51 suttaṃ passitabbaṃ.

ekavacanameva yathā “kosalesu janapade”ti. **Cārikanti** caraṇaṃ. Caraṇaṃ vā cāro, so eva **cārikā**. Tayidaṃ maggagamaṇaṃ idhādhippetāṃ, na cuṇṇikagamaṇamattanti āha “**addhānagamaṇaṃ gacchanto**”ti. Taṃ vibhāgena dassetuṃ “**cārikā ca nāmesā**”ti-ādi vuttaṃ. Tattha **dūrepīti** dūrepi nātidūrepi. **Sahasā gamaṇanti** sīghagamaṇaṃ.

Mahākassapapaccuggamaṇādīsūti ādi-saddena āḷavakādīnaṃ atthāya gamaṇaṃ saṅgaṇhāti. Bhagavā hi mahākassapatheraṃ paccuggacchanto muhuttana tigāvutamaggamaṇaṃ. Āḷavakassatthāya tiṃsayojanaṃ, tathā aṅgulimālassa, pukkusātissa pana pañcattālīsayaṇaṃ, mahākappinassa vīsayaṇasataṃ, dhaniyassatthāta sattayoṇasatāni, dhammasenāpatino saddhivihārikassa vanavāsissa tissasāmaṇerassa tigāvutādhikaṃ vīsayaṇasataṃ agamaṇi. **Imaṃ sandhāyāti** imaṃ aturitacārikaṃ sandhāya.

Upalabhimsūti ettha savanavasena upalabhimsūti imamatthaṃ dassento “**sotadvāra -pa- jānimsū**”ti āha. Sabbampi vākyāṃ avadhāraṇaphalattā antogadhāvadhāraṇanti āha “**padapūraṇamatte vā nipāto**”ti.

Avadhāraṇatthenāti pana iminā iṭṭhatthato vadhāraṇatthaṃ kho-saddaggaṇanti dasseti. **Assosīti** padaṃ kho-sadde gahite tena phullitamaṇḍitavibhūsitāṃ viya hontaṃ pūritaṃ nāma hoti, tena ca purimacchimapadāni saṃsiliṭṭhāni nāma honti, na tasmim aggahiteti āha “**padapūraṇena byañjanasiliṭṭhatāmattamevā**”ti. **Mattasaddo** visesanivatti-attho. Tenassa anantantaratīpanatā dassitā hoti, **evasaddena** pana byañjanasiliṭṭhatāya ekantikatā.

Samitapāpattāti accantaṃ anavasesato savāsaṇaṃ samitapāpattā. Evaṃ hi bhāhirakavītarāgasekkhāsekkhapāpasamaṇato bhagavato pāpasamaṇaṃ visesitaṃ hoti. Tenassa yathābhūtaguṇādhigatameṇaṃ nāmaṃ yadidaṃ samaṇoti dīpeti. Anekathattā nipātānaṃ idha anussavatto adhippetoti āha “**khalūti anussavatte nipāto**”ti. **Ālapanamattanti** piyāḷapavacanamatthaṃ. Piyasamudāhārā hete “bho”ti vā “āvuso”ti vā “devānaṃ piyā”ti vā. **Gotthavasenāti** ettha gaṃ tāyatīti gottaṃ. Gotamoti hi pavattamaṇaṃ vacanaṃ buddhiṇca tāyati ekaṃsikkavisayatāya rakkhatīti gottaṃ. Yathā hi buddhi āramaṇabhūtena

atthena vinā na vattati, tathā abhidhānaṃ abhidheyyabhūtena, tasmā so gottasaṅkhāto attho tāni tāyati rakkhatīti vuccati. Ko pana soti? Aññakulaparamparāsādhāraṇaṃ tassa kulassa ādipurisasamudāgataṃ taṃkulapariyāpannasādhāraṇaṃ sāmāññarūpanti daṭṭhabbaṃ. Ettha ca **samaṇoti** iminā parikkhakajanehi bhagavato bahumatabhāvo dassito samitapāpatākittanato. **Gotamoti** iminā lokiyajanehi uccākulasambhūtā dīpitā tena uditoditavipulakhattiyakulavibhāvanato. Sabbakhattiyānaṃ hi ādibhūtamahāsammatamahārājato paṭṭhāya asambhinnaṃ uḷāratamaṃ sakyarājakulaṃ.

Kenaci pārijuññenāti nātipārijuññabhogapārijuññādinā kenacipi pārijuññena pārihāniyā **anabhibhūto** anajjhotthaḥo. Tathā hi tassa kulassa na kiñci pārijuññaṃ lokanāthassa abhijātiyaṃ, atha kho vaḍḍhiyeva. Abhinikkhamane ca tatopi samiddhatamabhāvo loke pākaḥo paññātoti. **Sakyakulā pabbajitoti** idaṃ vacanaṃ bhagavato saddhāpabbajitabhāvadīpanaṃ¹ vuttaṃ mahantaṃ nātiparivaṭṭaṃ mahantañca bhogakkhandaṃ pahāya pabbajitabhāvasiddhito.

Itthambhūtākhyānattheti itthaṃ evaṃpakāro bhūto jātoti evaṃ kathanatthe. **Upayogavacananti** “abbhuggato”ti ettha abhi-saddo itthambhūtākhyānatthajotako, tena yogato “taṃ kho pana bhavantaṃ”ti idaṃ sāmi-atthe upayogavacanaṃ. Tenāha “**tassa kho pana bhoto gotamassāti attho**”ti. **Kalyāṇaguṇasamannāgatoti** kalyāṇehi guṇehi yutto, tannissito tabbisayatāyāti adhippāyo. **Setṭhoti** etthāpi eseva nayo. Kittetabbato kitti, sa eva saddanīyato saddoti āha “**kittisaddoti kittiyevā**”ti. Abhitthavanavasena pavatto saddo **thutighoso**. **Sadevakaṃ lokaṃ ajjhottharivā uggatoti** anaññasādhāraṇe guṇe ārabba pavattatā sadevakaṃ lokaṃ ajjhottharivā abhibhavitvā uggato.

So bhagavāti yo so samatīmsa pāramiyo pūretvā sabbakilese bhañjitvā anuttaraṃ sammāsambodhiṃ abhisambuddho devānaṃ

1. Saddhāpabbajitabhāvadīpanatthaṃ (Sārattha-Ṭī 1. 214 piṭṭhe)

atidevo sakkānaṃ atisakko brahmānaṃ atibrahmā lokanātho bhāgyavantatādīhi kāraṇehi sadevake loke “bhagavā”ti patthaṭakittisaddo, so bhagavā. “Bhagavā”ti ca idaṃ satthu nāmakittanaṃ. Tenāha āyasmā dhammasenāpati “bhagavāti netāṃ nāmaṃ mātarākatan”ti-ādi¹. Parato pana **bhagavāti** guṇakittanaṃ. Yathā kammaṭṭhānikena “arahan”ti-ādīsu navasu ṭhānesu paccemaṃ **iti**-saddaṃ yojetvā buddhaguṇā anussarīyanti, evaṃ buddhaguṇasaṃkittanenaṃpīti dassento “**itipi araham itipi sammāsambuddho -pa- itipi bhagavā**”ti āha. “Itipetaṃ bhūtaṃ itipetaṃ tacchan”ti-ādīsu² viya idha **iti**-saddo āsannaṃpaccakkhakarāṇattho, **pi**-saddo sampiṇḍanaṭtho, tena ca tesam guṇānaṃ bahubhāvo dīpito, tāni ca saṃkittentena viññūnā cittaṃ sammukhībhūtāneva katvā saṃkittetabbānīti dassento “**iminā ca iminā ca kāraṇenāti vuttaṃ hoti**”ti āha. Evaṃ nirūpetvā kittento yo kitteti, tassa bhagavati ativiya abhippasādo hoti.

Ārakattāti suvidūrattā. **Arīnanti** kilesārīnaṃ. **Arānanti** saṃsāracakkassa arānaṃ. **Hatattā**ti viddhamsitattā. **Paccayādīnanti** cīvarādīpaccayānañceva pūjāvīsesānañca. **Tatoti** visuddhimaggato³. Yathā ca visuddhimaggato, evaṃ taṃsaṃvaṇṇanātopi⁴ nesaṃ vitthāro gahetabbo.

Imaṃ lokanti nayidaṃ mahājanassa sammukhamattaṃ sandhāya vuttaṃ, atha kho anavaśesaṃ pariyādāyāti dassetuṃ “**sadevakan**”ti-ādi vuttaṃ. Tenāha “**idāni vattabbaṃ nidasseti**”ti. **Pajātattā**ti yathāsakaṃ kammakilesehi nibbattattā. **Pañcakāmāvacaradevaggahaṇaṃ** pārisesaṇayena itaresaṃ padantarena gahitattā. **Sadevakanti** ca avayavena viggaho samudāyo samāsatto. **Chaṭṭhakāmāvacaradevaggahaṇaṃ** paccāsattinayena. Tattha hi so jāto tannivāsī ca. **Sabrahmakavacanena brahmakāyikābrahmaggahaṇanti** etthāpi eseṃ nayo. **Paccatthikasamaṇabrāhmaṇaggahaṇanti** nidassanaṃmattametaṃ apaccatthikānaṃ samitabāhitapāpānañca samaṇabrāhmaṇānaṃ samaṇabrāhmaṇavacanena gahitattā. Kāmaṃ “sadevakan”ti-ādivīsesanānaṃ vasena sattavisayo lokasaddoti viññāyati

1. Khu 7. 162 piṭṭhe.

2. Dī 1. 3 piṭṭhe.

3. Visuddhi 1. 192 piṭṭhe.

4. Visuddhi-Tī 1. 224, 225 piṭṭhesu.

tulyayogagisayattā tesam, “salomako sapakkhako”ti-ādīsu pana atulyayogepi
 ayam samāso labbhatīti byabhicāradassanato pajāgahaṇanti āha
“pajāvacanena sattalokaggahaṇan”ti.

Arūpino sattā attano āneñjavihārena viharantā dibbantīti devāti imam
 nibbacanam labhantīti āha **“sadevakaggahaṇena arūpāvacaraloko gahito”**ti.
 Tenāha “ākāsānañcāyatanūpagānam devānam saḥabyatan”ti¹.

Samārakaggahaṇena chakāmāvacaradevaloko gahito tassa savisesam
 mārassa vase vattanato. **Sabrahmakaggahaṇena rūpībrahmaloko gahito**
 arūpībrahmalokassa gahitattā. **Catuparisavasenāti**
 khattiyādicatuparisavasena. Itarā pana catasso parisā samārakādiggahaṇena
 gahitā evāti. **Avasesasattaloko** nāgagaruḷādibhedo. **Tihākārehīti**
 devamārabrahmasahitatāsankhātehi tīhi pakārehi. **Tīsu padesūti**
 “sadevakan”ti-ādīsu tīsu padesu. **Tena tenākārenāti** sadevakattādinā tena
 tena pakārena. **Tedhātukameva pariyādinnanti** porāṇā āhūti yojanā.

Abhiññāti yakāralopenāyam niddeso, abhijānitvāti ayamettha atthoti āha
“abhiññāya adhikena ñāṇena ñātvā”ti. **Anumānādipaṭikkhepoti** anumāna-
 atthāpatti-ādippaṭikkhepo ekappamāṇattā. Sabbattha appaṭihatañāṇacāratāya
 hi sabbapaccakkhā buddhā bhagavanto.

Anuttaram vivekasukhanti phalasarāpattisukham. Tena vimissāpi²
 kadāci bhagavato dhammadesanā hotīti **“hitvāpi”**ti **pi-saddaggahaṇam**.
 Bhagavā hi dhammam desento yasmim khaṇe parisā sādhuḥkāram vā deti,
 yathāsutam vā dhammam paccavekkhati, tam khaṇam pubbhāgena
 paricchinditvā phalasarāpattim samāpajjati, yathāparicchedañca samāpattito
 vuṭṭhāya ṭhitaṭṭhānato paṭṭhāya dhammam deseti. **Appam vā bahum vā**
desentoti ugghaṭitaññussa vasena appam vā, vipañcitaññussa neyyassa vā
 vasena bahum vā desento. Dhammassa kalyāṇatā ca niyyānikatā ca sabbaso
 anavajjabhāvenevāti āha **“anavajjameva katvā”**ti.

1. Am 1. 270 piṭṭhe.

2. Vīthimissāpi (Sārattha-Ṭī 1. 323 piṭṭhe)

Desakāyattena āṇādividhinā atisaḷḷanaṃ pabodhanaṃ desanāti sā pariyattidhammasena vedittabbāti āha “**desanāya tāva cātuppādikagāthāyapī**”ti-ādi. Nidānanigamanānīpi satthu desanāya anuvidhānato tadantogadhāni evāti āha “**nidānaṃ ādi, idamavocāti pariyoṣānaṃ**”ti.

Sāsittabbapuggalagatena yathāparādhādisāsittabbabhāvena anusāsanāṃ tādāṅgavinayādivasena vinayanaṃ sāsanaṃ taṃ paṭipattidhammasena vedittabbanti āha “**sīlasamādhivipassanā**”ti-ādi. **Kusalānanti** anavajjadharmānaṃ sīlasamādhivipassanānaṃ sīladiṭṭhinaṅca ādibhāvo taṃmūlikattā uttarimanussadharmānaṃ. Ariyamaggassa antadvayavigamena majjhimāpaṭipadābhāvo viya sammāpaṭipattiyā ārabhā nibbattānaṃ vemajjhatāpi majjhabhāvoti vuttaṃ “**atthi bhikkhave -pa-majjhimaṃ nāma**”ti. **Phalaṃ pariyoṣānaṃ nāma** sa-upādisesatāvasena. **Nibbānaṃ pariyoṣānaṃ nāma** anupādisesatāvasena. Idāni tesāṃ dvinnampi sāsanaṃ pariyoṣānaṃ āgamena dassetuṃ “**tasmātiha tvan**”ti-ādi vuttaṃ. “Sātthaṃ sabyañjanaṃ”ti-ādivacanato dhammadesanāya ādimajjhāpariyoṣānaṃ adhippetanti āha “**idha -pa- adhippetan**”ti. Tasmim̐ tasmim̐ atthe kathāvadhisaddappabandho gāthāvasena suttavasena ca vavattito pariyattidhammo, so idha desanāti vutto, tassa pana attho viśesato sīlādi evāti āha “**bhagavā hi dhammaṃ desento -pa- dasseti**”ti. Tattha **sīlaṃ dassetvāti** sīlaggaḥena sasambhāraṃ sīlaṃ gahitaṃ, tathā maggaḥena sasambhāro maggoti tadubhayavasena anavasesato pariyatti-atthaṃ pariyādāya tiṭṭhati. **Tenāti** sīlādidassanaṃ. Atthavasena hi idha desanāya ādikalyāṇādibhāvo adhippeto. **Kathikasaṅṅhitīti** kathikassa saṅṅhānaṃ kathanavasena samavattānaṃ.

Na so sātthaṃ deseti niyyānatthavirahato tassā desanāya. **Ekabyañjanādiyuttā vāti** sithilādibhedesu byañjanesu ekappaḥāreṇa dvippaḥāreṇa vā byañjanaṃ yuttā damiḷabhāsā viya. Vīvaṭakaraṇatāya oṭṭhe aphaṣāpetvā uccāretabbato **sabbanīroṭṭhabyañjanā vā** kirātabhāsā viya. Sabbasseva¹ viśajjanīyayuttatāya

1. Sabbattheva (Sārattha-Tī 1.327 piṭṭhe)

sabbavissaṭṭhabyañjanā vā yavanabhāsā viya. Sabbasseva sānusāratāya **sabbaniggahitabyañjanā vā** pārasikādi¹milakkhabhāsā viya. Sabbāpesā byañjanekadesavaseneva pavattiyā aparipuṇṇabyañjanāti katvā “**abyañjanā**”ti vuttā.

Ṭhānakaraṇāni sithilāni katvā uccāretabbaṃ akkharaṃ pañcasu vaggesu paṭhamatatiyanti evamādi **sithilaṃ**. Tāni asithilāni katvā uccāretabbaṃ akkharaṃ vaggesu dutiyacatuṭṭhanti evamādi **dhanitaṃ**. Dvimattakālaṃ **dīghaṃ**. Ekamattakālaṃ **rassaṃ**. Tadeva lahukaṃ **lahukameva**. Saṃyogaparaṃ dīghaṃca **garukaṃ**. Ṭhānakaraṇāni niggahetvā uccāretabbaṃ **niggahitaṃ**. Parena sambandhaṃ katvā uccāretabbaṃ **sambandhaṃ**. Tathā na sambandhaṃ **vavatthitaṃ**. Ṭhānakaraṇāni vissaṭṭhāni katvā uccāretabbaṃ **vimuttaṃ**. **Dasadhā byañjanabuddhiyā pabhedoti** evaṃ sithilādivasena byañjanabuddhiyā akkharuppādakacittassa dasappaḥkārena pabhedo. Sabbāni hi akkharāni cittasamuṭṭhānāni yathādhippetatthabyañjanato byañjanāni ca.

Amakkhetvāti amilecchetvā avināsetvā, ahāpetvāti attho. Bhagavā yamatthaṃ nāpetuṃ ekagāthaṃ ekavākyampi deseti, tamatthaṃ tāya desanāya parimaṇḍalapadabyañjanāya eva desetīti āha “**paripuṇṇabyañjanameva katvā dhammaṃ deseti**”ti. Idha **kevalasaddo** anavasesavācako, na avomissatādivācakoṭi āha “**sakalādhivacanan**”ti. **Paripuṇṇanti** sabbaso puṇṇaṃ. Taṃ pana kiñci ūnaṃ vā adhikaṃ vā na hotīti “**anūnādhikavacanan**”ti vuttaṃ. Tattha yadatthaṃ desitaṃ, tassa sādhaḥkattā anūnatā veditabbā, tabbidhurassa pana asādhaḥkattā anadhikāṭā. **Sakalanti** sabbabhāgavantaṃ. **Paripuṇṇamevāti** sabbaso paripuṇṇameva. Tenāha “**ekadesanāpi aparipuṇṇā natthi**”ti. **Aparisuddhā desanā nāma hoti** taṇhāsamkilesattā. Lokāmisam cīvarādayo paccayā, tattha agadhitacittatāya **lokāmisamirapekkho**. **Hitapharaṇenāti** hitūpasamharaṇena. **Mettābhāvanāya muduhadayoti** mettābhāvanāya karuṇāya vā muduhadayo. **Ullumpanasabhāvasaṇṭhitenāti** sakalasaṃkilesato vaṭṭadukkhato ca uddharaṇākārāvaṭṭhitena cittena, karuṇādhippāyenāti attho. **Tasmāti**

1. Pādasikādi (Sārattha-Ṭī 1. 327 piṭṭhe)

yasmā sikkhattayasaṅgahaṃ sakalaṃ sāsanaṃ idha brahmacariyanti adhippetam, tasmā. **Brahmacariyanti** iminā samānādhikaraṇāni sabbapadāni yojetvā atthaṃ dassento “**so dhammaṃ deseti -pa- pakāsetīti evamettha attho daṭṭhabbo**”ti āha.

Sundaranti bhaddakaṃ. Bhaddakatā ca passantassa hitasukhāvahabhāvena veditabbāti āha “**atthāvahaṃ sukhāvahan**”ti. Tattha **atthāvahanti** diṭṭhadhammikasamparāyikaparamatthasamhitāhitāvahaṃ. **Sukhāvahanti** yathāvuttatividhasukhāvahaṃ. **Tathānurūpananti** tādisānaṃ. Yādisehi pana guṇehi bhagavā samannāgato, tehi catuppamāṇikassa lokassa sabbathāpi accantappasādanīyo tesam yathābhūtasabhāvattāti dassento “**yathārūpo**”ti-ādimāha. Tattha **yathābhūta -pa- arahatanti** iminā dhammappamaṇālūkhappamaṇānaṃ sattānaṃ bhagavato pasādāvahatā dassitā, itarena itaresaṃ. **Dassanamattampi sādhu hotīti** ettha kosiyavattu kathetabbaṃ. **Ubhatopakkhikāti** micchādiṭṭhisammādiṭṭhivasena ubhayapakkhikā. **Kerāṭikāti** saṭhā.

Anekathattā nipātānaṃ **yāvañcidanti** nipātasamudāyo adhimattappamaṇaparicchedaṃ dīpetīti āha “**adhimattappamaṇapariccheda-vacanametā**”ti. **Adhimattavippasannānīti** adhikappamaṇena vippasannāni. **Vippasannānīti** ca pakati-ākāraṃ atikkamivā vippasannānīti attho. Nanu ca cakkhādīnaṃ indriyānaṃ manoviññeyyattā kathaṃ tena tesam vippasannatā viññāyatīti āha “**tassa hī**”ti-ādi. **Tassāti** brāhmaṇassa. **Tesanti** cakkhādīnaṃ pañcannaṃ indriyānaṃ. Evampi manindriyena patiṭṭhitokāsassa adiṭṭhattā kathaṃ manindriyassa vippasannatā tena viññāyatīti āha “**yasmā panā**”ti-ādi. Nayaggāhapaññā hesā tassa brahmaṇassa. **Mane vippasanneyeva hoti** pasannacittasamuṭṭhitarūpasampadāhi eva cakkhādīnaṃ patiṭṭhitokāsassa pasannatāsambhavato.

Jambonadasuvaṇṇaṃ rattavaṇṇameva hotīti āha “**surattavaṇṇassā**”ti. **Jambonadasuvaṇṇassa ghaṭikāti** jambonadasuvaṇṇapiṇḍaṃ. Iminā **nekkhanti** nekkhappamaṇajambonadasuvaṇṇena kataṃ akatabhaṇḍaṃ vuttanti dasseti. **Nekkhanti** vā atirekapañcasuvaṇṇena katapilandhanaṃ katabhaṇḍaṃ vuttaṃ. Taṃ hi ghaṭṭanamajjanakkhamaṃ hotīti. **Suvaṇṇanti** ca

pañcadharaṇassa samaññā, tasmā pañcavīsati dharaṇahiraññavicitaṃ ābharaṇaṃ idha nekkhanti adhippetā. **Jambonadanti** mahājambusākhāya pavattanadiyaṃ nibbattaṃ. Taṃ kira ratanaṃ rattāṃ. Suvanṇākāre¹ mahājambuphalarase vā pathaviyaṃ pavitthe suvaṇṇaṅkurā utthahanti, tena suvaṇṇena katapilandhanantipi attho. **Suparikammakatanti** suṭṭhu kataparikkammaṃ. **Sampahaṭṭhanti** sammā pahaṭṭhaṃ ghaṭṭanādivasena sukataparikkammaṃ. Tenāha “**suvanṇakāra -pa- suparimajjitanti attho**”ti.

Vālarūpanīti āharimāni vālarūpani. “Akappiyarūpākulo akappiyamañco pallaṅko”ti sārasamāse. **Ratanacitranti**² bhitticchedādivasena ratanacitraṃ. Rukkhatūlalātātūlapoṭakitūlānaṃ vasena **tiṇṇaṃ tūlānaṃ**. Uddalomiyaṃ **kecīti** sārasamāsācariyā uttaravihārino ca. Tathā ekantalomiyaṃ. **Koseyyakaṭṭissamayanti** koseyyakasaṭamayā. **Ajinacammehīti** ajinamigacammehi. Tāni kira cammāni sukhumatarāni. Tasmā dupaṭṭatipaṭṭāni katvā sibbanti. Tena vuttaṃ “**ajinappaveṇī**”ti-ādi.

Nikāmalābhīti yathicchitalābhī. Tenāha “**icchiticchitalābhī**”ti **vipulalābhīti** uḷāralābhī. Kasiranti hi parittaṃ vuccati, tappaṭikkhepena **akasiraṃ** uḷāraṃ. Tenāha “**mahantalābhī**”ti-ādi.

Laddhā ca na kappantīti sāmāññena paṭisiddhattā sabbathā na kappatīti kassaci āsaṅkā siyā, tannivattanatthaṃ “**kiñci kiñci kappatī**”ti-ādimāha. Tattha **suddhakoseyyanti** ratanaparisisbhanarahitaṃ. Ettha ca “suddhakoseyyaṃ pana vaṭṭatī”ti **vinaye**³ vuttattā idhāpi ettakameva vuttaṃ. **Dīghanikāyaṭṭhakathāyaṃ**⁴ **pana** “ṭhapetvā tūlikaṃ sabbāneva gonakādīni ratanaparisisbbitāni na vaṭṭantī”ti vuttaṃ. Tattha “ṭhapetvā tūlikaṃ”ti etena ratanasibbanarahitāpi tūlikā na vaṭṭatīti dīpeti. **vacanatoti** etena **vinaye**⁵ vuttabhāvaṃ dasseti. **Ekena vidhānenāti** yathāvuttameva vidhānaṃ sandhāya vadati. Yadi evaṃ kasmā bhagavatā “laddhā ca na kappantī”ti sāmāññena paṭisedho katoti āha “**akappiyaṃ pana upādāyā**”ti-ādi.

Pallaṅkanti ettha **pari-saddo** samantatoti etasmim atthe vattati, tasmā vāmūruṃ dakkhiṇūruṅca samaṃ ṭhapetvā ubho pāde aññamaññasambandhe

1. Taṃ kira ṭhānaṃ rattasuvanṇakārehi (ka)

3. Vi-Ṭṭha 3. 369 piṭṭhe.

5. Vi 4. 295 piṭṭhe.

2. Vānacittanti (Aṭṭhakathāyaṃ)

4. Dī-Ṭṭha 1. 83 piṭṭhe.

katvā nisajjā pallaṅkanti āha “**samantato ūrubaddhāsanā**”ti. Ūrūnaṃ bandhanavasena nisajjā. **Pallaṅkaṃ ābhujitvā**ti ca yatā pallaṅkavasena nisajjā hoti, evaṃ ubho pāde ābhujje samīñjite katvāti attho. Taṃ pana ubhinnaṃ pādānaṃ tathā sambandhatākaraṇanti āha “**bandhitvā**”ti. **Ujūṃ kāyaṃ paṇidhāyā**ti uparimaṃ sarīraṃ ujukaṃ ṭhapetvā aṭṭhārasa piṭṭhikaṇṭake koṭiyā koṭim paṭipādetvā. Evaṃ hi nisinnassa cammamaṃsaṅhārūni na paṇamanti. Athassa yā tesāṃ paṇamanapaccayā khaṇe khaṇe vedanā uppajjeyyūṃ, tā na uppajjanti. Tāsu anuppajjamānāsu cittaṃ ekaggaṃ hoti, kammaṭṭhānaṃ na paripatati, vuddhiṃ phātim gacchati. Tenāha “**aṭṭhārasa piṭṭhikaṇṭake**”ti-ādi. **Ujūṃ kāyaṃ ṭhapetvā**ti uparimaṃ kāyaṃ ujukaṃ ṭhapetvā, ayameva vā pāṭho. Heṭṭhimakāyassa hi anujukaṭṭhapanāṃ nisajjāvacaṇeneva bodhitanti. **Ujūṃ kāyanti** ettha **kāya-**saddo uparimakāyavisayo.

Parimukhanti ettha **pari-**saddo abhisaddena samānatthoti āha “**kammaṭṭhānābhimukha**”ti, bahiddhā puthuttārammaṇato nivāretvā kammaṭṭhānaṃyeva purakkhitvāti attho. Ettha yathā “vanantaññeva pavisāmī”ti-ādinā bhāvanānurūpaṃ senāsanāṃ dassitaṃ, evaṃ “nisīdāmī”ti iminā alīnānuddhaccapakkiyo santo iriyāpathodassito, “pallaṅkaṃ ābhujitvā”ti iminā nisajjāya daḷhabhāvo, “parimukhaṃ satim upaṭṭhapetvā”ti iminā ārammaṇapariggahūpāyo. **Pariggahitaniyyānanti** sabbathā gahitāsammosaṃ pariccattasammosaṃ satim katvā, paramasatīnepakkaṃ upaṭṭhapetvāti attho. **Parīti pariggahaṭṭho** “pariṇāyikā”ti-ādīsu¹ viya. **Mukhanti niyyānaṭṭho** “suññatavimokkhaṃ”ti-ādīsu²viya. Paṭipakkhato niggamaṇaṭṭho hi niyyānaṭṭho.

Cattāri rūpāvacarajjhānāni dibbabhāvāvahattā dibbavihārā nāma hontīti tadāsannappavattacaṅkamopi tadupacārato dibbo nāma hotīti āha “**cattāri hi rūpajjhānāni**”ti-ādi. **Samāpajjitvā caṅkamantassāti** idaṅca caṅkamantassa antarantarā samāpattim samāpajjitvā utṭhāyutṭhāya caṅkamaṇaṃ sandhāya vuttaṃ. Na hi samāpattim samāpajjitvā avuṭṭhitena sakkā caṅkamituṃ. **Samāpattito vuṭṭhāya caṅkamantassapi caṅkamoti** idaṃ pana samāpattito vuṭṭhahitvā antarantarā samāpajjitvā caṅkamantassa vasena vuttaṃ. **Dvīsu**

1. Abhi 1. 20 piṭṭhe.

2. Khu 9. 231 piṭṭhe.

vihāresūti brāhmavihāre ariyavihāre ca. Mettājhānādayo hitūpasamhāradivasena pavattiyā brahmabhūtā seṭṭhabhūtā vihārāti **brahmavihārā**. Anaññasādhāraṇattā pana ariyānaṃ vihārāti **ariyavihārā**, catassopi phalasarāpattiyā. Idha pana arahattaphalasarāpattiyeva āgatā.

Paccavekkhaṇāya phalasarāpatti kathitā samāpattim samāpajjitvā vuṭṭhitassa paccavekkhaṇāsambhavato. **Caṅkamādayoti** phalasarāpattim samāpānassapi samāpattito vuṭṭhitassapi caṅkamaṭṭhānanisajjādayo. **Ariyacaṅkamādayo honti** na pana paccavekkhantassāti adhippāyo.

Venāgapurasuttavaṇṇanā niṭṭhitā.

4. Sarabhasuttavaṇṇanā

65. Catutthe gijjhā ettha santīti vijjham, kūṭam. Tam etassāti gijjhakūṭo. Gijjho viyāti vā gijjham, kūṭam. Tam etassāti gijjhakūṭo, pabbato. Tasmim **gijjhakūṭe**. Tenāha “**gijjhā vā**”ti-ādi. **Acirapakkantoti** ettha na desantarapakkamaṇaṃ adhippetam, atha kho sāsana-pakkamaṇanti dassento “**imasmim sāsane pabbajitvā**”ti-ādimāha, teneva hi “imasmā dhammavinayā”ti vuttaṃ. Labbhatīti lābho, catunnaṃ paccayānametaṃ adhivacanaṃ. Sakkaccaṃ kātabbo dātābboti sakkāro. Paccayā eva hi paṇitapaṇitā sundarasundarā abhisankharitvā katā sakkārāti vuccanti. Sakkāroti vā sundarakāro, parehi attano gāravakiriyā pupphādīhi vā pūjā. Lābho ca sakkāro ca lābhasakkārā, te naṭṭhā pahīnā etesanti **naṭṭhalābhasakkārā**.

Mahālābhasakkāro uppajjīti tadā kira bhagavato mahālābhasakkāro uppajjī yathā taṃ¹ cattāro asaṅkheyye pūritadānapāramisañcayassa. Sabbadisāsu hi yamakamahāmegho vuṭṭhahitvā mahogho viya sabbapāramiyo “ekasmim attabhāve vipākaṃ dassāmā”ti sampiṇḍitā viya lābhasakkāramahoghaṃ nibbattayimsu. Tato tato annapānayanavatthamālāgandhavigāṇāpanādīhatthā khattiyabrāhmaṇādayo āgantvā “kahaṃ

buddho, kahaṃ bhagavā, kahaṃ devadevo narāsabho purisasīho”ti bhagavantam pariyesanti, sakaṭasatehipi paccaye āharitvā okāsam alabhamānā samantā gāvutappamaṇampi sakaṭadhurena sakaṭadhuram āhacca tiṭṭhanti ceva anubandhanti ca andhakavindabrāhmaṇo¹ viya. Yathā ca bhagavato, evaṃ bhikkhusaṃghassapi. Vuttampi cetam—

“Tena kho pana samayena bhagavā sakkato hoti garukato mānito pūjito apacito lābhī
cīvarapiṇḍapātasenāsanagilānapaccayabhesajjaparikkhārānam,
bhikkhusaṃghopi sakkato hoti -pa- parikkhārānan”ti².

Tathā—

“Yāvātā kho pana cunda etarahi saṃgho vā gaṇo vā loke uppanno, nāhaṃ cunda aññaṃ ekaṃ saṃghampi samanupassāmi evaṃlābhaggayasaggappattam yatharivāyam cunda bhikkhusaṃgho”ti³.

Svāyam bhagavato ca saṃghassa ca uppanno lābhasakkāro ekato hutvā dvinnam mahānadīnam udakam viya appameyyo ahosi, bhagavato pana bhikkhusaṃghassa ca uppanno lābhasakkāro dhammassapi uppanno yeva. Dhammadharānam hi kato sakkāro dhammassa kato nāma hoti. Tena vuttam “**tiṇṇam ratanānam mahālābhasakkāro uppajji**”ti.

Vuttamattham pāliya nidassento “**yathāhā**”ti-ādimāha. Tattha **sakkatoti** sakkārappatto. Yassa hi cattāro paccaye sakkatvā su-abhisankhate paṇītapāṇīte upaneti, so sakkato. **Garukatoti** garubhāva hetūnam uttamaguṇānam matthakappattiyā anaññasādhāraṇena garukārena sabbadevamanussehi pāsāṇacchattam viya garukato. Yasmim hi garubhāvam paccupaṭṭhapetvā paccaye denti, so garukato. **Mānitoti** sammāpaṭipattiyā mānito manena piyāyito. Tāya hi viññūnam manāpatā. **Pūjitoti** mānanādipūjāya ceva catupaccayapūjāya ca pūjito. Yassa hi sabbametaṃ pūjanaṇca karonti, so pūjito. **Apacitoti** nīcavuttikaraṇena apacito. Satthāram hi disvā manussā hatthikkhandhādīhi otaranti, maggam denti, amsakūṭato sāṭakam apanenti,

1. Andhakaviṇhabrāhmaṇo (Ka) 2. Khu 1. 128 piṭṭhe Udāne. 3. Dī 3. 104 piṭṭhe.

āsanato vuṭṭhahanti, vandantīti evaṃ so tehi apacito nāma hoti.

Avanṇaṃ pattharivāti avanṇaṃ tattha tattha saṃkittanavasena pattharivā. **āvaṭṭanimāyanti** āvaṭṭetvā gahaṇamāyaṃ. **Āvaṭṭeti** purimākārato nivatteti attano vase vatteti etāyāti āvaṭṭanī, māyā, taṃ āvaṭṭanimāyaṃ **osāretvā** parijappetvāti attho. **Koṭito patṭhāyāti** antimakoṭito patṭhāya. Thaddhakāyena pharusavācāya tiṇṇaṃ ratanānaṃ avanṇakathanāṃ anathhāvahattā visasiñcanasadisā hotīti āha “**visaṃ siñcivā**”ti. **Aññātoti** aññāto. Tenāha “**ñāto**”ti-ādi.

Kāyaṅganti kāyameva aṅgaṃ, kāyassa vā aṅgaṃ, sīsādi. **Vācaṅganti** “hotu, sādhu”ti evamādivācāya avayavaṃ. **Ekakenāti** asahāyena. **Imassa panatthassāti** “cariyaṃ caraṇakāle”ti-ādinā vuttassa. **Yato yato garu dhuranti** yasmim̐ yasmim̐ ṭhāne dhuraṃ garu bhārikaṃ hoti, aññe balibaddā ukkhipitum̐ na sakkonti. **Yato gambhīravattanīti** vatthanti etthāti vattanī, dummagassetam̐ nāmaṃ, yasmim̐ ṭhāne udakacikkhallamahantatāya vā visamacchinnataṭabhāvena vā maggo gambhīro hotīti attho. **Tadāssu kaṇhaṃ yuñjentīti assūti** nipātamattam̐, tadā kaṇhaṃ yuñjentīti attho. Yadā dhurañca garu hoti maggo ca gambhīro, tadā aññe balibadde apanetvā kaṇhameva yuñjentīti vuttam̐ hoti. **Svāssu** taṃ **vahate dhuranti** etthāpi **assūti** nipātamattameva, so taṃ dhuraṃ vahatīti attho.

Gehavetananti gehe nivuṭṭhabhāvahetu dātabbam̐. **Kāḷako nāma nāmenāti** añjanavaṇṇo kiresa, tenassa “kāḷako”ti nāmaṃ akaṃsu. **Kāḷakaṃ upasaṅkamitvā āhāti** kāḷako kira ekadivasam̐ cintesi “mayham̐ mātā duggatā maṃ puttaṭṭhāne ṭhapetvā dukkhena poseti, yannūnāham̐ bhatim̐ katvā imam̐ duggatabhāvato moceyyan”ti. So tato patṭhāya bhatim̐ upadhārento vicarati. Atha tasmim̐ divase gāmagorūpehi saddhim̐ tattha samīpe carati¹. Sattavāhaputtopi gosuttavittako, so “atthi nu kho etesaṃ gunnaṃ antare sakaṭāni uttāretum̐

1. Samena sevati (Ka) Jātaka-Ṭṭha 1. 210 piṭṭhe passitabbam̐.

samattho usabhājāniyo”ti upadhārayamāno bodhisattaṃ disvā “ayaṃ ājāniyo sakkhissati mayhaṃ sakaṭāni uttāretun”ti aññāsi. Tena taṃ upasaṅkamtivā evamāha. **So aññesaṃ -pa- gehameva agamāsīti** tadā kira gāmadārakā “kiṃ nāmetaṃ kālakassa gale”ti tassa santikaṃ āgacchanti. So te anubandhitvā dūratova palāpento mātu santikaṃ gato. Taṃ sandhāyetaṃ vuttaṃ.

Sāyanhasamayanti sāyanhakāle. Bhummatthe etaṃ upayogavacanaṃ. Na hettha accantasāmyogo sambhavati. **Paṭisallānā vuṭṭhitoti** ettha tehi tehi saddhivihārika-antevāsika-upāsaka-upāsikādisattehi ceva rūpārammaṇādisaṅkhārehi ca paṭinivattetvā apasakkitvā nilīyanaṃ vivecanaṃ kāyacittehi tato vivittatāya paṭisallānaṃ kāyaviveko cittaviveko ca. Yo tato duvidhavivekato vuṭṭhito bhavaṅgappattiyā sabrahmacārīhi samāgamena ca apeto, so paṭisallānā vuṭṭhito nāma hoti. Ayaṃ pana yasmā paṭisallānānaṃ uttamato phalasaṃpattito vuṭṭhāsi, tasmā **“phalasaṃpattito”**ti vuttaṃ. **Kāyasakkhino bhavissāmāti** nāmakāyena desanāsampaṭicchanaśasena sakkhibhūtā bhavissāma. Nanu ca “paññatte āsane nisīdī”ti idaṃ kasmā vuttaṃ. Titthiyā hi bhagavato paṭipakkhā, te kasmā tassa āsanaṃ paññāpentīti āha **“tathāgato hī”**ti-ādi.

Viggāhikakathanti viggāhasaṃvattanikaṃ sārāmbhakathaṃ. **Āyāceyyāsīti** vacībhedāṃ katvā yāceyyāsi. **Pattheyyāsīti** manasā āsiseyyāsi. **Piheyysāsīti** tasseva vevacanaṃ. **Nittejatarā āpannoti** tejahāniyā nittajabhāvaṃ āpanno, nittejabhūtoti attho. Tato eva bhikkhu-ādayopi sammukhā oloketuṃ asamatthatāya **pattakkhandho**, patitakkhandhoti attho. Tenāha **“onataḡivo”**ti. **Dassitadhammesūti** vuttakhammesu. Vacanamattameva hi tesāṃ, na pana dassanaṃ tādisasseva dhammassa abhāvato. bhagavato eva vā “ime dhammā anabhisambuddhā”ti parassa vacanaśasena **dassitadhammesu**. **Paṭicarissatīti**¹ paṭicchādanavase carissati pavattissati², paṭicchādanattho eva vā **carati** saddo anekatthattā dhātūnanti āha **“paṭicchādessatī”**ti.

1. Paṭicarātīti (Ka)

2. Carati pavattati (Ka)

aññaena vā aññanti pana paṭicchādanākāradassananti āha “**aññaena vā vacanenā**”ti-ādi.

Tattha **aññaṃ vacananti** yaṃ samanuyuñjantena bhagavatā parassa dosavibhāvanam vacanam vuttam, tam tato aññaena vacanena paṭicchādeti. “Āpattim āpannosī”ti codakena vuttavacanam viya “ko āpanno kim āpanno, kismim āpanno, kam bhaṇatha, kim bhaṇathā”ti-ādivacanena aññaṃ āgantukakatham āharanto “tvam itthannāmaṃ āpattim āpannosī”ti vuṭṭho “pāṭaliputtam gatomhī”ti vatvā puna “na tava Pāṭaliputtagamanam pucchāma, āpattim pucchāmā”ti vutte tato rājagaham gatomhi. Rājagaham vā yāhi brāhmaṇageham vā, āpattim āpannosīti. “Tattha me sūkaramamsam laddhan”ti-ādini vadanto viya samanuyjakena vuttavacanato aññaṃ āgantukakatham āharanto apanāmessati, vikkhepaṃ gamayissati. Appatītā honti tena atuṭṭhā asomanassikāti **apaccayo**, domanassassetam adhivacanam. Neva attano, na paresam hitam abhirādhayatīti **anabhiraddhi**, domanassameva. Tenevāha “**apaccayena domanassam vuttan**”ti.

Yassa kho pana te atthāya dhammo desitoti ettha dhamma-saddena catusaccadhammo vuttoti āha “**yassa maggassa vā phalassa vā atthāyā**”ti. Catusaccadhammo hi maggaphalādhigamattāya desīyati. **Na niggacchatīti** na pavatteti. **Nanti** nam dhammam. Idāni “yassa kho pana te atthāya dhammo desito”ti ettha dhammasaddena paṭipattidhammo dassito, na pana catusaccadhammoti adhippāyena atthavikappaṃ dassento “**atha vā**”ti-ādimāha. **Pañca dhammāti** gambhīrañāṇacariyabhūtānam khandhādīnam uggahasavanadhāraṇaparicayayonisomanasikāre sandhāyāha. **Takkarassa sammā dukkhakkhayāyāti** ettha **sammāsaddo** ubyayatthāpi yojetabbo “sammā takkarassa sammā dukkhakkhayāyā”ti. Yo hi sammā dhammam paṭipajjati, tasseva sammā dukkhakkhayo hotīti. Yo pana vuttanayena takkaro, tassa niyyānam atthato dhammasseva niyyānanti tappaṭikkhepena “**so dhammo -pa- na niyyāti na niggacchatī**”ti āha.

Yadi tiracchānasīhassa nādo sabbatiracchāna-ekaccamanussāmanussanādato seṭṭhattā seṭṭhanādo, kimaṅgam pana tathāgatasīhassa

nādoti āha “**sīhanādanti seṭṭhanādan**”ti. Yadi vā tiracchānasīhanādassa seṭṭhanādātā nibbhayatāya appaṭisattutāya icchitā, tathāgatasīhanādasseva ayamattho sātisayoti āha “**abhītanādaṃ appaṭinādan**”ti. “Aṭṭhānametaṃ anavakāso”ti adinā¹ hi yo attho vutto, tassa bhūtatāya ayam nādo **seṭṭhanādo** nāma hoti uttamanādo. Bhūtattho hi uttamatthoti. Imamattham pana vadantassa bhagavato aññato bhayaṃ vā āsaṅkā vā natthīti **abhītanādo** nāma hoti. Abhūtaṃ hi vadato kutoci bhayaṃ vā āsaṅkā vā siyā, evaṃ pana vadantaṃ bhagavantaṃ koci uṭṭhahitvā paṭibāhitum samattho nāma natthīti ayam nādo **appaṭinādo** nāma hoti.

Samantato niggaṇhanavasena todanaṃ vijjhanaṃ **sannitodakaṃ**, sammā vā nitudanti pīḷenti etenāti **sannitodakaṃ**. **Vācāyāti** ca paccatte karaṇavacanaṃ². Tenāha “**vacanapatodena**”ti. **Sañjambharikaṃsūti** samantato sambharitaṃ akamsu, sabbe paribbājakā vācātodanehi tudimsūti attho. Tenāha “**sambharitaṃ -pa- vijjhimsū**”ti. **Siṅgālakamaṃyevāti** siṅgālameva, “segālakamaṃyevā”tipi pāṭho. **Tassevāti** siṅgālaravasseva. Atha vā **bheraṇḍakamaṃyevāti** bhedaṇḍasakuṇisadisamaṃyevāti attho. Bhedaṇḍaṃ nāma eko pakkhī dvimukho, tassa kira saddo ativiya virūpo amanāpo. Tenāha “**apica bhinnassaraṃ amanāpasaddaṃ nadati**”ti. Sesamettha uttānameva.

Sarabhasuttavaṇṇanā niṭṭhitā.

5. Kesamuttisuttavaṇṇanā

66. Pañcame kesamuttaṃ nivāso etesanti **Kesamuttiyāti** āha “**Kesamuttanigamavāsino**”ti. **Aṭṭhavidhapānakānīti** ambapānādi-aṭṭhavidhāni pānāni.

“Mā anussavenā”ti-ādīsu pana eko daharakālato paṭṭhāya evaṃ anussavo atthi, evaṃ cirakālakatāya anussutiyā labbhamānaṃ

1. Ma 3. 110; Am 1. 28 piṭṭhesu.

2. Vācāti ca karaṇatthe paccattavacanaṃ (?) Saṃ-Ṭī 2. 197 piṭṭhepi passitabbaṃ.

kathamidaṃ aññathā siyā, tasmā bhūtametanti anussavena gaṇhāti, kathā gahaṇaṃ paṭikkhipanto “**mā anussavenā**”ti āha. Anu anu savanaṃ **anussavo**. Aparo “amhākaṃ pitupitāmahādivuddhānaṃ upadesaparamparāya idamābhataṃ, evaṃ paramparābhatakathaṃ nāma na aññathā siyā tasmā bhūtametan”ti gaṇhāti, taṃ paṭikkhipanto “**mā paramparāyā**”ti āha. Eko kenaci kismiñci vuttamatte “evaṃ kira etan”ti gaṇhāti, taṃ nisedhento “**mā itikirāyā**”ti āha. Piṭakaṃ gantho sampadīyati etassāti piṭakasampadānaṃ, ganthassa uggaṇhanako. Tena piṭaka-uggaṇhanakabhāvena ekacco tādisaṃ ganthaṃ paguṇaṃ katvā tena taṃ samentaṃ sameti, tasmā “bhūtametan”ti gaṇhāti, taṃ sandhāyesa paṭikkhepo “**mā piṭakasampadānenā**”ti, attano uggahagantasampattiyā mā gaṇhitthāti vuttaṃ hoti. **Sametanti**¹ saṃgataṃ.

Koci kañci vitakkento “evameva tena bhavitabban”ti kevalaṃ attano saṅkappavasena “bhūtamidan”ti gaṇhāti, taṃ sandhāyetaṃ vuttaṃ “**mā takkahetū**”ti. Añño “imāha yuttiyā bhūtamidan”ti kevalaṃ anumānato² nayaggāhena gaṇhāti, taṃ paṭikkhipanto “**mā nayahetū**”ti āha. Kassaci “evametaṃ siyā”ti parikappentassa ekaṃ kāraṇaṃ upaṭṭhāti, so “atthetan”ti attano parikappitākārena gaṇhāti, taṃ paṭisedhento “**mā ākāraparivakkenā**”ti āha. Aparassa cintayato yathāparikappitaṃ kañci atthaṃ “evametaṃ na aññathā”ti abhinivisantassa ekā diṭṭhi uppajjati, yā yassa taṃ kāraṇaṃ nijjhāyantassa paccakkhaṃ viya nirūpetvā cintentassa khamati, so “atthetan”ti diṭṭhinijjhānakkhantiyā gaṇhāti, taṃ sandhāyāha “**mā diṭṭhinijjhānakkhantiyā**”ti.

Akusalaverassāti pāṇātipātādipaṇcavidhaṃ veraṃ sandhāya vadati, kodho nāma cetaso dukkhanti āha “**kodhacittassa abhāvenā**”ti. **Kilesassāti** cittaṃ vibādhentassa upatāpentassa uddhaccakukkuccādikilesassa. Sesamettha uttānameva.

Kesamuttisuttavaṇṇanā niṭṭhitā.

1. Idaṃ padaṃ pāḷiyaṃ aṭṭhakathāyañca natthi.

2. Anunayato (Ka)

6. Sālhasuttavaṇṇanā

67. Chaṭṭhe pāto asitabbabhojanam pātarāsam, bhuttam pātarāsam etesanti **bhuttapātarāsā**. **Dāsā** nāma antojātā vā dhanakkītā vā karamarānītā vā sayam vā dāsabyam upagatā. Bhattavetanabhatā **kammakārā** nāma.

Nicchātoti ettha chātam vuccati taṇhā jighacchāhetutāya, sā assa natthīti nicchāto. Tenāha “**nittanho**”ti. **Abbhantare santāpakarānam kilesānanti** attano santāne darathapariḷāhajananena santāpanakilesānam. Antotāpanakilesānam abhāvā sīto sītalo bhūto jātoti **sītibhūto**. Tenāha “**sītālībhūto**”ti. Maggaphalanibbānasukhāni vā paṭisamvedetīti **sukhappaṭisamvedī**. Sesam suviññeyyameva.

Sālhasuttavaṇṇanā niṭṭhitā.

7. Kathāvatthusuttavaṇṇanā

68. Sattame **kathāvatthūnīti** kathāya pavattiṭṭhānāni. Yasmā tehi vinā kathā na pavattati, tasmā “**kathākāraṇānī**”ti vuttam. Atati satati satatam gacchati pavattatīti **addhā**, kāloti āha “**atītamaddhānam nāma kālopi vattatī**”ti. Dhammapavattimattatāya hi paramatthato avijjamānopi kālo tasseva dhammassa pavatti-avatthāvisesam upādāya teneva vohārena atītoti-ādīnā voharīyati, atītādībhedo ca nāmāyam nippariyāyato dhammānamyeva hoti, na kālassāti āha “**khandhāpi vattantī**”ti. Yathāvuttamattham itaresu dvīsu atidisati “**anāgatapaccuppannesupi eseva nayo**”ti. **Atītamaddhānanti-**ādīsu ca dve pariyāyā suttantapariyāyo abhidhammapariyāyo ca. Suttantapariyāyena paṭisandhito pubbe atīto addhā nāma, cutito pacchā anāgato addhā nāma, saha cutipaṭisaddhīhi tadantaram paccuppanno addhā nāma. Abhidhammapariyāyena tīsu khaṇesu uppādato pubbe atīto addhā nāma, uppādato uddham anāgato

addhā nāma, khaṇattayaṃ paccuppanno addhā nāma. Tatthāyaṃ suttantadesanāti suttantapariyāyeneva atītādivisayaṃ katham dassento “**atīte kassapo nāmā**”ti-ādimāha.

Ekamseneva byākātabbo vissajjetabboti **ekamsabyākaraṇīyo**. “Cakkhu aniccan”ti pañhe uttarapadāvadhāraṇaṃ sandhāya “**ekamseneva byākātabban**”ti vuttaṃ niccatāya lesassapi tattha abhāvato, purimapadāvadhāraṇe pana vibhajjabyākaraṇīyatāya. Tenāha “**aniccam nāma cakkhūti puṭṭhena paṇā**”ti-ādi. Cakkhusote visesatthasāmaññatthānaṃ asādhāraṇabhāvato dvinnam tesam sadisacodanā paṭicchannamukheneva byākaraṇīyā paṭikkhepavasena anuññātavasena ca vissajjitabboti āha “**yathā cakkhu, tathā sotam -pa- ayaṃ paṭi pucchābyākaraṇīyo pañho**”ti. **Tam jivam tam sarīranti** jīvasarīraṇaṃ anaññatāpañhe yassa yena anaññatā coditā, so eva paramatthato nupalabbhatīti ca jhānattayassa metteyyatākittanasadisoti abyākātabbatāya **ṭhapanīyo** vutto. Evarūpo hi pañho tidhā avissajjanīyattā byākaraṇaṃ akatvā ṭhapetabbo.

Tiṭṭhati ettha phalam tadāyattavuttitāyāti **ṭhānam**, kāraṇanti āha “**kāraṇākāraṇe**”ti. **Yuttena kāraṇenāti** anurūpena kāraṇena. **Pahotīti** niggaṇhitum samattho hoti. **Sassatavādibhāvameva dīpetīti** attanā gahite ucchedavāde dosam disvā attanopi sassatavādibhāvameva dīpeti. **Puggalavādimhīti** iminā gacchakuttiyavādim dasseti. Pañham pucchantehi paṭipajjitabbā paṭipadā pañhapucchanakānaṃ vuttaṃ.

Paṭicaratīti paṭicchādanavasena carati pavattati. Paṭicchādanatto eva vā carati-saddo anekatthattā dhātūnanti āha “**paṭicchādeti**”ti. **Aññenaññanti** pana paṭicchādanākāradassananti āha “**aññena vacanenā**”ti-ādi. Tattha **aññena vacanenāti** yaṃ codakena cuditakassa dosavibhāvanam vacanam vuttaṃ, tam tato aññena vacanena paṭicchādeti. Yo hi “āpattim āpannosī”ti vutte “ko āpanno, kim āpanno kismim āpanno, kam bhaṇatha, kim bhaṇathā”ti vadati. “Evarūpaṃ kiñcitayā diṭṭhan”ti vutte “na suṇāmī”ti sotam vā upaneti, ayaṃ

aññenaññaṃ paṭicarati nāma. “Ko āpanno”ti-ādinā hi codanaṃ avissajjetvāva vikkhepāpajjanaṃ aññenaññaṃ paṭicaraṇaṃ, bahiddhā kathāpanāmanaṃ vissajjetvāti ayametesam viseso. Tenevāha “**āgantukakathaṃ otārento**”ti-ādi. Tattha **apanāmetīti** vikkhepeti. **Tatrāti** tasmim bahiddhākathāya apanāmane.

Upanisīdati phalaṃ etthāti kāraṇaṃ upanisā, upecca nissayatīti vā upanisā, saha upanisāyāti **sa-upanisoti** āha “**sa-upanissayo sapaccayo**”ti.

Ohitasototi anaññavihitattā dhammassavanāya apanāmitasoto. Tato eva tadatthaṃ **ṭhapitasoto**. **Kusaladhammanti** ariyamaggo adhippetoti āha “**ariyamagga**”ti.

Kathāvatthusuttaṇṇāni niṭṭhitā.

8. Aññatitthiyasuttavaṇṇanā

69. Aṭṭhame bhagavā mūlaṃ karaṇaṃ etesaṃ yāthāvato adhigamāyāti **bhagavarimūlakā**. Tenāha “bhagavantañhi nissāya mayaṃ ime dhamme ājānāma paṭivijjhāmā”ti. **Amhākaṃ dhammāti** tehi attanā adhigantabbatāya vuttaṃ. Sevittabbāsevitabbānaṃ hi yāthāvato adhigamaññāṇāni adhigacchanakasambandhīni, tāni ca sammāsambuddhamūlakāni anaññavisayattā. Tenāha “**pubbe kassapasammāsambuddhenā**”ti-ādi. **Ime dhammāti** ime ñāṇadhammā. **Ājānāmāti** abhimukhaṃ paccakkhato jānāma. **Paṭivijjhāmāti** tasseva vevacanaṃ, adhigacchāmāti attho. Bhagavā netā etesanti **bhagavarinnettikā**. **Netāti** sevittabbadhamme veneyyasantānaṃ pāpetā. **Vinetāti** asevitabbadhamme veneyyasantānato apanetā. Tadaṅgavinayādivasena vā **vinetā**. Atha vā yathā alamariyāñāṇadassanaviseso hoti, evaṃ visesato **netā**. **Anunetāti** “ime dhammā sevittabbā, ime na sevittabbā”ti ubhayasampāpanāpanayanatthaṃ paññāpetā. Tenāha “**yathāsabhāvato**”ti-ādi.

Paṭisaranti etthāti paṭisaraṇaṃ, bhagavā paṭisaraṇaṃ etesanti **bhagavaṃpaṭisaraṇā**. Āpāthaṃ upagacchantā hi bhagavā paṭisaraṇaṃ samosaraṇaṭṭhānaṃ. Tenāha “**catubhūmakadhammā**”ti-ādi. Paṭisarati sabhāvasampaṭivedhavasena paccekaṃ upagacchatīti vā paṭisaraṇaṃ, bhagavā paṭisaraṇaṃ etesanti **bhagavaṃpaṭisaraṇā**. Paṭisarati paṭivijjhatīti vā paṭisaraṇaṃ, tasmā paṭivijjhanavasena bhagavā paṭisaraṇaṃ etesanti **bhagavaṃpaṭisaraṇā**. Tenāha “**apicā**”ti-ādi. **Paṭivedhavasenāti** paṭivijjhitabbatāvasena. Asatipi mukhe atthato evaṃ vadanto viya hotīti āha “**phasso āgacchati ‘ahaṃ bhagavā kinnāmo’**ti” Phasso ñāṇassa āpāthaṃ āgacchantoyeva hi attano “ahaṃ kinnāmo”ti nāmaṃ pucchanto viya, bhagavā cassa nāmaṃ karonto viya hoti.

Paṭibhātūti ettha paṭisaddāpekkhāya “bhagavantāna”ti upayogavacanānaṃ, attho pana sāmivavanavaseneva vedittabboti dassento āha “**bhagavato**”ti. **Paṭibhātūti** ca bhāgo hotu. Bhagavato hi esa bhāgo, yadidaṃ dhammassa desanā, amhākaṃ pana bhāgo savananti adhippāyo. Evaṃ hi saddalakkhaṇena sameti. Keci pana **paṭibhātūti** padassa dissatūti atthaṃ vadanti, ñāṇena dissatu, desīyatūti vā attho. **Upaṭṭhātūti** ñāṇassa paccupatiṭṭhatu. Pāliyaṃ **ko adhippayāsoti** ettha ko adhippayogoti attho.

Lokavajjavasenāti lokiyajanehi pakatiyā garahitabbavajjavasena. **Vipākavajjavasenāti** vipākassa apāyasaṃvattanikavajjavasena. **Kathanti-**ādinā ubhayavajjavasenapi appasāvajjatāya visayaṃ dasseti. Sesamettha suviññeyyameva.

Aññatitthiyasuttavaṇṇanā niṭṭhitā.

9. Akusalamūlasuttavaṇṇanā

70. Navame lubbhatīti **lobho**. Dussatīti **doso**. Muyhatīti **moho**. Lobhādīni panetāni asahajātānaṃ pāṇātipāyādīnaṃ kesañci akusalānaṃ upanissayapaccayaṭṭhena, satajātānaṃ adinnādānādīnaṃ

kesaṅci sampayuttā hutvā uppādakaṭṭhena, sayam ca akusalānīti sāvajjadukkhavipākaṭṭhenāti āha “**akusalānaṃ mūlāni, akusalāni ca tāni mūlāni**”ti. Vuttampi cetam “ratto kho āvuso rāgena abhibhūto pariyādinnaṅcitto pāṇampi hanatī”ti-ādi. **Yadapīti** līṅgavipallāsena vuttanti āha “**yopi bhikkhave lobho**”ti. **Tadapīti** etthāpi eseva nayoti āha “**sopi akusalamūlan**”ti. Vināpi līṅgavipallāsena atthayojanaṃ dassento “**akusalamūlan vā**”ti-ādimāha. **Sabbatthāti** “yadapi bhikkhave doso, tadapi akusalamūlan”ti-ādīsu. **Abhisankharotīti** ettha **āyūhatīti** attham vatvā taṅca āyūhanaṃ paccayasamavāyasiddhito sampiṇḍanaṃ rāsikaraṇaṃ viya hotīti āha “**sampiṇḍeti rāsiraṃ karotī**”ti.

Pāḷiyam “vadhenā”ti-ādīsu **vadhenāti** māraṇena vā pothanena vā. **Vadhasaddo** hi himsanattho viheṭṭhanattho ca hoti. **Bandhanenāti** addubandhanādinā. **Jāniyāti** dhana jāniyā, “sataṃ gaṇhatha, sahasaṃ gaṇhathā”ti evam pavattitadaṇḍenāti attho. **Garahāyāti** pañcasikhamuṇḍakakaraṇaṃ gomayasiñcanaṃ gīvāya kuraṇḍakabandhananti evamādīni katvā garahapāpanena. Tattha **pañcasikhamuṇḍakakaraṇaṃ** nāma kākapaṅkhaṅkaraṇaṃ. **Gomayasiñcanaṃ** sīsena kaṇḍakāvasecanaṃ. **Kuraṇḍakabandhanaṃ** gaddulabandhanaṃ.

Kālasimā na vadatīti yuttakāle na vadati, vattabbakālassa pubbe vā pacchā vā ayuttakāle vattā hoti. **Abhūtavādīti** yaṃ natthi, tassa vattā. Tenāha “**bhūtaṃ na vadatī**”ti. **Atthaṃ na vadatīti** kāraṇaṃ na vadati, akāraṇanissitaṃ nipphalaṃ vattā hoti. **Dhammaṃ na vadatīti** sabhāvaṃ na vadati, asabhāvaṃ vattā ayathāvādīti attho. **Vinayaṃ na vadatīti** saṃvaravinayaṃ na vadati, na saṃvaravinayappaṭisaṃyuttassa vattā hoti, attano suṇantassa ca na saṃvaravinayāvahassa vattāti attho.

Atacchanti abhūtatthaṃ. Tenāha “**itaraṃ tasseva vevacanaṃ**”ti. Atha vā **abhūtanti** asantaṃ avijjamānaṃ. **Atacchanti** atathākāraṃ.

Puñṇakammato eti uppajjatīti ayo, vaḍḍhi. Tappaṭikkhepena **anayo**, avaḍḍhīti āha “**anayaṃ āpajjatīti avaḍḍhiṃ āpajjatī**”ti. **Māluvāsipāṭikā** nāma dīghasaṅgāhānaṃ māluvāpakkam, māluvāphalapoṭṭhalikāti

attho. **Phalitāyāti** ātapena sussitvā bhinnāya. **Vaṭarukkhādīnaṃ mūleti** vaṭarukkhādīnaṃ samīpe. **Sakabhāvena saṅṭhātuṃ na sakkontīti** kasmā na sakkonti? Bhavanavināsabhayā. Rukkhamūle patitamāluvābījato hi latā uppajjitvā rukkhaṃ abhiruhati, sā mahāpattā ceva bahupattā ca mahākolirapattasaṅṭhānehi¹ tato ca mahantatarehi sākḥāviṭapantarehi pattehi samannāgatā. Atha naṃ rukkhaṃ mūlato paṭṭhāya vinandhamānā sabbaviṭapāni sañchādetvā mahantaṃ bhāraṃ janetvā tiṭṭhati, sā vāte vāyante deve vā vassante oghanahetṭhāgatā olambandanatubhūtaṃ ghanabhāvaṃ janetvā tassa rukkhasa sabbasākhaṃ bhijjati, bhūmiyam nipātetī. Tato tasmim rukkhe patiṭṭhitavimānaṃ bhijjati vinassati. Iti tā devatāyo bhavanavināsabhayā sakabhāvena saṅṭhātuṃ na sakkonti. Ettha ca yaṃ sākhaṭṭhakavimānaṃ hoti, taṃ sākḥāsu bhijjamānāsu tattha tattheva bhijjitvā sabbasākḥāsu bhinnāsu sabbaṃ bhijjati, rukkhaṭṭhakavimānaṃ pana yāva rukkhasa mūlamattampi tiṭṭhati, tāva na nassatīti veditabbaṃ. **Tattha tattha palujjitvāti** tattha tattha bhijjitvā. Sesamettha suviññeyyameva.

Akusalamūlasuttavaṇṇanā niṭṭhitā.

10. Uposathasuttavaṇṇanā

71. Dasame **tadahūti** ettha tasmim ahanīti atthoti āha “**tasmim ahu uposathe**”ti. Upavasanti etthāti **uposatho**, uposathadivaso. **Upavasantīti** ca sīlena vā anasanena vā khīrasāyanādividhinā vā upetā hutvā vasantīti attho. Uposathadivase hi sāsānikā sīlena, bāhirakā sabbaso āhārassa abhuñjanena khīrasāyanamadhusāyanādividhinā vā upetā hutvā viharanti. So panesa uposathadivaso aṭṭhamicātuddasipannarasibhedena tividho, tasmā sesadvayanivāraṇatthaṃ “**pannarasika-uposathadivase**”ti vuttaṃ. **Vavassaggattheti** vacasāyatthe. **Divasaddo** divāsaddo viya divasapariyāyo, tassa visesanabhāvena vuccamāno divāsaddo savisesena dīpetīti āha “**divasassa**

1. Mahākovilārapattasaṅṭhānehi (?)

divā, majjhanhike kāleti attho”ti. Paṭicchāpetvāti sampaṭicchanaṃ kāretvā. **Vipākaphalenāti** sadisaphalena. **Na mahapphalo** hoti manoduccaritadussīlyena upakkiliṭṭhabhāvato. **Vipākānisamsenāti** udrayaphalena. **Vipākobhāsenāti** paṭipakkhavigamajanitena sabhāvasaṅkhātena vipākobhāsenā. **Na mahā-obhāso** aparisuddhabhāvato. **Vipākavipphārassāti** vipākavepullassa.

Nāhaṃ kvacanīti-ādivacanassa micchābhinivedavasena pavattattā “idaṃ tassa musāvādasmiṃ vadāmi”ti pāḷiyaṃ vuttaṃ, catukoṭīkasuññatādassanavasena pavattaṃ pana ariyadassanamevāti na tattha musāvādo. Vuttaṃ hetam—

“Puna caparaṃ bhikkhave ariyasāvako iti paṭisañcikkhati ‘nāhaṃ kvacani, kassaci kiñcanatasmiṃ, na ca mama kvacani, kismiñci kiñcanatatthī’ti”ādi¹.

Ettha hi catukoṭīkasuññatā kathitā. Kathaṃ? Ariyo² hi **nāhaṃ kvacanīti** kvaci attānaṃ na passati, **kassaci kiñcanatasmiṃ**ti attano attānaṃ kassaci parassa kiñcanabhāve upanetabbaṃ na passati, bhātiṭṭhāne bhātaraṃ, sahāyaṭṭhāne sahāyaṃ, parikkhāraṭṭhāne parikkhāraṃ maññitvā upanetabbaṃ na passatīti attho. **Na ca mama kvacanīti** ettha **mama-saddaṃ** tāva ṭhapetvā kvacani parassa ca attānaṃ kvaci na passatīti ayamattho. Idāni mama-saddaṃ āharitvā “**mama kismiñci kiñcanatatthī**”ti so parassa attānaṃ “mama kismiñci kiñcanabhāvena atthī”ti na passati, attano bhātikaṭṭhāne bhātaraṃ, sahāyaṭṭhāne sahāyaṃ, parikkhāraṭṭhāne parikkhāraṃ kismiñci ṭhāne parassa attānaṃ iminā kiñcanabhāvena upanetabbaṃ na passatīti attho. Evamayaṃ yasmā neva katthaci attānaṃ passati, na taṃ parassa kiñcanabhāve upanetabbaṃ passati. Na katthaci parassa attānaṃ passati, na parassa attānaṃ attano kiñcanabhāve upanetabbaṃ passati, tasmā ayaṃ suññatā catukoṭīkāti veditabbā.

Yasmā pana micchādiṭṭhikānaṃ yāthāvadassanassa asambhavato yathāvuttacatukoṭīkasuññatādassanaṃ na sambhavati, tasmā “natthi mātā, natthi

1. Ma 3. 50 piṭṭhe.

2. Visuddhi 2. 291; Ma-Ṭṭha 4. 43 piṭṭhesupi passitabbaṃ.

pitā”ti-ādivacanam¹ viya micchāgāhavasena “nāham kvacani”ti-ādi vuttanti yutto cettha musāvādasambhavo. **Katthacīti** thāne, kāle vā. Atha “nipphalo”ti kasmā vuttam. “Na mahapphalo”ti saddena hi mahapphalābhāvova jotito, na pana sabbathā phalābhāvoti āha “**byañjanameva hi ettha sāvasesan**”ti-ādi. **Sesapadesupīti** “na mahānisamsō”ti-ādīsupi.

Aṭṭhahi kāraṇehīti—

“Atha kho bhante sakko devānamindo devānam tāvatimsānam bhagavato aṭṭha yathābhucce vaṇṇe payirudāhāsi ‘tam kiṃ maññanti bhonto devā tāvatimsā, yāvañca so bhagavā bahujanahitāya paṭipanno bahujanasukhāya lokānukampāya atthāya hitāya sukhāya devamanussānam, evam bahujanahitāya paṭipannam bahujanasukhāya lokānukampāya atthāya hitāya sukhāya devamanussānam imināpaṅgena samannāgataṃ satthāraṃ neva atītaṃse samanupassāmi, na panetaraḥi aññatra tena bhagavatā”ti—

ādinā **mahāgovindasutte**² vitthāritehi bahujanahitāya paṭipannādīti buddhānubhāvādīpakehi aṭṭhahi kāraṇehi. Atha “navahi kāraṇehī”ti avatvā “aṭṭhahi kāraṇehī”ti kasmā vuttanti āha “**ettha hi -pa- sabbe lokiyalokuttarā buddhaguṇāsāṅgahitā**”ti. Idam vuttam hoti—imasmim sutte “itipi so bhagavā”ti iminā vacanena avisesato sabbepi lokiyalokuttarā buddhaguṇā dīpitā, tasmā tena dīpitaguṇe sandhāya “aṭṭhahi kāraṇehī”ti vuttanti. **Arahanti-ādīhi pāṭiyekkguṇāva niddiṭṭhāti** arahanti-ādīhi ekekehi padehi ekeke guṇāva niddiṭṭhāti attho.

Sahatantikanti pālīdhammasahitam. **Purimanayeneva yojanā kātabbāti** “kiliṭṭhasmim hi kāye pasādhanam pasādhetvā nakkhattam kīlamānā na sobhanti”ti-ādinā nayena yojanā kātabbāti attho.

1. Dī 1. 51 piṭṭhe.

2. Dī 2. 179 piṭṭhe.

Samāghassa anussaraṇaṃ nāma tassa guṇānussaraṇamevāti āha “**aṭṭhannaṃ ariyapuggalānaṃ guṇe anussarati**”ti. **Dve tayo vāre gāhāpitaṃ usumanti** dve tayo vāre uddhanaṃ āropetvā sedanavasena gāhāpitaṃ usumaṃ. **Purimanayeneva yojanā kātabbāti** “kiliṭṭhasmiṃ hi vatthe pasādhanāṃ pasādhetvā nakkhattaṃ kīḷamānā na sobhanti”ti-ādinā nayena yojanā kātabbā.

Pahīnakālato paṭṭhāya -pa- viratāvāti etena pahānahetukā idhādhippetā viratīti dasseti. Kammakkhayakaraṇāṇena hi pāṇātipātadussīlyassa pahīnattā arahanto accantameva tato paṭiviratāti vuccati samucchadavasena pahānaviratīnaṃ adhippetattā. Kiñcāpi pahānaviramaṇānaṃ purimapacchimakālatā natthi, maggadhammaṇaṃ pana sammādiṭṭhi-ādīnaṃ sammāvācādīnaṃ paccayapaccayuppannabhāve apekkhite sahaṇātanampi paccayapaccayuppannabhāvena gahaṇaṃ purimapacchimabhāveneva hotīti gahaṇappavatti-ākārasena paccayabhūtesu sammādiṭṭhi-ādīsū pahāyakadhammesu¹ pahānakiriyāya purimakālavohāro, paccayuppannāsu ca viratīsū viramaṇakiriyāya aparakālavohāro ca hotīti pahānaṃ vā samucchadavasena, viratī paṭippassaddhivasena yojetabbā.

Atha vā pāṇo atipātīyati etenāti **pāṇātipāto**, pāṇaghātahetubhūto dhammasamūho. Ko pana so? Ahirikānottappadosamohavīhimsādayo kilesā. Te hi arahanto ariyamaggena pahāya samugghātetvā pāṇātipātadussīlyato accantameva paṭiviratāti vuccanti kilesesu pahīnesu kilesanimittassa kammaṃ anuppajjanato. **Adinnādānaṃ pahāyāti**-ādīsūpi eseva nayo. **Viratāvāti** avadhāraṇena tassā viratīyā kālādivasena aparīyantataṃ dasseti. Yathā hi aññe samādinnaviratīkāpi anavaṭṭhitacittatāya lābhajīvitādihetu samādānaṃ bhindanti, na evaṃ arahanto, arahanto pana sabbaso pahīnapāṇātipātattā accantaviratā evāti.

Daṇḍanasāṅkhātassa paraviheṭhanassa ca parivaḷḷanabhāvadīpanattham daṇḍasatthānaṃ nikkhepavacananti āha “**parūpaghātathāyā**”ti ādi. **Lajjīti** ettha

1. Upakārakammesu (Ka)

vuttalajjāya ottappampi vuttamevāti daṭṭhabbāṃ. Na hi pāpajigucchanapāputtāsarahitaṃ, pāpabhayaṃ vā alajjanaṃ atthīti. Dhammagarutāya vā arahantānaṃ dhammassa ca attā dhīnattā attādhipatibhūtā lajjāva vuttā, na pana lokādhipati ottappaṃ. “**Dayaṃ mettacittataṃ āpannā**”ti kasmā vuttaṃ, nanu dayā-saddo “adayāpanno”ti-ādīsu karuṇāya pavattatīti? Saccametaṃ, ayaṃ pana dayā-saddo anurakkhaṇatthaṃ antonītaṃ katvā pavattamāno mettāya karuṇāya ca pavattatīti idha mettāya pavattamāno vutto. Mijjati siniyhatīti mettā, mettā etassa atthīti mettaṃ, mettaṃ cittaṃ etassāti mettacitto, tassa bhāvo **mettacittatā**, mettā-icceva attho.

Sabbapāṇabhūtahitānukampīti etena tassā viratiyā pavattavasena apariyantataṃ dasseti. **Pāṇabhūte**ti pāṇajāte. **Anukampakā**ti karuṇāyanakā. Yasmā pana mettā karuṇāya visesapaccayo hoti tasmā vuttaṃ “**tāya eva dayāpannatāyā**”ti. Evaṃ yehi dhammehi pāṇātipātā virati sampajjati, tehi lajjāmettākaruṇādhammehi samaṅgibhāvo dassito.

Parapariggahitassa ādānanti parasantakassa ādānaṃ. Theno vuccati coro, tassa bhāvo **theyyaṃ**, kāmañcetha “lajjī dayāpanno”ti na vuttaṃ, adhikāravasena pana atthato vuttamevāti daṭṭhabbāṃ. Yathā hi lajjādayo pāṇātipātappahānassa visesapaccayā, evaṃ adinnādānappahānassapīti tasmā sāpi pāḷi ānetvā vattabbā. Esa nayo ito paresupi. Atha vā **sucibhūtenā**ti etena hirottappādīhi samannāgamo, ahirikādīnañca pahānaṃ vuttamevāti “lajjī”ti-ādi na vuttanti daṭṭhabbāṃ.

Asetṭhacariyanti asetṭhānaṃ hīnānaṃ, asetṭhaṃ vā lāmakāṃ cariyaṃ, nihīnavuttiṃ methunanti attho. **Brahmaṃ setṭhaṃ ācāraṃ**ti methunaviratimāha. **Ārācārī methunā**ti etena “idhekacco na heva kho mātuḡāmena saddhiṃ dvayaṃdvayasamāpattiṃ samāpajjati, apica kho mātuḡāmassa ucchādanaparimaddanāhāpanasambāhanaṃ sādiyati, so taṃ assādeti, taṃ nikāmeti, tena ca vittiṃ āpajjati”ti-ādina¹ vuttā sattavidhamethunasamyogāpi paṭivirati dassitāti daṭṭhabbāṃ.

1. Am 2. 438 piṭṭhe.

“Saccato thetato”ti-ādīsu¹ viya **theta**-saddo thirapariyāyo, thirabhāvo ca saccavāditāya **ṭhitakathattā** kathāvasena veditabboti āha “**ṭhitakathāti attho**”ti. Na **ṭhitakathoti** yathā haliddirāgādayo anavaṭṭhitasabhāvatāya na **ṭhitā**, evaṃ na **ṭhitā** kathā yassa so na **ṭhitakathoti** haliddirāgādayo yathā kathāya upamā honti, evaṃ yojetabbam. Esa nayo “**pāsāṇalekhāviyā**”ti-ādīsupi. Saddhā ayati pavattati etthāti saddhāyā, saddhāyā eva **saddhāyikā** yathā venayikā. Saddhāya vā ayitabbā **saddhāyikā**, saddheyyāti attho. **Vattabbataṃ āpajjati** visamvādanatoti adhippāyo.

Ekam bhattam ekabhattam, tam etesamatthi **ekabhattikā**, ekasmim divase ekavārameva bhujjanakā. Tayidaṃ rattibhojanenapi siyāti āha “**rattūparatā**”ti. Evampi sāyanhabhojanenapi² siyūṃ ekabhattikāti tadāsaṅkānivattanattham “**viratā vikālabhojanā**”ti vuttam. Aruṇuggamanato paṭṭhāya yāva majjhinhikā ayam buddhānam ariyānam āciṅṇasamāciṅṇo bhojanassa kālo nāma, tadañño vikālo. Aṭṭhakathāyam pana dutiyapadena rattibhojanassa paṭikkhattatā aparāṇho “**vikālo**”ti vutto.

Saṅkhepato “sabbapāpassa karaṇaṃ”ti-ādinayappavattam³ bhagavato sāsanam sacchandarāgappavattito naccādīnam dassanam na anulometīti āha “**sāsanassa ananulomattā**”ti. Attanā payojijyamānam parehi payojāpīyamānaṅca naccam naccabhāvasāmaññato pāḷiyam ekeneva naccasaddena gahitam, tathā gītavāditasaddā cāti āha “**naccananaccāpanādivasenā**”ti. **Ādi**-saddena gāyanagāyāpanavādanavādāpanāni saṅgaṇhāti. Dassanena cettha savanampi saṅgahitam virūpekasesanayena. Ālocanasabhāvatāya vā pañcannam viññāṇānam savanakiriyāyapi dassanasāṅkhepasabbhāvato **dassanā**-icceva vuttam. Avisūkabhūtaṃ gītassa savanam kadāci vaṭṭatīti āha “**visūkabhūtam dassanam**”ti. Tathā hi vuttam paramatthajotikāya **khuddakapāṭhaṭṭhakathāya**⁴ “dhammūpasamhitam gītam vaṭṭati, gītūpasamhito dhammo na vaṭṭati”ti.

1. Ma 1. 10 piṭṭhe.

3. Dī 2. 42; Khu 1. 41 piṭṭhesu.

2. Aparāṇhabhojipi (Dī-Ṭī 1. 123 piṭṭhe)

4. Khuddakapāṭha-Ṭītha 26 piṭṭhe.

Yaṃ kiñcīti ganthitaṃ vā aganthitaṃ vā yaṃ kiñci **pupphaṃ**. **Gandhajātanti** gandhajātiyaṃ. Tassāpi “yaṃ kiñcī”ti vacanato dhūpitassapi adhūpitassapi yassa kassaci vilepanādi na vaṭṭatīti dasseti. **Uccāti** uccasaddena samānattham ekaṃ saddantaram. Seti etthāti **sayanam**. Uccāsayanam mahāsayanañca samaṇasārupperahitaṃ adhippetanti āha “**pamāṇātikantaṃ akappiyattharaṇaṃ**”ti, āsandādi-āsanañcetta sayanena saṅgahitanti daṭṭhabbaṃ. Yasmā pana ādhāre paṭikkhitte tadādhārakiriyā paṭikkhittāva hoti, tasmā “uccāsayanamahāsayanā” icceva vuttaṃ. Atthato pana tadupabhogabhūtanisajjānipajjanehi virati dassitāti daṭṭhabbā. Atha vā “uccāsayanāsanamahāsayanāsanā”ti etasmim atthe ekasesanayena ayaṃ niddeho kato yathā “nāmarūpapaccayā saḷāyatanan”ti¹. Āsanakiriyāpubbakattā vā sayanakiriyāya sayanaggahaṇeneva āsanampi saṅgahitanti veditabbaṃ.

“**Kīvā**”ti ayaṃ nipāto “kittakan”ti imassa attham bodhetīti āha “**kīvamahapphaloti kittakam mahapphalo**”ti. **Sesapadesūti** “kīvamahānisamsa”ti-ādīsu. **Ratta-saddo** ratanapariyāyoti āha “**pahūtarattaratanānanti pahūtena rattasaṅkhātena ratanena samannāgatānan**”ti. Pāḷiyam pana “pahūtasattaratanānan”tipi pāṭho dissati. **Bheritalasadisam katvāti** bheritalam viya samam katvā. **Tato ekam bhāgam na agghatīti** yathāvuttaṃ cakkavattirajjam tato seḷasabhāgato ekam bhāgam na agghati. **Tato bahutaram hotīti** cakkavattirajjasirito bahutaram hoti.

Cātumahārājikānanti-ādīsu **cātumahārājikā** nāma sinerupabbatassa vemajjhe honti, tesu bahū pabbataṭṭhāpi ākāsaṭṭhāpi tesam paramparā cakkavāḷapabbatam pattā, khiḍḍāpadosikā manopadosikā sītavalāhakā uṇhavalāhakā candimā devaputto sūriyo devaputtoti ete sabbe cātumahārājikadevalokaṭṭhakā eva. Tettiṃsa janā tattha uppannāti **tāvatiṃsā**. Apica **tāvatiṃsāti** tesam devānam nānamevāti vuttaṃ. Tepi atthi pabbataṭṭhakā, atthi ākāsaṭṭhakā, tesam paramparā cakkavāḷapabbatam pattā, tathā yāmādīnam.

1. Ma 1. 109; Saṃ 1. 24 piṭṭhesu.

Ekadevalokepi hi devānaṃ paramparā cakkavāḷapabbataṃ appattā nāma natthi. Tattha dibbasukhaṃ yātā payātā sampattāti **Yāmā**. Tuṭṭhā pahaṭṭhāti **Tusitā**. Pakatipaṭiyattārammaṇato atirekena ramitukāmakāle yathārucite bhoge nimminivā nimminivā ramantīti **Nimmānarati**. Cittācāraṃ ṇatvā parehi nimmitesu bhogesu vasaṃ vattentīti **Paranimmitavasavattī**.

Tattha cātumahārājikānaṃ devānaṃ manussagaṇanāya navativassasatasahassāni āyuppamaṇaṃ. Tāvatisānaṃ devānaṃ tisso ca vassakoṭiyo saṭṭhi ca vassasatasahassāni. Yāmānaṃ devānaṃ cuddasa ca vassakoṭiyo cattāri ca vassasatasahassāni. Tusitānaṃ devānaṃ sattapaññāsa ca vassakoṭiyo saṭṭhi ca vassasatasahassāni. Nimmānaratīnaṃ devānaṃ dve ca vassakoṭisatāni tisso ca vassakoṭiyo cattāri ca vassasatasahassāni. Paranimmitavasavattīnaṃ devānaṃ nava ca vassakoṭisatāni ekavīsa koṭiyo ca saṭṭhi ca vassasatasahassāni.

Muṭṭhihatthapādaketi pādatalato yāva aṭaniyā heṭṭhimanto, tāva muṭṭhiratanappamāṇapādake. Tañca kho majjhimassa purisassa hatthena, yassidāni vaḍḍhakīhatthoti samaññā. Silasamādānato paṭṭhāya aññaṃ kiñci akatvā dhammassavanena vā kammaṭṭhānāmanasikārena vā vītināmetabbanti āha “**taṃ pana upavasantena -pa- vicāretabban**”ti.

Vācaṃ bhinditvā uposathaṅgāni samādātabbānīti “imañca rattiṃ imañca divasaṃ”ti kālaparicchedaṃ katvā “uposathaṅgavasena aṭṭha sikkhāpadāni samādiyāmi”ti ekato katvā puna paccekaṃ “pāṇātipātā veramaṇisikkhāpadaṃ samādiyāmi -pa- uccāsayanamahāsayanā veramaṇisikkhāpadaṃ samādiyāmi”ti evaṃ vacībhedaṃ katvā yathāpāḷi samādātabbāni. Pāḷiṃ ajānantena pana attano bhāsāya paccekaṃ vā “buddhapaññattaṃ uposathaṃ adhiṭṭhāmi”ti ekato adhiṭṭhānavasena vā samādātabbāni, aññaṃ alabhantena adhiṭṭhātabbāni. Upāsakasīlaṃ hi attanā samādiyantenapi samādinnaṃ parasantike samādiyantenapi, ekajjhaṃ samādinnaṃpi samādinnaṃveva hoti paccekaṃ samādinnaṃpi. Taṃ pana ekajjhaṃ samādiyato ekāyeva virati ekā cetanā hoti. Sā pana sabbaviraticetanānaṃ kiccakārīti tenapi sabbasikkhāpadāni samādinnaṃveva. Paccekaṃ samādiyato pana nānaviraticetanāyo yathāsakaṃ kiccavasena uppajjanti, sabbasamādāne

pana vacibhedo kātabboyeva. **Parūparodhapaṭisaṃyuttā**
paravihiṃsāsāṃyuttā.

Nanu ca “maṇin”ti vutte veḷuriyampi saṅgahitameva, kimattham pana veḷuriyanti āha “**veḷuriyanti -pa- dasseti**”ti. “Maṇin”ti vatvāva “veḷuriyan”ti iminā jātimaṇibhāvaṃ dasseti yojetabbari. **Ekavassikaveḷuvaṇṇanti** jātito ekavassātikkantaveḷuvaṇṇam. **Laddhakanti** sundaram. **Candappabhā tāraṅgaṇāva sabbeti** yathā candappabhāya kalam sabbe tāraṅgaṇā nānubhavantīti ayamettha atthoti āha “**candappabhāti sāmi-atthe paccattan**”ti.

Uposathasuttavaṇṇanā niṭṭhitā.

Mahāvaggavaṇṇanā niṭṭhitā.

(8) 3. Ānandavagga

1. Channasuttavaṇṇanā

72. Tatiyassa paṭhame **channaparibbājako**ti na naggaparibbājako. **Bāhirakasamayaṃ luñcitvā harantoti** bāhirakānaṃ samayaṃ nisedhetvā āpanno.

Paññācakkhussa vibandhanato andham karotīti **andhakaraṇoti** āha “**yassa rāgo uppajjati**”ti-ādi. **Acakkhukaraṇoti** asamatthasamāsoyaṃ “asūriyapassāni mukhāni”ti-ādīsu viyāti āha “**paññācakkhum na karotīti acakkhukaraṇo**”ti. **Paññānirodhikoti** anuppanāya lokiyalokuttarāya paññāya uppajjitum na deti, lokiyapaññaṃ pana aṭṭhasamāpattipañcābhiññāvasena uppanampi samucchinditvā khipatīti paññānirodhikoti evampettha attho daṭṭhabbo. Anuppanānuppadā-uppanaparihānanimittatāya hi paññaṃ nirodhetīti paññānirodhiko. Vihanahi vibādhatīti **vighāto**, dukkhanti āha “**dukkhasaṅkhātassa vighātassā**”ti. **Kilesanibbānanti** iminā asaṅkhatanibbānameva vadati. Asaṅkhatam hi nibbānaṃ nāma, tam paccakkham kātuṃ na detīti **anibbānasamvattaniko**. **Lokuttaramissako kathito** pubbabhāgiyassapi ariyamaggassa kathitattā.

Channasuttavaṇṇanā niṭṭhitā.

2. Ājīvakasuttavaṇṇanā

73. Dutiye na aññātukāmoti na ājānitukāmoyevāti attho. Tenāha “**pariggaṇhanattham pana āgato**”ti, paññāya paricchinditvā upaparikkhitvā gaṇhanatthanti attho. **Kāraṇāpadesoti** kāraṇaniddeso. Sesamettha uttānameva.

Ājīvakasuttavaṇṇanā niṭṭhitā.

3. Mahānāmasakkasuttavaṇṇanā

74. Tatiye gilānassa bhāvo **gelaññanti** āha “**gilānabhāvato**”ti. **Dīpetīti** desanākkameneva paññāpeti. Paṭhamam hi sekhasīlasamādhipaññāyo vatvā pacchā asekkhasīlādīni vadanto imamattham dīpeti.

Mahānāmasakkasuttavaṇṇanā niṭṭhitā.

4. Nigaṇṭhasuttavaṇṇanā

75. Catutthe **haṃsavatṭakacchannenāti** haṃsavatṭakaparicchannena, haṃsamaṇḍalākārenāti attho. Natthi etassa parisēsanti **aparisesam**. Tenāha “**appamattakampi asesetvā**”ti. Aparisesadhammajānanato vā aparisesasaṅkhātām nāṇadassanam paṭijānātīti evampettha attho daṭṭhabbo. **Satatanti** niccam. **Samitanti** tasseva vevacananti āha “**satatam samitanti sabbakālam nirantaram**”ti. Atha vā niccaṭṭhena **satata**-saddena abhiṇḥappavatti jotitā siyāti “**samitan**”ti vuttam. Tena nirantarappavattim dassetīti āha “**sabbakālam nirantaram**”ti.

Visuddhisampāpanatthāyāti rāgādīhi malehi abhiṇḥāvisamalobhādīhi ca upakkiliṭṭhacittānam sattānam visuddhipāpanatthāya. **Samatikkamanatthāyāti** sokassa ca paridevassa ca pahānatthāya. **Attham gamanatthāyāti** kāyikadukkhassa ca cetasikadomanassassa cāti imesam dvinnam atthaṅgamanāya, nirodhāyāti attho. Nāyati nicchayena kamati nibbānam, tam

vā ñāyati paṭivijjhati etenāti **ñāyo**, ariyamaggoti āha “**maggassa adhigamanatthāyā**”ti. **Apaccayanibbānassa sacchikaraṇatthāyāti** paccayarahitattā apaccayassa asaṅkhatassa taṇhāvānavirahitattā nibbānanti laddhanāmassa amatassa sacchikiriyāya, attapaccakkhatāyāti vuttaṃ hoti. **Phusitva phusitvāti** patvā patvā. Sesamettha suviññeyameva.

Nigaṇṭhasuttavaṇṇanā niṭṭhitā.

5. Nivesakasuttavaṇṇanā

76. Pañcame kiccakaraṇīyesu sahabhāvaṭṭhena amā hontīti **amaccā**. “Ayaṃ ajjhattiko”ti evaṃ jānanti, ñāyanti vāti **ñāti**. **Sassusasurapakkhikāti** sassusasurā ca tappakkhiko ca sassusasurapakkhikā. Lohitena sambaddhāti **sālohitā**. Pitupakkhikā vā **ñāti**, mātupakkhikā **sālohitā**. Mātupitupakkhikā vā **ñāti**, sassusasurapakkhikā **sālohitā**. Avecca ratanassa guṇe yāthāvato ñatvā pasādo **aveccappasādo**. So pana yasmā maggenāgatattā kenaci akampanīyo ca appadhamāsiyo ca hoti, tasmā evaṃ vuttaṃ “**acalappasādo**”ti. **Bhāvaññathattanti** sabhāvassa aññathattaṃ.

Visatiyā koṭṭhāsesūti kesādimatthaluṅgapariyantesu. **Dvādasasu koṭṭhāsesūti** pittādimuttapariyantesu. **Catūsu koṭṭhāsesūti** “yena ca santappati, yena ca jīriyati, yena ca paridayhati, yena ca asitapītakhāyitasāyitaṃ sammā pariṇāmaṃ gacchatī”ti¹ evaṃ vuttesu catūsu koṭṭhāsesu. **Chasu koṭṭhāsesūti** “uddhaṅgamā vātā adhogamā vātā, kucchisayā vātā, koṭṭhāsāyā vātā, aṅgamaṅgānusārino vātā, assāso passāso”ti² evaṃ vuttesu chasu koṭṭhāsesu. **Vitthambhanāṃ** sesabhūtattayasantambhitatāpādanāṃ, “upakīlanā”ti eke. Sesāṃ suviññeyameva.

Nivesakasuttavaṇṇanā niṭṭhitā.

1. Ma 1. 245 piṭṭhe.

2. Ma 1. 246 piṭṭhe.

6. Paṭhamabhavasuttādivaṇṇanā

77-78. Chaṭṭhe **abhisaṅkhāraviññānanti** kammaśahajātaṃ viññāṇaṃ. Sesamettha suviññeyyameva. Sattame natthi vattabbaṃ.

Paṭhamabhavasuttādivaṇṇanā niṭṭhitā.

8. Sīlabbatasuttavaṇṇanā

79. Aṭṭhame **dukkarakārikānuyogoti** dukkarakiriyaṃ anuyogo. **Upaṭṭhānena sāranti** upaṭṭhānākāreṇa sāraṃ. “**idaṃ varan**”ti-ādinā upaṭṭhānākāraṃ vibhāveti. **Etthāti** etasmiṃ satthāro pucchite pañhe.

Sīlabbatasuttavaṇṇanā niṭṭhitā.

9. Gandhajātasuttavaṇṇanā

80. Navame mūle, mūlassa vā gandho **mūlagandhoti** āha “**mūlavatthuto gandho**”ti. Mūlaṃ vatthu etassāti **mūlavatthuko**. Idāni mūlaṃ gandhayogato gandhoti imamatthaṃ dassento “**gandhasampannaṃ vā mūlameva mūlagandho**”ti āha. Pacchimoyevettha attavikappo yuttataroti dassetuṃ “**tassa hi gandho**”ti-ādimāha. **Vassikapupphādīnanti** sumanapupphādīnaṃ.

Gandhajātasuttavaṇṇanā niṭṭhitā.

10. Cūḷanikāsuttavaṇṇanā

81. Dasame **aruṇavatisuttanta-aṭṭhuppattiyanti** “bhūtapubbaṃ bhikkhave rājā ahoṣi aruṇavā nāma. Rañño kho pana bhikkhave aruṇavato aruṇavatī nāma rājamānī ahoṣi. Aruṇavatim kho pana bhikkhave rājadhānim sikhī bhagavā arahaṃ sammāsambuddho upanissāya vihāsi.

Sikhissa kho pana bhikkhave bhagavato arahato sammāsambuddhassa Abhibhūsambhavaṃ nāma sāvakayugaṃ ahosi aggaṃ bhaddayugaṃ. Atha kho bhikkhave sikhī bhagavā araham̐ sammāsambuddho abhibhuṃ bhikkhuṃ āmantesī”ti-ādinā **brahmasaṃyutte**¹ āgataṃ aruṇavatisuttantaṃ aṭṭhuppattiyaṃ. **Atippagoti** ativiya pago, ativiya pātoti attho, na tāva kulesu bhattaṃ niṭṭhātīti vuttaṃ hoti.

Ujjhāyantīti avajjhāyanti, heṭṭhā katvā cintenti, lāmakato cintenti. **Anekavihitaṃ iddhivikubbanam̐ katvāti** “pakativaṇṇam̐ vijahitvā nāgavaṇṇam̐ vā dasseti, supaṇṇavaṇṇam̐ vā dasseti”ti-ādinā² nayena āgataṃ anekappakāram̐ iddhivikubbanam̐ katvā. **Sahassilokadhātunti** cakkavālasahassam̐. **Gāthādvayam̐ abhāsīti** thero kira “katham̐ desitā kho dhammadesanā sabbesaṃ piyā manāpā”ti cintetvā “sabbepi pāsaṇḍā sabbe devamanussā attano attano samaye purisakāram̐ vaṇṇayanti, vīriyassa avaṇṇavādī nāma natthi, vīriyappaṭisaṃyuttaṃ katvā desessāmi. Evamassa dhammadesanā sabbesaṃ piyā bhavissati manāpā”ti ñatvā tisu piṭakesu vicinitvā “ārambhatha nikkamathā”ti³ idaṃ gāthādvayam̐ abhāsī.

Kim̐ āloko ayanti kassa nu kho ayam̐ ālokoti. **Vicinantānanti** cintentānam̐. **Sabbeti** lokadhātuyam̐ sabbe devā ca manussā ca. **Osatāya parisāyāti** dhammassavanattham̐ samosaṭāya parimitaparicchinnāya parisāya. **Atthopi nesam̐ pākaṭo ahosīti** na kevalam̐ te saddameva assosum̐, atha kho atthopi tesam̐ pakatisavanūpacāre viya pākaṭo ahosi. Tena sahasam̐ lokadhātum̐ viññāpetīti adhippāyo.

Pariharantīti sinerum̐ dakkhiṇato katvā parivattenti. **Virocamānāti** attano jutiyā dibbamānā, sobhamānā vā. **Tāva sahasadhā lokoti**⁴ yattako candimasūriyehi obhāsiyamāno lokadhātusaṅkhāto ekeko loko, tatthakena pamāṇena sahasadhā loko⁴, iminā cakkavālena saddhim̐ cakkavālasahassanti attho. **Kasmā panesā ānītāti** esā cūlanikā

1. Saṃ 1. 157 piṭṭhe.

3. Saṃ 1. 158 piṭṭhe.

2. Khu 9. 388 piṭṭhe Paṭisambhidāmagge.

4. Sahassadhātulokoti (Ka)

lokadhātu kasmā bhagavatā ānītā, desitāti attho. **Majjhimikāya lokadhātuyā paricchedadassanattanti** dvisahassilokadhātuyā parimāṇadassanattam.

Sahassilokadhātuyā sahasi dvisahassilokadhātu, sā cakkavāḷagaṇanāya dasasatasahassacakkavāḷaparimāṇā. Tenāha “**sahassacakkavāḷāni sahasabhāgena¹ gaṇetvā**”ti-ādi. Kampanadevatūpasāṅkamanādinā jātacakkavāḷena saha yogakkhamam ṭhānam **jātikkhettam**. Tatthakāya eva jātikkhettabhāvo dhammatāvaseneva veditabbo, “pariggahavasena”ti keci. Sabbesampi buddhānam evam jātikkhettam tannivāsīnamyeva ca devatānam dhammābhisamayoti vadanti. **Paṭisandhiggahaṇā**dinam sattannamyeva gahaṇam nidassanamattam mahābhinihārādikālepi tassa pakampanassa labbhanato.

Sahassam sahasadhā katvā gaṇitam majjhimikanti-ādinā majjhimikāya lokadhātuyā sahasam tisahassilokadhātu, sāyeva ca mahāsahassilokadhātūti dasseti. Saraseneva āṇāpavattanam **āṇākkhettam**, yam ekajjham samvaṭṭati vivaṭṭati ca. **Āṇā pharatīti²** tannivāsīdevatānam sirasā sampaṭicchana vattati, tañca kho kevalam buddhānubhāvene, adhippāyavasena ca pana “yāvata pana ākaṅkheyyā”ti³ vacanato buddhānam avisayo nāma natthi, visayakkhettassa pamāṇaparinchedo nāma natthi. **Visamoti** sūriyuggamanādinam visamabhāvato visamo. Tenevāha “**ekasmim ṭhāne sūriyo uggato hoti**”ti-ādi. Sesamettha suviññeyyameva.

Cūḷanikāsuttavaṇṇanā niṭṭhitā.

Ānandavaggavaṇṇanā niṭṭhitā.

(9) 4. Samaṇavagga

1. Samaṇasuttādivaṇṇanā

82-86. Catutthassa paṭhame sammā ādānam gahaṇam **samādānanti** āha “**samādānam vuccati gahaṇam**”ti. Adhikam visiṭṭham sīlanti **adhisīlam**.

1. Dvisahassabhāgena (Ka)

2. Āṇāpavattīti (Ka)

3. Am 1. 299 piṭṭhe.

Lokiyasīlassa adhisīlabhāvo pariyāyenāti nipariyāyameva taṃ dassetuṃ “**apica sabbampi lokiyasīlan**”ti-ādi vuttaṃ. **Sikkhitabbatoti** āsevitabbato. Pañcapi dasapi vā sīlāni sīlaṃ nāma, pātimokkhasaṃvaro adhisīlaṃ nāma anavasesakāyikacetasikaṃvarabhāvato maggasīlassa padaṭṭhānabhāvato ca. Aṭṭha samāpattiyō cittam, vipassanāpādakajjhānaṃ adhicittam maggasaṃmādhissa adhiṭṭhānabhāvato. Kammassakataññaṃ paññā, vipassanā adhipaññā maggapaññāya adhiṭṭhānabhāvato. Apica nibbānaṃ patthayantena samādinnaṃ pañcasīlaṃ dasasīlampi adhisīlameva nibbānādhigamassa paccayabhāvato. Nibbānaṃ patthayantena samāpannā aṭṭha samāpattiyopi adhicittameva.

Kalyāṇakārī kalyāṇaṃ, pāpakārī ca pāpakaṃ.
Anubhoti dvayameṭaṃ, anubandhaṃ hi kāraṇanti—

evaṃ atīte anāgate ca vaṭṭamūlakadukkhasallakkheṇavasena saṃvegavatthutāya vimutti-ākaṅkhāya paccayabhūtā kammassakatapaññāpi adhipaññāti vadanti. Dutiyatīyacatutthapañcamāni uttānatthāneva.

Samaṇasuttādivaṇṇanā niṭṭhitā.

6. Paṭṭhamasikkhāsuttavaṇṇanā

87. Chaṭṭhe **samattakārī**ti anūnena paripūrena ākārena samannāgato. Sikkhāpadānaṃ khuddānukhuddakattaṃ apekkhāsiddhanti āha “**tatrāpi saṃghādisesaṃ khuddakaṃ**”ti-ādi. **Aṅguttaramahānikāyavaḷaṅjanaka-ācariyā**ti aṅguttaranikāyaṃ pariharantā ācariyā, aṅguttarabhāṇakāti vuttaṃ hoti. **Lokavajjaṃ nāpajjati** lokavajjasikkhāpadānaṃ vītikkamasādhakassa kilesagahanassa sabbaso pahīnattā. **Paṇṇattivajjameva āpajjati** paṇṇattivītikkamaṃ vā ajanatopi āpattisambhavato. **Cittena āpajjanto rūpiyappaṭiggahaṇaṃ āpajjati**ti upanikkhittasādiyane āpajjati.

Brahmacariyassa ādibhūtāni ādibrahmacariyāni, tāni eva **ādibrahmacariyakāni** yathā “vinayo eva venayiko”ti āha “**maggabrahmacariyassa**”ti-ādi. **Cattāri mahāsīlasikkhāpadāni**ti cattāri pārājikāni

sandhāya vadati. Paṭipakkhadhammānaṃ anavasesato savanato paggharaṇato soto, ariya maggoti āha “**sotasāṅkhātena maggenā**”ti. Vinipātetī virūpaṃ sadukkhaṃ sa-upāyāsaṃ nipātetīti vinipāto, apāyadukkhe khipanako. **Dhammoti** sabhāvo. Nāssa vinipāto dhammoti **avinipātaḍḍhammo**, na attānaṃ apāyesu vinipātanasabhāvoti vuttaṃ hoti. Kasmā? Ye dhammā apāyagamaṇīyā, tesam pahīnattā. Tenāha “**avinipātaḍḍhammoti catūsu apāyesu apatanasabhāvo**”ti. Tattha **apatanasabhāvoti** anuppajjanasabhāvo. **Sotāpattimaggaṇiyāmena niyatoti** uparimaggādhigamassa avassambhāvībhāvato niyato. Tenevāha “**sambodhiparāyaṇo**”ti. Heṭṭhimantato sattamabhavato upari anuppajjanadhammatāya vā **niyato**. Sambujjhatīti sambodhi, ariyamaggo. So pana paṭhamamaggassa adhigatattā avasiṭṭho ca adhigantabbabhāvena icchitabboti uparimaggattayasāṅkhātā sambodhi paraṃ ayanam parā gati assāti **sambodhiparāyaṇo**. Tenāha “**uparimaggattayasambodhiparāyaṇo**”ti.

Tanubhāvāti pariyuṭṭhānamandatāya ca kadāci karahaci uppattiyā ca tanubhāvena. Tanuttaṃ hi dvīhi kāraṇehi veditabbaṃ adhiccuppattiyā ca pariyuṭṭhānamandatāya ca. Sakadāgāmissa hi vaṭṭānusārimahājanassa viya kilesā abhiṇhaṃ na uppajjanti, kadāci karahaci uppajjanti viraḷākārā hutvā viraḷavāpīte khetto aṅkurā viya. Uppajjamānāpi ca vaṭṭānusārimahājanasseva maddantā pharantā chādentā andhakāraṃ karontā na uppajjanti, mandamandā uppānanti tanukākārā hutvā abbhapaṭalamiva makkhikāpattamiva ca. Tattha keci therā bhaṇanti “sakadāgāmissa kilesā kiñcāpi cirena uppajjanti, bahalāva uppajjanti. Tathā hissa puttā ca dhītarō ca dissantī”ti. Etaṃ pana appamāṇam. Puttadhītarō hi aṅgapaccāṅgaparāmasanamattenapi hontīti. Dvīhiyeva kāraṇehissa kilesānaṃ tanuttaṃ veditabbaṃ adhiccuppattiyā ca pariyuṭṭhānamandatāya cāti.

Heṭṭhābhāgiyānanti ettha **heṭṭhāti** mahaggatabhūmito heṭṭhā, kāmabhūmiyanti attho. Tesam paccayabhāvena heṭṭhābhāgassa hitāti heṭṭhābhāgiyā, tesam heṭṭhābhāgiyānaṃ, heṭṭhābhāgassa kāmabhavassa paccayabhāvena gahitānanti attho. Saṃyojenti bandhanti

khandhagatibhavādīhi khandhagatibhavādayo, kammaṃ vā phalenāti **saṃyojanānīti** āha “**saṃyojanānanti bandhanānan**”ti.

Asamucchinnarāgādikassa hi etarahi khandhādīnaṃ āyatim khandhādīhi sambandho, samucchinnarāgādikassa pana taṃ natthi, katānampi kammānaṃ asamatthabhāvāpattito rāgādīnaṃ anvayato byabhirekato ca saṃyojanaṭṭho siddho. **Parikkheyenāti** samucchedena.

Opapātikoti upapātikayoniko upapatane sādhu-kārī.

Sesayonipaṭikkhepavacanametam. Tena gabbhavāsadukkhābhāvamāha. **Tattha parinibbāyīti** iminā sesadukkhābhāvaṃ. Tattha parinibbāyitā cassa kāmaloke khandhabhijassa apunāgamanavasenevāti dassetuṃ “**anāvattidhammo**”ti vuttam. **Upariyevāti** brahmalokeyeva. **Anāvattidhammoti** tato brahmalokā punappunaṃ paṭisandhivasena na āvattanadhammo. Tenāha “**yonigativasena anāgamanadhammo**”ti.

Padesaṃ padesakārī ārādhetīti silakkhandhādīnaṃ pāripūriyā ekadesabhūtaṃ heṭṭhimamaggattayaṃ padeso, taṃ karonto padesaṃ ekadesabhūtaṃ heṭṭhimaṃ phalattayameva ārādheti, nipphādetī attho. Tenāha “**padesakārī puggalo nāma sotāpanno**”ti-ādi. **Paripūraṃ paripūrakārīti** silakkhandhādīhi saddhindriyādīhi ca parito pūraṇena paripūrasaṅkhātāṃ arahattamaggaṃ karonto nibbattento paripūraṃ arahattaphalaṃ ārādheti, nipphādetīti attho. Tenāha “**paripūrakārī nāma arahā**”ti-ādi.

Paṭhamasikkhāsuttavaṇṇanā niṭṭhitā.

7. Dutiyasikkhāsuttādivaṇṇanā

88-91. Sattame **kulā kulaṃ gamanakoti** kulato kulaṃ gacchanto. **Dve vā tayo vā bhaveti** devamanussavasena dve vā tayo vā bhave.

Missakabhāvavasena hetam vuttam. Desanāmatameva cetam “**dve vā tīṇi vā**”ti. Yāva chaṭṭhabhavā saṃsarantopi kolaṃkolova hoti. Tenevāha “**ayañhi dve vā bhave -pa- evamettha vikappo daṭṭhabbo**”ti. Uḷārakulavacano vā ettha kulasaddo, kulato kulaṃ

gacchatīti **kolaṃkolo**. Soṭāpatti phalāsacchikiriyaṭo paṭṭhāya hi nīcakule uppatti nāma natthi, mahābhogakulesu eva nibbattatīti attho. Kevalo hi kulasaddo mahākulameva vadati “kulaputto”ti-ādīsu viya. **Ekabījīti** ettha khandhabījaṃ nāma kathitaṃ, **khandhabījanti** ca paṭisandhiviññāṇaṃ vuccati. Yassa hi soṭāpannessa ekaṃ khandhabījaṃ atthi ekaṃ bhavaggahaṇaṃ, so ekabījī nāma. Tenāha “**ekasseva bhavassa bījaṃ etassa atthīti ekabījī**”ti. “**Mānusakāṃ bhavaṇ**”ti idaṃ panettha desanāmetameva, “devabhavaṃ nibbattetī”tipi pana vattum vaṭṭatiyeva.

Uddhamvāhibhāvena uddhamassa taṇhāsotaṃ vaṭṭasotaṃ vāti **uddhamāso**, uddham vā gantvā paṭilabhitabbato uddhamassa maggasotaṃ **uddhamāso**. Paṭisandhivasena akaniṭṭhabhavaṃ gacchatīti **akaniṭṭhagāmī**. **Yattha katthacīti** avihādīsu yattha katthaci. **Sappayogenāti** vipassanāññābhisaṅkhārasaṅkhātena payogena saha, mahatā vipassanāpayogenāti attho. **Upahaccāti** etassa upagantvāti attho. Tena vemajjhātikamo kālakiriyaṭapagamaṇāca saṅgahitaṃ hoti, tasmā āyuvemajjhaṃ atikkamitvā parinibbāyanto upahaccaparinibbāyī nāma hotīti āha “**yo pana kappasahassāyukesu aviheṣū**”ti-ādi. **So tividho hotīti** ñāṇassa tikkhamajjhamudubhāvena tividho hoti. Tenāha “**kappasahassāyukesū**”ti-ādi.

Saddhādhurena abhinivisitvāti “sace saddhāya sakkā nibbattetum, nibbattessāmi lokuttaramaggaṇ”ti evaṃ saddhādhuravasena abhinivisitvā vipassanaṃ paṭṭhapetvā. **Paññādhurena abhiniviṭṭhoti** “sace paññāya sakkā, nibbattessāmi lokuttaramaggaṇ”ti evaṃ paññādhuraṃ katvā abhiniviṭṭho. Yathāvuttameva aṭṭhavidhattaṃ kolaṃkolasattakkhattuparamesu atidisanto “**tathā kolaṃkolā sattakkhattuparamā cā**”ti āha, vuttanayeneva aṭṭha kolaṃkolā, aṭṭha sattakkhattuparamāti vuttaṃ hoti.

Tattha sattakkhattum paramā bhavūpapatti attabhāvaggahaṇaṃ assa tato paramā aṭṭhamaṃ bhavaṃ nādiyati **sattakkhattuparamo**. Bhagavato gahitaṇāmaseneva cetāni ariyāya jātiyā jātānaṃ tesaṃ nāmāni jātāni kumārānaṃ mātāpitūhi gahitaṇāmāni viya. Ettakaṃ hi ṭhānaṃ

gato ekabījī nāma hoti, ettakaṃ kolaṃkolo, ettakaṃ sattakkhattuparamoti bhagavatā etesaṃ nāmaṃ gahitaṃ. Niyamato pana ayaṃ ekabījī, ayaṃ kolaṃkolo, ayaṃ sattakkhattuparamoti natthi. Ko pana nesaṃ etaṃ pabhedam niyametīti? Keci tāva therā “pubbahetu niyametī”ti vadanti, keci paṭhamamaggo, keci upari tayo maggā, keci tiṇṇam maggānam vipassanāti.

Tattha “pubbahetu niyametī”ti vāde paṭhamamaggassa upanissayo kato nāma hoti, “upari tayo maggā nirupanissayā uppannā”ti vacanam āpajjati. “Paṭhamamaggo niyametī”ti vāde upari tiṇṇam maggānam niratthakathā āpajjati. “Upari tayo maggā niyametī”ti vāde paṭhamamagge anuppanneyeva upari tayo maggā uppannāti āpajjatīti. “Tiṇṇam maggānam vipassanā niyametī”ti vādo pana yujjati. Sace hi upari tiṇṇam maggānam vipassanā balavatī hoti, ekabījī nāma hoti, tato mandatarāya kolaṃkolo, tato mandatarāya sattakkhattuparamoti.

Ekacco hi sotāpanno paṭṭajjhāsayo hoti vaṭṭābhirato, punappunam vaṭṭasmiṃyeva carati sandissati. Anāthapiṇḍiko seṭṭhi, visākhā upāsikā, cūlarathamahārathā devaputtā, anekavaṇṇo devaputto, sakko devarājā, nāgadatto devaputtoti ime hi ettakā janā vaṭṭajjhāsayā vaṭṭābhiratā ādito paṭṭhāya cha devaloke sodhetvā akaniṭṭhe ṭhatvā parinibbāyissanti, ime idha na gahitā. Na kevalañcimeva, yopi manussesuyeva sattakkhattuṃ saṃsaritvā arahattaṃ pāpuṇāti, yopi devaloke nibbatta devesuyeva sattakkhattuṃ aparāparam saṃsaritvā arahattaṃ pāpuṇāti, imepi idha na gahitā, kālena deve, kālena manusse saṃsaritvā pana arahattaṃ pāpuṇantova idha gahito, tasmā “sattakkhattuparamo”ti idaṃ idhaṭṭhakavokiṇṇabhavūpapattikasukkhavipassakassa nāmaṃ kathitanti veditabbaṃ.

“Sakideva imaṃ lokaṃ āgantvā”ti¹ vacanato pañcasu sakadāgāmīsu cattāro vajjetvā ekova gahito. Ekacco hi idha sakadāgāmiphalaṃ patvā idheva parinibbāyati, ekacco idha patvā devaloke

1. Abhi 3. 119 piṭṭhe.

parinibbāyati, ekacco devaloke patvā tattheva parinibbāyati, ekacco devaloke patvā idhūpapajjitvā parinibbāyati. Ime cattāropi idha na gahitā. Yo pana idha patvā devaloke yāvatāyukaṃ vasitvā puna idhūpapajjitvā parinibbāyissati, ayam ekova idha gahitoti veditabbo.

Idāni tassa pabhedam dasseto “**tīsu pana vimokkhesū**”ti-ādimāha. Imassa pana sakadāgāmino ekabījīnā saddhiṃ kiṃ nānākaraṇanti? Ekabījissa ekāva paṭisandhi, sakadāgāmissa dve paṭisandhiyo, idam tesam nānākaraṇam. Suññatavimokkhena vimuttakhīṇāsavo paṭipadāvasena catubbidho hoti, tathā animitta-appaṇihitavimokkhehīti evam dvādasa arahantā hontīti āha”**yathā pana sakadāgāmino, tattheva arahanto dvādasa veditabbā**”ti. Aṭṭhamanavamadasamāni uttānatthāneva.

Dutiyasikkhāsuttādivaṇṇanā niṭṭhitā.

11. Saṅkavāsuttavaṇṇanā

92. Ekādasame vihārapaṭibaddhanavakammādibhāram harati pavattetīti **bhārahāro**. Tenevāha “**nave āvāse samuṭṭhāpeti, purāṇe paṭijaggatī**”ti. Sikkhitabbato sikkhā, pajjitabbato, pajjanti etehīti vā padāni, sikkhāyeva padāni **sikkhāpadānī**ti āha “**sikkhāsaṅkhātehi padehī**”ti. **Dassetī** paccakkhato dasseti, hatthāmalakaṃ viya pākaṭe vibhūte katvā vibhāveti. **Gaṇhāpetī**ti te dhamme manasā anupakkhite diṭṭhiyā suppaṭividdhe kārento uggaṇhāpeti. **Samussāhetī**ti samādhimhi ussāham janeti. **Paṭiladdhaguṇehī**ti tāya desanāya tannissayapaccattapurisakārena ca tesam paṭividdhaguṇehi. **Vodāpetī**ti tesam cittasantānam assaddhiyādikilesamalāpagamanena pabhassaram karoti. **Sanham sanham kathetī**ti ativiya sukhumaṃ katvā katheti.

Accayanam sādhumariyādam madditvā vītikkamanam **accayoti** āha “**aparādhō**”ti. Acceti atikkamati etenāti vā **accayo**, vītikkamassa pavattanako akusaladhammo. So eva aparajjhati etenāti **aparādhō**. So hi aparajjhantam purisam adhibhavitvā pavattati. Tenāha

“**atikkamma adhibhavitvā pavatto**”ti. **Paṭiggaṇhātū**ti adhivāsanavasena sampaṭicchātūti atthoti āha “**khamatū**”ti. Sadevakena lokena nissaraṇanti araṇīyato **ariyo**, tathāgatoti āha “**ariyassa vinayeti buddhassa bhagavato sāsane**”ti. **Puggalādhiṭṭhānaṃ karontoti** kāmaṃ “vuddhi hesā”ti dhammādhiṭṭhānavasena vākyam āradham, tathāpi desanam pana puggalādhiṭṭhānaṃ karonto “saṃvaram āpajjati”ti āhāti yojanā.

Saṅkavāsuttavaṇṇanā niṭṭhitā.

Samaṇavaggavaṇṇanā niṭṭhitā.

(10) 5. Loṇakapallavagga

1. Accāyikasuttavaṇṇanā

93. Pañcamassa paṭhame **atipātikānī**ti sīgham pavattetabbāni. **Karaṇīyānī**ti ettha avassake anīyasaddo daṭṭhabboti āha “**avassakiccānī**”ti. **Nikkhantasetañkurānī**ti bījato nikkhantasetañkurāni. Sesamettha uttānameva.

Accāyikasuttavaṇṇanā niṭṭhitā.

2. Pavivekasuttavaṇṇanā

94. Dutiye sāṇehi vākehi nibbattitāni **sāṇāni**. Missasāṇāni **masāṇāni** na bhaṅgāni. **Erakatiṇādīnī**ti **ādi**-saddena akkamakacikadalivākādīnaṃ saṅgaho. Erakādīhi katāni hi chavāni lāmakāni dussānīti “**chavadussānī**”ti vattabbataṃ labhanti. **Kuṇḍakanti** tanutaram taṇḍulappakaraṇam¹. **Pañca dussīlyānī**ti pāṇātipātādīni pañca. **Cattāro āsavā**ti kāmāsavādayo cattāro āsavā. **Sīlaggappatto**ti sīlena, sīlassa vā aggappatto.

Pavivekasuttavaṇṇanā niṭṭhitā.

1. Taṇḍulasakalam (Dī-Ṭī 1. 353 piṭṭhe)

3. Saradasuttavaṇṇanā

95. Tatiye **viddheti** dūrībhūte. Dūrabhāvo ca ākāsaṣa valāhakavigamena hotīti āha “**valāhakavigamena dūrībhūte**”ti. Teneva hi “viddhe vigatavalāhake”ti vuttam. **Nabham abhussakkamānoti** ākāsam abhilaṅghanto. Iminā taruṇasūriyabhāvo dassito. Nātidūrodite hi ādicce taruṇasūriyasamaññā. **Duvidhamevassa saṃyojanam natthīti** orambhāviya-uddhambhāgiyavasena duvidhampi saṃyojanam assa paṭhamajjhānalābhino ariyasāvakaṣa natthi. Kasmā paṇassa uddhambhāgiyasaṃyojanampi natthīti vuttam. Orambhāgiyasaṃyojanānameva hettha pahānam vuttanti āha “**itarampi**”ti-ādi, itaram uddhambhāgiyasaṃyojanam puna imam lokam paṭisandhivasena ānetum asamatthatāya natthīti vuttanti attho. Jhānalābhino hi sabbepi ariyā brahmalokūpapannā heṭṭhā na uppajjanti, uddham uddham uppajjantāpi vehapphalam akaniṭṭham bhavaggaṇca patvā na punaṇṇattha jāyanti, tattha tattheva arahattam patvā parinibbāyanti. Tenevāha “**imasmim sutte jhānānāgāmī nāma kathito**”ti. Jhānavasena hi heṭṭhā na āgacchatīti jhānānāgāmī.

Saradasuttavaṇṇanā niṭṭhitā.

4. Parisāsuttavaṇṇanā

96. Catutthe **paccayabāhullikāti** cīvarādibāhullāya paṭipannā. Avitatanṇhatāya hi tam tam parikkhārajātam bahum lanti ādiyantīti bahulā, te eva **bāhulikā** yathā “venayiko”ti¹. Te paccayabāhullāya yuttappayuttā hontīti cīvarādibāhullāya paṭipannā nāma hontī. Sikkhāya agāravabhāvato sithilam agāḷham² gaṇhantīti **sāthalikā**. **Sithilanti** ca bhāvanapumsakaniddeso. Sithilasaddena samānatthassa sathalasaddassa vasena sāthalikāti padasiddhi veditabbā. **Avagamanatṭhenāti** adhogamanatṭhena, orambhāgiyabhāvenāti attho. **Nikkhattadhurāti** oropitadhurā ujjitussāhā. **Upadhiviveko** nibbānam. **Duvidhampi vīriyanti** kāyikam cetasaṅkaṇca vīriyam.

1. Ma 1. 193; Am 3. 20; Vi 1. 3 piṭṭhesu.

2. Adalham (Ka)

Bhaṇḍanaṃ jātaṃ etesanti **bhaṇḍanaajātā**. Visesanassa paranipātavasena cetanaṃ vuttaṃ. Aṭṭhakathāyaṃ pana visesanassa pubbanipātavaseneva atthaṃ dassento “**jātabhaṇḍanā**”ti āha. Kalaho jāto etesanti **kalahajātā**ti etthāpi eseva nayo. **Kalahassa pubbabhāgoti** kalahassa hetubhūtā paṭibhāgā taṃsadisī ca anīṭṭhakiriyā. **Hatthaparāmāsādivasenāti** kujjhitvā aññaṃaññaṃ hatthe gahetvā palapana-acchindanādivasena. “Ayaṃ dhammo, nāyaṃ dhammo”ti-ādinā vuruddhavādabhūtaṃ vivādaṃ āpannāti **vivādāpannā**. Tenāha “**viruddhavādaṃ āpannā**”ti. Mukhasannissitatāya vācā idha “mukhaṃ”ti adhippetāti āha “**pharusā vācā mukhasattiyo**”ti.

Satipi ubhayesaṃ kalāpānaṃ paramatthato bhede pacurajanehi pana duviññeyyanānattaṃ khīrodakasammoditaṃ accantametaṃ saṃsaṭṭhaṃ viya hutvā tiṭṭhatīti āha “**khīrodakaṃ viya bhūtā**”ti, yathā khīrañca udakañca aññaṃaññaṃ saṃsandati, visum na hoti, ekattaṃ viya upeti, evaṃ sāmaggivasena ekattūpagatacittuppādāti attho. Mettacittaṃ paccupaṭṭhāpetvā olokanaṃ cakkhūni viya cakkhūni nāmāti āha “**upasantehi mettacakkhūhi**”ti. Piyabhāvadāpakāni hi cakkhūni **piyacakkhūni**. **Pamuditassa pīti jāyatīti** pamodapaccayabalavapītimāha. **Pañcavaṇṇā pīti uppajjati**ti khuddikādibhedena pañcappakārā pīti uppajjati. **Pītimaṇassāti** tāya pītiyā pīṇitamanassa, passaddhi-āvahehi uḷārehi pītivegehi tintacittassāti attho. **Vigatadaratho**ti kilesapariḷāhānaṃ dūrībhāvena vūpasantadaratho.

Kena udakena dārito pabbatappadesoti katvā āha “**kandaro nāmā**”ti-ādi. Udakassa yathāninnaṃ pavattiyā nadinibbattanabhāvena “**nadikuñjo**”tipi vuccati. Sāvaṭṭā nadiyo **padarā**. **Aṭṭha māseti** hemantagimha-utuvasena aṭṭha māse. Khuddakā udakavāhiniyo sākha viyāti **sākha**. Khuddakasobbhā **kusubbhā**¹ okārassa ukāraṃ katvā. Yattha upari unnatappadesato udakaṃ āgantvā tiṭṭhati ceva sandati ca,

1. Khuddakasombhā kusumbhā (Ka)

te kusubbhā khuddaka-āvāṭā. **Khuddakanadiyoti** pabbatapādādito nikkhantā khuddakā nadiyo.

Parisāsuttavaṇṇanā niṭṭhitā.

5. Paṭhama-ājānīyasuttādivaṇṇanā

97-99. Pañcame **anucchavikoti** rañño paribhuñjanayoggo.

Hatthapādādi-aṅgasamatāyāti hatthapādādi-avayavasamatāya, rañño vā senāya aṅgabhūtattā **rañño aṅganti** vuccati. Ānetvā hunitabbanti āhunam, āhutīti atthato ekanti āha “**āhutisaṅkhātaṃ piṇḍapātaṃ**”ti. Dūratopi ānetvā sīlavantesu dātabbasetam adhivacanam. **Piṇḍapātanti** ca nidassanamattam. Ānetvā hunitabbānam hi cīvarādīnam catunnam paccayānametaṃ adhivacanam āhunanti. Tam arahatīti **āhuneyyo**. **Paṭiggahetuṃ yuttoti** tassa mahapphalabhāvakaraṇato paṭiggaṇhituṃ anucchaviko.

Pāhunakabhattassāti disavidisato āgatānam piyamanāpānam nātimittānam atthāya sakkāre paṭiyattassa āgantukabhattassa. Tam hi ṭhapetvā te tathārūpe pāhunake saṅghasseva dātuṃ yuttam, saṅghova tam paṭiggahetuṃ yutto. Saṅghasadiso hi pāhunako natthi. Tathā hesa ekasmiṃ buddhantare vītivatte dissati, kadāci asaṅkhyeyyepi kappe vītivatte. Abbokiṇṇaṅca piyamanāpatādikarehi dhammehi samannāgato. Evaṃ pāhunamassa dātuṃ yuttam, pāhunaṅca paṭiggahetuṃ yuttoti **pāhuneyyo**. Ayam hettha adhippāyo “nātimittā vipavutṭhā na cirasseva samāgacchanti, anavaṭṭhitā ca tesu piyamanāpatā, na evamariyasaṅgho, tasmā saṅghova pāhuneyyo”ti.

Dakkhanti etāya sattā yathādhippetāhi sampattīhi vaḍḍhantīti dakkhiṇā, paralokam saddahitvā dānam. Tam dakkhiṇam arahati, dakkhiṇāya vā hito yasmā mahapphalakaraṇatāya visodhetīti **dakkhiṇeyyo**.

Puññatthikehi añjali karaṇīyo etthāti **añjalikaraṇīyo**. Ubho hatthe sirasi patiṭṭhāpetvā sabbalokena kayiramānam añjalikammam

arahaṭṭi vā **añjalikaraṇīyo**. Tenāha “**añjalipaggahaṇassa anucchaviko**”ti.

Yadipi pāḷiyam “anuttaran”ti vuttam, natthi ito uttaram visitṭhanti hi anuttaram, samampissa pana natthi dassento “**asadisan**”ti āha. Khittam vuttam bījam mahapphalabhāvakaraṇena tāyati rakkhati, khipanti vapanti ettha bījanīti vā khettaṃ, kedārādi, khettaṃ viya khettaṃ, puññānam khettaṃ **puññakkhettaṃ**. Yathā hi rañño vā amaccassa vā sālīnam vā yavānam vā viruṇaṇaṭṭhānam “rañño sālīkkhettaṃ yavakkhettaṃ”ti vuccati, evam saṃgho sabbalokassa puññānam viruṇaṇaṭṭhānam. Saṃgham nissāya hi lokassa nānappakārahitasukhasamvattanikāni puññāni viruhanti, tasmā saṃgho **anuttaram puññakkhettaṃ lokassa**. Sesam suviññeyyameva. Chaṭṭhasattamāni uttānatthāneva.

Paṭhama-ājānīyasuttādivaṇṇanā niṭṭhitā.

8. Potthakasuttavaṇṇanā

100. Aṭṭhame **navoti** navavāyimo. Tenāha “**karaṇam upādāya vuccati**”ti. **Vākamayavatthanti** sāṇādivākasāṭakaṃ. **Dubbaṇṇoti** vivaṇṇo. **Dukkhasamphasso**ti kharasamphasso. Appam agghatīti **appaggho**. Atibahum agghanto kahāpaṇagghanako hoti. **Paribhogamajjhimoti** paribhogakālavasena majjhimo. So hi navabhāvam atikkamitvā jīṇabhāvam appatto majjhe paribhogakālepi dubbaṇṇo ca dukkhasamphasso ca appagghoyeva hoti. Atibahum agghadhantā aḍḍham agghati, jīṇakāle pana aḍḍhamāsakam vā kākaṇikam vā agghati. **Ukkhaliparipuñchananti** kāḷukkhaliparipuñchanam. **Navotipi** upasampadāya pañcavassakālato heṭṭhā jātiyā saṭṭhivassepi navoyeva. **Dubbaṇṇatāyāti** sarīravaṇṇenapi guṇavaṇṇenapi dubbaṇṇatāya. Dussīlassa hi parisamajjhe nittejatāya sarīravaṇṇopi na sampajjati, guṇavaṇṇena vattabbameva natthi. Aṭṭhakathāyam pana sarīravaṇṇena dubbaṇṇatāpi guṇavaṇṇassa abhāvena dubbaṇṇatāyāti vuttam.

Ye kho panassāti ye kho pana tassa upaṭṭhākā vā nātimitṭhādayo vā etaṃ puggalam sevanti. **Tesanti** tesam puggalānam cha sathāre

sevantānaṃ micchādiṭṭhikānaṃ viya, devadatte sevantānaṃ kokālikādīnaṃ viya cataṃ sevanaṃ dīgharattaṃ ahitāya dukkhāya hoti. **Majjhimoti** pañcavassakālato paṭṭhāya yāva navavassakālā majjhimo nāma. **Theroti** dasavassato paṭṭhāya thero nāma. **Evamāhaṃsūti** evaṃ vadanti. **Kiṃ nu kho tuyhanti** tuyhaṃ bālassa bhaṇitena ko atthoti vuttaṃ hoti. **Tathārūpanti** tathājātikāṃ tathāsabhāvaṃ ukkhepanīyakammaṃ kāraṇabhūtaṃ.

Tiḥi kappāsa-aṃsūhi suttaṃ kantivā katavatthanti tayo kappāsa-aṃsū gahetvā kantitasuttēna vāyitaṃ sukhumavatthaṃ, taṃ navavāyimaṃ anagghaṃ hoti, paribhogamajjhimaṃ vīsampi tiṃsampi sahaṣṣāni agghati, jīṇṇakāle aṭṭhapi dasapi sahaṣṣāni agghati.

Tesaṃ taṃ hotīti tesaṃ sammāsambuddhādayo sevantā viya taṃ sevanaṃ dīgharattaṃ hitāya sukhāya hoti. Sammāsambuddhaṃ hi ekaṃ nissāya yāvajjakālā muccanakasattānaṃ pamāṇaṃ natthi, tathā sārīputtattheramahāmoggallānatthere avasese ca asīti mahāsāvake nissāya saggagatasattānaṃ pamāṇaṃ natthi, yāvajjakālā tesaṃ diṭṭhānugatiṃ paṭipannaṃsattānaṃ pamāṇaṃ natthiyeva. **Ādheyyaṃ gacchatīti** tassa mahātherassa taṃ atthanissitaṃ vacanaṃ yathā gandhakaraṇḍake kāsikavatthaṃ ādhātābbaṃ ṭhapetābbaṃ gacchati, evaṃ uttamaṅge sirasmiṃ hadaye ca ādhātābbaṃ ṭhapetābbaṃ gacchati.

Potthakasuttavaṇṇanā niṭṭhitā.

9. Loṇakapallasuttavaṇṇanā

101. Navame **yathā yathā kammaṃ karotīti** yena yena pakārena paṇāghātādīpāpakammaṃ karoti. **Vipākaṃ paṭisaṃvediyatevāti** avadhāraṇena kammaṃsiddhiyaṃ tabbipākassa appavatti nāma natthīti dīpeti. Tenevāha “**na hi sakkā**”ti-ādi. **Evaṃ santanti** bhūmatthe upayogavacananti āha “**evaṃ sante**”ti. **Abhisankhāravīññānanirodhenāti** kammaviññāṇassa āyatiṃ anuppattidhammatāpajjanena.

“Ayampi kho kāyo evaṁdhammo evaṁbhāvī evaṁanatīto”ti-ādinā kāyassa asubhāniccādi-ākāra-anupassanā kāyabhāvanāti āha “**kāyānupassanāsaṅkhātāya tāya bhāvanāyā**”ti. **Rāgādīnanti ādi-saddena** dosamohānaṁ saṅgaho daṭṭhabbo. “Rāgo kho āvuso pamāṇakaraṇo, doso pamāṇakaraṇo, moho pamāṇakaraṇo, te khīṇāsavassa bhikkhuno pahīnā ucchinnamūlā tālāvatthukatā anabhāvaṁkatā āyatim anuppādadhammā”ti¹ hi vuttaṁ.

Yathā hi pabbatapāde pūtipaṇṇassa udakaṁ nāma hoti, kāḷavaṇṇaṁ olokentānaṁ byāmasataṁ gambhīraṁ viya khāyati, yaṭṭhim vā rajjuṁ vā gahetvā minantassa piṭṭhipādoddharaṇamattampi na hoti, evameva ekaccassa yāva rāgādayo nuppajjanti, tāva taṁ puggalaṁ sañjānitum na sakkā hoti, sotāpanno viya sakadāgāmī viya anāgāmī viya ca khāyati. Yadā panassa rāgādayo uppajjanti, tadā ratto duṭṭho mūḷhoti paññāyati. Iti te rāgādayo “ettako ayan”ti puggalassa pamāṇaṁ dassentāva uppajjanṭi pamāṇakaraṇā nāma vuttā.

Jāpetunti jinadhanam kātum. **Soti** rājā, mahāmatto vā. **Assāti** añjalim paggahetvā yācantassa. Sesamettha uttānameva.

Loṇakapallasuttavaṇṇanā niṭṭhitā.

10. Paṇṣudhovakasuttavaṇṇanā

102. Dasame **anīhatadosanti** anapanītathūlakāḷakam. **Anapanītakasāvanti** anapagatasukhumakāḷakam. **Pahaṭamattanti** āhaṭamattam.

Dasakusalakammavāsena uppannam cittam cittameva, vipassanāpādaka-aṭṭhasamāpatticittam vipassanācittaṅca tato cittato adhikam cittanti **adhicittanti** āha “**adhicittanti samathavipassanācittan**”ti. **Anuyuttassāti** anuppannassa uppādanavasena uppannassa paṭibhūhanavasena anu anu yuttassa, tattha yuttappayuttassāti attho. Ettha ca purebhattam piṇḍāya caritvā pacchābhattam

1. Ma 1. 372 piṭṭhe.

piṇḍapātappaṭikkanto nisīdanam ādāya “asukasmim rukkhamūle vā vanasaṇḍe vā pabbhāre vā samaṇadhammam karissāmī”ti nikkhamantopi tattha gantvā hatthehi vā pādehi vā nisajjaṭṭhānato tiṇapaṇṇāni apantopi adhicittam anuyuttoyeva. Nisīditvā pana hatthapāde dhovivā mūlakammaṭṭhānam gahetvā bhāvanam anuyuñjanto bhāvanāya appanam appattāyapi adhicittamanuyuttoyeva tadatthenapi tamsaddavohārato.

Cittasampannoti dhammacittassa samannāgatattā sampannācitto.

Paṇḍitajātikoti paṇḍitasabhāvo.

Kāme ārabbhāti vatthukāme ārabbhā. Kāmarāgasāṅkhātena vā kāmena paṭisamyutto vitakko **kāmavitakko**. Byāpajjati cittam etenāti **byāpādo**, doso. Vihimsanti etāya satte, cihimsanam vā tesam etanti **vihimsā**, paresam viheṭhanākārena pavattassa karuṇāpaṭipakkhassa pāpadhammassetaṃ adhivacanam. **Ñātake ārabbhā uppanno vitakkoti** ñātake ārabbhā gehassitapemavasena uppanno vitakko. **Janapadamārabbhā uppanno vitakkoti** etthāpi eseva nayo. **Aho vata maṃ -pa- uppanno vitakkoti** “aho vata maṃ pare na avajāneyyūṃ, na heṭṭhā katvā maññeyyūṃ, pāsāṇacchattam viya garuṃ kareyyūṃ”ti evam uppannavitakko.

Dasavipassanupakkilesavitakkāti obhāsādidasavipassanupakkilese ārabbhā uppannavitakkā.

Avasiṭṭhā dhammavitakkā etassāti **avasiṭṭhadhammavitakko**, vipassanāsamādhī. **Na ekaggabhāvappatto** na ekaggatam patto. Ekam udetīti hi **ekodi**, paṭipakkhehi anabhibhūtattā aggam seṭṭham hutvā udetīti attho. Seṭṭhopi hi loka ekoti vuccati, ekasmim ārammaṇe samādhānavasena pavattacittassetam adhivacanam. Ekodissa bhāvo **ekodibhāvo**, ekaggabhāyetam adhivacanam.

Niyakajjhantanti attasantānassetam adhivacanam. **Gocarajjhantanti** idha nibbānam adhippetam. Tenāha “**ekasmim nibbānagocareyeva tiṭṭhati**”ti. **Suṭṭhu nisīdatīti** samādhipaṭipakkhe kilese sannisīdento suṭṭhu nisīdati. **Ekaggam hotīti** abyaggabhāvappattiyā ekaggam hoti. **Sammā ādhiyatīti** yathā ārammaṇe suṭṭhu appitam hoti, evam sammā sammadeva ādhiyati.

Abhiññā sacchikaraṇīyassāti ettha “abhiññāya sacchikaraṇīyassā”ti vattabbe “abhiññā”ti ya-kāralopena pana puna kālakiriyānidde so katoti āha “**abhiññāya paccakkham kātābassā**”ti. Abhiññāya iddhividhādīnāṇena sacchikiriyaṃ iddhividhapaccanubhavanādikaṃ **abhiññāsacchikaraṇīyanti** evaṃ vā ettha attho daṭṭhabbo. **Sakkhibhabbatā pāpuṇātī**ti ettha pana yassa paccakkham atthi, so sakkhī, sakkhino bhabbatā sakkhibhabbatā, sakkhibhavananti vuttam hoti. Sakkhī ca so bhabbo cāti sakkhibhabbo. Ayaṃ hi iddhividhādīnaṃ bhabbo tattha ca sakkhīti sakkhibhabbo, tassa bhāvo sakkhibhabbatā, tam pāpuṇātīti attho.

Abhiññāpādakajjhānādibhedeti ettha abhiññāpādā ca abhiññāpādakajjhānaṃ ca abhiññāpādakajjhānāni. **Ādi**-saddena arahattaṃ ca arahattassa vipassanā ca saṅgahitāti daṭṭhabbam. Teneva **majjhimanikāyaṭṭhakathāya**¹—

“Sati sati-āyataneti sati satikāraṇe. Kiñcetha kāraṇaṃ? Abhiññā vā abhiññāpādakajjhānaṃ vā, avasāne pana arahattaṃ vā kāraṇaṃ arahattassa vipassanā vāti veditabban”ti vuttam.

Yaṃ hi tam tatra tatra sakkhibhabbatāsaṅkhātāṃ iddhividhapaccanubhavanādi, tassa abhiññā kāraṇaṃ. Atha² iddhividhapaccanubhavanādi abhiññā, evaṃ sati abhiññāpādakajjhānaṃ kāraṇaṃ. Avāsāne chaṭṭhābhiññāya pana arahattaṃ, arahattassa vipassanā vā kāraṇaṃ. Arahattaṃ hi “kudāssu nāmātaṃ tadāyatanaṃ upasampajja viharissāmi, yadariyā etarahi upasampajja viharantī”ti³ anuttāresu vimokkhesu pihaṃ upaṭṭhapetvā abhiññā nibbattentassa kāraṇaṃ. Idaṃca sādharmaṇaṃ na hoti, sādharmaṇavasena pana arahattassa vipassanā kāraṇaṃ. Imasmiṃ hi sutte arahattaphalavasena chaṭṭhābhiññā vuttā. Tenevāha “**āsavānaṃ khayāti-ādi cettha phalāsamāpattivasena vuttanti veditabban**”ti.

Pāmsudhovakasuttavaṇṇanā niṭṭhitā.

1. Ma-Ṭṭha 3. 141 piṭṭhe.

2. Idha (Ka) majjhimaṇṇāsake mahāvachasuttaṭṭhikāyaṃ passitabbam.

3. Ma 1. 378; Ma 3. 261 piṭṭhesu.

11. Nimittasuttavaṇṇanā

103. Ekādasame yehi phalaṃ nimīyati, uppajjanaṭṭhāne pakkhipamaṇaṃ viya hoti, tāni **nimittāni**. Tenāha “**tīṇi kāraṇāni**”ti. **Kālena kālanti** ettha **kālenāti** bhummatthe karaṇavacanāṃ. **Kālanti** ca upayogavacananti āha “**kāle kāle**”ti. **Manasi kātabbāti** citte kātabbā, uppādetabbāti attho. Upalakkhitasamādhānākāro samādhiyeva idha samādhinimittanti āha “**ekaggatā hi idha samādhinimittanti vuttā**”ti. **Ṭhānaṃ taṃ cittaṃ kosajjāya saṃvatteyyāti** ettha ṭhānaṃ atthīti vacanaseso. Taṃ bhāvanācittaṃ kosajjāya saṃvatteyya, tassa saṃvattanassa kāraṇaṃ atthīti attho. **Taṃ** vā manasikaraṇaṃ **cittaṃ kosajjāya saṃvatteyya**, etassa ṭhānaṃ kāraṇaṃ atthīti attho. Tenāha “**kāraṇaṃ vijjati**”ti-ādi. **Ñāṇajavanti** saṅkhāresu aniccādivasena pavattamaṇaṃ paññājamaṃ.

Yaṃ kiñci suvaṇṇatāpanayogga-aṅgārabhājanaṃ idha “**ukkā**”ti adhippetanti āha “**aṅgārapallan**”ti. **Sajjeyyāti** yathā tattha pakkhittaṃ suvaṇṇaṃ tappati, evaṃ paṭiyādiyeyya. **Ālimpeyyāti** ādiyeyya, jaleyyāti attho. Tenāha “**tattha aṅgāre -pa- gāhāpeyyā**”ti. **Mūsāya vā pakkhipeyyāti** tattake¹ vā pakkhipeyya. **Upadhāretīti** sallakkheti.

Nimittasuttavaṇṇanā niṭṭhitā.

Loṇakapallavaggavaṇṇanā niṭṭhitā.

Dutiyapaṇṇāsako niṭṭhito.

1. Vaṭṭake (Ka) āvaṭṭaniyaṃ (?)

3. Tatiyapaṇṇāsaka

(11) 1. Sambodhavagga

1. Pubbevasambodhasuttādivaṇṇanā

104-106. Tatiyassa paṭhame **sambodhito pubbevā**ti sambodho vuccati catūsu maggesu ñāṇaṃ “sāmaṃ sammā bujji etenā”ti katvā, tato pubbeyevāti attho. Tenāha “**ariyamaggappattito aparabhāgeyevā**”ti. **Bodhisattasseva satoti** ettha yathā udakato uggantvā ṭhitam paripākagataṃ padumaṃ sūriyarasmiṣamphassa avassaṃ bujjhissatīti bujjhanakapadumanti vuccati, evaṃ buddhānaṃ santike byākaraṇassa laddhattā avassaṃ anantarāyena pāramiyo pūretvā bujjhissatīti bujjhanakasattoti **bodhisatto**. Tenāha “**bujjhanakasattasseva -pa-ārabhantasseva sato**”ti. Yā vā eṣā catumaggañāṇasaṅkhātā bodhi “taṃ bodhiṃ kudāssu nāmāhaṃ pāpuṇissāmī”ti patthayamāno paṭipajjatīti bodhiyaṃ satto āsattotipi **bodhisatto**. Tenāha “**sambodhiyā vā sattasseva laggasseva sato**”ti.

Atha vā bodhīti ñāṇaṃ “bujjhati etenā”ti katvā, bodhimā satto **bodhisatto** purimapade uttarapadalopaṃ katvā yathā “ñāṇasatto”ti, ñāṇavā paññavā paṇḍito sattoti attho. Buddhānaṃ hi pādamūle abhinīhārato paṭṭhāya paṇḍitova so satto, na andhabāloti bodhisatto. Evaṃ guṇavato uppannānāmasena bodhisattasseva sato. Assākhīyatīti **assādo**, sukhaṃ. Tañca sātākāralakkhaṇanti āha “**assādoti madhurākāro**”ti. Chandarāgo vinīyati ceva pahīyati ca etthāti **nibbānaṃ “chandarāgavinayo chandarāgappahānañcā”ti vuccati**. Tenāha “**nibbāna**”ti-ādi. Tattha **āgammā**ti idaṃ yo jano rāgaṃ vineti pajatati ca, tassa āramaṇakaraṇaṃ sandhāya vuttaṃ. Dutiyatatiyāni uttānatthāneva.

Pubbevasambodhasuttādivaṇṇanā niṭṭhitā.

4. Samaṇabrāhmaṇasuttādivaṇṇanā

107-112. Catutthe **sāmaññanti** ariyamaggo, tena araṇīyato upagantabbato **sāmaññattham**, ariyaphalanti āha “**sāmaññatthanti catubbidham ariyaphalan**”ti. **Brahmaññatthanti** etthāpi eseva nayo. Tenāha “**itaram tasseva vevacanan**”ti. Ariyamaggasaṅkhātam sāmaññameva vā araṇīyato **sāmaññatthanti** āha “**sāmaññatthena vā cattāro maggā**”ti. Pañcamādīni uttānatthāneva.

Samaṇabrāhmaṇasuttādivaṇṇanā niṭṭhitā.

10. Dutīyanidānasuttavaṇṇanā

113. Dasame **vivaṭṭagāmikammānanti** vivaṭṭūpanissayakammānaṃ. **Tadabhinivatteti** ettha **taṃ**-saddena paccāmasanassa vipākassa parāmāsoti āha “**taṃ abhinivatteti**”ti, taṃ vipākam abhibhavivā nivatteti attho. Idāni na kevalam vipākasseva parāmāso taṃ-saddena, atha kho chandarāgaṭṭhāniyānaṃ dhammānaṃ tabbipākassa ca parāmāso daṭṭhabboti āha “**yadā vā tenā**”ti-ādi. **Te ceva dhammeti** te chandarāgaṭṭhāniye dhamme. **Nibbijhitvā passatī**ti kilese nibbijhitvā vibhūtam pākātam katvā passatīti.

Dutīyanidānasuttavaṇṇanā niṭṭhitā.

Sambodhavaggavaṇṇanā niṭṭhitā.

(12) 2. Āpāyikavagga

1. Āpāyikasuttavaṇṇanā

114. Dutīyassa paṭhame apāyesu nibbattanasīlatāya apāyūpagā **āpāyikā**ti āha “**apāyam gacchissantīti āpāyikā**”ti. Aññe brahmacārino sunivatthe supārute sumbhakapattadhare gāmanigamarājadhānisu piṇḍāya carivā jīvikam kappente disvā sayampi tādīsena

ākārena tathāpaṭipajjanato “ahaṃ brahmacārī”ti paṭiññaṃ dento viya hotīti āha “**brahmacāripaṭiññoti brahmacāripaṭirūpako**”ti. “Ahampi bhikkhū”ti vatvā uposathaṅgādīni pavisanto pana brahmacāripaṭiñño hotiyeva, tathā saṃghikaṃ lābhaṃ gaṇhanto. Tenāha “**tesaṃ vā -pa- evaṃpaṭiñño**”ti. **Akkhosatīti** “assamaṇosi, samaṇapaṭiññosī”ti-ādinā akkosati. **Paribhāsati** “so tvaṃ ‘hotu, muṇḍakasamaṇo ahan’ti maññasi, idāni te assamaṇabhāvaṃ āropessāmi”ti-ādinā vadanto paribhāsati.

Kilesakāmopi assādiyamāno vatthukāmantogadhoyeva, kilesakāmavasena ca tesaṃ assādanaṃ siyāti āha “**kilesakāmena vatthukāme sevantassā**”ti. **Kilesakāmenāti** karaṇatthe karaṇavacanaṃ. **Natthi dosoti** assādetvā visayaparibhoge natthi ādīnavo, tappaccayā na koci antarāyoti adhippāyo. **Pātabbatam**¹ **āpajjatīti** paribhuñjanakataṃ upagacchati. Paribhogattho hi ayaṃ pā-saddo, kattusādhano ca tabba-saddo, yathā, ruci paribhuñjatīti attho. **Pivatabbatam paribhuñjitabbatanti** etthāpi kattivaseneva attho vedītabbo.

Āpāyikasuttavaṇṇanā niṭṭhitā.

2. Dullabhasuttavaṇṇanā

115. Dutiye parena katassa upakārassa anurūpappavatti attani kataṃ upakāraṃ upakārato jānanto vediyanto **kataññū katavedīti** āha “**iminā mayhaṃ katan**”ti-ādi.

Dullabhasuttavaṇṇanā niṭṭhitā.

3. Appameyyasuttavaṇṇanā

116. Tatiye **sukhena metabboti** yathā parittassa udakassa sukhena pamāṇaṃ gayhati, evameva “uddhato”ti-ādinā yathāvutthehi

1. Pātabyataṃ (Pāliyaṃ)

aguṇaṅgehi samannāgatassa sukkena pamāṇaṃ gayhatīti sukkena metabbo. **Dukkkena metabboti** yathā mahāsamuddassa dukkhena pamāṇaṃ gayhati, evameva “anuddhato”ti-ādinā dassitehi guṇaṅgehi samannāgatassa dukkhena pamāṇaṃ gayhati, “anāgāmī nu kho khīṇāsavo nu kho”ti vattabbataṃ gacchati, tenesa dukkhena metabbo. **Pametuṃ na sakkotīti** yathā ākāsaṃ na sakkā pamāṇaṃ gahetuṃ, evaṃ khīṇāsavassa, tenesa pametuṃ na sakkāti **appameyyo**.

Sārābhāvena tucchattā naḷo viya naḷo, mānoti āha “**unnaḷoti uggatanaḷo**”ti, uṭṭhitatucchamānoti vuttaṃ hoti. Tenāha “**tucchamānaṃ ukkhipitvā ṭhitoti attho**”ti. Mano hi seyyassa seyyoti sadisoti ca pavattiyā visesato tuccho. **Cāpallenāti** capalabhāvena, taṇhālolluppenāti attho. **Mukharoti** mukhena pharuso, pharusavācoti attho. **Vikiṇṇavācoti** viṣaṭavacano samphappalāpitāya apariyantavacano. Tenāha “**asaññatavacano**”ti, divasampi niratthakavacanaṃ palāpīti vuttaṃ hoti. **Cittekaggatārahito** upacārappanāsamādhirahito caṇḍasote baddhanāvā viya anavaṭṭhitakiriyo. **Bhantacittoti** anavaṭṭhitacitto paṇṇārulhavālamigasadiso. **Vivaṭṭindriyoti** samvarābhāvena gihikāle viya asaṃvutacakkhādi-indriyo.

Appameyyasuttavaṇṇanā niṭṭhitā.

4. Āneñjasuttavaṇṇanā

117. Catutthe saha byayati gacchatīti sahabyo, sahapavattanako. Tassa bhāvo **sahabyatā**, sahapavattīti āha “**sahabhāvaṃ upapajjati**”ti. “Yāvatakaṃ tesam devānaṃ āyuppamāṇaṃ, taṃ sabbaṃ khepetvā nirayampi gacchati”ti-ādivacanato arūpabhavato cutassa apāyūpapatti vuttā viya dissatīti tannivattanattham bhagavato adhippāyaṃ vivaranto “sandhāyabhāsitamidaṃ vacanaṃ”ti dīpeti “**nirayādīhi avippamuttattā**”ti-ādinā. Na hi tassa upacārājñhānato balavataṃ akusalaṃ atthīti. Iminā tato cavantānaṃ upacārājñhānameva paṭisandhijanaṃ kammanti dīpeti.

Adhikaṃ payasati payujjati etenāti **adhippayāso**, savisesaṃ itikattabbakiriyā. Tenāha “**adhikappayogo**”ti. Sesamettha uttānameva.

Āneñjasuttavaṇṇanā niṭṭhitā.

5. Vipattisampadāsuttavaṇṇanā

118. Pañcame **dinnanti** deyyadhammasīsenā dānaṃ vuttanti āha “**dinnassa phalābhāvaṃ sandhāya vadatī**”ti. Dinnaṃ pana annādivatthum kathaṃ paṭikkhipati. Esa nayo “**yiṭṭhaṃ hutā**”ti etthāpi. **Mahāyāgoti** sabbasādhāraṇaṃ mahādānaṃ. **Paheṇakasakkāro**¹ pāhunakānaṃ kātabbasakkāro. **Phalanti** ānisaṃsaphalaṃ nissandaphalañca. **Vipākoti** sadisaphalaṃ. **Paraloke** **ṭhitassa ayaṃ loko natthī** paraloke **ṭhitassa** kammunā laddhabbo ayaṃ loko na hoti. **Idhaloke** **ṭhitassapi paraloko natthī** idhaloke **ṭhitassa** kammunā laddhabbo paraloko na hoti. Tattha kāraṇamāha “**sabbe tattha tattheva ucchijjanti**”ti. Ime sattā yattha yattha bhavayonigati-ādīsu **ṭhitā**, tattha tattheva ucchijjanti, dvayavināsenā vinassanti.

Phalābhāvavasenāti mātāpitūsu sammāpaṭipattimicchāpaṭipattīnaṃ phalassa abhāvavasena “**natthi mātā, natthi pitā**”ti vadati, na mātāpitūnaṃ, nāpi tesu sammāpaṭipattimicchāpaṭipattīnaṃ abhāvavasena tesam lokapaccakkhattā. Pubbuḷakassa viya imesaṃ sattānaṃ uppādo nāma kevalo, na ca vanapubbakoti dassanatthaṃ “**natthi sattā opapātikā**”ti vuttanti āha “**cavitvā uppajjanakā sattā nāma natthī vadatī**”ti. **Sayaṃ abhiññā sacchikatvā pavedentī**ti ye imaṃca lokaṃ parañca lokaṃ abhivisiṭṭhāya paññāya sayam pacakkham katvā pavedenti, te natthīti sabbaññubuddhānaṃ abhāvaṃ dīpeti.

Vivattisampadāsuttavaṇṇanā niṭṭhitā.

1. Payonakasakkāro (Ka)

6. Apañṇakasuttādivaṇṇanā

119-120. Chaṭṭhe **chahi talehi samannāgato pāsakoti** catūsu passesu cattāri talāni, dvīsu koṭīsu dve talānīti evaṃ chahi talehi samannāgato pāsakakīlāpasutānaṃ maṇisadiso pāsakaviseso. Sattamaṃ uttānameva.

Apañṇakasuttādivaṇṇanā niṭṭhitā.

8. Paṭhamasoceyyasuttavaṇṇanā

121. Aṭṭhame **sucibhāvoti** kilesāsucivigamena suddhabhāvo asaṃkiliṭṭhabhāvo, atthato kāyasucaritādīni.

Paṭhamasoceyyasuttavaṇṇanā niṭṭhitā.

9. Dutiyasoceyyasuttavaṇṇanā

112. Navame samucchadavasena pahīnasabbakāyaduccaritatāya kāye, kāyena vā suci **kāyasuci**. Tenāha “**kāyadvāre**”ti-ādi. **Soceyyasampannanti** paṭippassaddhakilesattā parisuddhāya soceyyasampattiyā upetaṃ. Ninhātā aggamaggasalilena vikkhālītā pāpā etenāti **ninhātapāpako**, khīṇāsavo. Tenāha “**khīṇāsavova kathito**”ti.

Dutiyasoceyyasuttavaṇṇanā niṭṭhitā.

10. Moneyyasuttavaṇṇanā

123. Dasame munino bhāvā **moneyyāni**, yehi dhammehi ubhayahitamunanato muni nāma hoti, te munibhāvakarā moneyyā paṭipadā dhammā eva vuttā. Munino vā etāni **moneyyāni**, yathāvuttadhammā eva. Tattha yasmā kāyena akattabbassa akaraṇaṃ, kattabbassa ca

karaṇaṃ, “atthi imasmim̐ kāye kesā”ti-ādinā¹ kāyasaṅkhātassa ārammaṇassa jānaṇaṃ, kāyassa ca samudayato atthaṅgamato assādato ādinavato nissaraṇato ca yāthāvato pari jānanaṭā, tathā pari jānana vasena pana pavatto vipassanāmaggo, tena ca kāye chandarāgassa pajhanaṃ, kāyasaṅkhāraṃ nirodhetvā pattabbasamāpatti vā, sabbe ete kāyamukhena pavattā moneyyappaṭipadā dhammā **kāyamoneyyaṃ nāma**. Tasmā tamatthaṃ dassetuṃ “katamaṃ kāyamoneyyaṃ? Tividhakāyaduccaritassa pahānaṃ kāyamoneyyaṃ, tividhakāyasucaritampi kāya moneyyaṃ”ti-ādinā² pāḷi āgatā. Idhāpi teneva pāḷinayena atthaṃ dassento

“**tividhakāyaduccaritappahānaṃ kāyamoneyyaṃ nāma**”ti-ādimāha.

Idāni “katamaṃ vacīmoneyyaṃ? Catubbidhava cīduccaritassa pahānaṃ vacīmoneyyaṃ, catubbidhaṃ vacīsucaritaṃ, vācārammaṇe ñāṇaṃ, vācāpariññā, pariññāsahagato maggo, vācāya chandarāgassa pahānaṃ, vacīsaṅkhāranirodho dutiyajjhānasamāpatti cacīmoneyyaṃ”ti imāya pāḷiyā² vuttamatthaṃ atidīpento “**vacīmoneyyepi eseva nayo**”ti-ādimāha. Tattha copanavācañceva saddavācañca ārabha pavattā paññā **vācārammaṇe ñāṇaṃ**. Tassā vācāya samudayādito pari jānanaṃ **vācāpariññā**.

“Katamaṃ manomoneyyaṃ? Tividhamanoduccaritassa pahānaṃ manomoneyyaṃ, tividhaṃ manoduccaritaṃ, manārammaṇe ñāṇaṃ, manapariññā, pariññāsahagato maggo, manasmim̐ chandarāgassa pahānaṃ, cittasaṅkhāranirodho saññāvedayitanirodhasamāpatti manomoneyyaṃ”ti imāya pāḷiyā² āgatanayena atthaṃ vibhāvento “**manomoneyyepi imināva nayena atthaṃ ñatvā**”ti-ādimāha. Tattha ca ekāsītidham̐ lokiyacittaṃ ārabha pavattañāṇaṃ **manārammaṇe ñāṇaṃ**. Tassa samudayādito pari jānanaṃ **manapariññā**ti ayaṃ viseso.

Moneyyasuttavaṇṇanā niṭṭhitā.

Āpāyikavaggavaṇṇanā niṭṭhitā.

1. Dī 2. 233; Ma 1. 72; Saṃ 2. 329; Khu 1. 2 piṭṭhesu.

2. Khu 7. 44 piṭṭhe.

(13) 3. Kusināravagga

1. Kusinārasuttādivaṇṇanā

124-125. Tatiyassa paṭhame **taṇhāgedhena gathitoti** taṇhābandhanena baddho. **Taṇhāmucchanāyāti** taṇhāya vasena mucchāpattiyā. **Mucchitoti** mucchaṃ moham pamādaṃ āpanno. **Ajjhopannoti** adhi-opanno. Taṇhāya adhibhavitvā ajjhotthaṭṭho gilitvā pariniṭṭhapetvā viya ṭhito. Tenāha “**ajjhopannoti taṇhāya gilitvā pariniṭṭhapetvā pavatto**”ti. **Anādinavadassāvīti** gathitādibhāvena paribhoge ādinavamattampi na passati. **Nissaraṇapaṇṇoti** ayamatto āhāraparibhogeti tattha payojanaparicchedikā “yāvadeva imassa kāyassa ṭhitiyā”ti-ādinā¹ pavattā āhārapaṭibaddhachandarāganissaraṇabhūtā paṇṇā assa atthīti nissaraṇapaṇṇo. Sesamettha uttānameva. Dutiye natthi vattabbaṃ.

Kusinārasuttādivaṇṇanā niṭṭhitā.

3. Gotamakacetiyaṣuttavaṇṇanā

126. Tatiye **sambahulāti** pañcasatamattā. Pañcasatā kira brāhmaṇā tiṇṇaṃ vedānaṃ pāragū aparabhāge bhagavato dhammadesanaṃ sutvā kāmesu ādinavaṃ nekkhamme ca ānisaṃsaṃ passamānā bhagavato santike pabbajitvā na cirasseva sabbaṃ buddhavacanaṃ uggaṇhitvā pariyattim nissāya mānaṃ uppādesuṃ “yaṃ yaṃ bhagavā katheti, taṃ taṃ mayam khippameva jānāma. Bhagavā hi itthilingādīni tīṇi liṅgāni, nāmādīni cattāri padāni, paṭhamādayo satta vibhattiyo muñcivā na kiñci katheti, evaṃ kathite ca amhākaṃ paṇṭhipadaṃ nāma natthī”ti, te bhagavati agāravā hutvā tato paṭṭhāya bhagavato upaṭṭhānampi dhammassavanampi abhiṇṇaṃ na gacchanti. Te sandhāya vuttaṃ “**sambahulā kira brāhmaṇapabbajitā -pa-dhammassavanaṃ na gacchantī**”ti. **Mukhapaṭiṇṇaṃ gahetvāti** “saccaṃ kira tumhe bhikkhave”ti-ādinā tamatthaṃ paṭipucchitvā “saccaṃ bhagavā”ti tehi bhikkhūhi vuttaṃ paṭivacanaṃ gahetvā. Taṃ hi attano mukheneva paṭiṇṇātattā “mukhapaṭiṇṇā”ti vuccati.

1. Ma 1. 12; Ma 2. 18; Ma 3. 54; Saṃ 2. 323; Aṃ 2. 341; Aṃ 3. 15 piṭṭhesu.

Neva āgataṭṭhānaṃ na gataṭṭhānaṃ addasaṃsu. Kasmā? Aññāṇato. Te kira tassa suttassa atthaṃ na jānimsu. Tesāṃ hi tasmim̐ samaye vicitrānaṃ desanāvīlāsayuttampi taṃ suttaṃ ghanaputhulena dussapaṭṭena mukhaṃ baddhaṃ¹ katvā purato ṭhapitamanuññabhojanaṃ viya ahosi. Nanu ca bhagavā attanā desitaṃ dhammaṃ pare ñāpetuṃ kappasatasahassādhikāni cattāri asaṅkhyeyyāni pāramiyo pūretvā sabbaññutaṃ patto, so kasmā yathā tena jānanti, tathā desetīti? Tesāṃ mānabhañjanatthaṃ. Bhagavā hi “abhabbā ime imaṃ mānakhilaṃ anupahacca maggaṃ vā phalaṃ vā sacchikātun”ti tesāṃ sutapariyattim̐ nissāya uppannaṃ aṭṭhuppattim̐ katvā desanākusalo mānabhañjanatthaṃ “sabbadhammāmūlapariyāyan”ti-ādinā **mūlapariyāyasuttaṃ**² abhāsi.

Sammāsambuddho “mayhaṃ kathā niyyātī”ti mukhasampattameva kathetīti cintayimsūti idaṃ aṅguttarabhāṇakānaṃ vaḷaṅjanakatantinihārena vuttaṃ. Majjhimabhāṇakā pana evaṃ vadanti—evaṃ mānabhañjanatthaṃ desitañca pana taṃ suttaṃ sutvā te bhikkhū “taṃyeva kira pathaviṃ diṭṭhigatiko sañjānāti, sekhopi arahāpi tathāgatopi abhijānāti, kiṃ nāmidam̐ kathaṃ nāmidan”ti cintentā “pubbe mayaṃ bhagavatā kathitaṃ yaṃkiñci khippameva jānāma, idāni paṇimassa mūlapariyāyassa antaṃ vā koṭim̐ vā na jānāma na passāma, aho buddhā nāma appameyyā atulā”ti uddhatadāṭhā viya sappā nimmadā hutvā buddhūpaṭṭhānañca dhammassavanañca sakkaccaṃ agamaṃsu. Tena samayena dhammasabhāyaṃ sannisinnā bhikkhū “aho buddhānaṃ ānubhāvo, te nāma brāhmaṇapabbajitā tathā mānamadamattā bhagavatā mūlapariyāyadesanāya nihataṃānā katā”ti kathaṃ samuṭṭhāpesuṃ. Taṃ sutvā bhagavā “na bhikkhave idāneva, pubbepi ahaṃ evaṃ ime mānapaggahitasīse carante nihataṃāne akāsin”ti vatvā atītaṃ āharanto “bhūtapubbaṃ bhikkhave aññataro disāpāmokkho brāhmaṇo bārāṇasiyaṃ paṭivasati tiṇṇaṃ vedānaṃ pāragū sanighaṇṭukeṭubhānaṃ sākkharappabhedānaṃ itiyāsapañcamānaṃ padako veyyākaraṇo lokāyatamahāpurisalakkhaṇesu anavayo, so pañcamattāni māṇavakasatāni mante vāceti. Paṇḍitamāṇavakā bahuñca gaṇhanti lahuñca, suṭṭhu ca upadhārentī”ti-ādinā³ jātaṃ kathaṃ.

1. Mukhe bandhaṃ (Ma-Ṭṭha 1. 58 piṭṭhe.)

2. Ma 1. 1 piṭṭhe.

3. Jātaka-Ṭṭha 2. 237 piṭṭhe.

Taṃ sutvā te bhikkhū “pubbepi mayāṃ māneneva upahatā”ti bhīyyoso mattāya nihataṃānā hutvā attano upakāraṃmaṭṭhānaparāyaṇā ahesuṃ. Tato bhagavā ekaṃ samayaṃ janapadacārikaṃ caranto vesālim patvā gotamake cetiye viharanto imesaṃ pañcasatānaṃ bhikkhūnaṃ ṇānaparipākaṃ viditvā idaṃ gotamakassuttaṃ kathesi. Idañca suttaṃ sutvā te pañcasatā bhikkhū tasmim̐ yeva āsane saha paṭisambhidāhi arahattaṃ pāpuṇimsūti.

Abhiññāyāti kusalādibhedāṃ khandhādibhedañca desetabbaṃ dhammaṃ, veneyyānañca āsayānusayacariyādhimutti-ādibhedāṃ, tassa ca nesaṃ desetabbappakāraṃ yāthāvato abhijānitvāti attho. **Ime pañcakkhandhā dvādasāyatanānīti**-ādi panettha nidassanamattaṃ vuttanti vedītabbaṃ. **Sappaccayanti** sakāraṇaṃ, veneyyānaṃ ajjhāsayena vā pucchāya vā aṭṭhuppattiyā vāsanimittaṃ hetūdāharaṇasahitañcāti attho. Rāgādīnaṃ paṭiharaṇaṃpaṭihāriyaṃ, tadeva pāṭihāriyaṃ, saha pāṭihāriyenāti **sappāṭihāriyaṃ**. Rāgādippaṭisedhanavaseneva hi sathā dhammaṃ deseti. Teneha “**paccanīkapaṭiharaṇena sappāṭihāriyameva katvā**”ti. Apare pana “yathārahaṃ iddhi-ādesanānusāsanipāṭihāriyasahitaṃ”ti vadanti anusāsanipāṭihāriyarahitā desanā natthīti katvā. Sesamettha uttānameva.

Gotamakacetiyasuttavaṇṇanā niṭṭhitā.

4. Bharaṇḍukālāmasuttavaṇṇanā

127. Catutthe **āḷarakālāmakāle**ti āḷarakālāmānaṃ dharamānakāle. **Pariññanti** pahānapariññaṃ. Sā hi samatikkamo, na itarā. Tenāha “**pariññā nāma samatikkamo**”ti. Ettha ca paṭhamo sathā rūpāvaccarasamāpattilābhī daṭṭhabbo, dutiyo arūpāvaccarasamāpattilābhī, tatiyo sammāsambuddho daṭṭhabbo. Vuttaṃ hetāṃ **Puggalapaññattiyāṃ**¹—

1. Abhi 3. 142 piṭṭhe.

“Yvāyaṃ satthā kāmānaṃ pariññaṃ paññāpeti, na rūpānaṃ pariññaṃ paññāpeti, na vedanānaṃ pariññaṃ paññāpeti, rūpāvaccarasamāpattiyā lābhī satthā tena daṭṭhabbo. Yvāyaṃ satthā kāmānañca pariññaṃ paññāpeti, rūpānañca pariññaṃ paññāpeti, na vedanānaṃ pariññaṃ paññāpeti, arūpāvaccarasamāpattiyā lābhī satthā tena daṭṭhabbo. Yvāyaṃ satthā kāmānañca pariññaṃ paññāpeti, rūpānañca pariññaṃ paññāpeti, vedanānañca pariññaṃ paññāpeti, sammāsambuddho satthā tena daṭṭhabbo”ti.

Tattha titthiyā samayaṃ jānantā kādhānaṃ pariññaṃ paññāpeyyuṃ paṭhamajjhānaṃ vadamānā. Rūpānaṃ pariññaṃ paññāpeyyuṃ arūparāgaṃ vadamānā. Vedanāpariññaṃ paññāpeyyuṃ asaññārāgaṃ vadamānā. Te pana “idaṃ nāma paṭhamajjhānaṃ, ayaṃ rūpabhavo, ayaṃ asaññābhavo”tipi na jānanti. Te paññāpetuṃ asakkontāpi kevalaṃ “paññāpemā”ti vadanti. Tathāgato pana kāmānaṃ pariññaṃ anāgāmi maggena paññāpeti, rūpavedanānaṃ arahatthamaggena. Evamettha dve janā bāhirakā, eko sammāsambuddhoti imasmiṃ loke tayo satthāro nāma.

Bharaṇḍukālāmasuttavaṇṇanā niṭṭhitā.

5. Hatthakasuttavaṇṇanā

128. Pañcame **abhikkantā**ti atikkantā, vigatāti atthoti āha “**khaye dissati**”ti. Teneva hi “**nikkhanto paṭhamo yāmo**”ti anantaraṃ vuttaṃ. **Abhikkantataroti** ativiya kantataro. Tādiso ca sundaro bhaddako nāma hotīti āha “**sundare dissati**”ti. **Koti** devanāgayakkhagandhabbādīsu ko katamo. **Meti** mama. **Pādānī**ti pāde. **Iddhiyāti** imāya evarūpāya deviddhiyā. **Yasasāti** iminā edisena parivārena paricchena. **Jalanti** vijjotamāno. **Abhikkantenāti** ativiya kantena kamañiyena abhirūpena. **Vaṇṇenāti** chavivaṇṇena sarīravaṇṇanibhāya. **Sabbā obhāsayaṃ disāti** dasa disā pabhāsento, cando viya sūriyo viya ca ekobhāsaṃ ekālokaṃ karontoti gāthāya attho. **Abhirūpeti** uḷārarūpe sampannarūpe. **Abbhanumodaneti**

sampahaṃsane. **Idha panāti** “atikkantāya rattiyā”ti etasmim̄ pade. **Tenāti** sundarapariyāyattā. Khaye vā idha abhikkantasaddo daṭṭhabbo, tena “abhikkantāya parikkhīṇāya rattiyā”ti vuttam̄ hoti.

Rūpāyatanādīsūti ādisaddena akkharādīnam̄ saṅgaho daṭṭhabbo. **Suvaṇṇavaṇṇoti** suvaṇṇacchavīti ayamettha atthoti āha “**chaviyan**”ti. Tathā hi vuttam̄ “kañcanasannibhattaco”ti¹. **Saññūḥhāti** sambandhitā, ganthitāti attho. **Vaṇṇāti** guṇavaṇṇāti āha “**thutiyān**”ti, thomanāyanti attho. **Kulavaggeti** khattiyādikulakoṭṭhāse. Tattha “accho vippasanno”ti-ādinā vaṇṇitabbaṭṭhena **vaṇṇo**, chavi. Vaṇṇanaṭṭhena abhitthavaṭṭhena **vaṇṇo**, thuti. Aññamaññam̄ asaṅkarato vaṇṇetabbato ṭhapetabbato **vaṇṇo**, khattiyādikulavaggo. Vaṇṇiyati ṇāpiyati etenāti **vaṇṇo**, ṇāpakakāraṇam̄. Vaṇṇanato thūlarassādibhāvena upaṭṭhānato **vaṇṇo**, saṅṭhānam̄. Mahantam̄ khuddakam̄ majjhimanti vaṇṇetabbato pamitabbato **vaṇṇo**, pamāṇam̄. Vaṇṇiyati cakkhunā passiyatīti **vaṇṇo**, rūpāyatananti evam̄ tasmim̄ tasmim̄ atthe vaṇṇasaddassa pavatti veditabbā. **Soti** vaṇṇasaddo **chaviyā daṭṭhabbo** rūpāyatane gayhamānassapi chavimukheneva gahetabbato. Chavigatā pana vaṇṇadhātu va “suvaṇṇavaṇṇo”ti ettha vaṇṇaggahaṇena gahitāti apare.

Kevalaparipuṇṇanti ekadesampi asesetvā niravasesatova paripuṇṇanti ayamettha atthoti āha “**anavasesatā attho**”ti. **Kevalakappāti kappa**-saddo nipāto padapūraṇamattam̄, “kevalam̄” icceva attho. Kevalasaddo ca bahulavācīti āha “**yebhuyyatā attho**”ti. Keci pana “īsakam̄ asamattam̄² kevalam̄ kevalakappan”ti vadanti. Anavasesattho ettha kevalasaddo siyā, anattantarena pana kappasaddena padavaḍḍhanam̄ kataṃ “kevalā eva kevalakappā”ti. Tathā vā³ kappanīyattā paññapetabbattā kevalakappā. **Abyāmissatā** vijātiyena asaṅkaro suddhatā. **Anatirekatā** taṃparamatā⁴ visesābhāvo.

1. Ma 2. 351; Khu 1. 367 piṭṭhesu.

2. Imassa pana sādhippāyo attho moggallānabyākhyāyam̄ catutthakaṇḍe (120) suttabyākhyāto gahetabbo.

3. Atha vā (pāthikavagge āṭānāṭiyasuttaṭīkāya)

4. Gammakattā (Ka) Saṃ-Ṭī 1. 43 piṭṭhe passitabbam̄.

Kevalakappanti kevalaṃ daḷhaṃ katvāti attho. Kevalaṃ vuccati nibbānaṃ sabbasaṅkhatavivittatā, taṃ etassa adhigataṃ¹ atthīti **kevalī**, sacchikatanirodho khīṇāsavo.

Kappa-saddo paṇāyaṃ sa-upasaggo anupasaggo cāti adhippāyena okappaniyapade labbhamānaṃ okappasaddamattaṃ nidasseti, aññathā kappasaddassa atthuddhāre okappaniyapadaṃ anidassanameva siyā. **Samaṇakappehī**ti vinayasiddhehi samaṇavohārehi. **Niccakappanti** niccakālaṃ. **Paññatthī**ti nāmaṃ. Nāmaṃ hetuṃ tassa āyasmato, yadidaṃ kappoti. **Kappitakesamassū**ti katthariyā cheditakesamassu. **Dvaṅgulakappoti** majjhanhikavelāya vītikantāya dvaṅgulabhāvīkappo. **Lesoti** apadeso. Anavasesaṃ pharituṃ samatthassa obhāsassa kenaci kāraṇena ekadesapharaṇampi siyā, ayaṃ pana sabbasseva pharātīti dassetuṃ samantattho kappasaddo gahitoti āha “**anavasesaṃ samantato**”ti.

Ābhāya pharitvāti vatthamālālaṅkārasarīrasamuṭṭhitāya ābhāya pharitvā. Devatānaṃ hi sarīrobhāsaṃ dvādasayojanamattaṃ ṭhānaṃ tato bhiyyopi pharitvā tiṭṭhati, tathā vatthābharaṇādisamuṭṭhitā pabhā.

Hatthakasuttavaṇṇanā niṭṭhitā.

6. Kaṭuviyasuttādivaṇṇanā

129. Chaṭṭhe gāvīnaṃ kayavikkayaavasena yogo etthāti goyogo, kayavikkayaṃ karonto gāvīhi yujjanti etthāti vā goyogo, gāvīnaṃ vikkayaṭṭhānaṃ. Tattha jāto pilakkharukkho **goyogapilakkho**, tasmimī. Samīpatthe cetāṃ bhummavacanaṃ. Tenāha “**gāvīnaṃ vikkayaṭṭhane utṭhitapilakkhassa santike**”ti. Ritto assādo etassāti **rittassādo**. Tenāha “**jhānasukhābhāvena rittassādan**”ti. Sesamettha uttānameva.

Kaṭuviyasuttādivaṇṇanā niṭṭhitā.

1. Adhimattaṃ (Ka)

8. Dutiya-anuruddhasuttavaṇṇanā

131. Aṭṭhame **idam te mānasminti** ettha **manasminti** paccatte bhummavacanam. Idanti ca liṅgavipallāsenā napumsakaniddeso katoti āha “**ayam te navavidhena vaḍḍhitamāno**”ti. Sesesupi eseva nayo.

Dutiya-anuruddhasuttavaṇṇanā niṭṭhitā.

9. Paṭicchannasuttavaṇṇanā

132. Navame **asādhāraṇasikkhāpadanti** bhikkhunīnaṃ asādhāraṇaṃ bhikkhūnaṃ yeva paññattasikkhāpadaṃ. **Sādhāraṇasikkhāpadanti** bhikkhūnaṃ bhikkhunīnaṃca sādharmaṇaṃ ubhatopaññattasikkhāpadaṃ.

Paṭicchannasuttavaṇṇanā niṭṭhitā.

10. Lekhasuttavaṇṇanā

133. Dasame **thiraṭṭhānatoti**¹ thiraṭṭhānatova. Pāsāṇe lekhasadisā parāparādhanibbattā kodhalekhā yassa so pāsāṇalekhūpamasamannāgato **pāsāṇalekhūpamoti** vutto. Evaṃ itarepi. **anusetīti** appahīnatāya anuseti. **Na khippaṃ lujjatīti** na antarā nassati kammaṭṭhānena nassanato. **Evamevanti** evaṃ tassapi puggalassa kodho na antarā punadivase vā aparadivase vā niṭṭhiti, addhaniyo pana hoti, maraṇena niṭṭhātīti attho. **Kakkhaḷenāti** atikakkhaḷena mammacchedakena thaddhavacanena. **Samsandatīti** ekībhavati. **Sammodatīti** nirantaro hotīti evamettha attho daṭṭhabbo.

Atha vā **sandhiyatīti** ṭhānagamanādīsu kāyakiriyāsu kāyena samodhānaṃ gacchati, tilataṇḍulā viya missībhāvaṃ upetīti attho. **Samsandatīti** cittakiriyāsu cittaena samodhānaṃ gacchati, khīrodakaṃ viya ekībhāvaṃ upetīti attho. **Sammodatīti** uddesaparipucchādīsu

1. Idam padaṃ pāliyaṃ aṭṭhakathāyaṅca natthi.

vacīkiriyaṣu vācāya samodhānaṃ gacchati, vippavāsāgatovi piyasahāyako viya piyatarabhāvaṃ upetīti attho. Apica kiccakaraṇīyesu tehi saddhiṃ āditova ekakiriyaḅhāvaṃ upagacchanto **sandhiyati**, yāva majjhā pavattanto **samsandati**, yāva pariyoṣānā anivattanto **sammodatīti** veditaḅbo.

Lekhasuttavaṇṇanā niṭṭhitā.

Kusināravaggavaṇṇanā niṭṭhitā.

(14) 4. Yodhājīvavagga

1. Yodhājīvasuttavaṇṇanā

134. Catutthasā paṭhame yujjhanaṃ yodho, so ājīvo etassāti **yodhājīvo**. Yuddhamupajīvatīti vā etasmiṃ atthe **yodhājīvoti** niruttinayena padasiddhi veditaḅbā. Tenāha “**yuddham upajīvatīti yodhājīvo**”ti. **Saha -pa-** passatīti pubbhāge vipassanāpaññāya sammāsanavasena, maggakkhaṇe abhisamayavasena attapaccakkhena ñāṇena passati.

Yodhojīvasuttavaṇṇanā niṭṭhitā.

2. Parisāsuttavaṇṇanā

135. Dutiye **appaṭipucchivā vinītāti** “taṃ kiṃ maññatha bhikkhave rūpaṃ niccaṃ vā aniccaṃ vā”ti-ādinā **appaṭipucchivā** kevalaṃ dhammadesanāvaseneva vinītaparisā. **Dubbiniṭtaparisāti** dukkhena vinītaparisā. **Pucchivā vinītāti** “taṃ kiṃ maññatha bhikkhave”ti-ādinā **pucchivā** anumattiggahaṇavasena vinītā. **Suvinītaparisāti** sukhena vinītaparisā. Anumatiggahaṇavasena vinayanaṃ hi na dukkaraṃ hoti.

Parisāsuttavaṇṇanā niṭṭhitā.

4. Uppādāsuttavaṇṇanā

137. Catutthe **uppādā vā tathāgatānantī** tathāgatānaṃ uppādepi veneyyapuggalānaṃ maggaphaluppatti viya saṅkhārānaṃ aniccādisabhāvo na tathāgatuppādāyatto, atha kho tathāgatānaṃ uppādepi anuppādepi hotiyevāti vuttam hoti. **Ṭhitāva sā dhātūti** ṭhito eva so aniccāsabhāvo byabhicārābhāvato na kadāci saṅkhārā aniccā na hoti. Kāmaṃ asaṅkhatā viya dhātu na nicco so sabhāvo, tathāpi sabbakālikoyevāti adhippāyo.

Aparo nayo—**ṭhitāva sā dhātūti** “sabbe saṅkhārā aniccā”ti esā dhātu esa sabhāvo tathāgatānaṃ uppādato pubbe uddhañca appaṭivijjhiyamāno na tathāgatehi uppādito, atha kho sabbakālaṃ sabbe saṅkhārā aniccā, ṭhitāva sā dhātu, kevalaṃ pana sayambhuññaṇena abhisambujjhanato “ayaṃ dhammo tathāgatena abhisambuddho”ti pavedanato ca tathāgato dhammassāmīti vuccati apubbassa tassa uppādanato. Tena vuttam **“ṭhitāva sā dhātū”**ti.

Abhisambujjhatīti ñāṇena abhisambujjhati. **Abhisametīti** ñāṇena abhisamāgacchati. **Ācikkhatīti** katheti. **Desetīti** dasseti. **Paññāpetīti** jānāpeti. **Paṭṭhapetīti** ñāṇamukhe ṭhapeti. **Vivaratīti** vivaritvā dasseti. **Vibhajātīti** vibhāgato dasseti. **Uttānīkarotīti** pākāṭam karoti.

Atha vā **abhisambujjhatīti** paccakkhakaṇaṇena abhimukhaṃ bujjhati, yāthāvato paṭivijjhati. Tato eva **abhisameti** abhimukhaṃ samāgacchati. Ādito kathento **ācikkhati**, uddisatīti attho. Tameva uddesaṃ pariyosāpento **deseti**. Yathā-uddiṭṭhamatthaṃ nidassanavasena pakārehi ñāpento **paññāpeti**. Pakārehi etamatthaṃ patiṭṭhapento **paṭṭhapeti**. Yathā-uddiṭṭhaṃ paṭinidassanavasena **vivarati vibhajati**. Vivaṭam vibhattañca atthaṃ hetūdāharaṇadassanehi pākāṭam karonto **uttānīkaroti**.

Uppādāsuttavaṇṇanā niṭṭhitā.

5. Kesakambalasuttādivaṇṇanā

138-143. Pañcame **tantāvutānaṃ vatthānanti** idaṃ “yāni kānicī”ti iminā samānādhikaraṇanti āha “**paccatte sāmivacanan**”ti. **Vāyitānanti** vītānaṃ. **Lāmakoti** nihīno, **makkhali moghapurisoti** ettha **makkhalī**ti tassa nāmaṃ. Taṃ kira sakaddamāya bhūmiyā telaghaṭaṃ gahetvā gacchantāṃ “tāta mā khalī”ti sāmiko āha. So pamādena khalitvā patitvā sāmikassa bhayena palāyituṃ āradhho. Sāmiko upadhāvitvā naṃ dussakaṇṇe aggahesi, sāṭakaṃ chaḍḍetvā acelako hutvā palāyi. So paṇṇena vā tiṇena vā paṭicchādetumpi ajānanto jātarūpeneva ekaṃ gāmaṃ pāvīsi. Manussā taṃ disvā “ayaṃ samaṇo arahā appiccho, natthi iminā sadiso”ti pūvabhaddānī gahetvā upasaṅkamanti. So “mayhaṃ sāṭakaṃ anivatthabhāvena idaṃ uppannaṃ”ti tato paṭṭhāya sāṭakaṃ labhitvāpi na nivāsesi, tadeva ca pabbajjāṃ aggahesi. Tassa santike aññepi aññepīti pañcasatā manussā pabbajjīṃsu. Taṃ sandhāyāha “makkhali moghapuriso”ti. Chaṭṭhādīni uttānattāni eva.

Kesakambalasuttādivaṇṇanā niṭṭhitā.

11. Paṭhamamorānivāpasuttādivaṇṇanā

144-146. Ekādasame akuppadhammatāya khayavayasaṅkhātāṃ antaṃ atītāti accantā, evaṃ¹ aparihāyanasabhāvattā accantā niṭṭhā assāti **accantaniṭṭho**. Tenāha “**antaṃ atikkantaniṭṭho**”ti-ādi. Na hi paṭividdhassa lokuttaradhammassa dassanaṃ kuppanaṃ nāma atthi. **Dhuvaniṭṭhoti** satataniṭṭho. Accantameva catūhi yogehi khemo etassa atthīti **accantayogakkhemī**, nīccayogakkhemīti attho. Maggabrahmacariyassa vusitattā tassa avihāyanasabhāvattā accantaṃ brahmacārīti **accantabrahmacārī**, nīccabrahmacārīti attho. **Pariyosānanti** brahmacariyapariyosānaṃ

1. Sā eva (Ka)

vaṭṭadukkhapariyosānañca. Accantaṃ pariyosānamassāti **accantapariyosāno**.
Dvādasama terasamāni uttānatthāneva.

Paṭhamamoraniṅgavaṇṇanā niṭṭhitā.

Yodhājīvavaggavaṇṇanā niṭṭhitā.

147-156. Maṅgalavaggo uttānatthoyeva.

Tatiyapaṇṇāsako niṭṭhito.

(16) 6. Acelakavaggavaṇṇanā

157-163. Ito paresu pana suttapadesu “**gāḷhā**”ti vuttamatthaṃ vivaranto “**kakkhaḷā**”ti āha. Kakkhaḷacāro cassā na lūkhasabhāvo, atha kho taṇhāvasena thiraggahaṇanti āha “**lobhavasena thiraggahaṇā**”ti. **Agāḷhā paṭipadā**ti vā kāmānaṃ ogāhanaṃ paṭipatti, kāmasukhānuyogoti attho. **Nijjhāmā paṭipadā**ti kāyassa nijjhāpanavasena khepanavasena pavattā paṭipatti, attakilamathānuyogoti attho. **Nicceloti** nissaṭṭhacelo sabbena sabbaṃ paṭikkhittacelo. Naggiyavatasamādānena **naggo**. **Ṭhitakova uccāraṃ karotī**-ādi nidassanamattaṃ vamtivā mukhavikkhālanādi-ācārassapi tena vissaṭṭhattā. **Jivhāya hatthaṃ apalekhati** avalekhati udakena adhovanato. Dutiyavikappepi eseva nayo. “Ehi bhadante”ti vutte upagamanasaṅkhāto vidhi ehibhadanto, taṃ caratīti ehibhadantiko, tappaṭikkhepena **na ehibhadantiko**. **Na karoti** “samaṇena nāma parassa vacanakarena na bhavitabban”ti adhippāyena.

Puretaranti taṃ ṭhānaṃ attano upagamanato puretaraṃ. Taṃ kira so “bhikkhunā nāma yādicchakā eva bhikkhā gahetabbā”ti adhippāyena na gaṇhāti. **Uddissa kataṃ** mama nimittabhāvena bahū khuddakā pāṇā saṃghātaṃ āpāditāti na gaṇhāti. **Nimantanā na sādīyati** evaṃ tesāṃ vacanaṃ kataṃ bhavissatīti. Kumbhizādīsipi so sattasaññīti āha “**kumbhikaḷo piyo**”ti-ādi. **Kabaḷantarāyo hotīti** uṭṭhitassa dvinnampi kabaḷantarāyo hoti. Gāmasabhāgādivasena saṅgama kittenti etissāti **saṅkitti**, yathāsaṃhatataṇḍulādīsaṅcayo. **Mānusakānīti** veyyāvaccakarā manussā.

Surāpānamevāti majjalakkhaṇappattāya surāya pānameva. Surāgahaṇenevettha merayampi saṅgahitaṃ. Ekāgārameva uñchatīti **ekāgāriko**. Ekālopeveva vattatīti **ekālopiko**. Dīyati etāyāti **datti**, dvatti-ālopamattaggāhi khuddakaṃ bhikkhādānabhājanaṃ. Tenāha “**khuddakapāti**”ti. Abhuñjanavasena eko aho etassa atthīti ekāhiko, āhāro, taṃ **ekāhikaṃ**. So pana atthato ekadivasāṃ laṅghako hotīti āha “**ekadivasantarikaṃ**”ti. **Dvāhikanti**-ādīsupi eseve nayo. Ekāhaṃ abhuñjitvā ekāhaṃ bhuñjanaṃ **ekāhavāro**, taṃ ekāhikameva atthato. Dvīhaṃ abhuñjitvā dvīhaṃ bhuñjanaṃ **dvīhavāro**. Sesapadadvayepi eseve nayo. Ukkattho pana pariyaabhataḥojaniko dvīhaṃ abhuñjitvā ekāhameva bhuñjati. Sesadvayepi eseve nayo.

Micchāvāyāmaseneva ukkuṭikavatānuyogoti āha “**ukkuṭikavīriyamanuyutto**”ti. **Attakilamathānuyoganti** attano kilamathānuyogaṃ, sarīradukkhakāraṇanti attho. Sarīrapariyāyo hi idha attasaddo “attantapo”ti-ādīsū¹ viya. **Dve anteti** ubho koṭṭiyo, ubho lāmakapaṭipattiyoti attho. Lāmakampi hi antoti vuccati “antamidam bhikkhave jīvikānaṃ², koṭṭhako anto”ti evamādīsū³. Majjhimaṭṭipadāya uppathabhāvena amanīyā gantabbā nātābbāti **antā**. Tato eva lāmakā.

Acelakavaggavaṇṇanā niṭṭhitā.

Peyyālavaggavaṇṇanā

164-184. **Samanuñño**ti sammadeva katānuñño. Tenāha “**samānajjhāsayo**”ti. Sesamettha uttānameva.

Iti manorathapūraṇiyā aṅguttaranikāyaṭṭhakathāya

Tikanipātavaṇṇanāya anuttānatthadīpanā samattā.

1. Ma 2. 365 piṭṭhe.

2. Saṃ 2. 76; Khu 1. 255 piṭṭhesu.

3. Khu 4. 90 piṭṭhe.

Catukkanipāta

1. Paṭhamapaṇṇāsaka

1. Bhaṇḍagāmaṅga

1. Anubuddhasuttādivaṇṇanā

1-2. Catukkanipātassa paṭhame ānubodho pubbabhāgiyaṃ ñāṇaṃ, paṭivedho anubodhena abhisamayo. Tattha yasmā anubodhapubbako paṭivedho anubodhena vinā na hoti. Anubodho hi ekacco paṭivedhasambaddho, tadubhayābhāvahetukañca vaṭṭe saṃsaraṇaṃ, tasmā vuttaṃ pāḷiyaṃ “ananubodhā -pa- tumhākañcā”ti. Paṭisandhiggahaṇavasena bhavato bhavantarūpagamaṇaṃ **sandhāvanaṃ**, aparāparaṃ cavanūpapajjanavasena sañcaraṇaṃ **saṃsaraṇanti** āha “**bhavato**”ti-ādi. Sandhāvitasāṃsaritapadānaṃ kammaśādhanaṃ sandhāyāha “**mayā ca tumhehi cā**”ti paṭhamavikappe. Dutiyavikappe pana bhāvasādhanaṃ hadaye katvā “**mamañceva tumhākañcā**”ti yathārutavaseneva vuttaṃ. Dīgharajjunā baddhasakuṇaṃ viya rajjuhattho puriso desantaram taṇhārajjunā baddhaṃ sattasantānaṃ abhisāṅkhāro bhavantaraṃ neti etāyāti **bhavanetti**. Tenāha “**bhavarajjū**”ti-ādi.

Vaṭṭadukkhassa antakaroti sakalavaṭṭadukkhassa sakasantāne parasantāne ca vināsakaro abhāvakaro. Buddhacakkhu dhammacakkhu dibbacakkhu māṃsacakkhu samantacakkhusāṅkhātehi **pañcahi cakkhūhi cakkhumā**. Savāsanānaṃ kilesānaṃ samucchinnatā sātisaṃyamaṃ kilesapariniḥḥānaṃ **parinibbuto**. Dutiyaṃ uttānameva.

Anubuddhasuttādivaṇṇanā niṭṭhitā.

3. Paṭhamakhatasuttādivaṇṇanā

3-4. Tatiye **kalinti** aparādham. **Vicinātīti** ācīnoti pasavati. **Tena ca kalinā sukham na paṭilabhatīti** tena aparādhena sukham na vindati. Nindiyappasamsāya hi pasamsīyanindāya ca samakova vipāko. **Pasamsīyanindāti** ca sampannaguṇaparidhamśanavasena pavattiyā mahāsāvajjatāya kaṭukataravipākā. Nindiyappasamsā pana katham tāya samavipākāhi ce? Tasmim avijjamānaguṇasamāropanena attano paresañca micchāpaṭipattihetubhāvato pasamsīyena tassa sabbhāvakaṇato ca. Lokepi hi asūram sūrena samam karonto gārayho hoti, pageva duppaṭipannaṃ suppaṭipannena samam karontoti. **Sakena dhanenāti** attano sāpateyyena. **Appamattakova kalīti** diṭṭhadhammikattā sappaṭikārattā ca appamattako aparādho. **Ayam -pa- mahantataro kali** katūpacitattā samparāyikattā appaṭikārattā ca.

Nirabbudoti gaṇanāvīseso esoti āha “**nirabbudagaṇanāyā**”ti, sataśahassam nirabbudāti attho. Nirabbudaparimāṇam pana vassagaṇanāya evam vedītabbām. Yatheva hi satam sataśahassānam koṭi hoti, evam satam satasāśahassānam koṭiyo pakoti nāma hoti, satam sataśahassānam pakotiyo koṭipakoti, satam sataśahassakoṭipakotiyo nahutam, satam sataśahassanahutāni ninnahutam, satam sataśahassaninnahutāni ekam abbudam, tato vīsatiḡuṇitam nirabbudam. **Yam ariye garahanto nirayam upapajjati** ariye garahanto yam nirabbudasaṅkhātam nirayam upapajjati, nirabbudoti ca pāṭiyekko nirayo natthi, avīcimhiyeva pana nirabbudagaṇanāya paccitabbaṭṭhānassetam nāmam. Catuttham uttānameva.

Paṭhamakhatasuttādivaṇṇanā niṭṭhitā.

5. Anusotasuttavaṇṇanā

5. Pañcame **anusotam gacchatīti** samsārasotassa anukūlabhāvena gacchati. **Paccanīkapaṭipattiyāti** samsārasotassa paṭikūlavasena

pavattanibbidānupassanādipaṭipattiyā. **Ṭhitasabhāvoti** acalappasādādisamannāgadena ṭhitasabhāvo. Anāgāmī hi assaddhiyehi kāmarāgabyāpādehi akampaniyacittattāya tamhā lokā anāvattidhammatāya ca ṭhitasabhāvo nāma. **Ogham taritvāti** kāmoghādicatubbidham ogham atikkamitvā. **Paratīram gatoti** nibbānapāram gato. **Brāhmaṇoti** bāhitapāpatāya brāhmaṇoti saṅkham gato khīṇāsavo. Tenāha “**setṭho niddoso**”ti. **Pañcaverakammanti** pāṇātipātādipañcaduccaritam. **Sahāpi dukkhena sahāpi domanassenāti** kilesapariyuṭṭhāne sati uppanna dukkhadomanassena saddhimpī. **Paripuṇṇanti** tissannaṃ sikkhānaṃ ekāyapi anūnaṃ. **Parisuddhanti** nirupakkilesaṃ. **Brahmacariyanti** setṭhacariyaṃ. Iminā varena sotāpannasakadāgāmino kathitā. Kim pana te rudantā brahmacariyaṃ carantīti? Āma, kilesarodanena rodantā caranti nāma, sīlasampanno puthujjanabhikkhu ettheva saṅgahito.

Cetovimuttinti phalasaṃmadhiṃ. **Paññāvimuttinti** phalaññaṃ. **Chahākārehi pāragatoti** abhiññāpāragū pariññāpāragū bhāvanāpāragū pahānapāragū sacchikiriyāpāragū samāpattipāragūti evaṃ chahi ākārehi sabbadhammānaṃ pāram pariyojanaṃ gato. Sesamettha suviññeyyameva.

Anusotasuttavaṇṇanā niṭṭhitā.

6. Appassutasuttavaṇṇanā

6. Chaṭṭhe **appakaṃ sutam hoti**ti navaṅgasatthusāsane kiñcīdeva sutam hoti. Tadeva navaṅgasatthusāsanaṃ dassetuṃ “**suttam geyyan**”ti-ādi vuttam. Tattha suttādāni vibhajitvā dassento “**ubhatovibhaṅganiddesakkhandhakaparivārā**”ti-ādimāha. Katham panāyaṃ vibhāgo yujjeyya. Sagāthakaṃ hi suttam geyyam, niggāthakaṃ suttam veyyākaraṇam. Tadubhayavinimuttañca suttam udānādivisesasaññārahitaṃ natthi, yaṃ suttāṅgaṃ siyā. **Maṅgalasuttādīnañca**¹ suttāṅgasāṅgaho na siyā gāthābhāvato dhammapadādīnaṃ

1. Khu 1. 3, 318 piṭṭhesu.

viya. Geyyaṅgasaṅgaho vā siyā sagāthakattā sagāthāvaggassa viya. Tathā Ubhatovibhaṅgādīsu sagāthakappadesānanti? Vuccate—

Suttanti sāmāññavidhi, visesavidhayo pare.
Sanimittā niruḷhattā, sahatāññena nāññato¹.

Sabbassapi hi buddhavacanassa suttanti ayam **sāmāññavidhi**. Tenevāha āyasmā mahākaccāno **nettiyam**² “navavidhasuttantapariyettihī”ti. Ettakaṃ tassa bhagavato suttāgataṃ suttapariyāpannaṃ³ sakavāde pañca sutta satānīti⁴ evamādi ca etassa atthassa sādhaṃ. **Visesavidhayo pasesanimittā**tadekadesesu geyyādayo visesavidhayo tena tena nimittena patiṭṭhitā. Tathā hi geyyassa sagāthakattaṃ tabbhāvanimittam. Lokepi hi sasilokaṃ sagāthakaṃ vā cuṇṇiyaganthaṃ “geyyan”ti vadanti, gāthāvirahe pana sati puccham katvā vissajjanabhāvo veyyākaraṇassa tabbhāvanimittam. Pucchāvissajjanaṃ hi “byākaraṇan”ti vuccati. Byākaraṇameva veyyākaraṇam. Evaṃ sante sagāthakādīnampi puccham katvā vissajjanavasena pavattānam veyyākaraṇabhāvo āpajjati? Nāpajjati geyyādīsaññānam anokāsabhāvato, “gāthāvirahe satī”ti visesitattā ca. Tathā hi dhammapadādīsu kevalam gāthābandhesu sagāthakattepi somanassaññāmayikagāthāyuttesu “vuttaṃ hetan”ti-ādivacanasambandhesu abbhutadhammappaṭisaṃyuttesu ca suttavisesesu yathākkamaṃ gāthā-udāna-itivuttaka-abbhutadhammasaṃñā patiṭṭhitā, tathā satipi gāthābandhabhāve bhagavato atītāsu jātīsu cariyānubhāvappakāsakesu jātakasaṃñā, satipi pañhavissajjanabhāve sagāthakatte ca kesuci suttantesu vedassa labhāpanato vedallasāññā patiṭṭhitāti evam tena tena sāgāthakattādinā nimittena tesu tesu suttavisesesu geyyādīsaññā patiṭṭhitāti visesavidhayo suttāṅgato pare geyyādayo, yaṃ panettha geyyaṅgādinimittarahitaṃ, taṃ suttāṅgaṃ visesasaññāparihārena sāmāññasaññāya pavattanato. Nanu ca sagāthakaṃ suttam geyyam, niggāthakaṃ

1. Netti-Ṭṭha 13; Dī-Ṭṭi 1. 32; Sārattha-Ṭṭi 1. 93 piṭṭhesu.

2. Khu 10. 1 piṭṭhe.

3. Vi 2. 72, 470 piṭṭhesu.

4. Abhi-Ṭṭha 1. 5, 6, 9; Abhi-Ṭṭha 3. 105 piṭṭhesu.

suttaṃ veyyākaraṇanti suttaṅgaṃ na sambhavatīti codanā tadavatthāvāti? Na tadavatthā sodhitattā. Sodhitam hi pubbe “gāthāvirahe sati pucchāvissajjanabhāvo veyyākaraṇassa tabbhāvanimittan”ti.

Yañca vuttam “gāthābhāvato maṅgalasuttādīnam suttaṅgasāṅgaho na siyā”ti, tam **na, niruḷhattā**. Niruḷho hi maṅgalasuttādīnam suttabhāvo. Na hi tāni dhammapadabuddhavaṃsādayo viya gāthābhāvena paññātāni, atha kho suttabhāveneva. Teneva hi aṭṭhakathāyaṃ “suttanāmakam”ti nāmaggaṇaṃ katam. Yam pana vuttam “sagāthakattā geyyaṅgasāṅgaho siyā”ti, tadapi natthi, yasmā **sahataññena**. Saha gāthāhīti hi sagāthakam. Sahabhāvo nāma atthato aññena hoti, na ca maṅgalasuttādīsu gāthāvinimutto koci suttapadeso atthi, yo “saha gāthāhī”ti vucceyya, na ca samudāyo nāma koci atthi. Yadapi vuttam “ubhatovibhaṅgādīsu sagāthakappadesanam geyyaṅgasāṅgaho siyā”ti, tadapi na, aññato. Aññā eva hi tā gāthā jātakādīpariyāpanattā. Ato na tāhi ubhatovibhaṅgādīnam geyyaṅgabhāvoti. Evaṃ suttādīnam aṅgānam aññamaññam saṅkarābhāvo veditabbo. Ayamettha saṅkhepo, vitthāro pana samantapāsādikāya vinayasamvaṇṇanāya **sāratthadīpaniyā**¹ amhehi pakāsito, icchantehi tatoyeva gahetabbo.

Na atthamaññāya dhammamaññāya dhammānudhammapaṭipanno hotīti aṭṭhakathaṅca pālīṅca jānitvā lokuttaradhammassa anurūpadhammam pubbhāgappaṭipadam paṭipanno na hotīti evamettha sambandho veditabbo. Tenevāha “na atthamaññāya dhammamaññāyāti aṭṭhakathaṅca pālīṅca jānitvā² **-pa- na paṭipanno hotī”ti.**

Appassutasuttavaṇṇanā niṭṭhitā.

7. Sobhanasuttavaṇṇanā

7. Sattame **paññāveyyattiyenāti** saccasampaṭivedhādīpaññāveyyattiyena. **Vinayam upetāti** tadāṅgādivasena kilesānam vinayam upetā.

1. Sārattha-Ṭī 1. 93 piṭṭhe.

2. Ajānitvā (Ka) Abhi-Ṭītha 3. 95 piṭṭhe passitabham.

Vesārajjenā¹ sārājjarānaṃ diṭṭhivicikicchādipāpadhammānaṃ vigamanato vesārajjena, sārajarahitenāti attho. Tepiṭakavasena bahu sutam etesanti **bahussutā**. Tameva pariyattidhammaṃ dhārenti suvaṇṇabhājane pakkhittasīhavasam viya vinassantaṃ akatvā suppaguṇasuppavattibhāvena hadaye ṭhapentīti **dhammadharā**. Edisā ca attanā sutassa dhammassa ādhārabhūtā nāma hontīti āha “**sutadhammānaṃ ādhārabhūtā**”ti.

Sobhanasuttavaṇṇanā niṭṭhitā.

8. Vesārajjasuttavaṇṇanā

8. Aṭṭhame byāmohavasena saraṇapariyesanaṃ sārājjanam sārado, byāmohabhayaṃ. Vigato sārado etassāti visārado, tassa bhāvo **vesārajjam**. Tam pana nāṇasampadam pahānasampadam desanāvisesasampadam khemañca nissāya pavattam catubbidhapaccavekkhaṇañānaṃ. Tenāha “**catūsu ṭhānesū**”ti-ādi. Usabhassa idanti **āsataṃ**, seṭṭhaṭṭhānaṃ. Sabbaññutapaṭijānanavasena abhimukham gacchanti, aṭṭha vā parisā upasaṅkamantīti **āsabhā**, pubbapuddhā. **Idam panāti** buddhanaṃ ṭhānaṃ sabbaññutameva vadati. **Tiṭṭhamānovāti** avadantopi tiṭṭhamānova paṭijānāti nāmāti attho. **Upagacchatīti** anujānāti.

Aṭṭhasu parisāsūti “abhijānāmi kho panāham sārīputta anekasataṃ khattiyaparisaṃ upasaṅkamitā -pa- brāhmaṇaparisaṃ gahapatiparisaṃ samaṇaparisaṃ cātumahārājikaparisaṃ tāvatimsaparisaṃ māraparisaṃ brahmaparisaṃ upasaṅkamitā, tatrapi mayā sannisinnapubbañceva sallapitapubbañca sākacchā ca samāpajjitapubbā. Tatra vata maṃ ‘bhayaṃ vā sārājjanam vā okkamissatī’ti nimittametam sārīputta na samanupassāmi”ti² evaṃ vuttaparisaṃsu. **Abhītanādam nadatīti** parato dassitañāyogena visārado ahanti abhītanādam nadati. **Sīhanādasuttenāti** khandhavagge³ āgatena sīhanādasuttena.

“Devamanussānaṃ catucakkaṃ vattatī”ti⁴ suttasesena sappurisūpanissayādiphalaṃ sampattipavattī vuttā, purimasappurisūpanissayādi-upanissayā

1. Nissārajjenāti (Ka)

3. Sam 2. 70 piṭṭhe.

2. Ma 1. 104 piṭṭhe.

4. Am 1. 341 piṭṭhe.

pacchimasappurisūpanissayādisampattipavatti vā vuttā. Ādi-saddena tattha ca cakka-saddassa gahaṇaṃ veditabbaṃ. Vicakkasaṅṭhānā¹ asani eva **asanivicakkaṃ. Uracakkādīsūti ādi-saddena āṇāsamūhādīsūpi cakkasaddassa pavatti veditabbā.** “Saṃghabhedanā karissāma cakkabhedanā”ti-ādīsū² hi āṇā “cakkaṃ”ti vuttā. “Devacakkaṃ asuracakkaṃ”ti-ādīsū samūhoti.

Paṭivedhaniṭṭhattā arahattamaggañāṇaṃ paṭivedhoti “**phalakkhaṇe uppannaṃ nāma**”ti vuttaṃ. Tena paṭiladdhassapi desanāñāṇassa kiccanipphatti parassa bujjanamattena hotīti “**aññāsikoṇḍaññaṃ sotāpatti -pa- phalakkhaṇe pavattaṃ nāma**”ti vuttaṃ. Tato paraṃ pana yāva parinibbānā desanāñāṇappavatti tasseva pavattitassa dhammacakkassa ṭhānanti veditabbaṃ.

Dassitadhammesūti vuttadhammesu. Vacanamattameva hi tesāṃ, na pana dassanaṃ tādisassova dhammassa abhāvato. Bhagavato eva vā “ime dhammā anabhisambuddhā”ti parassa vacanavasena **dassitadhammesu.** “Dhammapaṭisambhidā”ti-ādīsū³ viya **dhamma-saddo** hetupariyāyoti āha “**sahadhammenāti sahetunā**”ti. **Hetūti** ca upapattisādhanahetu veditabbo, na kāraṇiko, sampāpako vā. **Nimittanti** codanāya kāraṇaṃ. Tattha codako codanaṃ karotīti **kāraṇaṃ**, dhammo codanaṃ karoti etenāti **kāraṇaṃ.** Tenāha “**puggalopi**”ti-ādi. **Khemanti** kenaci appaṭibāhiyabhāvena anupaddutaṃ.

Antarāyo etesaṃ atthi, antarāye vā niyuttāti **antarāsikā.** Evambhūtā pana te yasmā antarāyakaṃ nāma honti, tasmā āha “**antarāyaṃ karontīti antarāyikā**”ti. Asañcicca vītikkame nātisāvajjāti katvā vuttaṃ “**sañcicca vītikkantā**”ti. **Satta āpattikkhandhāti-ādi** nidassanamattaṃ itaresampi catunnaṃ “antarāyikā”ti vuttadhammānaṃ tabbhāve byabhicārābhāvato. **Idha pana methunadhammo adhippetoti** idaṃ aṭṭhuppattivasena vuttaṃ aritṭhasikkhāpadaṃ⁴ viya. Yasmā taṃ khaṇampi kāmānaṃ ādīnavaṃ disvā virato hoti ce, visesaṃ adhiḡacchati, na kāmesu āsatto, tasmā vuttaṃ “**methuna -pa- antarāyo hoti**”ti. Tattha yassa **kassacīti** na kevalaṃ pabbajitasseva, atha

1. Vaṭṭasaṅṭhānādi (Ka) Di-Ṭṭha 3. 21 piṭṭhe passitabbaṃ.

2. Vi 1. 263; Vi 4. 358 piṭṭhesu.

3. Abhi 2. 307 piṭṭhe.

4. Vi 2. 175 piṭṭhe.

kho yassa kassaci. Tathā hi vuttaṃ “methunamanuyuttassa, mussatevāpi sāsanan”¹.

Tasmim̐ aniyyānikadhammeti tasmim̐ parehi parikkappita-aniyyānikadhammanimittam̐. Nimittatthe hi idam̐ kammasaṃyoge bhummaṃ.

Upanibaddhāti viracitā. Tenāha “**abhisankhatā**”^{ti}. **Puthubhāvanti** bahubhāvaṃ. **Puthūhi vā sitāti** bahūhi samaṇabrāhmaṇehi sitā upanibaddhā.

Vesārajjasuttavaṇṇanā niṭṭhitā.

9. Taṇhuppādasuttavaṇṇanā

9. Navame bhavati etena ārogyanti **bhavo**, gilānapaccayo. Parivuddho bhavo **abhavo**. Vuddhi-attho hi ayamakāro yathā “saṃvarāsaṃvaro, phalāphalan”^{ti} ca. **Sappinavanītādīnīti ādi**-saddena telamadhuphāṇitādīnam̐ gahaṇam̐. Sappinavanītādiggahaṇaṅcetha nidassanamattam̐, sabbassapi gilānapaccayassa saṅgaho daṭṭhabbo. **Bhavābhavoti** vā khuddako ceva mahanto ca upapattibhavo veditabbo. Tenevāha “**sampattibhavesū**”^{ti}-ādi. **Bhavoti** vā sampatti, **abhavoti** vipatti. **Bhavoti** vuddhi, **abhavoti** hāni. Tam̐nimittaṅca taṇhā uppajjatīti vuttaṃ “**bhavābhavahetuvā**”^{ti}.

Taṇhādutiyoti taṇhāsahāyo. Taṇhā hi nirudakakantāre marīcikāya udakasaññā viya pipāsābhibhūtam̐ tasitam̐ sattam̐ assāsadassanavasena sahāyakiccaṃ karontī bhavādīsu anubbinnaṃ katvā paribbhamāpeti. Tathā hi tam̐ papātakam̐ acintetvā madhuggaṇhanakaluddakā viya anekādīnavākulesu bhavesu ānisaṃsameva dassentī anattahajāle sā paribbhamāpeti, tasmā taṇhā “purisassa dutiyā”^{ti} vuttā. Nanu ca aññepi kilesādayo bhavanibbattipaccayāti? Saccametaṃ, na pana tathā visesapaccayo, yathā taṇhā. Tathā hi sā kusalehi

1. Khu 1. 416 piṭṭhe Suttanipāte.

vinā akusalehi, kāmāvacarādikusalehi ca vinā rūpāvacarādikusalehi bhavanibbattiyā visesapaccayo. Yato samudayasaccanti vuccatīti.

Itthabhāvaññathābhāvanti itthabhāvo ca aññathābhāvo ca itthabhāvaññathābhāvo, so etassa atthīti itthabhāvaññathābhāvo, saṃsāro, taṃ itthabhāvaññathābhavaṃ. Tattha **itthabhāvo** manussattaṃ, **aññathābhāvo** tato avasiṭṭhasattāvāsā. **Itthabhāvo** vā tesam tesam sattānaṃ paccuppanno attabhāvo, **aññathābhāvo** anāgatattabhāvo. Evarūpo vā aññopi attabhāvo **itthabhāvo**, na evarūpo **aññathābhāvo**. Tenevāha “**itthabhāvaññathābhāvanti ettha itthabhāvo nāma ayaṃ attabhāvo**”ti-ādi. Saṃsaraṇaṃ **saṃsāro**.

Khandhānañca paṭipāṭi, dhātu-āyatanāna ca.

Abbocchinnam vattamānā, saṃsāroti pavuccati¹.

Tenāha “**khandhadhātu-āyatanānaṃ paṭipāṭin**”ti khandhadhātu-āyatanānaṃ hetuphalabhāvena aparāparappavattinti attho.

Evamādīnavam ñatvāti ettha etamādīnavam ñatvātipi paṭhanti, etam sakalavaṭṭadukkhassa sambhavaṃ samudayaṃ taṇhaṃ ādīnavam ñatvāti attho. Atha vā **evamādīnavam** ñatvāti etaṃ yathāvuttaṃ saṃsārānavattana-ādīnavam dosaṃ ñatvā. **Niggahaṇoti** caturūpādānaśākhātassa sabbassa gahaṇassa paṭinissajjana niggahaṇo, khandhaparibbānena saṅkhārappavattito apagaccheyyāti evaṃ vā ettha attho daṭṭhabbo.

Taṇhuppādasuttavaṇṇanā niṭṭhitā.

10. Yogasuttavaṇṇanā

10. Dasame **yojenti** kammaṃ vipākena bhavādīnaṃ, bhavantarādīhi dukkhena sattaṃ yojenti ghaṭenti **yogā**, kāmaṇaṭṭhena kāmo ca so yathāvuttenatthena yogo cāti **kāmayogo**. **Bhāyogo** nāma bhavarāgoti dassetuṃ “**rūpārūpabhavesū**”ti-ādi vuttaṃ. Tattha

1. Visuddhi 2. 176; Dī-Ṭṭha 2. 86; Saṃ-Ṭṭha 2. 89; Am-Ṭṭha 1. 11; Abhi-Ṭṭha 2. 142; Suttanipāta-Ṭṭha 2. 151; Udāna-Ṭṭha 245; Itivuttaka-Ṭṭha 55 piṭṭhesupi.

paṭhamo upapattibhavesu rāgo, dutiyo kammabhavesu, tatiyo bhavadiṭṭhisahagato yathā rajjanaṭṭhena rāgo, evaṃ yujjanaṭṭhena yogoti vutto. **Catūsu saccesu aññānanti** idaṃ suttantanayaṃ nissāya vuttaṃ. Suttantasamvaṇṇanā hesāti, tadantogadhattā vā pubbantādīnaṃ.

Samudayanti dve samudayā khaṇikasamudayo paccayasamudayo ca. Uppādakkhaṇo khaṇikasamudayo, paccayova paccayasamudayo. Samudayate samudayanaṃ samudayo, samudeti etasmāti samudayoti evaṃ ubhinnaṃ samudayānaṃ saddatthato pi bhedo veditabbo. Paccayasamudayaṃ pajānantopi bhikkhu khaṇikasamudayaṃ pajānāti, khaṇikasamudayaṃ pajānantopi paccayasamudayaṃ pajānāti. Paccayato hi saṅkhārānaṃ udayaṃ passato khaṇato ca nesaṃ udayadassanaṃ sukhaṃ hoti, khaṇato ca nesaṃ udayaṃ passato pageva paccayānaṃ suggahitattā paccayato dassanaṃ sukheṇa ijjhati, idha pana khaṇikasamudayaṃ dassento āha “**samudayanti uppattin**”ti.

Atthaṅgamopi duvidho accantatthaṅgamo bhedatthaṅgamoti. Accantatthaṅgamo appavattinirodho, nibbānanti keci. Bhedatthaṅgamo khaṇikanirodho. Tadubhayaṃ pubbhāge uggahaparipucchādivasena passato aññataradassanena itaradassanampi siddhameva hoti. Pubbhāveveva ārammaṇavasena khayato vayato sammasanādikāle bhedatthaṅgamaṃ passanto byātirekavasena anussāvādito¹ accantatthaṅgamaṃ passati, maggakkhaṇe pana ārammaṇato accantatthaṅgamaṃ passanto asammohato itarampi passati. Idha pana bhedatthaṅgamaṃ dassento āha “**atthaṅgamanti bhedan**”ti. Kāmānaṃ uppattibhedagahaṇeneva cettha yathā kāmānaṃ paṭiccasamuppannatā vibhāvitā, evaṃ kāmavattunopīti ubhayesampi aniccataṃ dukkhatā anattatā ca vibhāvitāti daṭṭhabbaṃ. **Madhurabhāvanti** iminā kāmasannissitaṃ sukhaṃ somanassaṃ dasseti. “Yaṃ kho bhikkheve ime pañca kāmaguṇe paṭicca uppajjati sukhaṃ somanassaṃ, ayaṃ kāmānaṃ assādo”ti² hi vuttaṃ. **Amadhurabhāvanti** iminā pana kāmahetukaṃ dukkhaṃ domanassaṃ dasseti.

Phassāyatanānanti chadvārikassa phassassa kāraṇabhūtānaṃ cakkhādi-āyatanānaṃ. Tenāha “**cakkhādīnaṃ cakkhusamphassādikāraṇānaṃ**”ti.

1. Anusārato (Ka)

2. Ma 1. 120 piṭṭhe.

punabbhavakaraṇaṃ punobhavo uttaradalopena, mano-saddassa viya ca purimapadassa okārantatā daṭṭhabbā. Punobhavo sīlametesanti **ponobhavikā**¹. Atha vā sīlatthena ikasaddena gamitatthattā kiriyāvācakasaddassa adassanaṃ daṭṭhabbaṃ yathā apūpabhakkhanasīlo apūpiko. Atha vā punabbhavaṃ danti, punabbhavāya saṃvattanti, punappunabbhave nibbattenti **ponobhavikā**. “Taddhitā”²ti hi bahuvacananiddesā vicittatā vā taddhitānaṃ abhidhānalakkhaṇattā vā “punabbhavaṃ denti”³ti-ādīsupi atthesu ponobhavikasaddasiddhi daṭṭhabbā.

Visaṃyojenti paṭipannaṃ puggalaṃ kāmāyogādito viyojenti **visaṃyogā**, asubhajjhānādīni visaṃyojanakāraṇāni. Tenāha “**visaṃyogāti visaṃyojanakāraṇāni**”³ti-ādi.

Yogasuttavaṇṇanā niṭṭhitā.

Bhaṇḍagāmaṃvaggavaṇṇanā niṭṭhitā.

2. Caravagga

1. Carasuttavaṇṇanā

11. Dutiyaṃ paṭhame **caratoti** gacchantassa, caṅkamantassa vā. **Uppajjati kāmavitakko vāti** vatthukāmesu avītarāgatāya tādise paccaye kāmāpaṭisaṃyutto vā vitakko uppajjati ce, yadi uppajjati. **Byāpadavitakko vā vihimsāvitakko vāti** āghātavinaye visesena cittassa adamittā āghātanimitte byāpādapaṭisaṃyutto vā vitakko, leḍḍudaṇḍādīhi parahimsanavasena vihimsāpaṭisaṃyutto vā vitakko uppajjati ceti sambandho. **Taṃ ce bhikkhu adhivāseti**ti taṃ yathāvuttaṃ kāmavitakkādīni yathāpaccayaṃ attano citte uppannaṃ “itipāyaṃ vitakko pāpako, itipi akusalo, itipi sāvajjo, so ca kho attabyābādhāya saṃvattati”³ti-ādīnā nayena paccavekkhaṇāya abhāvato adhivāseti attano cittaṃ³ āropetvā vāseti. Adhivāsentoyeva ca **nappajhāti** tadaṅgādippahānavasena na paṭinissajjati. Tato eva

1. Ponobbhavikā(Ka)

2. Pāṇini 4. 1. 76 suttam hetam.

3. Citte(?)

ca na vinodeti attano cittasantānato na nudati na nīharati. Tathā avinodanato **na byantīkaroti** na vigatantaṃ karoti. Ātāpī pahitatto yathā tesāṃ antopi nāvasissati antamaso bhaṅgamattampi, evaṃ karoti, ayaṃ pana tathā na karotīti attho. Tathābhūto pana¹ na **anabhāvaṃ gameti** anu anu abhāvaṃ na gameti. Na pajahati ce, na vinodeti ceti iti-ādinā ce-saddaṃ yojetvā attho veditabbo.

Evambhūtoti evaṃ kāmavitakkādīhi pāpavitakkehi samaṅgibhūto. **Anātāpīti** kilesānaṃ ātāpayikassa vīriyassa abhāvena anātāpī. Pāputrāsalaḅbhaṇassa ottappaṇassa abhāvena **anottāpī**. **Satataṃ samitaṃ** sabbakālaṃ nirantaraṃ. **Kusīto hīnavīriyoti** kusalehi dhammehi pariḥāpayitvā akusalapakkhe kucchitaṃ sīdanato kosajjasamannāgamaṇa ca kusīto, sammappadhānavīriyābhāvena hīnavīriyo vīriyavirahitoti **vuccati** kathīyati. **Ṭhitassāti** gamanaṃ upacchinditvā tiṭṭhato. Sayana-iriyāpathassa visesato kosajjapakkhikattā yathā taṃsamaṅgino bhāvitattā sambhavanti, taṃ dassetuṃ “**jāgarassā**”ti vuttaṃ.

Sukkapakkhe **tañce bhikkhu nādhivāsetīti** āraddhavīriyassapi viharato² anādīmati saṃsāre cirakālabhāvitattā tathārūpapaccayasamāyoge satisammosena vā kāmavitakkādi uppajjati ce, taṃ bhikkhu attano cittaṃ³ āropetvā na vāseti, abbhantare na vāsetīti attho. Anadhivāseto kiṃ karoti? **Pajahati** chaḍḍeti. Kiṃ kacavaraṃ viya piṭakenāti? Na, apica kho taṃ **vinodeti** nudati nīharati. Kiṃ balibaddaṃ viya patodenāti? Na, atha kho **byantīkaroti** vigatantaṃ karoti, yathā tesāṃ antopi nāvasissati antamaso bhaṅgamattampi, tathā te karoti. Kathaṃ pana te tathā karoti? **Anabhāvaṃ gameti** anu anu abhāvaṃ gameti, vikkhambhanappahānena yathā suvikkhambhitā honti, tathā ne karotīti vuttaṃ hoti.

Evambhūtoti-ādīsu evaṃ kāmavitakkādīnaṃ anadhivāseṇa suvisuddhāsayo samāno tāya ca āsayasampattiyā tannimittāya ca

1. Tathābhūtova (itivuttaka-Ṭṭha 333 piṭṭhe.)

2. Āraddhavīriyassa hi vīriyavato (Ka) Itivuttaka-Ṭṭha 334 piṭṭhe passitabbaṃ.

3. Citte (?)

payogasampattiyā parisuddhasīlo indriyesuguttadvāro bhojane mattaññū satisampajaññena samannāgato jāgariyaṃ anuyutto tadaṅgādivasena kilesānaṃ ātāpanalakkhaṇena vīriyena samannāgatattā **ātāpī**, sabbaso pāputrāsena samannāgatattā **ottāpī satataṃ** rattindivaṃ **samitaṃ** nirantaraṃ samathavipassanānuyogavasena catubbidhasammappadhānasiddhiyā **āraddhavīriyo pahitatto** nibbānaṃ pati pesitacittoti **vuccati** kathiyatīti attho.

Gāthāsu **gehanissitanti** ettha gehavāsīhi apariccattattā gehavāsīsabhāvattā gehadhammattā vā gehaṃ vuccati vatthukāmo. Atha vā ge happaṭibaddhabhāvato, kilesakāmānaṃ nivāsaṭṭhānabhāvato vā gehāti vuccanti, taṃvatthukattā kāmavitakkādi gehanissitaṃ nāma.

Kummaggapaṭipannoti yasmā ariyamaggassa uppathabhāvato abhijjhādayo tadekaṭṭhadhammā ca kummaggo, tasmā kāmavitakkādibahulo kummaggapaṭipanno. **Mohaneyyesu mucchitoti** mohasaṃvattaniyesu rūpādīsu mucchito sammatto ajjhopanno. **Sambodhinti** ariyamaggañāṇaṃ. **Putṭhunti** phusitum pattum **pāpo so tādiso** micchāsaṅkappagocaro puggalo **abhabbo**, na kadāci taṃ pāpuṇātīti attho.

Vitakkaṃ samayitvānāti yathāvuttaṃ micchāvitakkaṃ paṭisaṅkhānabhāvanābalena vūpasametvā. **Vitakkūpasame ratoti** navannampi mahāvitakkānaṃ accantūpasamabhūte arahatte, nibbāne eva vā ajjhāsayena rato abhirato. **Bhabbo soti** so yathāvutto sammāpaṭipajjamāno puggalo pubbabhāge samathavipassanābalena sabbavitakke yathārahaṃ tadaṅgādivasena vūpasametvā ṭhito vipassanaṃ ussukkāpetvā maggapaṭipāṭiyā arahattamaggañāṇasaṅkhātāṃ nibbānasaṅkhātāṃca anuttaraṃ **sambodhim phuṭṭhum** adhigantum **bhabbo** arahā. Evamettha pāḷivaṇṇanā veditabbā.

Carasuttavaṇṇanā niṭṭhitā.

2. Sīlasuttavaṇṇanā

12. Dutiye **sampannasīlā**ti ettha tividhaṃ sampannaṃ paripuṇṇasamaṅgimadhuravasena. Tattha—

“Sampannaṃ sālīkedāraṃ, suvā bhuñjanti kosiya.
Paṭivedemi te brahme, na ne vāretumussahe”¹—

idaṃ **paripuṇṇasampannaṃ** nāma. “Iminā pātimokkhasaṃvarena upeto hoti samupeto upāgato samupāgato upapanno sampanno samannāgato”² idaṃ **samaṅgisampannaṃ** nāma. “Imissā bhante mahāpathaviyā heṭṭhimatalaṃ sampannaṃ, seyyathāpi khuddamadhuṃ anīlakaṃ, evamassādan”³ idaṃ **madhurasampannaṃ** nāma. Idha paripuṇṇasampannavasena atthaṃ dassento “**sampannasīlāti paripuṇṇasīlā**”³ti āha. Samaṅgisampannavasenapi attho yujjatiyeva, tasmā **sampannasīlāti** paripuṇṇasīlā hutvātipi sīlasamaṅgino hutvātipi evamettha attho daṭṭhabbo. Tattha sīlassa anavasesasamādānena akhaṇḍādibhāvappattiyā paripuṇṇasīlā, samādānato paṭṭhāya avicchindanato sīlasamaṅgino. Samādānavato hi accantavirodhidhammānuppattiyā sīlasamaṅgitā veditabbā, cetanādīnaṃ pana sīlanalakkhaṇānaṃ dhammānaṃ pavattilakkhaṇena vattabbameva natthi.

Tattha “paripuṇṇasīlā”³ti iminā atthena khettadosavigamena khettapāripūrī viya sīladosavigamena sīlapāripūrī vuttā hoti. Yathā hi khettaṃ bījakhaṇḍaṃ vappakhaṇḍaṃ udakakhaṇḍaṃ ūsakhaṇḍanti catudosasamannāgataṃ aparipūraṃ hoti. Tattha **bījakhaṇḍaṃ** nāma yattha antarantarā bījāni khaṇḍāni vā pūtīni vā honti, tāni yattha patanti, tattha sassam na uṭṭheti, khettaṃ khaṇḍaṃ hoti, aparipūraṃ hotīti attho. **Vappakhaṇḍaṃ** nāma yattha akusalo bījāni vapanto antarantarā nipātetī. Evaṃ hi sabbattha sassam na uṭṭheti, khettaṃ khaṇḍaṃ hoti. **Udakakhaṇḍaṃ** nāma yattha katthaci udakaṃ atibahuṃ vā hoti, na vā hoti. Tatrāpi hi sassāni na uṭṭhenti, khettaṃ khaṇḍaṃ hoti. **Ūsakhaṇḍaṃ** nāma yattha kassako kismiñci padese naṅgalena bhūmiṃ cattāro pañca vāre kasanto atigambhīraṃ karoti, tato ūsaṃ uppajjati. Tatrāpi hi sassam na uṭṭheti, khettaṃ khaṇḍaṃ hoti, tādīsañca khettaṃ na mahapphalaṃ hoti na mahānisamsaṃ. Tatrāpi bahumpi vapitvā appaṃ labhati. Imesaṃ pana catunnaṃ dosānaṃ vīgamā khettaṃ paripuṇṇaṃ hoti, tādīsañca khettaṃ mahapphalaṃ hoti mahānisamsaṃ. Evameva khaṇḍaṃ chiddaṃ sabalaṃ kammāsanti catudosasamannāgataṃ sīlaṃ aparipūraṃ hoti,

1. Khu 5. 276 piṭṭhe Jātake.

2. Abhi 2. 225 piṭṭhe.

3. Vi 1. 8 piṭṭhe.

tādisañca sīlaṃ na mahapphalaṃ hoti na mahānisaṃsaṃ. Imesaṃ pana catunnaṃ dosānaṃ vigamā sīlaṃ paripuṇṇaṃ hoti, tādisañca sīlaṃ mahapphalaṃ hoti mahānisaṃsaṃ.

“Sīlasamaṅgino”ti iminā panatthena sīlena samaṅgibhūtā samodhānagatā samannāgatā hutvā viharathāti idameva vuttaṃ hoti. Tattha dvīhi kāraṇehi sampannasīlatā hoti sīlavipattiyā ādīnavadassanena, sīlasampattiyā ca ānisaṃsadassanena. Tadubhayampi **visuddhimagge**¹ vitthāritaṃ. Tattha “sampannasīlati ettāvata ca kira bhagavā catupārisuddhisīlaṃ uddisitvā ‘pātimokkhasaṃvarasaṃvutā’ti iminā tattha jeṭṭhakaṣīlaṃ vitthāretvā dasseti”ti divāvihāravāsī sumatthero āha. Antevāsiko panassa tepiṭakacūlanāgatthero āha “ubhayatthāpi pātimokkhasaṃvaro bhagavatā vutto, pātimokkhasaṃvaroyeva hi sīlaṃ, itarāni pana tīpi sīlanti vuttaṭṭhānaṃ nāma atthi”ti² vatvā taṃ ananujānanto āha “indriyasaṃvaro nāma chadvārarakkhāmatkameva, ājīvapārisuddhi dhammena samena paccayuppattimattakaṃ, paccayanissitaṃ paṭiladdhapaccaye idamatthanti paccavekkhitvā paribhuñjanamattakaṃ. Nippariyāyena pātimokkhasaṃvarova sīlaṃ. Yassa so bhinno, ayaṃ chinnaṣo viya puriso hatthapāde, sesāni rakkhissatīti na vattabbo. Yassa pana so arogo, ayaṃ acchinnaṣo viya puriso jīvitaṃ, sesāni puna pākātikāni katvā rakkhitaṃ sakkoti. Tasmā ‘sampannasīlā’ti iminā pātimokkhasaṃvaram uddisitvā ‘sampannapātimokkhā’ti tasseva vevacanaṃ vatvā taṃ vitthāretvā dassento ‘pātimokkhasaṃvarasaṃvutā’ti-ādīmāhā”ti.

Pātimokkhasaṃvarasīlena saṃvutāti yo naṃ pāti rakkhati, taṃ mokkheti moceti āpāyikādīhi dukkhehīti pātimokkhanti laddhanāmena sikkhāpadasīlena pihitakāyavacīdvārā. Evambhūtā ca tena upetā samannāgatā nāma hontīti āha “**upetā hutvā**”ti. **Ācārena ca gocarena ca sampannā**ti kāyikavācasika-avītikkamasāṅkhātena ācārena, navesiyagocarātādisaṅkhātena gocarena ca sampannā, sampanna-ācāragocarāti attho. **Aṇuppannāṇesūti** atiparittakesu anāpattigamanīyesu. **Dukkaṭṭadubbhāsitamattesūti** apare.

1. Visuddhi 1. 16 piṭṭhe.

2. Natthīti (Ka)

Dosesūti gārayhesu akusaladhammesu. **Bhayato dassanasīlāti** paramāṇumattampi vajjam sineruppamāṇam viya katvā bhāyanasīlā. **Sabbasikkhakoṭṭhāsesūti** mūlapaññatti-anupaññattisabbatthapaññattipadesapaññatti-ādibhedesu. **Tam tam samādātabbam samādāyāti** yaṃ kiñci sikkhakoṭṭhāsesu mūlapaññatti-ādibhedesu sikkhitabbam paṭipajjitabbam pūritabbam kāyikaṃ vācasikaṃ vā sīlam, tam sabbam sammā ādāya, sammadeva sakkaccaṃ sabbaso ca ādiyitvāti attho.

Udayam passanto pañcavīsati lakkhaṇāni passatīti “avijjāsamudayā rūpasamudayoti paccaya-amudayaṭṭhena rūpakkhandhassa udayam passati. Taṇhāsamudayā -pa-. Kammasamudayā -pa-. Āhārasamudayā rūpasamudayoti paccayasamudayaṭṭhena rūpakkhandhassa udayam passati. Nibbattilakkhaṇam passantopi rūpakkhandhassa udayam passati. Rūpakkhandhassa udayam passanto imāni pañca lakkhaṇāni passati. Tathā avijjāsamudayā vedanāsamudayoti paccayasamudayaṭṭhena vedanākkhandhassa udayam passati. Taṇhāsamudayā -pa-. Kammasamudayā -pa-. Phassasamudayā vedanāsamudayoti paccayasamudayaṭṭhena vedanākkhandhassa udayam passati. Nibbattilakkhaṇam passantopi vedanākkhandhassa udayam passati. Vedanākkhandhassa udayam passanto imāni pañca lakkhaṇāni passatīti”-ādinā nayena ekekasmim khandhe pañca pañca katvā vuttāni pañcavīsati udayalakkhaṇāni passati.

Vayam passanto pañcavīsati lakkhaṇāni passatīti “avijjānirodhā rūpanirodhoti paccayanirodhaṭṭhena rūpakkhandhassa vayam passati. Taṇhānirodhā -pa-. Kammanirodhā -pa-. Āhānanirodhā rūpanirodhoti paccayanirodhaṭṭhena rūpakkhandhassa vayam passati. Vipariṇāmalakkhaṇam passantopi rūpakkhandhassa vayam passati. Rūpakkhandhassa vayam passanto imāni pañca lakkhaṇāni passati. Avijjānirodhā -pa-. Taṇhānirodhā -pa-. Phassanirodhā vedanānirodhoti paccayanirodhaṭṭhena vedanākkhandhassa vayam passati. Vipariṇāmalakkhaṇam passantopi vedanākkhandhassa vayam passati. Vedanākkhandhassa vayam passanto imāni pañca lakkhaṇāni passatīti”-ādinā nayena ekekasmim khandhe pañca pañca katvā vuttāni pañcavīsati vayalakkhaṇāni passati. **Pesitattoti** nibbānam pati pesitacitto. **Kathayantīti** tathāvidham bhikkhum buddhādayo ariyā ācikkhanti.

Yataṃ careti vāyamamāno careyya, caṅkamanādivasena gamanaṃ kappentopi “anuppannaṃ pāpakānaṃ akusalānaṃ dhammānaṃ anuppādāya chandaṃ janeti vāyamaṭī”¹ti-ādinā¹ nayena vuttappadhānavīriyaṃ karonto ghaṭento vāyamanto yathā akusaladhammā pahīyanti, kusaladhammā bhāvanāpāripūriṃ gacchanti, evaṃ gamanaṃ kappeyyāti attho. Esa nayo sesesupi. **Yatamenaṃ pasārayeti** etaṃ pasāretabbaṃ hatthapādādiṃ yataṃ yatamāno yathāvuttavīriyasamaṅgī hutvā pasāreyya, sabbattha padhānaṃ jaheyyāti adhippāyo.

Idāni yathā paṭipajjanto yataṃ yatanto nāma hoti, taṃ paṭipadaṃ dassetuṃ “**uddhan**”ti-ādi vuttaṃ. Tattha **uddhanti** upari. **Tiriyanti** parito, puratthimadisādivasena samantato disābhāgesūti attho. **Apācīnanti** heṭṭhā. **Yāvataṃ jagato gatīti** yattakā sattasaṅkhārābhedaṃ lokassa pavatti, tattha sabbatthāti attho. Ettāvataṃ anavasesatā sammasanañāṇassa visayaṃ saṅgahetvā dasseti. **Samavekkhitāti** sammā hetunā ñāyena avekkhitā, aniccādivasena vipassitāti vuttaṃ hoti. **Dhammānanti** sattaṣuññānaṃ. **Khandhānanti** rūpādīnaṃ pañcannaṃ khandhānaṃ. **Udayabbayanti** udayaṅca vayaṅca. Idaṃ vuttaṃ hoti—upari tiriyaṃ adhoti tidhā saṅgahite sabbasmiṃ loke atītādibhedabhinnānaṃ pañcupādānakkhandhasaṅkhātānaṃ sabbesaṃ rūpārūpadhammānaṃ aniccādisammasanādhiगतena udayabbayañāṇena pañcavīsatiyā ākārehi udayaṃ, pañcavīsatiyā ākārehi vayaṃ samavekkhitā samanupassitā bhaveyyāti.

Cetosamathasāmīcinti cittasaṅkilesānaṃ accantavūpasamanato cetosamathasaṅkhātassa ariyamaggassa anucchavikaṃ paṭipadāñāṇadassanavisuddhiṃ. **Sikkhamānanti** paṭipajjamānaṃ bhāventaṃ ñāṇaparamparā nibbattentaṃ. **Sadāti** sabbakālaṃ rattiñceva divā ca. **Satanti** catusampajaññasamannāgatāya satiyā satokārī. Evampettha gāthāvaṇṇanā daṭṭhabbā. Sesamettha suviññeyyameva.

Sīlasuttavaṇṇanā niṭṭhitā.

1. Abhi 2. 225 piṭṭhe.

3. Padhānasuttavaṇṇanā

13. Tatiye **uttamavīriyānī**ti seṭṭhavīriyāni visiṭṭhassa atthassa sādhanato. Māro dhiyyati etthāti **māradheyyam**, kilesamārassa pavattiṭṭhānabhūtam, tam tebhūmakavattanti āha “**tebhūmakavattasaṅkhātam māradheyyam**”ti. Jātimaraṇato jātam bhayam **jātimaraṇabhayam**, jātimaraṇameva vā bhayahetuto bhayanti **jātimaraṇabhayam**. Tenāha “**jātiṅca maraṇaṅca -pa-bhayassā**”ti. Sesam uttānameva.

Padhānasuttavaṇṇanā niṭṭhitā.

4. Saṁvarasuttavaṇṇanā

14. Catutthe saṁvarādīnam sādhanavasena padahati etehīti **padhānāni**. Saṁvarantassa **uppannavīriyanti** yathā abhijjhādayo na uppajjanti, evam satiyā upaṭṭhāne cakkhādīnam pidahane analasassa uppannavīriyam. **Pajahantassāti** vinodentassa. **Uppannavīriyanti** tasseva pahānassa sādhanavasena pavattavīriyam. **Bhāventassa uppannavīriyanti** etthāpi eseva nayo. **Samādhinimittanti** samādhi eva. Purimuppannasamādhi hi parato uppajjanakasamādhissa kāraṇam hotīti “samādhinimittan”ti vuttam.

Upadhivivekattāti khandhūpadhi-ādi-upadhīhi vivittattā vinissaṭṭattā. **Tam āgammāti** tam nibbānam maggena adhigamahetu. Rāgādayo virajjanti etta, etenāti **virāgo**. Evam **nirodhopi** daṭṭhabbo. Yasmā idha bojjhaṅgamissakavasena icchitā, tasmā “**ārammaṇavasena vā adhigantabbavasena vā**”ti vuttam. Tattha **adhigantabbavasenāti** tanninatāvasena. **Vossaggapariṇāminti** vossagavasena pariṇāmitam pariccajanavasena ceva pakkhandanavasena ca pariṇāmanasīlam. Tenāha”**dve vossaggā**”ti-ādi. Khandānam pariccajanam nāma tappaṭibaddhakilesappahānavasenāti yenākārena vipassanā kilese pajahati, tenevākārena tannimittakkhandhe ca pajahatīti vattabbatam arahatīhi āha “**vipassanā -pa- pariccajati**”ti. Yasmā vipassanā vuṭṭhānagāminibhāvam pāpuṇantī ninnapoṇapabbhārabhāvena ekamsato nibbānam pakkhandatīti vattabbatam labhati, maggo ca samucchadavasena

kilese khandhe ca rāgaṃ pariccajati, tasmā yathākkamaṃ vipassānāmaggānaṃ vasena **pakkhandanapariccāgavossaggā** veditabbā. **Vossaggatthāyāti** pariccāgavossaggatthāya ceva pakkhandanavossaggatthāya ca. **Parīṇamatīti** pariccajati. Tam pana pariṇāmanaṃ vuṭṭhānagāminibhāvappattiyā ceva ariyamaggabhāvappattiyā ca icchitanti āha “**vipassanābhāvaṇca maggabhāvaṇca pāpuṇāti**”ti. **Sesapadesūti** “dhammavicayasambojjhaṅgaṃ bhāvetī”ti-ādīsu sesasambojjhaṅgakoṭṭhāsesu.

Bhaddakanti abhaddakānaṃ nīvaraṇādipāpadhammānaṃ vikkhambhanaena rāgavigamanena¹ ekantahitattā dullabhāta ca bhaddakaṃ sundaraṃ. Na hi aññaṃ samādhinimittaṃ evaṃ dullabhaṃ rāgassa ujuvipaccanīkabhūtaṃ atthi. **Anurakkhatīti** ettha anurakkhanā nāma adhigatasamādhito yathā pariḥāni na hoti, evaṃ paṭipattisāsanatappaṭipakkhavigamanenāti āha “**sāmādhī**”ti-ādi. **Aṭṭhikasāññādikāti** aṭṭhikajjhānādikā. Saññāsīsena hijhānaṃ vadati. Sesamettha uttānameva.

Samvarasuttavaṇṇanā niṭṭhitā.

5. Paññattisuttavaṇṇanā

15. Pañcame attabhāvo etesaṃ atthīti attabhāvino, tesam **attabhāvīnaṃ**. Tenāha “**attabhāvavantānaṃ**”ti. **Yāva chattimsāya** indānaṃ **āyuppamāṇam**, **tāva paṇīte kāme paribhūñjīti** mandhāturājā kira ekadivasam attano pariṇāyakaratanam pucchi “atthi nukho manussalokato ramaṇīyataram ṭhānaṃ”ti. Kasmā deva evaṃ bhaṇasi, kiṃ na passasi candimasūriyānaṃ ānubhāvaṃ, nanu etesaṃ ṭhānaṃ ito ramaṇīyataranti. Rājā cakkaratanam purakkhatvā tattha agamāsi.

Cattāro mahārājāno “mandhātumahārājā āgato”ti sutvā “tāvamahiddhiko mahārājā na sakkā yuddhena paṭibāhitun”ti sakarajjam niyyātesuṃ. So tam gahetvā puna pucchi “atthi nu kho ito ramaṇīyataram ṭhānaṃ”ti. Athassa tāvatimsabhavanaṃ kathayimsu “tāvativimsabhavanaṃ deva ramaṇīyam, tattha sakkassa devaraṇṇo ime cattāro

1. Rāgavidhamanena (Ka)

mahārājāno pāricārikā dovārikabhūmiyaṃ tiṭṭhanti. Sakko devarājā mahiddhiko mahānubhāvo. Tassimāni upabhogaṭṭhānānīyojanasahasubbedho vejayantapāsādo, pañcayojanasatubbedhā sudhammadevasabhā, diyaḍḍhayojanasatiko vejayantaratho, tathā erāvaṇo hatthī dibbarukkhasahasappaṭimaṇḍitaṃ nandanavanaṃ, cittalatāvanaṃ, phārusakavanaṃ, yojanasatubbedho pāricchattako kovilāro, tassa heṭṭhā saṭṭhiyojanāyāmā paññāsayojanavitthārā pañcadasayojanubbedhā jayasumanapupphavaṇṇā paṇḍukambalasilā, yassa mudutāya sakkassa nisīdato upaḍḍhakāyo anuppavisatī”ti.

Taṃ sutvā rājā tattha gandhukāmo cakkaratanāṃ abbhukkiri, taṃ ākāse utṭhahi saddhim caturaṅginiyā senāya. Atha dvinnāṃ devalokānaṃ vemajjhato cakkaratanāṃ otarivā pathaviyā āsanne ṭhāne aṭṭhāsi saddhim pariṇāyakaratanappamukhāya caturaṅginiyā senāya. Rājā ekakova attano ānubhāvena tāvatimsabhavanaṃ agamāsi. Sakko “mandhātā āgato”ti sutvā tassa paccuggamaṇāṃ katvā “svāgataṃ mahārāja, sakaṃ te mahārāja, anusāsa mahārājā”ti vatvā saddhim nātakehi rajjaṃ dve bhāge katvā ekaṃ bhāgamadāsi. Rañño tāvatimsabhavane patiṭṭhitamattasseva manussagandhasarīranissandādīmanussabhāvo vigacchi, devaloke pavattivipākadāyino aparapariyāyavedanīyassa kammaṃ katokāsattā sabbadā soḷasavassuddesikatāmālāmilāyanādīdevabhāvo pāturahosi. Tassa sakkena saddhim paṇḍukambalasilāya nisinnassa akkhinimisanamattena nānattaṃ paññāyati. Taṃ asallakkhenta devā sakkassa ca tassa ca nānatte muyhanti. So tattha dibbasampattiṃ anubhavamāno tadā manussānaṃ asaṅkheyyāyukatāya yāva chattimsa sakkā upapajjitvā cutā, tāva sakkarajjaṃ kāretvā “kiṃ me iminā upaḍḍharajjena”ti atitto kāmehi tato cavitvā attano uyyāne patito manussaloke utukakkhaḷatāya vātātapena phusitagatto kālamakāsi. Tena vuttaṃ “**devaloke pana yāva chattimsāya indānaṃ āyuppanānaṃ, tāva paṇīte kāme paribhuñjī**”ti.

Paññattisuttavaṇṇanā niṭṭhitā.

6. Sokhummasuttavaṇṇanā

16. Chaṭṭhe **sukhumalakkhaṇappaṭivijjhanakānīti**
aniccādisukhumalakkhaṇānaṃ paṭivijjhanakāni.

Sukhumalakkhaṇapariggāhakañānenāti sukhumalakkhaṇapariggāhakena
ñānena. **Parato jānitvāti** avasavattanena aññato jānitvā. Saṅkhārā hi “mā
bhijjimsū”ti icchitāpi bhijjanteva, tasmā te avasavattitāya pare nāma. Sā ca
nesaṃ paratā aniccadassanena pākaṭā hotīti vuttaṃ “**iminā hi padena**
aniccānupassanā kathitā”ti. Sesaṃ uttānameva.

Sokhummasuttavaṇṇanā niṭṭhitā.

7. Paṭhama-agatisuttādivaṇṇanā

17-20. Sattame **chandāgatinti** ettha sandhivasena saralopoti dassento āha
“**chandena agatin**”ti. **Chandāti** hetumhi nissakkavacananti āha “**chandena**”ti,
pemenāti attho. Chandasaddo hettha taṇhāpariyāyo, akusalacchandapariyāyo
vā. **Sesesūti** “dosāgatim gacchatī”ti-ādīsu.

Ettha ca yo “ayaṃ me mittoti vā, sandiṭṭhoti vā, ñātakoti vā, lañcaṃ vā
pana me detī”ti chandavasena assāmikaṃ karoti, ayaṃ chandena akattabbaṃ
karoti nāma. Yo “ayaṃ me verī”ti cirakālānubaddhaveravasena vā,
taṅkhaṇuppannakodhavasena vā sāmikaṃ assāmikaṃ karoti, ayaṃ dosena
akattabbaṃ karoti nāma. Yo pana mandattā momūhattā yaṃ vā taṃ vā
ayuttaṃ akāraṇaṃ vatvā assāmikaṃ sāmikaṃ karoti, ayaṃ mohena
akattabbaṃ karoti nāma. Yo pana “ayaṃ rājavallabhoti vā visame corādike
visamāni vā, kāyaduccaritādīni samādāya vattanena visamanissito vā,
anattampi me kareyyā”ti bhīto assāmikaṃ sāmikaṃ karoti, ayaṃ bhayena
akattabbaṃ karoti nāma.

Yo pana kiñci bhājento “ayaṃ me sandiṭṭho vā sambhatto vā”ti
pemavasena atirekaṃ deti, “ayaṃ me verī”ti dosavasena ūnakaṃ

deti, yo muyhanto dinnādinnam ajānamāno kassaci ūnam, kassaci adhikam deti, “ayam imasmim adiyamāne mayham anathampi kareyyā”ti bhito kassaci atirekam deti, so catubbidhopi yathanukkamena chandāgati-ādini gacchanto akattabham karoti nāma.

Nihiyati tassa yasoti tassa agatigāmino kittiyasopi parivārayasopi nihiyati parihāyati. Yassati tena kittiyatīti hi yaso, kitti thutighoso. Yassati tena purecarānucarabhāvena parivārayatīti yaso, parivāro. Aṭṭhamanavamadasamāni uttānatthāneva.

Caravaggo dutiyo.

3. Uruvelavagga

1. Paṭhama-uruvelasuttavaṇṇanā

21. Tatiyassa paṭhame mahāvelā viya **mahāvelā**, vipulavālikavuñjatāya mahanto velātaṭo viyāti attho. Tenāha “**mahāvālikarāsīti attho**”ti. Uru maru sikatā vālukā vaṇṇu vālikāti ime saddā samānatthā, byañjanameva nānam. Tenāha “**urūti vālikā vuccatī**”ti.

Najjāti nadati saddāyatīti¹ nadī, tassā najjā, nadiyā ninnagāyāti attho. **Nerañjarāyāti** “nelañjalāyā”ti vattabbe la-kārassa ra-kāram katvā “nerañjarāyā”ti vuttam, kaddamasevālapaṇakādidosarahitasalilāyāti attho. Keci “nīlamñjalāyāti vattabbe nerañjarāyā”ti vadanti. Nāmameva vā etam tassā nadiyāti veditabham. Tassā nadiyā tīre yattha bhagavā vihāsi, tam dassetuṃ “**Ajapālanigrodhe**”ti vuttam. Kasmā paṇāyam Ajapālanigrodho nāma jātoti āha “**tassā**”ti-ādi. Keci pana “yasmā tattha vede sajjhāyitum asamatthā mahallakabrāhmaṇā pākāraparikkhepayuttāni nivesanāni katvā sabbe vasimsu, tasmāssa ajapālanigrodhoti nāmam jātan”ti

1. Sandatīti (Sārattha-Ṭī 3. 132; Udāna-Ṭīha 25 piṭṭhesu)

vadanti. Tatrāyaṃ vacanattho—na japantīti ajapā, mantānaṃ anajjhāyakāti attho. Ajapā lanti ādiyanti nivāsaṃ etthāti **ajapāloti**. Apare pana vadanti “yasmā majjhanhikasamaye antopaviṭṭhe aje attano chāyāya pāleti rakkhati, tasmā ‘ajapālo’ tissa nāmaṃ ruḷhan” ti. Sabbatthāpi nāmametaṃ tassa rukkhassa.

Paṭhamābhisambuddhoti paṭhamamā abhisambuddho, anunāsikalopenāyaṃ niddeso. Tenevāha “**sambuddho hutvā paṭhamamevā**” ti. **Paṭhamanti** ca bhāvanapumsakaniddeso, tasmā abhisambuddho hutvā paṭhamamā ajapālanigrodhe viharāmīti evamettha sambandho veditabbo. **Ayam vitakkoti** ayam “kinnu khvāham -pavihareyyan” ti evam pavattavitakko. Hatthī ca vānaro ca tittiro ca **hatthivānaratittirā**.

Ye vuddhamapacāyantīti jātivuddho vayovuddho guṇavuddhoti tayo vuddhā. Tesu jātisampanno **jātivuddho** nāma, vaye ṭhito **vayovuddho** nāma, guṇasampanno **guṇavuddho** nāma. Tesu guṇasampanno vayovuddho imasmiṃ ṭhāne vuddhoti adhippeto. **Apacāyantīti** jeṭṭhāpacāyikā kammena pūjenti. **Dhammassa kovidāti** jeṭṭhāpacāyanadhammassa kovidā kusalā. **Diṭṭheva dhammeti** imasmiṃyeva attabhāve. **Pāsamsāti** pasamsārahā. **Samparāye ca suggatīti** samparetabbe imam lokam hitvā gantabbe paralokepi tesam sugatiyeva. Ayam panettha piṇḍattho—khattiyā vā hontu brāhmaṇā vā vessā vā suddā vā gahaṭṭhā vā pabbajitā vā tiracchānagatā vā, ye keci sattā jeṭṭhāpacitikammena sīlādiguṇasampannānam vayovuddhānam apacitim karonti, te imasmiṃca attabhāve jeṭṭhāpacitikārakāti pasamsam vaṇṇanam thomanam labhanti, kāyassa ca bhedaṃ sagge nibbantantīti.

Aññasminti parasmim. Attā na hotīti **añño**, paro. So panettha na yo koci adhippeto, atha kho garuṭṭhāniyo. Tenāha “**kañci garuṭṭhāne aṭṭhapetvā**” ti. Patissati garuno āṇam sampaṭicchati patisso, na patisso **appatisso**, **patissayarahito**, garupassayarahitoti attho.

Sadevaketi avayavena viggaho samudāyo samāsatto.

Sadevakaggahaṇena pañcakāma vacaradevaggahaṇaṃ pārisesañāyena itaresaṃ padantarehi saṅgahitattā. **Samāraka**ggahaṇena chaṭṭhakāmāvacaradevaggahaṇaṃ paccāsattiñāyena. Tattha hi māro jāto tannivāsī ca hoti. **Sabrahma**kavacanena brahmakāyikādibrahmaggaṇaṃ paccāsattiñāyeneva. **Sassamaṇabrāhmaṇiyā pajāyā**ti sāsanaṃ paccatthikasamaṇabrāhmaṇaggahaṇaṃ. Nidassanamattañcetaṃ apaccatthikānaṃ asamitābāhitapāpānaṃca samaṇabrāhmaṇānaṃ teneva vacanena gahitattā. Kāmaṃ “sadevake”ti-ādivisesanānaṃ vasena sattavisayo lokasaddoti viññāyati tulyayogavisayattā tesāṃ, “salomako sapakkhako”ti-ādīsu pana atulyayoge ayaṃ samāso labbhatīti byabhicāradassanato **pajā**gahaṇanti pajāvacanena sattalokaggahaṇaṃ.

Devabhāvasāmaññaṇa mārabrahmesu gahitesupi itarehi tesāṃ labbhamānavisesadassanattaṃ visuṃ gahaṇanti dassento “**māro nāmā**”ti-ādimāha. Māro brahmānampi vicakkhukammāya pahotīti āha “**sabbesaṃ**”ti. **Uparī**ti uparibhāge. **Brahmā**ti dasasahassibrahmānaṃ sandhāyāha. Tathā cāha “**dasahi aṅgulīhī**”ti-ādi. Idha dīghanikāyādayo viya bāhirakānampi ganthanikāyo labbhatīti āha “**ekanicāyādivasena**”ti. **Vatthuvijjādī**ti ādisaddena vijjāṭṭhānāni saṅgayhanti. Yathāsakaṃ kammakilesehi pajātattā nibbattattā pajā, sattanicāyo, tassā **pajāya**. **Sadevamanussāyā**ti vā iminā sammutidevaggahaṇaṃ tadavasiṭṭhamanussalokaggahaṇaṃca daṭṭhabbaṃ.

Evam bhāgaso lokāṃ gahetvā yojanaṃ dassetvā idāni abhāgaso lokāṃ gahetvā yojanaṃ dassetuṃ “**apicetthā**”ti-ādi vuttaṃ. **Lokavasena vuttāni** “lokīyanti ettha kammaṃ kammaphalāni”ti katvā. **Pajāvasena** “hetupaccayehi pajātā”ti katvā. **Sīlasampannataranti** ettha paripuṇṇasampannatā adhippetā “sampannaṃ sālikedāraṃ”ti-ādīsu¹ viya. Tenāha “**adhikataranti attho**”ti. Paripuṇṇaṃ hi adhikataranti vattuṃ arahati. **Kāraṇanti** yuttim. **Atthanti** aviparītatthaṃ. **Vaḍḍhinti** ativaḍḍhinimittaṃ.

1. Khu 5. 276 piṭṭhe Jātaka.

Iminā vacanenāti imasmim̐ sutte anantaram̐ vuttavacanena. Na kevalam̐ imināva, suttantarampi ānetvā paṭibāhitabboti dassento “**na me ācariyo atthi**”ti-ādimāha. Tattha **na me ācariyo atthi**ti lokuttaradhamme mayham̐ ācariyo nāma natthi. Kiñcāpi lokiyadhammānampi yādiso lokanāthassa adhigamo, na tādiso adhigamo parūpadeso atthi. Lokuttaradhammo panassa lesopi natthi. **Natthi me paṭipuggaloti** mayham̐ sīlādīhi guṇehi paṭinidhibhūto puggalo nāma natthi. **Saranti** karaṇe etaṃ paccattavacananti āha “**sarantenā**”ti, **saranti** vā saraṇahetu cāti attho.

Yatoti bhummatthe tosaddoti āha “**yasmim̐ kāle**”ti. Rattiyo jānantīti rattaññū, attano pabbajitadivasato paṭṭhāya bahūrattiyo jānanti, cirapabbajitāti vuttam̐ hoti. Rattaññūnam̐ mahantabhāvo **rattaññumahantam̐**. Bhāvappadhāno esa niddeso. “Rattaññumahattan”ti vā pāṭho. Esa nayo sesesupi. Theranavamajjhimanam̐ vasena vipulabhāvo **vepullamahantam̐**. Sikkhattayasāṅgahitassa sāsana brahmacariyassa jhānābhīññādivasena vipulabhāvo **brahmacariyamahantam̐**. Viṣiṭṭhassa paccayalābhassa vipulabhāvo **lābhaggamahantam̐**. **Catubbidhena mahantenā**ti catubbidhena mahantabhāvena. **Mahāpajāpatiyā dussayugadānakāleti** bhagavato saṅghe gāravassa pākaṭakāladassanamattam̐. Na hi bhagavā tato pubbe saṅghe gāravarahito vihāsi.

Paṭhama-uruvelasuttavaṇṇanā niṭṭhitā.

2. Dutiya-uruvelasuttavaṇṇanā

22. Dutiye **huhukajātikenā**ti so kira diṭṭhamaṅgaliko mānavasena kodhavasena ca “huhun”ti karonto vicarati, tasmā huhukajātikoti vuccati. “Huhukajātiko”tipi paṭhanti, tena saddhim̐ āgatāti attho. **Jarājinnā**ti jarāya khaṇḍadantapalitakesādibhāvaṃ āpāditā. **Vayovuddhā**ti aṅgapaccaṅgānam̐ vuddhimariyādappattā. **Jātimahallakā**ti upapattiyā mahallakabhāvena samannāgatā. Mahattam̐ lanti

Gaṇhantīti mahallakā, jātiyā mahallakā, na vibhavādināti jātimahallakā. **Vayo-anuppattā**ti pacchimavayaṃ sampattā, pacchimavayo nāma vassasatassa pacchimo tatiyo bhāgo. **Jiṇṇā**ti vā porāṇā, cirakālappavattakulanvayāti vuttaṃ hoti. **Vuddhā**ti sīlacārādiḡuṇavuddhiyuttā. **Mahallakā**ti vibhavamahantatāya samannāgatā. **Mahaddhanā**ti mahābhogā. **Addhagatā**ti maggappaṭṭipannā brāhmaṇānaṃ vatacariyādimariyādaṃ avītikkamma caramānā. **Vayo-anuppattā**ti jātivuddhabhāvaṃ antimavayaṃ anuppattā. **Sutaṃ netanti** ettha suttaṃ no etanti padacchedo. **Noti** ca karaṇatthe sāmivacanaṃ. Tenāha “**amhehi sutan**”ti.

Akāleti ayuttakāle. **Asabhāvaṃ vadatī**ti yaṃ natthi, taṃ vadati. **Anatthaṃ vadatī**ti akāraṇanissitaṃ vadati. **Akāraṇanissitanti** ca nipphalanti attho. Phalaṃ hi kāraṇanissitaṃ. Akāraṇanissitatā ca tadavinābhāvato akāraṇe nissitaṃ, nipphalaṃ samphanti vuttaṃ hoti. **Avinayaṃ vadatī**ti na saṃvaravinayappaṭṭisaṃyuttaṃ vadati, attano suṇantassa ca na saṃvaravinayāvahaṃ vadatīti vuttaṃ hoti. **Na hadaye nidhetabbayuttakanti** ahitasamhitattā cittaṃ anuppavesetvā nidhetuṃ ayuttaṃ. **Kathetuṃ ayuttakālenā**ti dhammaṃ kathentena yo attho yasmaṃ kāle vattabbo, tato pubbe pacchā ca tassa akālo, tasmaṃ ayuttakāle vattā. **Apadesarahitanti** suttāpadesarahitaṃ. **Sāpadesaṃ sakāraṇaṃ katvā na kathetī**ti “bhagavatā asuke sutte evaṃ vuttan”ti evaṃ sāpadesaṃ kāraṇasahitaṃ katvā na katheti.

Pariyantarahitanti paricchedarahitaṃ, suttaṃ vā jātakam vā nikkhipitvā tassa anuyogaṃ upamaṃ vā vatthuṃ vā āharitvā yaṃ suttaṃ jātakam vā nikkhipitaṃ, tassa sarīrabhūtaṃ kathaṃ anāmasitvā bāhirakathameyeva katheti, nikkhittaṃ nikkhittamattameva hoti, “suttaṃ nu kho katheti jātakam nu kho, nāssa antaṃ vā koṭṭim vā passamā”ti vattabbataṃ āpajjati. Yathā vaṭarukkhasākhānaṃ gatagataṭṭhāne pārohā oratanti, otiṇṇotiṇṇaṭṭhāne viruḷhiṃ āpajjitvā puna vaḍḍhantiyeva, evaṃ aḍḍhayanampi yojanampi gacchatiyeva. Gacchante gacchante pana mūlarukkho vinassati, anujātapārohamūlāniyeva tiṭṭhanti, evaṃ ayampi nigrodhadhammakathiko nāma hoti, nikkhittaṃ nikkhittameva katvā passeneva pariharanto gacchati. Yo pana

bahumpibhaṇanto “etadatthamidam vuttan”ti nikkhittasuttato aññampi anuyogūpamāvattuvasena tadupayogīnam āharitvā āharitvā jānāpetum sakkoti, tathārūpassa dhammakathikassa bahumpi kathetum vaṭṭati. **Na lokiyalokuttara-atthanissitanti** attano paresaṅca na lokiyalokuttarahitāvahaṃ.

Pakaṭṭhānam ukkaṭṭhānam sīlādi-atthānam bodhanato sabhāvaniruttivasena ca buddhādīhi bhāsītattā pakaṭṭhānam vacanappabandhānam ālīti **pāḷi**, pariyattidhammo. Purimassa atthassa pacchimena atthena anusandhānam **anusandhi**, atthamukhena pana pāḷippadesānampi anusandhi hotiyeva. Svāyam anusandhi pucchānusandhi-ajjhāsayaṅanusandhiyathānusandhi-ādivasena catubbidho, taṃtaṃdesanānam pana pubbāparapāḷivasena anusandhivasena **pubbāparavasenā**ti paccekaṃ yojettabbā. **Uggahitanti** byañjanaso atthaso ca uddham uddham gahitaṃ, pariyāpuṇavasena ceva paripucchāvasena ca hadayena gahitanti attho. Vaṭṭadukkhanissaraṇatthikehi sotabbato **sutaṃ**, pariyattidhammo. Taṃ dhāretīti **sutadharo**. Yo hi sutadharo, sutaṃ tasmim patiṭṭhitaṃ hoti suppatiṭṭhitaṃ arovikaṃ, tasmā vuttaṃ “**sutassa ādhārabhūto**”ti. Tenāha “**yassa hī**”ti-ādi. Ekaṃ padaṃ ekakkharampi avinaṭṭhaṃ hutvā sannicīyatīti sannicayo, sutaṃ sannicayo etasminti **sutasannicayo**. **Ajjhosāyā**ti¹ anuppavisitvā. **Tiṭṭhatī**ti na sammussati.

Pagunāti vācuggaṭā. **Niccalikanti** aviparivattaṃ. **Saṃsanditvā**ti aññehi saṃsandhitvā. **Samanuggāhitvā**ti paripucchāvasena atthaṃ ogāhitvā. Pabandhassa vicchedābhāvato **gaṅgāsotasadisam**. “Bhavaṅgasotasadisana”ti vā pāṭho, akittimaṃ sukhappavattīti² attho. Suttekaadesassa suttamattassa ca vacasā paricayo idha nādhippeto, vaggādivasena pana adhippetoti āha “**suttadasaka -pa- sajjhāyitā**”ti, “dasasuttāni gatāni, dasavaggāni gatāni”ti-ādinā sallakkhetvā vācāya sajjhāyitāti attho. Manasā anu anu pekkhitā bhāgaso nijjhāyitā cintitā **manasānupekkhitā**. **Rūpagataṃ viya paññāyatī**ti rūpagataṃ viya cakkhussa vibhūtaṃ hutvā paññāyati. **Suppaṭividdhā**ti nijjaṭaṃ niggumbaṃ katvā suṭṭhu yāthāvato paṭividdhā.

1. Idam padaṃ pāḷiyam aṭṭhakatāsaṅca na dissati.

2. Akicchimaṃ pavattatīti (Ka) Sārattha-Ṭī 3. 39 piṭṭhe passitabbā.

Adhikaṃ cetoti **abhiceto**, upacārajjhānacittaṃ. Tassa pana adhikatā pākatikakāmāvacaracittehi sundaratāya, sā paṭipakkhato suddhiyāti āha “**abhikkantaṃ visuddhaṃ cittaṃ**”ti. **Adhicittanti** samādhimāha. Sopi upacārasamādhī daṭṭhabbo. Vivekajaṃ pītisukhaṃ, samādhijaṃ pītisukhaṃ, apītijaṃ kāyasukhaṃ, satipārisuddhijaṃ ñāṇasukhanti catubbidhampi jhānasukhaṃ paṭipakkhato nikkhantataṃ upādāya nekkhammasukhanti vuccatīti āha “**nekkhammasukhaṃ vindati**”ti. **Ichchicchitakkhaṇe samāpajjituṃ samatthoti** iminā tesu jhānesu samāpajjanavasībhāvamāha. **Nikāmalābhīti** pana vacanato āvajjanādhiṭṭhānapaccavekkhaṇavasiyopi vuttā evāti veditabbā. **Sukheneva paccanīkadhamme vikkhambhetvāti** etena tesam jhānānaṃ sukhappaṭipadatanā khippābhiññātañca dasseti.

Vipulānanti vepullaṃ pāpitānaṃ jhānānaṃ. Vipulatā nāma subhāvitabhāvena ciratarappavattiyā, sā ca paricchedanurūpāva icchitabbāti “**vipulānan**”ti vatvā “**yathāparicchena vuṭṭhātuṃ samatthoti vuttaṃ hoti**”ti-āha. Paricchadakālaṃ hi appatvāva vuṭṭhahanto akasiralābhī na hoti yāvadicchitaṃ pavattetuṃ asamatthattā. Idāni yathāvutte samāpajjanādivasībhāve byatirekavasena vibhāvetuṃ “**ekacco hī**”ti-ādi vuttaṃ. Tattha **lābhiyeva hotīti** idam paṭiladdhamattassa jhānassa vasena vuttaṃ. **Tathāti** icchicchitakkhaṇe. **Pāripanthiketi** vasībhāvassa paccanīkadhamme. Jhānādhigamassa pana paccanīkadhammā pageva vikkhambhitā, aññathā jhānādhigamo eva na siyā. **Kicchena vikkhambhetīti** kicchena visodheti. Kāmādīnavapaccavekkhaṇādīhi kāmaccchandādīnaṃ viya aññesampi samādhīpāripanthikānaṃ dūrasamussāraṇaṃ idha vikkhambhanaṃ visodhanañcāti veditabbam. **Nāḷikayantanti** kālamānanāḷikayanta māha.

Aṭṭhapitasāṅkappoti na sammāpaṇihitasāṅkappo. **Abhiññāpāragūti** sabbesaṃ lokiyalokuttaradhammānaṃ abhiññāya pāraṃ gato, sabbadhamme abhivisiṭṭhāya aggamaggapaññāya jānitvā ṭhitoti attho. **Pariññāpāragūti** pañcannaṃ khandhānaṃ pariññāya pāraṃ gato, pañcakkhandhe pari jānitvā ṭhitoti attho. **Bhāvanāpāragūti** catunnaṃ maggānaṃ bhāvanāya pāraṃ gato, cattāro magge bhāvetvā ṭhitoti attho. **Pahānapāragūti** sabbakilesānaṃ pahānena pāraṃ gato, sabbakilese pajahitvā ṭhitoti

attho. **Sacchikiriyāpāragūti** nirodhasacchikiriyāya pāraṃ gato, nirodhaṃ sacchikatvā ʒhitoti attho. **Samāpattipāragūti** sabbasamāpattīnaṃ samāpajjanena pāraṃ gato, sabbā samāpattiyo samāpajjitvā ʒhitoti attho. **Brahmacariyassa kevalīti** yaṃ brahmacariyassa kevalaṃ sakalabhāvo, tena samannāgato, sakalacatumaggabrahmacariyavāsoti attho. Tenāha “**sakalabrahmacariyo**”ti, paripuṇṇamaggabrahmacariyoti attho. Sesāṃ suviññeyyameva.

Dutiya-uruvelasuttavaṇṇanā niṭṭhitā.

3. Lokasuttavaṇṇanā

23. Tatiye **lokoti** lujjanapalujjanaṭṭhena loko, atthato purimasmiṃ ariyasaccadvayaṃ, idha pana dukkhaṃ ariyasaccaṃ vedītabbaṃ. Tenāha “**lokoti dukkhasaccaṃ**”ti. **Visamyuttoti** viśamsaṭṭho na paṭibaddho, sabbesaṃ saṃyojanānaṃ sammadeva samucchinnatā tato vippamuttoti attho. **Lokasamudayoti** sutantanayena taṇhā, abhidhammanayena pana abhisāṅkhārehi saddhiṃ diyaḍḍhakilesasahassaṃ. **Lokanirodhoti** nibbānaṃ. **Sacchikatoti** attapaccakkho kato. **Lokanirodhagāminī paṭipadāti** sīlādikkhandhattayasaṅgaho ariyo aṭṭhaṅgiko maggo. So hi lokanirodhaṃ nibbānaṃ gacchati adhigacchati, tadatthaṃ ariyehi paṭipajjīyati cāti lokanirodhagāminī paṭipadāti vuccati.

Etthāvataṃ tathāni abhisambuddho yāthāvato gatoti **tathāgatoti** ayamattho dassito hoti. Cattāri hi ariyasaccāni tathāni nāma. Yathāha—

“Cattārimāni bhikkhave tathāni avitathāni anaññathāni. Katamāni cattāri? Idaṃ dukkhanti bhikkhave tathametaṃ avitathametaṃ anaññathametaṃ”ti¹ vitthāro.

Apica tathāya gatoti **tathāgato**, **gatoti** ca avagato atīto patto paṭipannoti attho. Idaṃ vuttaṃ hoti—yasmā

1. Saṃ 3. 377; Khu 9. 293 piṭṭhesu.

bhagavā sakalalokaṃ tīraṇapariññāya tathāya aviparītāya gato
 avagato, tasmā loko tathāgatena abhisambuddhoti tathāgato.
 Lokasamudayaṃ pahānapariññāya tathāya gato atītoti tathāgato.
 Lokanirodhaṃ sacchikiriyāya tathāya gato pattoti tathāgato.
 Lokanirodhagāminim paṭipadaṃ tathaṃ aviparītaṃ gato paṭipannoti
 tathāgatoti. Evaṃ imissā pāḷiyā tathāgatabhāvadīpanavasena attho
 veditabbo.

Iti bhagavā catusaccābhisambodhavasena attano tathāgatabhāvaṃ
 pakāsetvā idāni tattha diṭṭhādi-abhisambodhavasenapi taṃ dassetuṃ “**yaṃ
 bhikkhave**”ti-ādimāha. Aṭṭhakathāyaṃ pana “catūhi saccehi attano
 buddhabhāvaṃ kathetvā”ti vuttaṃ, taṃ tathāgatasaddabuddhasaddānaṃ
 atthato ninnānākaraṇataṃ dassetuṃ vuttaṃ. Tathā ceva hi pāḷi pavattāti.
Diṭṭhanti rūpāyatanam daṭṭhabbato. Tena yaṃ diṭṭhaṃ yaṃ dissati, yaṃ
 dakkhati, yaṃ samavāye passeyya, taṃ sabbaṃ diṭṭhanteva gahitaṃ
 kālavisesassa anāmaṭṭhabhāvato yathā “duddhan”ti dasseti. **Sutanti**-ādīsupi
 eseva nayo. **Sutanti saddāyatanam** sotabbato. **Mutanti** sanissaye indriye
 nissayaṃ muñcitvā pāpuṇitvā gahetabbam. Tenāha “**patvā gahetabbato**”ti.
Viññātanti vijānitabbam. Taṃ pana diṭṭhādivinimuttaṃ viññeyyanti āha
 “**sukhadukkhādi dhammārammaṇam**”ti. **Pattanti** yathā tathā patvā
 hatthagataṃ, adhigatanti attho. Tenāha “**pariyesitvā vā apariyesitvā vā**”ti.
Pariyesitanti pattiyā atthaṃ pariyiṭṭhaṃ. Taṃ pana pattaṃ vā siyā appattaṃ
 vā, ubhayathāpi pariyesitamevāti āha “**pattaṃ vā appattaṃ vā**”ti. Dvayenapi
 dvippakārampi pattaṃ dvippakārampi pariyesitaṃ tena tena pakārena
 tathāgatena abhisambuddhanti dasseti. **Cittena anusañcaritanti** te pana
 apāpetvā citteneva anu anu sañcaritaṃ, viparitakkitanti attho.

Pītakanti-ādīti ādisaddena lohita-odātādisabbam rūpārammaṇabhāgaṃ
 saṅgaṇhāti. **Sumanoti** rāgavasena lobhavasena saddhādivasena vā samano.
Dummanoti byāpādavitakkavasena vā vihimśāvitakkavasena vā dummano.
Majjhottoti aññāṇavasena ñāṇavasena vā majjhatto. Esa nayo sabbattha.
 Tattha **ādi**-saddena sañkhasaddo, paṇavasaddho, pattagandho,
 pupphagandho, puppharaso, phalaraso, upādinnaṃ, anupādinnaṃ,

majjhattavedanā kusalakammaṃ akusalakammanti evamādīnaṃ saṅgho daṭṭhabbo. **Appattanti** ñāṇena asampattaṃ, aviditanti attho. Tenāha “**ñāṇena asacchikatan**”ti. **Lokena gatanti** lokena ñātaṃ. **Tatheva gatattā**ti theveva ñātattā abhisambuddhattā, gatasaddena ekattaṃ buddhi-atthanti attho. Gati-atthā hi dhātavo buddhi-atthā bhavantīti akkharacintakā.

Yañca bhikkhave rattirī tathāgato anuttaraṃ sammāsambodhirī abhisambujjhatīti yassaṃ ca visākhapuṇṇamāya rattiyaṃ tathā-āgatattādi-atthena tathāgato bhagavā bodhimaṇḍe aparājitapallaṅke nisinno tiṇṇaṃ mārānaṃ matthakaṃ madditvā uttaritarābhāvato anuttaraṃ sammāsambodhirī āsavakkhayañāṇena saddhirī sabbaññutaññāṇaṃ adhigacchati. **Yañca rattirī anupādisesāya nibbānadhātuyā parinibbāyati**ti yassaṃ ca visākhapuṇṇamāya rattiyaṃyeva kusinārāyaṃ upavattane mallānaṃ sālavane yamakasālānamantare anupādisesāya nibbānadhātuyā parinibbāyati. **Yaṃ etasmirī antareti** imāsaṃ dvinnaṃ sa-upādisesa-anupādisesanibbānadhātūnaṃ majjhe pañcacattālīsavassaparimāṇakāle paṭhamabodhiyampi majjhimabodhiyampi pacchimabodhiyampi yaṃ suttageyyādippabhedāṃ dhammaṃ **bhāsati** nidassanavasena, **lapati** uddisanavasena, **niddisati** pariniddisanavasena. **Sabbaṃ taṃ tatheva hotī**ti taṃ etthantare desitaṃ sabbaṃ suttageyyādinavaṅgaṃ buddhavacanaṃ atthato byañjanato ca anūnaṃ anadhikaṃ sabbākāraparipuṇṇaṃ rāgamadanimmadanaṃ dosamadanimmadanaṃ mohamadanimmadanaṃ, natthi tattha vālaggamattampi avakkhalitaṃ, ekamuddikāya lañchitaṃ viya ekāya nāḷiyā mitaṃ viya ekatulāya tulitaṃ viya ca taṃ tatheva hoti yassatthāya bhāsitaṃ, ekanteneva tassa sādhanato, **no aññathā**, tasmā tathaṃ avitathaṃ anaññathaṃ. Etena tathāvāditāya tathāgatoti dasseti. Gada-attho ayaṃ gatasaddo dakārassa takāraṃ katvā, tasmā tathaṃ gadatīti tathāgatoti attho. Atha vā āgadanāṃ āgado, vacananti attho. Tato aviparīto āgado assāti dakārassa takāraṃ katvā tathāgatoti evamettha padasiddhi veditabbā.

Yathāvādīti ye dhamme bhagavā “ime dhammā akusalā sāvajjā viññugarahitā samattā samādinnā ahitāya dukkhāya samvattanti”ti paresaṃ dhammaṃ desento vadati, te dhamme ekanteneva sayāṃ pahāsi. Ye

pana dhamme bhagavā “ime dhammā kusalā anavajjā viññuppasatthā samattā samādinnā hitāya sukhāya samvattantī”ti vadati, te dhamme ekanteneva sayam upasampajja viharati, tasmā yathāvādī bhagavā tathākārīti veditabbo. Tathā sammadeva silādiparipūraṇavasena sammāpaṭipadāyam¹ yathākārī bhagavā, tatheva dhammadesanāya paresam tattha paṭiṭṭhāpanavasena **tathāvādī**. Bhagavato hi vācāya kāyo anulometi, kayassapi vācā, tasmā yathāvādī tathākārī, yathākārī tathāvādī ca hoti. Evaṃbhūtaṃ ca yathā vācā, kāyopi tathā gato pavatto. Yathā ca kāyo, vācāpi tathā gatā pavattāti attho.

Abhibhū anabhibhūtoti upari bhavaggaṃ, heṭṭhā avīcinirayaṃ pariyaṇṭam katvā tiriyaṃ aparimāṇasu lokadhātūsu bhagavā sabbasatte abhibhavati sīlenapi samādhināpi paññāyapi vimuttiyāpi, na tassa tulā avā pamāṇam vā atthi. Asamo asamasamo appaṭimo appaṭibhāgo appaṭipuggalo atulo appameyyo anuttaro dhammarājā devadevo sakkānam atisakko brahmānam atibrahmā, tato eva ayam na kenaci abhibhūto. **Dakkhatīti** sabbam passati. Visesavacanicchāyapi abhāvato anavasesavisayo dasasaddo. Tena yaṃ kiñci neyyam nāma, sabbam tam hatthatale āmalakam viya passatīti dipeti. Avīparītam āsayādi-avabodhena hitūpasamhārādinā ca satte, bhāvāññatthattūpanayavasena² saṅkhāre, sabbākārena suciṇṇavasitāya samāpattiyo, cittaṅca vase vattetīti **vasavattīti** evamettha attho daṭṭhabbo.

Visaṃyuttoti catūhi yogehi visaṃyutto. Tenāha “**catunnam yogānam pahānena visaṃyutto**”ti. **Taṇhādiṭṭhi-upayehi virahitoti** sabbasmimpi loke taṇhādiṭṭhisāṅkhātehi upayehi virahito.

Abhibhavitvā ṭhitoti tabbisayakilesappahānena abhibhuyya atikkamitvā ṭhito. **Cattāropi ganthe ṭhitoti** sabbe abhijjhākāyagandhādike sakasantānato mocetvā ṭhito. Veneyyasantāne vā attano desanāvīlāsena tesam pamocanoti **sabbaganthappamocano**. **Phuṭṭha’ssa paramā santīti** assa anena khīṇāsavena

1. Sammā paṭipanno sayam (Itivuttaka-Ṭṭha 351 piṭṭhe)

2. Bhāvāññatthapananayena (Ka) Itivuttaka-Ṭṭha 351 piṭṭhe passitabbam.

buddhena paramā santi nāṇaphusanena phuṭṭhāti evamettha sambandho veditabbo. Tenāha “**phuṭṭha’ssā**”ti-ādi. **Nibbāne kutoci bhayaṃ natthīti** kutoci bhayakāraṇato nibbāne bhayaṃ natthi asaṅkhatabhāvena sabbaso khemattā. Tenāha bhagavā “khemañca vo bhikkhave dhammaṃ desessāmi khemagāminiñca paṭipadan”ti-ādi¹. Nibbānappattassa vā kutoci bhayaṃ natthīti **nibbānaṃ akutobhayaṃ**ti evamettha attho daṭṭhabbo, na kutoci bhayaṃ ettha etasmiṃ adhigateti **akutobhayaṃ**, nibbānanti evamettha nibbacanañca daṭṭhabbaṃ.

Anīgho niddukkho. **Sabbakammakkhayaṃ pattoti** sabbesaṃ kammānaṃ khayaṃ pariyosānaṃ accantabhāvaṃ patto. Upadhī sammadeva khīyanti etthāti **upadhisāṅkhayo**, nibbānanti āha “**upadhisāṅkhayasāṅkhāte nibbāne**”ti. **Cakkanti** dhammacakkaṃ. **Pavattayīti** te parivaṭṭam dvādasākāraṃ pavattesi. Mahantehi sīlādiguṇehi samannāgatattā **mahantaṃ**. **Vītasāradanti** catuvesārajjayogena vītasāraṃ. Sesam uttānameva.

Lokasuttavaṇṇanā niṭṭhitā.

4. Kāḷakārāmasuttavaṇṇanā

24. Catutthe **bāḷhaṃ kho ne pasamsasīti** ne samaṇe bāḷhaṃ katvā pasamsasi vaṇṇayasi. Kīdisaṃ sīlaṃ etesanti **kimsilā**. Ko samācāro etesanti **kimsamācārā**. **Guṇamaggasaṅṭhitāti** guṇaggasaṅṭhitā. **Ma-kāro** padasandhikaro, aggaguṇe patiṭṭhitāti vuttaṃ hoti. **Santindriyā** santamānasā, “santaṃ tesam gataṃ ṭhitaṃ”tipi paṭhanti. **Ekakiyāti** ekakā, catūsu iriyāpathesu ekakā hutvā viharantīti adhippāyo. Tenevāha “**adutiya**”ti. **Tādisā samaṇā mamātīti** ettha **iti-saddo** ādi-attho. Tena—

“Kāyakammaṃ suci nesaṃ, vācākammaṃ anāvilaṃ.
Manokammaṃ suvisuddhaṃ, tādisā samaṇā mama.

1. Saṃ 2. 542 piṭṭhe.

Vimalā saṅkhamuttābhā, suddhā antarabāhirā.

Puṇṇā suddhehi dhammehi, tādīsā samaṇā mama.

Lābhena unnato loko, alābhena ca onato.

Lābhālābhena ekaṭṭhā, tādīsā samaṇā mama.

Yasena unnato loko, ayasena ca onato.

Yasāyasena ekaṭṭhā, tādīsā samaṇā mama.

Pasaṃsāyunnato loko, nindāyapi ca onato.

Samā nindāpasaṃsāsu, tādīsā samaṇā mama.

Sukhena unnato loko, dukkhenapi ca onato.

Akampā sukhadukkhesu, tādīsā samaṇā mamā”ti¹—

evamādiṃ saṅgaṇhāti.

“**Dūre santo**”ti-ādigāthāya ayamattho. **Santhoti** rāgādīnaṃ santatāya buddhādayo santo nāma, idha pana pubbabuddhesu katādhikārā ussannakusalamūlā bhāvitabhāvanā sattā santoti adhippetā. **Pakāsantīti** dūre ṭhitāpi buddhānaṃ nāṇapathaṃ āgacchantā pākaṭā honti. **Himavantovāti** yathā tiyojanasahassavitthato pañcayojanasatubbedho caturāsītiyā kūṭasahashehi paṭimaṇḍito himavantapabbato dūre ṭhitānampi abhimukhe ṭhito viya pakāsati, evaṃ pakāsantīti attho. **Asantettha na dissantīti** lābhagarukā vitthiṇṇaparalokā āmisacakkhukā jīvikatthāya pabbajitā bālapuggalā asanto nāma, te ettha buddhānaṃ dakkhiṇassa jāṇumaṇḍalassa santike nisinnāpi na dissanti na paññāyanti. **Rattim khittā yathā sarāti** rattim caturaṅgasamannāgate andhakāre khittā sarā viya tathārūpassa upanissayabhūtassa pubbahetuno abhāvena na paññāyantīti attho.

Brahmadeyyanti seṭṭhadeyyaṃ, yathā dinnam na puna gahetabbaṃ hoti nissaṭṭham pariccattam, evaṃ dinnanti attho.

Diṭṭham na maññatīti ettha **diṭṭhanti** maṃsacakkhunāpi diṭṭham, dibbacakkhunāpi diṭṭham, rūpāyanassetam adhivacanam. Yam hi cakkhudvayena katadassanakiriyāsamāpanam,

1. Dhammapada-Ṭṭha 2. 292 piṭṭhe.

yaṃ cakkhudvayaṃ passati apassi passissati, samavāye passeyya, taṃ sabbaṃ kālavisesavacanicchāya abhāvato “diṭṭhan”teva vuttaṃ yathā “duddhan”ti. Tenevāha “**diṭṭhaṃ rūpāyatanan**”ti. **Evarūpāni hi vacanānīti** “daṭṭhabbaṃ sotabban”ti-ādīni.

Lābhēpi tādī, alābhēpi tādīti yathā alābhakāle lābhassa laddhakālepi tathevāti tādiso. **Yasepīti** yase satipi mahāparivārakālepi. Sesamettha uttānameva.

Kāḷakārāmasuttavaṇṇanā niṭṭhitā.

5. Brahmācariyasuttavaṇṇanā

25. Pañcame **nayidanti** ettha **na**-iti paṭisedhe nipāto, tassa “vussatī”ti iminā sambandho “na vussatī”ti, **ya**-kāro padasandhikaro. **Idaṃ**-saddo “ekamidāhaṃ bhikkhave samayaṃ ukkaṭṭhāyaṃ viharāmi subhagavane sālārājamūle”ti-ādīsu¹ nipātamattaṃ, “idaṃ kho taṃ bhikkhave appamattakaṃ silamattakan”ti-ādīsu² yathāvutte āsannapaccakkhe āgato.

“Idaṃ hi taṃ jetavanaṃ, isisaṃghanisevitaṃ.

Āvutthaṃ dhammarājena, pītisañjananaṃ mama”ti—

ādīsu³ vakkhamāne āsannapaccakkhe. Idhāpi vakkhamāneyeva āsannapaccakkhe daṭṭhabbo.

Brahmācariya-saddo—

“Kiṃ te vataṃ kiṃ pana brahmācariyaṃ,

Kissa suciṇṇassa ayaṃ vipāko.

Iddhī jūtī balavīriyūpapatti,

Idaṅca te nāga mahāvīmānaṃ.

Ahaṅca bhariyā ca manussaloke,

Saddhā ubho dānapatī ahumhā.

Opānabhūtaṃ me gharaṃ tadāsi,

Santappitā samaṇabrāhmaṇā ca.

1. Dī 2. 42; Ma 1. 401 piṭṭhesu.

2. Dī 1. 11 piṭṭhe.

3. Ma 3. 306; Saṃ 1. 31, 53, 54 piṭṭhesu.

Taṃ me vataṃ taṃ pana brahmacariyaṃ,
tassa suciṇṇassa ayaṃ vipāko.
Iddhī jutī balavīriyūpapatti,
idañca me vīra mahāvīmānaṃ”ti—

imasmim **puṇṇakajātake**¹ dāne āgato.

“Kena pāṇi kāmadaḍḍo, kena pāṇi madhussavo.
Kena te brahmacariyena, puññaṃ pāṇimhi ijjhātī”ti—

imasmim **Aṅkurapetavatthusmim**² veyyāvacce.

“Evaṃ kho taṃ bhikkhave Tittiriyaṃ nāma brahmacariyaṃ ahoṣī”ti
imasmim **tittirajātake**³ pañcasikkhāpadasīle.

“Taṃ kho pana me pañcasikha brahmacariyaṃ neva nibbidāya na
virāgāya -pa- yāvadeva brahmalokūpapattiyā”ti imasmim
mahāgovindasutte⁴ brahmavihāre.

“Pare abrahmacārī bhavissanti, mayamettha brahmacārī bhavissāmā”ti
imasmim **sallekhasutte**⁵ methunaviratiyaṃ.

“Mayañca bhariyā nātikkamāma,
Amhe ca bhariyā nātikkamanti.
Aññatra tāhi brahmacariyaṃ carāma,
Tasmā hi amhaṃ daharā na mīyare”ti—

imasmim **mahādhammapārajātake**⁶ sadārasantose.

“Abhijānāmi kho paṇāyaṃ sārīputta caturaṅgasamannāgataṃ
brahmacariyaṃ caritā, tapassī sudaṃ homī”ti **lomahaṃsasutte**⁷ vīriye.

“Hīnena brahmacariyena, khattiye upapajjati.
Majjhimena ca devattaṃ, uttamena visujjhatī”ti—

nemijātake⁸ attadamanavasena kate aṭṭhaṅgike uposathe

1. Khu 6. 304 piṭṭhe.

4. Dī 2. 201 piṭṭhe.

7. Ma 1. 110 piṭṭhe.

2. Khu 2. 156 piṭṭhe.

5. Ma 1. 51 piṭṭhe.

8. Khu 6. 185 piṭṭhe.

3. Vi 4. 311 piṭṭhe.

6. Khu 5. 214 piṭṭhe.

“Idaṃ kho pana me pañcasikha brahmacariyaṃ ekantanibbidāya virāgāya -pa- ayameva ariyo aṭṭhaṅgiko maggo”ti **mahāgovindasutte**eva¹ ariyamagge.

“Tayidaṃ brahmacariyaṃ iddhañceva phītañca vitthārikaṃ bāhujāññaṃ puthubhūtaṃ yāva devamanussehi suppakāsitaṃ”ti **pāsadikasutte**² sikkhattayasaṅgahite sakalasmim sāsane. Idhāpi ariyamagge sāsane ca vattati.

Vussatīti vusīyati, carīyatīti attho. **Janakuhanatthanti** “aho ayyo sīlavā vattasampanno appiccho santuṭṭho mahiddhiko mahānubhāvo”ti-ādinā janassa sattalokassa vimhāpanattaṃ. Keci pana “**kuhanatthanti** pāpicchassa icchāpakatassa sato sāmanta-jappana- iriyāpathanissitapaccayapaṭisevanasaṅkhātena tividhena kuhanavatthunā kuhakabhāvena janassa vimhāpanatthan”ti vadanti. Idhāpi ayamevattho dassito. Tenevāha “**ūhi kuhanavatthūhi janassa kuhanatthāyā**”ti, janassa vimhāpanatthāyāti attho. **Janalāpanatthanti** “evarūpassa nāma ayyassa dinnāṃ mahapphalāṃ bhavissatī”ti pasannacittehi “kenattho, kiṃ āhariyatū”ti vadāpanattham. “Janalapanatthan”tipi paṭhanti, tassa pāpicchassa sato paccayattham parikathobhāsādivasena lapanabhāvena upalāpakabhāvena janassa lapanatthanti attho. Tenevāha “**na janalapanatthanti na janassa upalāpanatthan**”ti.

Na itivādappamokkhānisamsatthanti ettha “na lābhasakkārasilokānisamsatthan”tipi paṭhanti. Yattha yvāyam “ākaṅkheyya ce bhikkhave bhikkhu ‘lābhī assaṃ cīvarapiṇḍapātasenāsanagilānapaccayabhesajjaparikkhārānan’ti, sīlesvevassa paripūrakārī”ti³ sīlānisamsabhāvena vutto catupaccayalābho ca, catunnaṃ paccayānaṃ sakkaccadānasaṅkhāto ādarabahumānagarukaraṇasaṅkhāto ca sakkāro, yo ca “sīlasampano bahussuto sutadharo āraddhavīriyo”ti-ādinā nayena uggacchanakathutighosasaṅkhāto siloko brahmacariyaṃ vasantānaṃ diṭṭhadhammiko ānisaṃso, tadatthanti attho. Keci pana “**lābhasakkārasilokānisamsatthanti** pāpicchasseva sato lābhādigarutāya lābhasakkārasilokasaṅkhātassa ānisaṃsassa udayassa nipphādanatthan”ti evamattham vadanti.

1. Dī 2. 201 piṭṭhe.

2. Dī 3. 102 piṭṭhe.

3. Ma 1. 93 piṭṭhe.

Na iti maṃ jano jānātūti evaṃ brahmacariyavāse sati “sīlavā kalyāṇadhammo”ti-ādināmaṃ loko jānātu sambhāvetūti attano santaguṇavasena sambhāvanatthampi na idaṃ brahmacariyaṃ vussatīti sambandho. Keci pana “pāpicchassa sato asantaguṇasambhāvanādhippāyena ‘iti evaṃguṇoti maṃ loko jānātū’ti na idaṃ brahmacariyaṃ vussatī”ti evamettha atthaṃ vadanti. Sabbatthāpi panettha purimo purimoyeva atthavikappo sundarataro.

Atha khoti ettha **athā**ti aññatthe nipāto, **khoti** avadhāraṇe. Tena kuhanādito aññadatthaṃyeva idaṃ bhikkhave brahmacariyaṃ vussatīti dasseti. Idāni taṃ payojanaṃ dassento “**samvaratthaṃ pahānatthaṃ**”ti āha. Tattha pañcavidho samvaro pātimokkhasamvaro satsamvaro ñāṇasamvaro khantisaṃvaro vīriyasamvaroti. “Iti iminā pātimokkhasamvarena upeto hoti samupeto”ti-ādinā¹ nayena āgato ayaṃ **pātimokkhasamvaro**, sīlasamvarotipi vuccati, “rakkhati cakkhundriyaṃ, cakkhundriye samvaram āpajjati”ti² āgato ayaṃ **satsamvaro**.

“Yāni sotāni lokasmiṃ, sati tesam nivāraṇaṃ.

Sotānaṃ samvaram brūmi, paññāyete pidhīyare”ti³—

āgato ayaṃ **ñāṇasamvaro**. “Khamo hoti sītassa uṇhassā”ti-ādinā⁴ nayena āgato ayaṃ **khantisaṃvaro**.

“Uppannaṃ kāmavitakkaṃ nādhivāseti”ti-ādinā⁵ nayena āgato ayaṃ **vīriyasamvaro**.

Atthato pana pāṇātipātādīnaṃ pajahanavasena vattappaṭivattānaṃ pūraṇavasena ca pavattā cetanā ceva virati ca. Saṅkhepato sabbo kāyavacīsamyamo, vitthārato sattannaṃ āpattikkhandhānaṃ avītikkamo sīlasamvaro. Sati eva **satsamvaro**, satippadhānā vā kusalā khandhā. Ñāṇameva **ñāṇasamvaro**. Adhivāsanavasena adoso, adosappadhānā

1. Abhi 2. 255 piṭṭhesu. 2. Dī 1. 166; Ma 1. 238; Sam 2. 384; Am 1. 111 piṭṭhesu.

3. Khu 1. 434; Khu 8. 30; Khu 10. 13, 61 piṭṭhesu.

4. Ma 1. 13; Am 2. 432; Am 3. 342 piṭṭhesu.

5. Ma 1. 14; Am 2. 432; Am 3. 342 piṭṭhesu.

vā tathāpavattā kusalā khandhā **khantisamvaro**, paññāti eke.
Kāmaṅgavikkhambhanasamucchedasamvaraṇato samvaro, dutiyo
Kāmavitakkādīnaṃ abhibhavanavasena pavattaṃ vīriyameva **vīriyasamvaro**.
Tesu paṭhamo kāyaduccaritādīsu dussīlassa samvaraṇato samvaro, dutiyo
muṭṭhassaccassa, tatiyo aññāṇassa, catuttho akkhantiyā, pañcama kosajjassa
samvaraṇato pidahanato samvaroti veditabbo. Evametassa samvarassa
atthāya **samvarattham** samvaranipphādanatthanti attho.

Tīhi pahānehīti tadaṅgavikkhambhanasamucchedasaṅkhātehi tīhi
pahānehi. Pañcavidhappahānampi idha vattum vaṭṭatiyeva. Pañcavidham hi
pahānaṃ tadaṅgavikkhambhanasamucchedappaṭippassaddhinissaraṇavasena.
Tattha yaṃ dīpālokeneva tamassa paṭipakkhabhāvato alobhādīhi
lobhādikassa nāmarūpaparicchedādivipassanāññehi tassa tassa anathassa
pahānaṃ, seyyathidaṃ—pariccāgena lobhādimalassa, sīlena
pāṇātipātādīdussīlyassa, saddhādīhi assaddhiyādīkassa, nāmarūpavathānena
sakkāyadīṭṭhiyā, paccayapariggahena ahētuvisamahetudīṭṭhīnaṃ, tasseva
aparabhāgena kaṅkhāvitaraṇena kathāmkathībhāvassa, kalāpasammasanena
ahamamāti gāhassa, maggāmaggavavathānena amagge maggasaññāya,
udayadassanena ucchedadīṭṭhiyā, vayadassanena sassatadīṭṭhiyā,
bhayadassanena sabhaye abhayasaññāya, ādīnavadassanena assādasaññāya,
nibbidānupassanena abhiritisaññāya, muccitukamyatāññāna
amuccitukamyatāya, upekkhāññāna anupekkhāya, anulomena
dhammaṭṭhiyāyaṃ nibbāne ca paṭilomabhāvassa, gotrabhunā
saṅkharanimittaggāhassa pahānaṃ, etaṃ **tadaṅgappahānaṃ** nāma.

Yaṃ pana upacārappanābhedenā samādhinā pavattibhāvanivāraṇato
ghaṭappahāreṇeva udakapiṭṭhe sevālassa tesam tesam
nīvaraṇādīdhammānaṃ pahānaṃ, etaṃ **vikkhambhanappahānaṃ** nāma.
Yaṃ catunnaṃ ariyamaggānaṃ bhāvitattā taṃtaṃmaggavato attano santāne
“dīṭṭhigatānaṃ pahānāya”¹ti-ādīna¹ nayena vuttassa samudayapakkhiyassa
kilesagahaṇassa accantaṃ appavattibhāvena samucchindanaṃ, etaṃ
samucchedappahānaṃ nāma. Yaṃ pana phalakkhaṇe paṭippassaddhattham
kilesānaṃ, etaṃ **paṭippassaddhippahānaṃ** nāma. Yaṃ
sabbasaṅkhatanissaṭṭā pahīnasabbasaṅkhatam nibbānaṃ, etaṃ
nissaraṇappahānaṃ

1. Abhi 1. 72; Abhi 2. 276 piṭṭhesu.

nāma. Tassa pañcavidhassapi tathā tathā rāgādikilesānaṃ paṭinissajjanaṭṭhena samatikkamanaṭṭhena vā pahānassa atthāya, pahānasādhanatthanti evamettha attho daṭṭhabbo.

Tattha saṃvarena kilesānaṃ cittasantāne pavesanivāraṇaṃ pahānena ca pavesanivāraṇameva samugghāto cāti vadanti. Ubhayenapi pana yathārahaṃ ubhayaṃ sampajjatīti daṭṭhabbaṃ. Sīlādiddhammā eva hi saṃvaraṇato saṃvaram, pajahanato pahānanti.

Anītihanti ītiyo vuccanti upaddavā diṭṭhadhammikā samparāyikā ca. Ītiyo hantīti ītihaṃ, anu īti hanti **anītihaṃ**, sāsanabrahmacariyaṃ maggabrahmacariyaṇca. Atha vā ītihi anatthehi saddhiṃ hananti gacchanti pavattantīti ītihā, taṇhādi-upakkilesā. Natthi ettha īti hāti **anītihaṃ**. Īti hā vā yathāvuttenatthena titthiyasamayā, tappaṭipakkhato idaṃ **anītihaṃ**. “Anitihan”tipi¹ pāṭho, tassattho—“īti hāyan”ti dhammesu anekamsaggāhabhāvato vicikicchā itihāṃ nāma, sammāsambuddhappaveditattā yathānusiṭṭhaṃ paṭipajjantānaṃ nikkāṅkhabhāvasādhanato ca natthi ettha itihanti **anītihaṃ**, aparapattiyanti attho. Vuttaṃ hetam “paccattaṃ veditabbo viññūhi”ti², “atakkāvacarō”ti³ ca. Gāthābandhasukhatthaṃ pana “anītihan”ti dīghaṃ katvā paṭhanti. Pacchimaṃ panettha atthavikappaṃ dassetuṃ “**īti hapa riva jītan**”ti-ādi vuttaṃ.

Nibbānasaṅkhātānaṃ ogadhaṃ patiṭṭhaṃ pāraṃ gacchatīti nibbānogadhagāmī, vimuttirasattā ekanteneva nibbānasampāpakoti attho, taṃ **nibbānogadhagāmināṃ** brahmacariyaṃ. **Nibbānogadhoti** vā ariyamaggo vuccati tena vinā nibbānāvagāhaṇassa asambhavato tassa ca nibbānaṃ anālambitvā appavattanato, tañcetaṃ ekantasampādanena gacchatīti **nibbānogadhagāmī**. Atha vā **nibbānogadhagāminanti** nibbānassa antogāmināṃ. Maggabrahmacariyaṃ hi nibbānaṃ ārammaṇaṃ karitvā tassa anto eva pavattatīti. Imameva ca atthavikappaṃ dassetuṃ “**nibbānassa antogāminan**”ti-ādi vuttaṃ. **Soti** yo so samatimsa pāramiyo pūretvā sabbakilese bhañjitvā anuttaraṃ sammāsambodhiṃ abhisambuddho, so bhagavā **adesayi**

1. Anītiyantipi (Ka) Itivuttaka-Ṭṭha 106 piṭṭhe passitabbaṃ.

2. Ma 2. 322, 323 piṭṭhesu.

3. Dī 2. 31, 32; Ma 1. 224; Ma 2. 291; Saṃ 1. 138; Vi 3. 5, 7, 8 piṭṭhesu.

desesi. **Mahantehī**ti mahā-ātumehi uḷārajjhāsayehi. Mahantaṃ nibbānaṃ, mahante vā sīlakkhandhādike esanti gavesantīti **mahesino**, buddhādayo ariyā. Tehi **anuyāto** paṭipanno.

Yathā buddhena desitanti yathā abhiññeyyādibhāvena sammāsambuddhena mayā desitaṃ, evaṃ ye etaṃ maggabrahmacariyaṃ tadatthaṃ sāsana brahmacariyaṃca paṭipajjanti, te diṭṭhadhammikasamparāyikaparamatthehi yathārahaṃ anusāsantassa satthu mayhaṃ sāsana kārina ovādappaṭikarā sakalassa vaṭṭadukkhassa antaṃ pariyaṃtaṃ appavattiṃ karissanti, dukkhassa vā antaṃ nibbānaṃ sacchikarissanti.

Brahmacariyasuttavaṇṇanā niṭṭhitā.

6. Kuhasuttavaṇṇanā

26. Chaṭṭhe **kuhakā**ti sāmanta jappanādinā kuhanavattunā kuhakā, asanta guṇasambhāvanicchāya kohaññaṃ katvā paresaṃ viddhaṃsakāti attho. **Thaddhā**ti “kodhano hoti upāyāsabahulo, appampi vutto samāno abhisajjati kuppanti byāpajjati patitthiyati”¹ti evaṃ vuttena kodhena ca, “dubbaco hoti dovacassakaraṇehi dhammehi samannāgato akkhamo appadakkhiṇaggāhī anusāsanaṃ”²ti evaṃ vuttena dovacassena ca, “jātimado gottamado lābhamado ārogyamado yobbanamado jīvitamado”³ti evaṃ vuttajātimadādibhedena mānena ca garukātabbesu garūsupi nipaccakāraṃ akatvā ayosalākaṃ gilitvā ṭhita viya anonatā hutvā vicaraṇakā. Tenāha “**kodhena cā**”^{ti}-ādi.

Upalāpakāti micchājīvasena kulasaṅgaṇhakā. **Lapā**ti paccayatthaṃ payuttavācāvasena nippesikatāvasena lapakāti attho. **Siṅganti** siṅgāraṃ. Taṃ hi kusalassa vijjhanato suṭṭhu āsevitatāya sīse parikkhittaṃ sunibbattaṃ visāṇaṃ viya thirattā ca siṅgaṃ viyāti siṅgaṃ, nāgarikabhāvasaṅkhātassa kilesasiṅgassetāṃ nāmaṃ. Siṅgārabhāvo **siṅgāratā**, siṅgāra karaṇaka-ākāro vā. Cātura bhavo **cāturatā**.

1. Am 1. 121, 122, 124 piṭṭhesu.

2. Ma 1. 133; Vi 1. 272 piṭṭhesu.

3. Abhi 2. 359 piṭṭhe.

Tathā **cāturiyaṃ**. Parikkhatabhāvo **parikkhatatā**, parikhaṇitvā ṭhapitasseva daḷhasiṅgārassetam nāmaṃ. Itaram tasseva vevacanaṃ. Evaṃ sabbehi vārehi kilesasiṅgārātāva kathitā.

Uggatanaḷāti naḷasadisam tuccamānaṃ ukkhipitvā vicaraṇakā. Tenāha “**tuccamānaṃ ukkhipitvā ṭhitā**”ti. Yasmā te kuhanādiyogato na sammāpaṭipannā, tasmā “**mama santakā na hontī**”ti vuttaṃ. **Apagatāti** yadipi te mama sāsane pabbajitā, yathānusiṭṭham paṇa appaṭipajjanato apagatā eva imasmā dhammavinayā, ito te suvidūre ṭhitāti dasseti. Vuttaṃ hetam—

“Nabhañca dūre pathavī ca dūre,
Pāraṃ samuddassa tadāhu dūre.
Tato have dūratarāṃ vadanti,
Satañca dhammo asatañca rājā”ti¹.

Sabbattha patthaṭatāya vepullaṃ pāpuṇantīti sabbattha patthaṭabhāvena sīlādihammakkhandhapāripūriyā vepullaṃ pāpuṇanti.

Kuhasuttavaṇṇanā niṭṭhitā.

7. Santuṭṭhisuttavaṇṇanā

27. Sattame **niddosānīti** avajjarahitāni āgamanasuddhito kāyamaṇḍanādikilesavatthubhāvābhāvato ca. Tattha sulabhatāya pariyesanadukkhassa abhāvo dassito, appatāya pariharaṇadukkhassapi abhāvo dassito, anavajjatāya agarahitabbatāya bhikkhusārappabhāvo dassito hoti. Appatāya vā parittāsassa avatthutā, sulabhatāya gedhādīnaṃ avatthutā, anavajjatāya ādīnavadassananissaraṇapaññānaṃ atthitā dassitā hoti. Appatāya vā lābhena na somanassaṃ janayanti, alābhena na domanassaṃ janayanti, anavajjatāya vippaṭisāranimittam aññāṇupekkham na janayanti avippaṭisāravatthubhāvato.

1. Khu 6. 137, 142 piṭṭhesu.

Paṃsukūlanti saṅkārakūḍādisu yattha katthaci paṃsūnaṃ upari ʘhitattā abbhuggataṭṭhena paṃsukūlaṃ viyāti paṃsukūlaṃ, paṃsu viya kucchitabhāvaṃ ulati gacchatīti paṃsukūlanti evaṃ laddhanāmaṃ rathikādisu patitanantakāni uccinitvā katacīvaraṃ. **Rukkhamūlanti** vivekānurūpaṃ yaṃ kiñci rukkhasamīpaṃ. **Yaṃ kiñci muttanti** yaṃ kiñci gomuttaṃ. Keci panettha “gomuttaparibhāvitaharītakakhaṇḍaṃ **pūtimuttan**”ti vadanti, “pūtibhāvena āpaṇādito vissatṭhaṃ chaḍḍitaṃ apariggahitaṃ yaṃ kiñci bhesajjaṃ **pūtimuttanti** adhippetan”ti apare.

Yato khoti paccatte nissakkavacanaṃ, yaṃ khoti vuttaṃ hoti. **Tena tuṭṭho hotīti** vuttakiriyaṃ parāmasati. **Tuṭṭhoti** santuṭṭho. **Idamassāhanti** yvāyaṃ catubbidhena yathāvuttena paccayena appena sulabhena santoso, idaṃ imassa bhikkhuno sīlasaṃvarādisu aññataraṃ ekaṃ sāmāññaṅgaṃ samaṇabhāvakāraṇanti ahaṃ vadāmi. Santuṭṭhassa hi catupārisuddhisīlaṃ paripuṇṇaṃ hoti, samathavipassanā ca bhāvanāpāripūriṃ gacchanti. Atha vā sāmāññaṃ nāma ariyamaggo, tassa saṅkhepato dve aṅgā bāhiraṃ ajjhattikanti. Tattha bāhiraṃ sappurisūpanissayo saddhammassavanaṅca. Ajjhattikaṃ pana yonisomanasikāro dhammānudhammappaṭipatti ca. Tesu yasmā yathārahaṃ dhammānudhammappaṭipattibhūtā tassa mūlabhūtā cete dhammā, yadidaṃ appicchatā santuṭṭhitā pavivittatā asaṃsaṭṭhatā āraddhavīriyatāti evamādayo, tasmā vuttaṃ “**idamassāhaṃ aññataraṃ sāmāññaṅganti vadāmi**”ti.

Senāsanamārabbhāti vihārādiṃ mañcapīṭhādīṅca senāsanam nissāya. **Cīvaraṃ pānabhojananti** nivāsanādicīvaraṃ ambapānakādipānaṃ khādanīyabhojanīyādibhuñjitabbavatthuṅca ārabbhāti sambandho. **Vighātoti** vighātabhāvo, cittassa dukkhaṃ na hotīti yojanā. Ayaṃ hettha saṅkhepattho—“amukasmīṃ nāma āvāse paccayā sulabhā”ti labhitabbaṭṭhānagamanena vā “mayhaṃ pāpuṇāti, na tuyhan”ti vivādāpajjanena vā navakammakaraṇādivasena vā senāsanādīni pariyesantānaṃ asantuṭṭhānaṃ icchitālābhādinā yo vighāto cittassa hoti, so tattha santuṭṭhassa na hoti. **Disā nappaṭihaññatīti** santuṭṭhiyā cātuddisabhāvena disā na paṭihanati. Vuttaṃ hettaṃ “cātuddiso appaṭigho ca hoti, santussamāno itarītareṇā”ti¹.

1. Khu 1. 286 piṭṭhe Suttanipāte.

Samaṇadhammassa anulomāti samaṇadhammassa samathavipassanābhāvanāya, ariyamaggasseva vā anucchavikā appicchatādayo. **Tuṭṭhacittassa bhikkhunoti** tuṭṭhacittena bhikkhunā. **Adhiggahitā hontī**ti paṭipakkhadhamme abhibhavitvā gahitā honti. **Antogatā**ti abbhantaragatā. Na **paribāhirā**ti na bāhirā katā.

Santuṭṭhisuttavaṇṇanā niṭṭhitā.

8. Ariyavaṁsasuttavaṇṇanā

28. Aṭṭhame **vaṁsa**-saddo “piṭṭhivaṁsaṁ atikkamitvā nisīdatī”ti-ādīsu dvinnam gopānasīnam sandhānatṭhāne ṭhapetabbadaṇḍake āgato.

“Vaṁso visālova yathā visatto,
Puttesu dāresu ca yā apekkhā.
Vaṁsakkalīrova asajjamāno,
Eko care khaggavisāṇakappo”ti¹—

ādīsu kaṭṭhake. “Bherisaddo mudīṅgasaddo vaṁsatālasaddo”ti-ādīsu tūriyavisese, veṇūtipi vuccati. “Bhinnena piṭṭhivaṁsena mato hatthī”ti-ādīsu hatthi-ādīnam piṭṭhivemajjhe padese. “Kulavaṁsaṁ ṭhapessāmī”ti-ādīsu² kulanvaye. “Vaṁsānurakkhako pavenīpālako”ti-ādīsu³ guṇānupubbīyaṁ guṇānam pabandhappavattiyam. Idha pana catupaccayasantosabhāvanārāmatāsaṅkhāttaguṇanam pabandhe daṭṭhabbo. Tassa pana vaṁsassa kulanvayaṁ guṇanvayaṅca nidassanavasena dassetuṁ “yathā hī”ti-ādi vuttam. Tattha **khattiyavaṁsoti** khattiyakulavaṁso. Esa nayo sesapadesupi. **Samaṇavaṁso** pana samaṇatanti samaṇapaveṇī. **Mūlagandhādīnanti ādi**-saddena yathā sārāgandhādīnam saṅgaho, evamettha gorasādīnampi saṅgaho daṭṭhabbo, dutiyena pana **ādi**-saddena kāsikavatthasappimaṇḍādīnam.

Ariya-saddo amilakkhesupi manussesu pavattati, yesam nivasanaṭṭhānam ariyam āyatananti vuccati. Yathāha “yāvatā ānanda ariyam

1. Khu 1. 285; Khu 3. 9 piṭṭhesu.

2. Dī 3. 154 piṭṭhe.

3. Visuddhi 1. 95; Dhammapada-Ṭīha 2. 244 piṭṭhesu. Dī-Ṭī 3. 221 piṭṭhepi passitabbarā.

āyatanan”ti¹. Lokiyasādhujañesupi “ye hi vo ariyā parisuddhakāyasamācārā, tesam aham aññataro”ti-ādīsu². Idha pana ye “ārakā kilesehī”ti-ādīnā laddhanibbacanā paṭividdha-ariyasaccā, te eva adhippetāti dassetuṃ **“ke pana te ariyā”**ti puccham katvā **“ariyā vuccanti”**ti-ādī vuttam. Tattha ye mahāpañidhānakappato paṭṭhāya yāvāyaṃ kappo, etthantare uppannā sammāsambuddhā, te tāva sarūpato dassetvā tadaññepi sammāsambuddhe paccekabuddhe buddhasāvake ca saṅgahetvā anavasesato ariye dassetuṃ **“apicā”**ti-ādī vuttam. Tattha yāva sāsanaṃ antaradhāyati, tāva satthā dharati eva nāmāti imameva bhagavantam, ye cetarahi buddhasāvakā, te ca sandhāya paccuppannaggahaṇam. Tasmim tasmim kāle te te paccuppannāti ce, atītānāgataggahaṇam na kattabham siyā.

Idāni yathā bhagavā “dhammam vo bhikkhave desessāmi ādikalyāṇam majjhakalyāṇam pariyosānakalyāṇam sāttham sabyañjanam kevalaparipuṇṇam parisuddham brahmacariyam pakāsessāmi, yadidaṃ cha chakkānī”ti **chachakkadesanāya**³ aṭṭhahi padehi vaṇṇam abhāsi, evaṃ mahā-ariyavaṃsadesanāya ariyānaṃ vaṃsam “cattārome bhikkhave ariyavaṃsā aggaññā rattaññā vaṃsaññā porāṇā, asaṃkiṇṇā asaṃkiṇṇapubbā na saṃkiyanti na saṃkiyissanti, appaṭikuṭṭhā samaṇehi brāhmaṇehi viññūhī”ti yehi navahi padehi vaṇṇam abhāsi, tāni tāva ānetvā thomanāvaseneva vaṇṇento **“te kho panete”**ti-ādīmāha. **Aggāti jānitabbā** sabbavaṃsehi setṭhabhāvato setṭhabhāvasādhanato ca. **Rattaññā cirarattāti jānitabbā**⁴ rattaññūhi buddhādīhi tehi ca tathā anaṭṭhitattā. **Vaṃsāti jānitabbāti** buddhādīnaṃ ariyānaṃ vaṃsāti jānitabbā. **Porāṇāti** purātanā. **Na adhunuppattikāti** na adhunātanā. **Avikiṇṇāti** na khittā na chaḍḍitā. Tenāha **“anapanītā”**ti. **Na apanītapubbāti** na chaḍḍitapubbā, tissannampi sikkhānaṃ paripūraṇūpāyabhāvato na pariccattapubbā. Tato eva idānipi na apanīyanti, anāgatepi na apanīyissantiyeva. Dhammasabhāvassa vijānanena **viññū**.
Samitapāpā **samaṇā**

1. Dī 2. 74; Khu 1. 187 piṭṭhesu.

2. Ma 1. 20 piṭṭhe.

3. Ma 3. 327 piṭṭhe.

4. Rattaññā dīgharattam pavattāti jānitabbā (Aṭṭhakathāyam)

ceva bāhitapāpā **brāhmaṇā** ca. **Tehi appaṭikuṭṭhā** appaṭikkhittā. Yehi na paṭikkositabbā, te aninditabbā. Agarahitabbā apariccajitabbatāya appaṭikkhipitabbā hontīti.

Santuṭṭhoti ettha yathādhippetasantosameva dassentena paccayasantosavasena santuṭṭhoti vuttaṃ, jhānavipassanādivasenapi idha bhikkhuno santuṭṭhatā hotīti. **Itarītareṇā**ti itarena itarena. Itarasaddo aniyamavacano dvikkhattuṃ vuccamāno yaṃ-kiñcisaddehi samānattho hotīti vuttaṃ “**yena kenaci**”ti. Svāyaṃ aniyamavācitāya eva yathā thūlādīnaṃ aññataravacano, evaṃ yathāladdhādīnampi aññataravacanoti. Tattha dutiyapakkhasseva idha icchitabhāvaṃ dassento “**atha kho**”ti-ādimāha. Nanu ca yathāladdhādayopi thūlādayo eva? Saccametaṃ, tathāpi atthi vīseso. Yo hi yathāladdhesu thūlādīsu santoso, so yathālābhasantosova, na itaro. Na hi so paccayamattasannissayo icchito, atha kho attano kāyabalasārubbhāvasannissayopi. Thūladukādayo tayopi cīvare labbhanti, majjhimo catupaccayasādhāraṇo, pacchimo pana cīvare senāsane ca labbhātīti daṭṭhabbaṃ. **Ime tayo santoseti** idaṃ sabbasaṅgāhikanayena vuttaṃ. Ye hi parato gilānapaccayaṃ piṇḍapāte eva pakkhipitvā cīvare vīsati, piṇḍapāte pannarasa, senāsane pannarasāti samapaññāsa santosā vuccanti, te sabbepi yathārahaṃ imesu eva tīsu santosesu saṅghaṃ samosaraṇaṃ gacchantīti.

Cīvaraṃ jānitabbanti “idaṃ nāma cīvaraṃ kappiyan”ti jātito cīvaraṃ jānitabbam. **Cīvarakhetanti** cīvarassa uppattikkhettaṃ. **Paṃsukūlanti** paṃsukūlacīvaraṃ, paṃsukūlalakkhaṇappattaṃ cīvaraṃ jānitabbanti attho. **Cīvarasantosoti** cīvare labbhamāne sabbo santoso jānitabbo. **Cīvarappaṭisaṃyuttāni dhutaṅgāni jānitabbāni**, yāni gopento cīvarasantosena sammadeva santuṭṭho hotīti. Khomakappāsikakoseyyakambalasāṇabhaṅgāni **khomādīni**. Tattha **khomaṃ** nāma khomasuttehi vāyitaṃ khomappaṭṭacīvaraṃ. Tathā sesānipi. **Sāṇanti** sāṇavākasuttehi katacīvaraṃ. **Bhaṅganti** pana khomasuttādīni sabbani, ekaccāni vā missetvā katacīvaraṃ. Bhaṅgampi vākamayamevāti keci. **Chāti** gaṇanaparicchedo. Yadi evaṃ ito

aññā vatthajāti natthīti? No natthi, sā pana etesaṃ anulomāti dassetuṃ “**dukūlādīni**”ti-ādi vuttaṃ. **Ādi**-saddena pattuṇṇaṃ somārapaṭṭaṃ cīnapaṭṭaṃ iddhijaṃ devadinnanti tesāṃ saṅgaho. Tattha dukūlaṃ sāṇassa anulomaṃ vākamayattā. Pattuṇṇadese sañjātavatthaṃ **pattuṇṇaṃ**. “Koseyyaviseso”ti hi abhidhānakose vuttaṃ. Somāradese cīnadese ca jātavattāni **somāracīnapaṭṭāni**. Pattuṇṇādīni tīṇi koseyyassa anulomāni pāṇakehi katasuttamayattā. **Iddhijaṃ** ehibhikkhūnaṃ puññiddhiyā nibbattacīvaraṃ, taṃ khomādīnaṃ aññataraṃ hotīti tesāṃ eva anulomaṃ. Devatāhi dinnacīvaraṃ **devadinnaṃ**, taṃ kapparukkhe nibbattaṃ jāliniyā devakaññāya anuruddhattherassa dinnavatthasadiṣaṃ, tampi khomādīnaṃyeva anulomaṃ hoti tesu aññatarabhāvato.

Imānīti antogadhāvadhāraṇavacanāṃ, imāni evāti attho. Buddhādīnaṃ paribhogayoggaṭṭāya **kappiyacīvarāni**. Idāni avadhāraṇena nivattitāni ekadesena dassetuṃ “**kusacīraṇ**”ti-ādi vuttaṃ. Tattha kusatiṇehi aññehi vā tādisehi tiṇehi katacīvaraṃ **kusacīraṇ**. Akkavākādīhi vākehi katacīvaraṃ **vākacīraṇ**. Catukkoṇehi tikkoṇehi vā phalakehi katacīvaraṃ **phalakacīraṇ**. Manussānaṃ kesehi katakambalaṃ **kesakambalaṇ**. Cāmarivāla-assavālādīhi kataṃ **vālakambalaṇ**. Makacitanti vāyito **potthako**. **Cammanti** miḡacammādi yaṃ kiñci cammaṇ. Ulūkapakkhehi ganthitvā katacīvaraṃ **ulūkapakkhaṇ**. Bhujapattatacādimayaṃ **rukkhadussaṇ**, tirīṭakanti attho. Sukhumatarāhi latāhi latāvākehi vā vāyitaṃ **latādussaṇ**. Erakavākehi kataṃ **erakadussaṇ**. Tathā **kadalidussaṇ**. Sukhumehi veḷuvilīvehi kataṃ **veḷadussaṇ**. **Ādi**-saddena vakkalādīnaṃ saṅgaho. **Akappiyacīvarāni** tiṭṭhiyaddhajabhāvato.

Aṭṭhannaṃ mātikānaṃ vasaṇāti “sīmāya deti, katikāya deti”ti-ādinā¹ āgatānaṃ aṭṭhannaṃ cīvaruppattimātikānaṃ vasaṇa. Cīvarānaṃ paṭilābhakkhetadassanatthaṃ hi bhagavatā “aṭṭhimā bhikkhave mātikā”ti-ādinā¹ mātikā ṭhapitā. **Mātikāti** hi mātaro cīvarappattijanikāti.

1. Vi 3. 427 piṭṭhe.

Sosānikanti susāne patitaṃ. **Pāpaṇikanti** āpaṇadvāre patitaṃ. **Rathiyanti** puññatthikehi vātapānantarena rathikāya chaḍḍitacoḷakam. **Saṅkarakūṭakanti** saṅkaraṭṭhāne chaḍḍitacoḷakam. **Sinānanti** nahānacoḷakam, yaṃ bhūtavajjehi sasīsam nahāyivā kālakaṇṇicoḷanti chaḍḍetvā gacchanti. **Titthanti** titthacoḷam, sinānatitthe chaḍḍitapilotikā. **Aggidaddhanti** agginā daddhappadesam. Tam hi manussā chaḍḍenti. **Gokhāyitādīni** pakaṭāneva. Tānipi hi manussā chaḍḍenti. **Dhajam ussāpetvāti** nāvaṃ ārohantehi vā yuddham pavisantehi vā dhajayaṭṭhim ussāpetvā, tattha baddham vātena **ānītaṃ** tehi chaḍḍitanti adhippāyo.

Sādakabhikkhunāti gahapaticīvarassa sādiyanabhikkhunā.

Ekamāsamattanti cīvaramāsasaññitaṃ ekamāsamattaṃ **vitakketuṃ vaṭṭati**, na tato paranti adhippāyo. Sabbassapi hi taṇhāniggahatthā sāsane paṭipattīti. **Paṃsukūliko addhamāseneva karoti** aparappaṭibaddhattā paṭilābhassa, itarassa pana parappaṭibaddhattā māsamattaṃ anuññātaṃ. **Idam māsaddhamāsamattaṃ -pa- vitakkasantoso** vitakkentassa parimitakālikattā. Mahātheraṃ tattha attano sahāyaṃ icchantopi garugāravena **“gāmadvāraṃ bhante gamissāmi”** iccevāha. Theropi tassa ajjhāsayaṃ ñatvā **“ahampāvuso gamissāmi”**ti āha. “Imassa bhikkhuno vitakkassa avasaro mā hotū”ti **pañham pucchamāno gāmaṃ pāvisi**. **Uccārapalibuddhoti** uccārena piḷito. Tādā bhagavato dukkarakiriyānussaraṇamukhena tathāgate uppanassa pītisomanassavegassa balavabhāvena kilesānaṃ vikkhambhitattā **tasmimyeva -pa- tīni phalāni patto**.

Kattha labhissāmīti cintanāpi lābhāsāpubbikāti tathā **“acintetvā”**ti vuttaṃ. “Sundaraṃ labhissāmi, manāpaṃ labhissāmi”ti evamādicintanāya kā nāma kathā, kathaṃ pana gantabbanti āha **“kammaṭṭhānasīseneva gamanan”**ti. Tena cīvaraṃ paṭicca kiñcīpi na cintetabbamevāti dasseti. Apesalo appatirūpāyapi pariyesanāya paccayo bhavēyyāti **“pesalaṃ bhikkhuṃ gahetvā”**ti vuttaṃ. **Āhariyamānanti** susānādīsu patitaṃ vatthaṃ “ime bhikkhū paṃsukūlapariyesanaṃ carantī”ti ñatvā kenaci purisena tato ānīyamānaṃ. **Evam laddham gaṇhantassapīti** evam paṭilābhasantosam akopetvā laddham gaṇhantassapi. **Attano**

pahonakamattenevāti yathāladdhānaṃ paṃsukūlānaṃ ekapaṭṭadupaṭṭānaṃ atthāya attano pahonakappamaṇeṇeva. Avadhāraṇena upari paccāsaṃ nivatteti. Gāme bhikkhāya āhiṇḍantena sapaḍānacārinā viya dvārappaṭipāṭiyā caraṇaṃ **loluppavivajjanaṃ** nāma loluppassa dūrasamussāritattā.

Yāpetunti attabhāvaṃ pavattetuṃ. **Dhovanupagenā**ti dhovanayoggena. **Paṇṇā**ṇīti ambajambādipaṇṇāni. **Akopetvā**ti santosaṃ akopetvā. **Pahonakanihārenevā**ti antaravāsakādīsu yaṃ kātukāmo, tassa pahonakaniyāmeṇeva yathāladdhaṃ thūlasukhumādiṃ gahetvā karaṇaṃ. **Timaṇḍalappaṭicchādanamattassevā**ti nivāsanaṃ ce nābhimaṇḍalaṃ jāṇumaṇḍalaṃ, itaraṅce galavāṭamaṇḍalaṃ jāṇumaṇḍalanti timaṇḍalappaṭicchādanamattasseva karaṇaṃ, taṃ pana atthato tiṇṇaṃ cīvarānaṃ heṭṭhimantena vuttaparimāṇaṃyeva hoti. **Avicāretvā** na vicāretvā.

Kusibandhanakāleti maṇḍalāni yojetvā sibbanakāle. **Sattavā**reti satta sibbanavāre. Kappabindu-apadesena kassaci vikārasa akaraṇaṃ **kappasantoso**.

Sītappaṭighātanādi atthāpattito sijjhatīti mukhyameva cīvaraparibhoge payojanaṃ dassetuṃ “**hirikopīnappaṭicchādanamattavasenā**”ti vuttaṃ. Tenāha bhagavā “yāvadeva hirikopīnappaṭicchādanatthan”ti¹. **Vaṭṭati**, na tāvatā santoso kuppatti sambhārānaṃ² dakkhiṇeyyānaṃ alābhato. **Sāraṇīyadhamme** **thatvā**ti silavantehi bhikkhūhi sādharmaṇabhogibhāve thatvā. **Itī**ti-ādinā paṭhamasseva ariyavaṃsassa paṃsukūlikaṅgatecīvarikaṅgānaṃ tesaṅcassa paccayataṃ dassento “iti ime dhammā aññaṃaññaṃsā samuṭṭhāpakā upatthambhakā cā”ti dīpeti. Esa nayo ito paresu.

Santuṭṭho hoti **vaṇṇavādī**ti ettha catukkoṭikaṃ sambhavati. Tattha catutthoyeva pakkho vaṇṇitathomitoti tathā desanā katā. **Eko santuṭṭho** hoti, **santosassa vaṇṇaṃ na katheti** seyyathāpi thero nāḷako. **Eko na santuṭṭho** hoti, **santosassa vaṇṇaṃkatheti** seyyathāpi upanando sakyaputto. **Eko neva santuṭṭho** hoti, **na santosassa vaṇṇaṃ katheti** seyyathāpi thero

1. Ma 1. 12; Am 2. 341; Khu 7. 379 piṭṭhesu.

2. Samānānaṃ (Ka)

lāḷudāyi. **Eko santuṭṭho ceva hoti, santosassa ca vaṇṇaṃ katheti** seyyathāpi therō mahākassapo.

Anesananti ayuttaṃ esanaṃ. Tenāha “**appatirūpan**”ti, sāsane ṭhitānaṃ appatirūpaṃ ayoggaṃ. **Kohaṇṇaṃ karontoti** cīvaruppādananimittaṃ paresaṃ kuhaṇaṃ vimhāpanaṃ karonto. **Uttasatīti** taṇhāsantāsenā uparūpari tasati. **Paritassatīti** parito tassati. Yathā sabbe kāyavacippayogā tadatthā eva jāyanti, evaṃ sabbabhāgehi tasati. Gadhitaṃ¹ vuccati giddho, so cettha abhijjhālakkhaṇo adhippeto. Gadhitaṃ etassa natthīti **agadhītoti** āha “**vigatalobhagiddho**”ti. **Mucchanti** taṇhāvasena muyhanaṃ. Tassa samussayassa adhigataṃ **anāpanno** anupagato. **Anotthato** anajjhotthato. **Apariyonaddhoti** taṇhacchadanena acchādito. **Ādīnaṃ passamānoti** diṭṭhadhammikaṃ samparāyikaṇca dosaṃ passanto. Gadhitaṃ paribhogato nissarati etenāti nissaraṇaṃ, idamaṭṭhikā. Tam pajānātīti **nissaraṇapaṇṇo**. Tenāha “**yāvadeva -pa- jānanto**”ti.

Nevattānukkaṃsetīti attānaṃ neva ukkaṃseti na ukkhipati na ukkaṭṭhato dahati. **Ahanti**-ādi ukkaṃsanākāradassanaṃ. **Na vambheti** na hīleti na nihīnato dahati. **Tasmim cīvarasantoseti** tasmim yathāvutte vīsatividhe cīvarasantose. Kāmañcetta vuttappakārasantosaggahaṇeṇeva cīvarahetu anesanāpajjanādipi gahitameva tasmim sati tassa bhāvato, asati ca abhāvato. Vaṇṇavādītā-attukkaṃsanaparavambhaṇāni pana gahitāni na hontīti “**vaṇṇavādādīsu vā**”ti² vikappo vutto. Etta ca **dakkhoti**-ādi yesaṃ dhammānaṃ vasenassa yathāvuttasantosādī ijjhanti, taṃdassanaṃ. Tattha **dakkhoti** iminā tesāṃ samuṭṭhāpanapaṇṇaṃ dasseti. **Analasoti** iminā paggaṇhanavīriyaṃ, **sampajānoti** iminā pārihāriyapaṇṇaṃ, **paṭissatoti** iminā tattha asammosavuttiṃ dasseti.

Piṇḍapāto jānitabboti pabhedato piṇḍapāto jānitabbo.
Piṇḍapātakkhattanti piṇḍapātassa uppattiṭṭhānaṃ. **Piṇḍapātasantoso**

1. Gadhitaṃ (Ka)

2. Vaṇṇavādītādīsu vāti (Ka)

jānitabboti piṇḍapātasantosappabhedo jānitabbo. Idha bhesajjampi piṇḍapātagatikameva. Āharitabbato hi sappi-ādīnampi gahaṇaṃ kataṃ.

Piṇḍapātakkhettaṃ piṇḍapātassa uppattiṭṭhānaṃ khettaṃ viya khettaṃ. Uppajjati ettha, etenāti ca **uppattiṭṭhānaṃ**. Saṃghato vā hi bhikkhuno piṇḍapāto uppajjati uddisavasena vā. Tattha sakalassa saṃghassa dātabbabbhattaṃ **saṃghabbhattaṃ**. Katipaye bhikkhū uddisitvā uddesena dātabbabbhattaṃ **uddesabbhattaṃ**. Nimantetvā dātabbabbhattaṃ **nimantaṇaṃ**. Salākāya dātabbabbhattaṃ **salākabbhattaṃ**. Ekasmiṃ pakkhe ekadivasaṃ dātabbabbhattaṃ **pakkhikaṃ**. Uposathe uposathe dātabbatattaṃ **uposathikaṃ**. Pāṭipada-divase dātabbabbhattaṃ **pāṭipadikaṃ**. Āgantukānaṃ dātabbabbhattaṃ **āgantukabbhattaṃ**. Dhuragehe eva ṭhapetvā dātabbabbhattaṃ **dhurabbhattaṃ**. Kuṭiṃ uddissa dātabbabbhattaṃ **kuṭibhattaṃ**. Gāma-vāsi-ādīhi vārena dātabbabbhattaṃ **vārabhattaṃ**. Vihāraṃ uddissa dātabbabbhattaṃ **vihārabhattaṃ**. Sesāni pākaṭāneva.

Vitakketi “kattha nu kho ahaṃ ajja piṇḍāya carissāmī”ti. “**Sve kattha piṇḍāya carissāmā**”ti therena vutte “**asukagāme bhante**”ti kāmametaṃ paṭivacanadānaṃ, yena pana cittaṃ cintetvā taṃ vuttaṃ, taṃ sandhāyāha “**ettakaṃ cintetvā**”ti. **Tato paṭṭhāyāti** vitakkamaḷake ṭhatvā vitakkita-kālato paṭṭhāya. **Tato paraṃ vitakkento ariyavaṃsā cuto hotīti** idaṃ tiṇṇampi ariyavaṃsikānaṃ vasena gahetabbaṃ, na ekacārikasseva. Sabbopi hi ariyavaṃsiko ekavārameva vitakketuṃ labhati, na tato paraṃ. **Paribāhīro**ti ariyavaṃsikabhāvato bahibhūto. Svāyaṃ vitakkasantoso kammaṭṭhāna-manasikārena na kuppati visujjhati ca. Ito paresupi eseva nayo. Tenevāha “**kammaṭṭhānasīsena gantabbaṃ**”ti. **Gahetabbamevāti** aṭṭhānappayutto **eva-saddo**. Yāpanamattameva gahetabbanti yojetabbaṃ.

Etthāti etasmiṃ puṇḍapātappaṭiggahaṇe. **Appanti** attano yāpanappamāṇatopi appaṃ gahetabbaṃ dāyakaṃsa citta-rādhanatthaṃ. **Pamāṇenevāti** attano pamāṇeneva appaṃ gahetabbaṃ. **Pamāṇena gahetabbanti** etta kāraṇaṃ dassetuṃ “**paṭiggahaṇasmiṃhi**”ti-ādi vuttaṃ. **Makkhetīti** viddhamseti apaneti. **Vinipāṭeti** vināseti aṭṭhānaviniyogena. **Sāsananti** satthusāsaṇaṃ anusīṭṭhiṃ **na karoti** na paṭipajjati. Sapadānacāriṇā

viya dvārapaṭipāṭiyā caraṇaṃ **loluppavivajjanasantosoti** āha
“dvārapaṭipāṭiyā gantabban”ti.

Harapetvāti adhikaṃ apantvā. Āhāragedhato nissarati etenāti **nissaraṇaṃ**. Jighacchāya paṭivinodanattamaṃ katā, kāyassa ṭhiti-
 ādipayojanaṃ pana atthāpattito āgatamevāti āha **“jighacchāya -pa- santoso
 nāmā”**ti. **Nidahitvā na paribhuñjitabbaṃ** tadahupīti adhippāyo. Itaratta
 pana sikkhāpadeneva vāritaṃ. **Sāraṇiyadhamme ṭhitenāti** silavantehi
 bhikkhūhi sādharmaṇabhogibhāve ṭhitenā.

Senāsanenāti sayanena āsanena ca. Yattha yattha hi mañcādike
 vihārādike ca seti, taṃ senaṃ. Yattha yattha pīṭhādike āsati, taṃ āsanaṃ.
 Tadubhayaṃ ekato katvā **“senāsanā”**ti vuttaṃ. Tenāha **“mañco”**ti-ādi.
 Tattha **mañco** masārakādi. Tathā **pīṭhaṃ**. Mañcabhisi, pīṭhabhisīti duvidho
bhisi. **Vihāro** pākāraparicchinnō sakalo āvāso, “dīghamukhapāsādo”ti keci.
Aḍḍhayogo dīghapāsādo, “ekapassacchādanakasenāsanā”ti keci. **Pāsādoti**
 caturassapāsādo, “āyatacaturassapāsādo”ti keci. **Hammiyanti**
 muṇḍacchadanapāsādo. **Guhāti** kevalā pabbataguhā. **Leṇaṃ** dvārabandhaṃ.
Aṭṭo bahalabhittikagehaṃ, yassa gopānasiyo aggahetvā iṭṭhakāhi eva
 chadanaṃ hoti, “aṭṭalākārena karīyatī”tipi vadanti. **Mālo** ekakūṭasaṅgahito
 anekakoṇo paṭissayaviseso, “vaṭṭākārena katasenāsanā”ti keci.

Piṇḍapāte vuttanayenevāti “sādako bhikkhu ‘ahaṃ kattha vasissāmī’
 vitakketī”ti-ādinā yathārahaṃ piṇḍapāte vuttanayeneva veditabbā. “Tato
 paraṃ vitakkento ariyavaṃsā cuto hoti paribāhiro, senāsanāṃ kuhiṃ
 labhissāmīti acintetvā kammaṭṭhānasīseneva gantabban”ti ca evamādi
 sabbāṃ purimanayeneva.

Kasmā panettha paccayasantosaṃ dassentena bhagavatā
 gilānapaccayasantoso na gahitoti? Na kho panetaṃ evaṃ daṭṭhabbanti
 dassento **“gilānapaccayo pana piṇḍapāte eva pavitṭho”**ti āha,
 āharitabbatāsāmaññenāti adhippāyo. Yadi evaṃ tatthāpi piṇḍapāte viya

vitakkasantosādayopi pannarasa santosā icchitabbāti? Noti dassento āha “**tatthā**”ti-ādi. Nanu cettha dvādaseva dhutaṅgāni viniyogaṃ gatāni, ekaṃ pana nesajjikaṅgiṃ na katthaci viniyuttanti āha “**nesajjikaṅgaṃ bhāvanārāma-ariyavaṃsaṃ bhajati**”ti. Ayañca attho aṭṭhakathāruḷho evāti dassento “**vuttampi cetan**”ti-ādimāha.

Pathaviṃ pattharamāno viyāti-ādi ariyavaṃsadesanāya sudukkarabhāvadassanaṃ mahāvisayattā tassā desanāya. Yasmā nayasahassaapaṭimaṇḍitaṃ hoti, ariyamaggādhigamāya vitthārato pagattiyamānā desanā **cittuppādakaṇḍe** ayañca bhāvanārāma-ariyavaṃsakathā ariyamaggādhigamāya vitthārato pavattiyamānā eva hotīti vuttaṃ “**sahassanayapaṭimaṇḍitaṃ -pa- desanaṃ āraṭi**”ti.

Paṭipakkhavidhamanato abhimukhabhāvena ramaṇaṃ āramaṇaṃ **ārāmoti** āha “**abhiratīti attho**”ti. Byadhikaraṇānampi padānaṃ vasena bhavati bāhiratthasamāso yathā “urasilomo kaṇṭhekāḷo”ti āha “**bhāvanāya ārāmo assāti bhāvanārāmo**”ti. Abhiramitabbaṭṭhena vā āromo, bhavanā ārāmo assāti **bhāvanārāmoti** evampettha samāsajjanā veditabbā. **Bhāvento ramatīti** etena bhāvanārāmasaddānaṃ kattusādhanataṃ kammadhārayasamāsatañca dasseti. “**Pajahanto ramati**”ti vuttattā **pahānārāmoti** etthāpi eseva nayo.

Kāmaṃ “nesajjikaṅgaṃ bhāvanārāma-ariyavaṃsaṃ bhajati”ti vuttaṃ bhāvanāyogassa anucchavikkattā, nesajjikaṅgavasena pana nesajjikassa bhikkhuno ekaccāhi āpattīhi anāpattibhāvoti tampi saṅgaṇhanto “**terasannaṃ dhutaṅgānaṃ**”ti vatvā vinayaṃ patvā garuke ṭhātabbanti icchitattā sallekhasa apariccajanavasena paṭipatti nāma vinaye ṭhitassevāti āha “**terasannaṃ -pa- kathitaṃ hoti**”ti. Kāmaṃ suttabhidhammapiṭakesupi tattha tattha sīlakathā āhaṭṭāyeva, yehi pana guṇehi sīlassa vodānaṃ hoti, tesu kathitesu yathā sīlakathābāhullaṃ vinayapiṭakaṃ kathikaṃ hoti, evaṃ bhāvanākathābāhullaṃ suttapīṭakaṃ abhidhammapiṭakañca catutthena ariyavaṃsena kathitena kathitameva hotīti vuttaṃ “**bhāvanārāmena avasesaṃ piṭakadvayaṃ kathitaṃ**”ti. So nekkhammaṃ

bhāvento ramatī”ti nekkhammapadaṃ ādim katvā tattha desanāya pavattattā sabbesampi vā samathavipassanāmaggadhammānaṃ yathāsakaṃ paṭipakkhato nikkhamanena nekkhammasaññitānaṃ tattha āgatattā so paṭho nekkhammapāḷīti vuccatīti āha “**nekkhammapāḷiyā kathetabbo**”ti. Tenāha **aṭṭhakathāyaṃ**¹ “sabbepi kusalā dhammā, nekkhammanti pavuccare”ti.

Dasuttarasuttantapariyāyenāti dasuttarasuttantadhammena² dasuttarasuttante āgatanāyenaṃti vā attho. Sesapadadvayepi eseva nayo.

Sopi jāgariyaṃ anuyutto bhikkhu. **Nekkhammanti** kāmehi nikkhantabhāvato nekkhammasaññitānaṃ paṭhamajjhānūpacāraṃ, so “abhijjhaṃ loke pahāyā”ti-ādinā³ āgato. Paṭhamajjhānassa pubbhāgabhāvanā hi idhādhippetā, tasmā “abyāpādan”ti-ādīsupi evameva attho veditabbo. Sa-upāyānaṃ hi aṭṭhannaṃ samāpattīnaṃ aṭṭhārasannaṃ mahāvipassanānaṃ catunnaṃ ariyamaggānaṃca vasenettha desanā pavattāti. Tattha **abyāpādanti** mettā. **Ālokasaññanti** vibhūtaṃ katvā manasikaraṇena upaṭṭhita-ālokasaññānaṃ. **Avikkhepanti** samādhim. **Dhammavavatthānanti** kusalādidhammānaṃ yāthāvanicchayaṃ, “sapaccayanāmavavatthānan”tipi vadanti. Evaṃ kāmacchandādinīvaraṇappahānena “abhijjhaṃ loke pahāyā”ti-ādinā³ vuttassa paṭhamajjhānassa pubbhāgapaṭipadāya bhāvanārāmataṃ pahānārāmataṃca dassetvā idāni saha upāyena aṭṭhasamāpattīti aṭṭhārasahi ca mahāvipassanāhi taṃ dassetuṃ “**ñāṇan**”ti-ādimāha. Nāmarūpapariiggahaṇakaṃkhāvitaraṇānaṃ hi vibandhabhūtassa mohassa dūrīkaraṇena ñātapariññāya ṭhitassa aniccasaññādayo sijjhanti. Tathā jhānasamāpattisu anabhiratinimittena pāmojjena tattha anabhiratiyā vinoditāya jhānādīnaṃ samadhigamoti samāpattivipassanaṃ arativinodana-avijjāpadālana-upāyo. Uppaṭipāṭiniddeso pana nīvaraṇasabhāvāya avijjāya heṭṭhānīvaraṇesu saṅghadassanatthanti daṭṭhabbaṃ. Kiñcāpi paṭhamajjhānūpacāreyeva dukkhaṃ, catutthajjhānūpacāreyeva sukhaṃ pahīyati, atisayappahānaṃ pana sandhāyāha “**catutthajjhānaṃ sukhadukkhe**”ti.

1. Itivuttaka-Ṭṭha 331 piṭṭhe.

2. Dī 3. 227 piṭṭhe.

3. Abhi 2. 253 piṭṭhe.

Aniccassa, aniccanti ca anupassanā **aniccānupassanā**,
tebhūmakadhammānaṃ aniccataṃ gahetvā pavattāya anupassanāyetaṃ
nāmaṃ. **Niccasaññanti** saṅkhatadhammesu niccā sassatāti pavattam
micchāsaññaṃ. Saññāsīsena diṭṭhicittānampi gahaṇaṃ daṭṭhabbaṃ. Esa nayo
ito paresupi. **Nibbidānupassananti** saṅkhāresu nibbindanākārena pavattaṃ
anupassanaṃ. **Nandinti** sappītikataṇhaṃ. **Virāgānupassananti**
virajjanākārena pavattaṃ anupassanaṃ. **Nirodhānupassananti** saṅkhārānaṃ
nirodhassa anupassanaṃ. “Te saṅkhārā nirujjhantiyeva, āyatim
samudayavasena na uppajjanti”ti evaṃ vā anupassanā **nirodhānupassanā**.
Tenevāha “nirodhānupassanāya nirodheti no samudeti”ti. Muccitukāmatā hi
ayaṃ balappattāti. Paṭinissajjanākārena pavattā anupassanā
paṭinissaggānupassanā. Paṭisaṅkhā santiṭṭhanā hi ayaṃ. **Ādānanti**
niccādivasena gahaṇaṃ. Santatisamūhakiccārammaṇānaṃ vasena
ekattaḡgahaṇaṃ **ghanasaññā**. **Āyūhanaṃ** abhisāṅkharāṇaṃ.
Avatthāvisesāpatti **vipariṇāmo**. **Dhuvasaññanti** thirabhāvaggahaṇaṃ.

Nimittanti samūhaghanavasena, sakiccaparicchedatāya ca saṅkhārānaṃ
saviggahataṃ. **Paṇidhinti** rāgādipaṇidhim. Sā panatthato taṇhāvasena
saṅkhāresu ninnatā. **Abhinivesanti** attānudiṭṭhi. Aniccadukkhādivasena
sabbadhammatīraṇaṃ **adhipaññādhammavipassanā**. **Sārādānābhinivesanti**
asāre sāranti gahaṇavipallāsaṃ. “Issarakuttādivasena loko samuppanno”ti
abhiniveso **sammohābhiniveso**. Keci pana “ahosiṃ nu kho
ahamatītamaddhānanti-ādinā¹ pavattasamsayāpatti sammohābhiniveso”ti
vadanti. Saṅkhāresu tāṇaleṇabhāvaggahaṇaṃ **ālayābhiniveso**. “Ālayaratā
ālayasammuditā”ti² ca vacanato ālayo taṇhā, sāyeva cakkhādīsū rūpādīsū ca
abhinivesavasena pavattiyā ālayābhinivesoti keci. Evaṃ ṭhitā te saṅkhārā
paṭinissajjīyantīti pavattaṃ ṇāṇaṃ **paṭisaṅkhānupassanā**. Vattato vigatattā
vivattaṃ nibbānaṃ, tattha ārammaṇasaṅkhātēna anupassanena pavattiyā
vivattānupassanā gotrabhu. **Samyogā bhinivesanti** samyujjanavasena
saṅkhāresu nivesanaṃ. **Diṭṭhakatṭheti** diṭṭhiyā sahaṡātekatṭhe pahānekatṭhe
ca. **Oḷāriketi** uparimaggavajjhe

1. Ma 1. 10; Saṃ 1. 265 piṭṭhesu.

2. Dī 2. 31, 32; Ma 1. 224; Ma 2. 291; Saṃ 1. 138; Vi 3. 5, 7, 8 piṭṭhesu.

kilese apekkhitvā vuttaṃ, aññathā dassanappahātābbāpi dutiyamaggavajjhehipi oḷāritāti. **Aṇusahagateti** aṇubhūte. Idarṃ heṭṭhimamaggavajjhe apekkhitvā vuttaṃ. **Sabbakileseti** avasiṭṭhasabbakilese. Na hi paṭhamādimaggehipi pahīnā kilesā puna pahīyantīti.

Evanti paṭisambhidāmagge¹ nekkhammapāḷiyā yojanaṃ nigamtvā **dīghanikāyeti**-ādinā dasuttarapariyāyena² yojanaṃ dasseti. **Ekam dhammaṃ bhāvento ramati, ekam dhammaṃ pajahanto ramatīti** ca nayidaṃ dasuttarasutte² āgataniyāmena vuttaṃ, tattha pana “eko dhammo bhāvetabbo, eko dhammo pahātabbo”ti desanā āgatā. Evaṃ santepi yasmā atthato bhedo natthi, tasmā paṭisambhidāmagge¹ nekkhammapāḷiyaṃ āgatanīhārenea **“ekam dhammaṃ bhāvento ramati, ekam dhammaṃ pajahanto ramatī”**ti vuttaṃ. Esa nayo sesavāresupi.

Evanti-ādinā dasuttarapariyāyena² yojanaṃ nigamtvā idāni satipaṭṭhānasuttantapariyāyena³ yojanaṃ dassetuṃ **“majjhimanikāye”**ti-ādi āraddhaṃ. Kāmaṃ cettha kāyānupassanāvaseneva saṃkhipitvā yojanā katā, ekavīsatiyā pana ṭhānānaṃ vasenapi yojanā kātābbā. Idāni abhidhammaniddesapariyāyena dassetuṃ **“abhidhamme niddesapariyāyena”**ti-ādi āraddhaṃ. **Aniccatoti**-ādīsu yaṃ vattabbaṃ, taṃ **visuddhimaggasamvaṇṇanāsu**⁴ vuttanayena vedītabbaṃ.

Ukkaṇṭhitanti adhikusalesu dhammesu pantasenāsanesu ca ukkaṇṭhādīṅca, ananuyogoti attho. Ariyavaṃsapūraḷo dhīro sīlavā bhikkhu ariyavaṃsaparipūraṇassa bhedaṃ anicchanto samāhito vipassako ca paccayaghātena aratiyā ratiyā ca sahitā abhibhavitā hotīti vuttaṃ **“aratiratisaho bhikkhave dhīro”**ti. Sesam suviññeyyameva.

Ariyavaṃsasuttavaṇṇanā niṭṭhitā.

1. Khu 9. 45, 104 piṭṭhesu.

2. Dī 3. 227 piṭṭhe.

3. Ma 1. 70 piṭṭhe.

4. Visuddhi 2. 247; Visuddhi-Ṭī 2. 393 piṭṭhesu.

9. Dhammapadasuttavaṇṇanā

29. Navame jhānādibhedo dhammo pajjati etenāti dhammapadam, anabhihjhāva dhammapadam **anabhihjhādhhammapadam**, anabhihjhāpadhāno vā dhammakotṭhāso **anabhihjhādhhammapadam**. Evaṃ sesesupi. Atthato pana **anabhihjhādhhammapadam** nāma alobho vā alobhasīsena adhigatajjhānavipassanāmaggaphalanibbānāni vā. **Abyāpādo dhammapadam** nāma mettā vā mettāsīsena adhigatajjhānādīni vā. **Sammāsati dhammapadam** nāma sūpaṭṭhitassati vā satisīsena adhigatajjhānādīni vā. **Sammāsamādhidhammapadam** nāma aṭṭhasamāpatti vā aṭṭhasamāpattisīsena adhigatajjhānavipassanā maggaphalanibbānāni vā. Dasa asubhavasena vā adhigatajjhānādīni **anabhihjhā dhammapadam**. Catubrahmavihārasena adhigatāni **abyāpādo dhammapadam**. Dasānussati-āhārepaṭīkūlasaṅgāvasena adhigatāni **sammāsati dhammapadam**. Dasakasiṇa-ānāpānavasena adhigatāni **sammāsamādhidhammapadam**. **Anabhihjhālūti** anabhihjhāyanasīlo. Abhipubbo jhesaddo abhihjhāyanaṭṭho. Tenevāha “**nittanḥo hutvā**”ti. **Pakatibhāvaṃ avijahantenāti** parisuddhabhāvaṃ sabhāvasaṅkhāta- anavajjasāṅkhātaṃ pakatibhāvaṃ avijahatena. Sāvajjadhammasamuppattiyā hi cittassa anavajjabhāvo jahito hotīti.

Dhammapadasuttavaṇṇanā niṭṭhitā.

10. Paribbājakasuttavaṇṇanā

30. Dasame **abhiññātā**ti ediso ca ediso cāti abhilakkhaṇavasena ñātā. Tenāha “**ñātā pakatā**”ti. **Paṭisallānā vuṭṭhitoti** ettha **paṭisallānanti** tehi tehi saddhivihārika-antevāsika-upāsakādisattehi ceva rūpārammaṇādisaṅkhārehi ca paṭinivattitvā apasakkivā sallīnaṃ nilīyanaṃ, ekībhāvo pavivekoti vuttaṃ hoti. Yo tato vuṭṭhito, so paṭisallānā vuṭṭhito nāma hoti. Bhagavā pana yasmā paṭisallānā uttamato phalasaṃpattito vuṭṭhāsi, yasmā vuttaṃ “**paṭisallānā vuṭṭhitoti phalasaṃpattito vuṭṭhito**”ti. **Vatthukāmesūti** rūpādisu kilesakāmassa vatthubhūtesu kāmesu. **Bahalarāganti** thiramūladummocanīyatāhi ajjhosānena bahalabhūtaṃ

kilesakāmaṃ. **Sakāraṇā**ti yehi kāraṇehi paresaṃ vāde dosaṃ dassenti, tehi kāraṇehi sakāraṇā. Na hi lakkhaṇayuttena hetunā vinā paravādesu dosaṃ dassetuṃ sakkā.

Evamādīti ettha **ādis**saddena “natthi hetu natthi paccayo sattānaṃ saṃkilesāyā”¹ti¹ evamādiṃ saṅgaṇhāti, tasmā **evamādivādino** evaṃ hetuppaṭikhepavādinoti attho. Ettha ca natthikadiṭṭhi vipākaṃ paṭibāhati, akiriyadiṭṭhi kammaṃ paṭibāhati, ahetikadiṭṭhi ubhayaṃ paṭibāhati. Tattha kammaṃ paṭibāhantena vipāko paṭibāhito hoti, vipākaṃ paṭibāhantenapi kammaṃ paṭibāhitaṃ. Iti sabbepe te atthato ubhayapaṭibāhakā aheticavādā ceva akiriyavādā ca natthikavādā ca honti. **Okkantaniyamā**ti ogāhamicchattaniyamā. **Sajjhāyatī**ti taṃ diṭṭhidīpakamāṃ ganthaṃ uggahetvā paṭhati. **Vīmaṃsatī**ti tassa atthaṃ vicāreti. **Tassā**ti-ādi vīmaṃsanākāradassanaṃ. **Tasmī** **ārammaṇ**eti yathāparikkappitahetupaccayābhāvādike natthi hetūti-ādinayappavattāya laddhiyā ārammaṇe. **Micchāsati santiṭṭhatī**ti “natthi hetū”ti-ādivasena anussavūpaladdhe atthe tadākāraparivitakkanehi saviggahe viya sarūpato cittaṃ paccupaṭṭhite cirakālaparicayena evametanti nijjhānakkhamabhāvūpagamanena nijjhānakkhantiyā tathāgahite punappunamā tatheva āsevantaṃ bahuḷikarontassa micchāvittakkena samānīyamānā micchāvāyāmapatthambhikā atamsabhāvaṃ taṃsabhāvanti gaṇhantī micchāsati laddhanāmā taṃladdhisahagatā taṃhā santiṭṭhati. **Cittaṃ ekaggaṃ hotī**ti yathāvuttavitakkādīpaccayalābhena tasmī ārammaṇe avaṭṭhitatāya anekaggatamā pahāya cittaṃ ekaggaṃ appitamā viya hoti micchāsamādhinā. Sopi hi paccayavisesena laddhabhāvanābalo kadāci samādhānapaṭirūpakiccakaro hotiyeva paharaṇavijjhanādīsu viyāti daṭṭhabbamā.

Javanāni javantīti anekakkhattuṃ tenākārena pubbhāgiyesu javanavāresu pavattesu sabbapacchime javanavāre satta javanāni javanti. **Paṭhamajavane satekiccho hoti, tathā dutiyādīsū**ti dhammasabhāvadassanaṃmetamā, na pana tasmī khāṇe tesamā satekicchabhāvāpādanamā

1. Dī 1. 50 piṭṭhe.

kenaci sakkā kātuṃ. **Tatthāti** tesu tīsu micchādassanesu. **Koci ekam dassanam okkamati** ti yassa ekasmiṃyeva abhiniveso āsevanā pavattā, so ekamiyeva dassanam okkamati. Yassa dvīsu tīsupi vā abhiniveso āsevanā pavattā, so **dve tīni okkamati**. Etena yā pubbe ubhayapaṭibāhikatāmukhena pavattā atthasiddhā sabbadiṭṭhikā, sā pubbabhāgiyā, micchāniyāmokkantiyā pana yathāsakam paccayasamudāgamadiṭṭhito bhinnārammaṇānam viya visesādhigamānam ekajjham anuppattiyā abhikiṇṇā evāti dasseti. Ekasmiṃ okkantepi dvīsu tīsu okkantesupi niyatamicchādiṭṭhikova hotīti iminā tissannampi diṭṭhīnam samānaphalataṃ samānabalañca dasseti. Tasmā tissopi cetanā ekassa uppannā aññamaññam anubalappadāyikā honti.

Kim panesa etasmiññeva attabhāve niyato, udāhu aññasmimpīti? Etasmiññeva niyato. Akusalam hi nāmetaṃ abalam, na kusalam viya mahābalaṃ. Aññathā sammattaniyāmo viya accantiko siyā, āsevanavasena pana bhavantarepi taṃ taṃ diṭṭhim rocetiyeva. Tenevāha “**vaṭṭakhāṇuko nāmesa satto**”ti. Tasmā “sakiṃ nimuggo nimuggo eva bālo”ti viya vaṭṭakhāṇujotana¹, yādisehi pana paccayehi ayaṃ taṃ dassanam okkanto puna kadāci micchattaniyāmo tappaṭikkhepapaccaye paṭicca tato sīsukkhepanamassa na hotīti na vattabbaṃ. Tena vuttaṃ “**yebhuyyena**”ti. **Edisāti** “buddhānampi atekicchā”ti-ādinā vuttasadisā.

Attano nindābhayenāti “sammā diṭṭhiñca nāma te garahantī”ti-ādinā attano upari parehi vattabbanindābhayena. **Ghaṭṭanabhayenāti** tathā paresaṃ apasādanabhayena. Sahadhammena parena attano upari kātabbaniggaho upārambho, tato parittāso upārambhabhayam. Taṃ pana atthato upavādabhayam hotīti āha “**upavādabhayena**”ti. Paṭippassaddhivasena abhijjhā vinayati etenāti **abhijjhāvinayo**, arahattaphalam. Tenāha “**abhijjhāvinayo vuccati arahattan**”ti.

Paribbājakasuttavaṇṇanā niṭṭhitā.

Uruvelavaggavaṇṇanā niṭṭhitā.

1. Vaṭṭakhāṇuko nāma (?)

4. Cakkavagga

1. Cakkasuttavaṇṇanā

31. Catutthassa paṭhame **cattāri cakkānī**ti ettha cakkam nāma dārucakkam ratanacakkam dhammacakkam iriyāpathacakkam sampatticakkanti pañcavidham. Tattha “yam panidam samma rathakāra cakkam chahi māsehi niṭṭhitam chārattūnehī”¹ti idam dārucakkam. “Pitarā pavattitam cakkam anuvatteti”²ti idam ratanacakkam. “Mayā pavattitam cakkan”³ti idam dhammavakkam. “Catucakkam navadvāran”⁴ti idam iriyāpathacakkam. “Cattārimāni bhikkheve cakkāni yehi samannāgatānam devamanussānam catucakkam pavattati”⁵ti idam sampatticakkam. Idhāpi etadeva adhippetanti āha “**cattāri sampatticakkāni vattanti**”ti. **Anucchavike deseti** puñṇakiriyāya sammāpaṭipattiyā anurūpadese. **Sevanam** kālena kālam upasaṅkamanam. **Bhajanam** bhattivasena payirupāsanam. **Attano sammā ṭhapananti** attano cittasantānassa yoniso ṭhapanam. Saddādīsu nivesananti āha “**sace**”ti-ādi. **Idameva cettha pamāṇanti** idameva pubbekatapuñṇatāsāṅkhātam sampatticakkam eva etesu sampatticakkesu pamāṇabhūtam itaresam kāraṇabhāvato. Tenāha “**yena hī**”ti-ādi. **So eva ca** katapuñṇo **puggalo attānam sammā ṭhapeti** akatapuñṇassa tadabhāvato.

Cakkasuttavaṇṇanā niṭṭhitā.

2. Saṅghasuttavaṇṇanā

32. Dutiye **tassa dānameva dātabbanti** pabbajitassa pabbajitaparikkhāram pattacīvarādi, gihino ghiparikkhāram vatthāvudhayānasayanādi dātabbam. **Sabbanti** sabbam upakāram. **Makkhetvā nāseti** makkhibhāve ṭhatvā. **Telena viya makkhetī**ti satadhotatelena makkheti viya. **Atthavaḍḍhanakathāti** hitāvahakathā. Kathāgahaṇam cettha nidassanamattam, paresam hitāvaho

1. Am 1. 110 piṭṭhe.

3. Khu 1. 368; Khu 4. 381; Khu 5. 24, 132 piṭṭhesu.

5. Am 1. 341 piṭṭhe.

2. Sam 1. 192 piṭṭhe.

4. Sam 1. 15, 62 piṭṭhesu.

kāyappayogopi **atthacariyā**. Aṭṭhakathāyaṃ pana vacippayogavaseneva atthacariyā vuttā. **Samānattatā**ti sadisabhāvo, samānaṭṭhāne ṭhapanam, tam panassa samānaṭṭhapanam attasadisatākaraṇamukhena ekasambhogatā. Attano sukhuppattiyam tassa ca dukkuppattiyam tena dukkhena attanā ekasambhogatāti āha “**samānasukhadukkhabhāvo**”ti. Sā ca samānasukhadukkhata ekato nisajjadinā pākaṭā hotīti dassento “**ekāsane**”ti-ādimāha.

Tattha jātiyā hīno bhogena adhiko dussaṅgaho totī. Na hi sakkā tena saddhim ekaparibhogo kātuṃ jātiyā hīnattā. Tassa tathā akariyamāne ca so kujjhati bhogena adhikattā, tasmā so dussaṅgaho. Bhogena hīno jātiyā adhikopi dussaṅgaho hotī. So hi “aham jātimā”ti bhogasampanna saddhim ekaparibhogam icchati, tasmim akariyamāne kujjhati. Ubhohipi hīno susaṅgaho hotī. Na hi so itarena saddhim ekaparibhogam icchati jātiyā hīnabhāvato, na akariyamāno kujjhati bhogena hīnabhāvato. Ubhohi sadisopi susaṅgahoyeva. Sadisabhāveneva itarena saha ekaparibhogassa paccāsīsāya, akaraṇe ca tassa kujjhanassa abhāvato. Bhikkhu dussīlo dussaṅgaho hotī. Na hi sakkā tena saddhim ekaparibhogam kātuṃ, akariyamāne ca kujjhati. Sīlavā pana susaṅgaho hotī. Sīlavā hi adīyamānepi kismiñci āmise akariyamānepi saṅgahe na kujjhati, aññaṃ attanā saddhim paribhogam akarontampi na pāpakena cittena passati pesalabhāvato. Tato eva paribhogopi anena saddhim sukaro hotī, tasmā gihi ce, ubhohi sadiso. Pabbajito ce, sīlavā puggalo. Evaṃ samānattatāya saṅgahetabbo. Tenevāha “so sace gahaṭṭhassa jātiyā pabbajitassa sīlena sadiso hotī, tassāyaṃ **samānattatā kātabbā**”ti. Sesam suviññeyyameva.

Saṅghasuttavaṇṇanā niṭṭhitā.

3. Sīhasuttavaṇṇanā

33. Tatiye **sīhoti** parissayasayanato paṭipakkhahananato ca “sīho”ti laddhanāmo migādhipati. **Cattāroti** samānepi sīhajātibhāve vaṇṇavisesādisiddhena visesena cattāro sīhā. Te idāni nāmato vaṇṇato āhārato dassetvā idhādhippetasīhaṃ nānappakārato vibhāvetum “**tiṇasīho**”ti-ādi āraddhaṃ. Tiṇabhakkho sīho **tiṇasīho** purimapade uttarapadalopena yathā “sākapatthivo”ti¹. Kāḷavaṇṇatāya **kāḷasīho**. Tathā **paṇḍusīho**. Tenāha “**kāḷagāvisadiso, paṇḍupalāsavaṇṇagāvisadiso**”ti ca. Rattakambalassa viya kesaro kesarakalomo etassa atthīti **kesarī**. Lākhāparikammakatehi viya pādapariyante hīti ca yojanā.

Kammānubhāvasiddha-adhipaccamahesakkhatāhi **sabbamigagaṇassa rājā. Suvaṇṇaguhatovāti**-ādi “sīhassa vihāro kiriyā evaṃ hoti”ti katvā vuttaṃ.

Samam patiṭṭhāpetvāti sabbabhāgehi samameva bhūmiyaṃ patiṭṭhāpetvā. **Ākaḍḍhitvāti** purato ākaḍḍhitvā. **Abhiharitvāti** abhimukhaṃ haritvā. **Saṅghātanti** vināsaṃ. Vīsatiyaṭṭhikaṃ ṭhānaṃ **usabhaṃ**.

Samasīhoti samajātiko samappabhāvo ca sīho. **Samānosmīti** desanāmattaṃ, samappabhāvatāya eva **na bhāyati. Sakkāyadiṭṭhibalavatāyāti** “ke aññe amhehi uttaritarā, atha kho mayameva mahābalā”ti evaṃ balātimānanimittāya ahaṃkārahetubhūtāya sakkāyadiṭṭhiyā balavabhāvena. **Sakkāyadiṭṭhiyā pahīnattāti** nirahaṃkāraṭṭā attasinehassa suṭṭhu samugghātattā **na bhāyati**.

Tathā tathāti sīhasadisatādinā tena tena pakārena attānaṃ kathesīti vatvā tamatthaṃ vivaritvā dassetum “**sīhoti kho**”ti-ādi vuttaṃ.

Katamahābhinihārassa lokanāthassa bodhiyā niyatabhāvappattiyā ekantabhāvī buddhabhāvoti katvā “tīsu pāsādesu

1. Pāṇinī 2. 1. 60 vāttikasuttaṃ passitabbaṃ.

nivāsakālo, magadharañño paṭiññādānakālo, pāyāsassa paribhuttakālo”ti-
ādinā abhisambodhito purimāvattthāpi sīhasadisā katvā dassitā. Bhāvini
bhūtūpacāropi hi lokavohāro. Vijjābhāvasāmaññato dvivijjā itaravijjampi
ekajjham gahetvā paṭiccasamuppādasammasanato tam puretarasiddham viya
katvā āha “**tisso vijjā sodhetvā**”ti. Anulomapaṭilomato pavattañāṇassa
vasena “**yamakaññamanthanenā**”ti vuttam.

Tattha viharantassāti ajapālanigrodhamūle viharantassa. **Ekādasame**
divaseti sattasattāhato param ekādasame divase. **Acalapallaṅketi** isipatane
dhammacakkappavattanattam nisinnapallaṅke. Tampi hi kenaci
appaṭivattiyam dhammacakkappavattanattam nisajjāti katvā vajirāsanam
viya acalapallaṅkam vuccati. **Imasmim ca pana padeti** “dveme bhikkhave
antā”ti-ādinayappavatte ca imasmim saddhammakotṭhāse. **Dhammaghoso**
-pa- dasasahassilokadhātuṃ paṭicchādesi “sabbattha ṭhitā suṇantū”ti
adhiṭṭhānena. **Soḷasahākārehīti** dukkhapariññā, samudayappahānam,
nirodhasacchikiriyā, maggabhāvanāti ekekasmim magge cattāri cattāri katvā
soḷasahi ākārehi.

Paṭhamena nayena abhisambodhito purimatarāvattthāpi
avassambhāvitāya gahetvā sīhasadisatam dassetvā idāni
abhisambuddhāvattthūsu eva sīhasadisatam dassetuṃ “**aparo nayo**”ti-ādi
āraddham. **Aṭṭhahi kāraṇehīti** “tathā āgatoti tathāgato, tathā gatoti tathāgato,
tathalakkhaṇam āgatoti tathāgato, tathadhamme yāthāvato abhisambuddhoti
tathāgato, tathadassitāya tathāgato, tathavāditāya tathāgato, tathākāritāya
tathāgato, abhibhavanaṭṭhena tathāgato”ti¹ evam vuttehi aṭṭhahi
tathāgatasādhakehi kāraṇehi. Yadihi bhagavā bodhipallaṅke nisinnamatteva
abhisambuddho na jāto, tathāpi tāya nisajjāya nisinnova panujja sabbam
parissayam abhisambuddho jāto. Tathā hi tam “aparājitapallaṅkan”ti
vuccati, tasmā “**yāva bodhipallaṅkā vā**”ti vatvā tena aparitussanto “**yāva**
arahattamaggañāṇā vā”ti āha.

1. Dī-Ṭṭha 1. 59; Ma-Ṭṭha 1. 47; Saṃ-Ṭṭha 2. 265; Am-Ṭṭha 1. 80; Udāna-Ṭṭha 112;
Itivuttaka-Ṭṭha 111; Theragāthā-Ṭṭha 1. 42; Buddhavaṃsa-Ṭṭha 18; Mahāniddeśa-
Ṭṭha 153; Paṭisaṃ-Ṭṭha 1. 190 piṭṭhesu.

Iti sakkāyoti ettha itisaddo nidassanatto. Tena sakkāyo sarūpato parimāṇato paricchedato ca dassitoti āha “**ayaṃ sakkāyo**”ti-ādi. “**Ayaṃ sakkāyo**”ti iminā pañcupādānakkhandhā sarūpato dassitā. “**Ettako sakkāyo**”ti iminā te parimāṇato dassitā. Tassa ca parimāṇassa ekantikabhāvaṃ dassentena “**na ito bhiyyo sakkāyo atthi**”ti vuttaṃ. **Sabhāvatoti** salakkhaṇato. **Sarasatoti** sakiccatto. **Pariyantatoti** parimāṇapariyantato. **Paricchedatoti** yattake ṭhāne tassa pavattitassa paricchindanato. **parivaṭṭamatoti** pariyoṣānappavattito. **Sabbepi pañcupādānakkhandhā dassitā honti** yathāvuttena vibhāgena. **Ayaṃ sakkāyassa samudayo nāmāti** ayaṃ āhārādisakkāyassa samudayo nāma. Tenāha “**ettāvata**”ti-ādi. **Atthaṅgamoti** nirodho. “**Āhārasamudayā āhāranirodhā**”ti ca asādhāraṇameva taṃ gahetvā sesesu **ādi**-saddena saṅgaṇhāti.

Paṇṇāsalaṅkhaṇapaṭimaṇḍitanti paṇṇāsa-udayavayalakkhaṇavibhūsitam samudayatthaṅgamaggahaṇato. **Khīṇāsavattāti** anavasesaṃ sāvasesaṅca āsavānaṃ parikkhīṇattā. Anāgāmīnampi hi bhayaṃ cittutrāsaṅca na hotīti. **Ñāṇasaṃvego** bhayatupaṭṭhānapaññā. **Itarāsaṃ pana devatānanti** akhīṇāsavadeve sandhāya vadati. **Bhoti dhammālapanamattanti** sabhāvakaṭṭhanamattam.

Cakkanti satthu āṇācakkam, taṃ pana dhammato āgatanti **dhammacakkam**. Tattha ariyasāvakanam paṭivedhadhammato āgatanti **dhammacakkam**. Itaresaṃ desanādhhammato āgatanti **dhammacakkam**. Duvidhepi ñāṇam padhānanti ñāṇasīsenā vuttam “**paṭivedhañāṇampi desanāñāṇampī**”ti. Idāni taṃ ñāṇam sarūpato dassetuṃ “**paṭivedhañāṇam nāmā**”ti-ādi vuttaṃ. Yasmā tassa ñāṇassa paṭividdhattā bhagavā tāni saṭṭhi nayasahassāni veneyyānaṃ dassetuṃ samatto ahosi, tasmā tāni saṭṭhi nayasahassāni tena ñāṇena saddhimyeva siddhānīti katvā dassento “**saṭṭhiyā ca nayasahassehi paṭivijjhi**”ti āha. **Tiparivaṭṭanti** “idam dukkhan”ti ca “pariññeyyan”ti ca “pariññātan”ti ca evam tiparivaṭṭam, tamyeva **dvādasākāram**. **Tanti** desanāñāṇam. **Esa** bhagavā. **Appaṭipuggaloti** paṭinidhibhūtapuggalarahito. **Ekasadisassāti** nibbikārassa.

Sihasuttavaṇṇanā niṭṭhitā.

4. Aggapasādasuttavaṇṇanā

34. Catutthe **aggesu pasādāti** seṭṭhesu pasādā. **Aggā vā pasādāti** seṭṭhabhūkā pasādā. Seṭṭhavacano hettha **aggasaddo**. Purimasmiṃ atthavikappe aggasaddena buddhādiratanattayaṃ vuccati. Tesu bhagavā tāva asadisatṭhena guṇavisitṭhatṭhena asamasamaṭṭhena ca aggo. So hi mahābhinihāraṃ dasannaṃ pāramīnaṃ pavicyaṅca ādim katvā bodhisambhāraguṇehi ceva buddhaguṇehi ca payojanehi ca sesajanehi asadisoti asadisatṭhenapi aggo. Ye cassa te guṇā mahākaruṇādayo, tehi sesasattānaṃ guṇehi visitṭhatṭhenapi sabbasattuttamatāya aggo. Ye pana purimakā sammāsambuddhā sabbasattehi asamā, tehi saddhiṃ asameva rūpakāyaguṇehi ceva dhammakāyaguṇehi ca samoti asamasamaṭṭhenapi aggo. Tato dullabhapātubhāvato acchariyamanussabhāvato bahunahitasukhāvahato adutiya-asahāyādibhāvato ca bhagavā loka aggoti vuccati. Yathāha—

“Ekapuggalassa bhikkhave pātubhāvo dullabho lokasmiṃ. Katamassa ekapuggalassa? Tathāgatassa arahato sammāsammuddhassa. Ekapuggalo bhikkhave loka uppajjamāno uppajjati acchariyamanusso. Ekapuggalo bhikkhave loka uppajjamāno uppajjati bahunā -pa-sammāsambuddho. Ekapuggalo bhikkhave loka uppajjamāno uppajjati adutiyo asahāyo appaṭimo appaṭibhāgo appaṭipuggalo asamo asamasamo dvipadānaṃ aggo. Katamo ekapuggalo? Tathāgato araham sammāsambuddho”¹.

Dhammasaṅghā aññadhammasaṅghehi asadisatṭhena visitṭhaguṇatāya dullabhapātubhāvādinā ca aggā. Tathā hi tesam svākkhātātādisuppaṭipannatādiguṇavisesehi aññe dhammasaṅghasadisā appataraṃ nihīnā² vā natthi, kuto seṭṭhā. Sayameva tehi visitṭhaguṇatāya seṭṭhā. Tathā dullabhuppāda-acchariyabhāvabahunahitasukhāvaha-adutiyaasahāyādisabhāvā ca te. Yadaggena hi bhagavā dullabhapātubhāvo,

1. Am 1. 22 piṭṭhe.

2. Aññadhammasaṅghā sadisā appataranihīnā (Itivuttaka-Ṭṭha 269 piṭṭhe)

tadaggena dhammasaṅghāpīti. **Acchariyā**disupi eseva nayo. Evaṃ aggesu seṭṭhesu uttamesu pavaresu guṇavisiṭṭhesu pasādāti **aggappasādā**.

Dutiyasmiṃ panatthe yathāvuttesu aggesu buddhādīsu uppattiyā aggabhūtā pasādā **aggappasādā**. Ye pana ariyamaggena āgatā aveccappasādā, te ekanteneva aggabhūtā pasādāti **aggappasā dā**. Yathāha— “idha bhikkhave ariyasāvako buddhe aveccappasādena samannāgato hotī”ti-ādi¹. Aggavipākattāpi cete **aggappasādā**. Vuttampi cetam “agge kho pana pasannānam aggo vipāko”ti².

Apadā vāti-ādīsu **vāsaddo** samuccayattho, na vikappattho. Yathā “anuppanno vā kāmāsavo uppajjati, uppanno vā kāmāsavo pavaḍḍhatī”ti³ ettha anuppanno ca uppanno cāti attho, yathā ca”bhūtānaṃ vā sattānaṃ ṭhitiyā sambhavesīnaṃ vā anuggahāyā”ti ettha bhūtānaṃ sambhavesīnaṃcāti attho, yathā ca “aggito vā udakato vā mithubhedato vā”ti⁴ ettha aggito ca udakato ca mithubhedato cāti attho, evaṃ “apadā vā -pa- aggamakkhāyati”ti⁵ etthāpi apadā ca dvipadā cāti sampiṇḍanavasena attho daṭṭhabbo. Tena vuttam “vāsaddo samuccayattho, na vikappattho”ti.

Rūpinoti rūpavanto. Na rūpinoti **arūpino**. **Saññinoti** saññavanto. Na saññinoti **asaññino**. “Apadā vā”ti-ādisabbapadehi kāmabhavo rūpabhavo arūpabhavo ekavokārabhavo catuvokārabhavo pañcavokārabhavo saññibhavo saññibhavo nevasaññināsaññibhavoti navavidhepi bhave sattepi anavasesato pariyādiyitvā dasseti. Ettha hi rūpiggahaṇena kāmabhavo rūpabhavo pañcavokārabhavo ekavokārabhavo ca dassito, arūpiggahaṇena arūpabhavo catuvokārabhavo ca dassito, saññibhavādayo pana sarūpeneva dassitā, apadādiggaṇena kāmabhavapañcavokārabhavasaññibhavānaṃ ekadesova dassito.

1. Saṃ 3. 348, 350 piṭṭhesu.

3. Ma 1. 9 piṭṭhe.

5. Am 1. 343; Khu 1. 254 piṭṭhesu.

2. Am 1. 343; Khu 1. 254 piṭṭhesu.

4. Dī 2. 74 piṭṭhe.

Kasmā panettha yathā adutiyasutte “dvipadānaṃ aggo”ti dvipadā eva gahitā, evaṃ dvipadaggahaṇameva akatvā apadādiggahaṇaṃ katanti? Vuccate—adutiyasutte tāva seṭṭhataravasena dvipadaggahaṇameva kataṃ. Imasmiṃ hi loke seṭṭho nāma uppajjamāno apadacatuppadabahupadesu na uppajjati, dvipadesueva uppajjati. Kataresu dvipadesu? Manussesu ceva devesu ca. Manussesu uppajjamāno sakalalokaṃ vase vattetuṃ samattho buddho hutvā uppajjati, devesu uppajjamāno dasasahasilokadhātuṃ vase vattanako mahābrahmā hutvā uppajjati, so tassa kappiyakārako vā ārāmiko vā sampajjati. Iti tatopi seṭṭhataravasenesa dvipadānaṃ aggoti tattha vuttaṃ. Idha pana anavasesapariyādānavasena evaṃ vuttaṃ “yāvata bhikkhave sattā apadā vā -pa- nevasaññināsaññino vā, tathāgato tesāṃ aggamakkhāyatī”ti. Niddhāraṇe cetāṃ sāmivacanaṃ. **Ma**-kāro padasandhikaro, aggo akkhāyatīti padavibhāgo. Tenevāha “**guṇehi aggo**”ti-ādi.

Aggo vipāko hotīti agge sammāsambuddhe pasannānaṃ yo pasādo aggo seṭṭho uttamakoṭibhūto vā, tasmā tassa vipākopi aggo seṭṭho uttamakoṭibhūto ulāratamo paṇītatamo hoti. So pana pasādo duvidho lokiyalokuttarabhedato. Tesu lokiyassa tāva—

“Ye keci buddhaṃ saraṇaṃ gatāse,
Na te gamissanti apāyabhūmiṃ.
Pahāya mānusaṃ dehaṃ,
Devakāyaṃ paripūressanti¹.

Buddhoti kittayantassa, kāye bhavati yā pīti.
Vameva hi sā pīti, kasiṇenapi Jambudīpassa².

Sataṃ hatthī sataṃ assā, sataṃ assatarīrathā.
Sataṃ kaññāsahassāni, āmukkamaṇikuṇḍalā.
Ekassa padavītihārassa, kalaṃ nāgghanti soḷasim³.

1. Dī 2. 204; Saṃ 1. 25 piṭṭhesu.

2. Dī-Ṭṭha 1. 54; Itivuttaka-Ṭṭha 271 piṭṭhesu.

3. Vi 4. 303 piṭṭhe.

Sādhu kho devānaminda buddhaṃ saraṇagamanāṃ hoti, buddhaṃ saraṇagamanahetu kho devānaminda evamidhekacce sattā kāyassa bhedaṃ paraṃ maraṇā sugatīm saggaṃ lokaṃ upapajjanti. Te aññe deve dasahi ṭhānehi adhiggaṇhanti dibbena āyunā, dibbena vaṇṇena, dibbena sukkena, dibbena yasena, dibbena ādhipateyyena, dibbehi rūpehi, dibbehi saddehi, dibbehi gandhehi, dibbehi rasehi, dibbehi phoṭṭhabbehi”ti¹—

evamādīnaṃ suttapadānaṃ vasena pasādaphalavisesayogo veditabbo, tasmā so apāyadukkhavinivattanena saddhīm sampattibhavesu sukhavisesadāyakova daṭṭhabbo.

Lokuttaro pana sāmāññaphalavipākadāyako vaṭṭadukkhānivattako. Sabbopi cāyaṃ pasādo paramparāya vaṭṭadukkhāṃ vinivattetiyeva. Vuttam hetam—

“Yasmiṃ samaye bhikkhave ariyasāvako attano saddhaṃ anussarati, nevassa tasmim samaye rāgapariyuṭṭhitaṃ cittaṃ hoti, na dosapariyuṭṭhitaṃ -pa- Na mohapariyuṭṭhitaṃ cittaṃ hoti, ujugatamevassa tasmim samaye cittaṃ hoti, ujugatacittassa pāmojjaṃ jāyati, pamuditassa pīti jāyati -pa- nāparaṃ itthattāyāti pajānāti”ti.

Dhammāti sabhāvadhammā. **San̄khatā**ti samecca sambhūya paccayehi katāti san̄khatā, sapaccayā dhammā. Hetūhi paccayehi ca na kehici katā san̄khatāti **asankhatā**, apaccayo nibbānaṃ. San̄khatānaṃ pariyositabhāvena² “asankhatā”ti puthuvacanaṃ. **Virāgo tesam aggamakkhāyatī**ti tesam san̄khatāsan̄khatadhammānaṃ yo virāgasan̄khāto san̄khatadhammo, so sabhāveneva saṇhasukhumabhāvato santatarapaṇītatarabhāvato gambhīrādibhavato madanimmadanādibhāvato aggaṃ seṭṭhaṃ uttamaṃ pavaranti vuccati. **Yadidanti nipāto**, yo ayanti attho. **Madanimmadanoti-ādīni sabbāni nibbānavevacanāni**. Tenevāha “**virāgoti-ādīni nibbānasseva nāmāni**”ti. **Rāgamadādayoti ādi-saddena mānamadapurisamadādi**

1. Saṃ 2. 467 piṭṭhe.

2. Paṭiyogibhāvena (Itivuttaka-Ṭṭha 272 piṭṭhe)

saṅgaṇhāti. **Sabbā pipāsāti** kāmapiṇṇāsādikā sabbā pipāsā. **Sabbe ālayā samugghātāṃ gacchantīti** kāmālayādikā sabbepi ālayā samugghātāṃ yanti. **Vatṭānīti** kammavaṭṭavipākavaṭṭāni. **Taṇhāti** aṭṭhasatappabhedā sabbāpi taṇhā.

Aggo vipāko hotīti etthāpi—

“Ye keci dhammaṃ saraṇaṃ gatāse -pa-.

Dhammoti kittayantassa, kāye bhapati yā pīti -pa-.¹

Sādhu kho devānaminda dhammaṃ saraṇagamaṇaṃ hoti,
dhammaṃ saraṇagamaṇaṃ hetu kho devānaminda evamidhekacce -pa-.
Dibbehi phoṭṭhabbehi”ti²—

evamādīnaṃ suttapadānaṃ vasena dhamme pasādassa phalavisesayogo veditabbo.

Samghā vā gaṇā vāti janasaṃmūhasaṅkhātā yāvataṃ loke saṃghā vāgaṇāvā. **Tathāgatasāvakaṃ** hoti aṭṭha-ariyapuggalaṃ saṃmūhasaṅkhāto diṭṭhisīlasāmaññaṃ samhato tathāgataṃ sāvakaṃ. **Aggamakkhāyatīti** attano sīlasamādhīpaññāvimutti-ādiguṇavisesena tesāṃ saṃghānaṃ aggo seṭṭho uttamo pavaroti vuccati. **Yadidanti** yāni imāni. **Cattāri purisayugāni** yugaḷavasena, paṭhamamaggaṭṭho paṭhamaphalaṭṭhoti idamekaṃ yugaḷaṃ, yāva catutthamaggaṭṭho catutthaphalaṭṭhoti idamekaṃ yugaḷanti evaṃ cattāri purisayugāni. **Aṭṭha purisapuggalāti** purisapuggalavasena eko paṭhamamaggaṭṭho, eko paṭhamaphalaṭṭhoti iminā nayena aṭṭha purisapuggalā. Ettha ca purisoti vā puggaloti vā ekatthāni etāni pādāni, veneyyavasena panevaṃ vuttaṃ. **Esa bhagavato sāvakaṃ** hoti yānimāni yugaḷavasena cattāri yugāni pāṭiyekkatō aṭṭha purisapuggalā, esa bhagavato sāvakaṃ. **Āhuneyyoti**-ādīni vuttatthāneva. Idhāpi—

“Ye keci saṃghaṃ saraṇaṃ gatāse -pa-.¹

Samghoti kittayantassa, kāye bhavati yā pīti -pa-.³

1. Dī 2. 204; Saṃ 1. 25 piṭṭhesu sannissitapāli.

2. Saṃ 2. 467 piṭṭhe.

3. Dī-Ṭṭha 1. 54; Itivuttaka-Ṭṭha 271 piṭṭhesu sannissitagāthā.

Sādhū kho devānaminda saṅghaṃ saraṇagamaṇaṃ hoti, saṅghaṃ saraṇagamaṇahetu kho devānaminda -pa- dibbehi phoṭṭhabbehi”ti¹—

ādīnaṃ suttapadānaṃ vasena saṅghe pasādassa phalavisesayogo tassa aggavipākatā ca veditabbā. Tathā anuttariyapaṭilābho sattamabhavādito paṭṭhāya vaṭṭadukkhāsamucchedo anuttarasukhādhigamoti evamādi-
uḷāraphalanipphādanavasena aggavipākatā veditabbā.

Gāthāsu **aggatoti** agge ratanattaye, aggabhāvato vā pasannānaṃ. **Aggaṃ dhammanti** aggasabhāvaṃ buddhasubodhiṃ dhammasudhammataṃ saṅghasuppaṭipattiṃ, ratanattayassa anaññasādhāraṇaṃ uttamasabhāvaṃ, dasabalādisvākkhātātādisuppaṭipannaṭādiguṇasabhāvaṃ vā. **Vijānanti** vijānantānaṃ. Evaṃ sādharmaṇato aggappasādavatthuṃ dassetvā idāni asādhāraṇato taṃ vibhāgena dassetuṃ “**agge buddhe**”ti-ādi vuttaṃ. Tattha **pasannānanti** aveccappasādena ca itarappasādena ca pasannānaṃ adhimuttānaṃ. **Virāgūpasameti** virāge upasame ca, sabbassa rāgassa sabbesaṃ kilesānaṃ accantavirāgahetubhūte accanta-upasamaṇahetubhūte cāti attho. **Sukheti** vaṭṭadukkhakkhayabhāvena saṅkhārūpasamasukkhābhāvena sukhe.

Aggasmim dānaṃ dadanti agge ratanattaye dānaṃ dadantānaṃ deyyādhammaṃ pariccajantānaṃ. Tattha dhamaṇaṃ bhagavantaṃ catūhi paccayehi upaṭṭhahantā pūjentā sakkarontā, parinibbutaṃ bhagavantaṃ uddissa dhātucetiyādike upaṭṭhahantā pūjentā sakkarontā buddhe dānaṃ dadanti nāma. “Dhammaṃ pūjessāmā”ti dhammadhare puggale catūhi paccayehi upaṭṭhahantā pūjentā sakkarontā dhammaṇca ciraṭṭhitikaṃ karontā dhamme dānaṃ dadanti nāma. Tathā ariyasāṅghaṃ catūhi paccayehi upaṭṭhahantā pūjentā sakkarontā taṃ uddissa itarasmimpi tathā paṭipajjantā saṅghe dānaṃ dadanti nāma. **Aggaṃ puññaṃ pavaḍḍhatīti** evaṃ ratanattaye pasannena cetasā uḷāraṃ pariccāgaṃ uḷāraṇca pūjāsakkāraṃ pavattentānaṃ divase divase aggaṃ uḷāraṃ kusalaṃ upacīyati. Idāni tassa puññaṃsa aggavipākatāya aggabhāvaṃ dassetuṃ “**aggaṃ āyū**”ti-ādi vuttaṃ. Tattha **āyūti** dibbaṃ vā mānusaṃ vā aggaṃ uḷāraṃ paramaṃ āyu **pavaḍḍhati**

1. Saṃ 2. 468 piṭṭhe.

uparūpari brūhati. **Vaṇṇoti** rūpasampadā. **Yasoti** parivārasampadā. **Kittīti** thutighoso. **Sukhanti** kāyikaṃ cetasikañca sukhaṃ. **Balanti** kāyabalañceva ñāṇabalañca.

Aggassa ratanattayassa dānaṃ **dātā**. Atha vā **aggassa** deyyadhammassa dānaṃ uḷāraṃ katvā tattha puññaṃ pavattetā. **Aggadhammasamāhitoti** aggena pasādadhammena dānādīdhammena ca saṃhito samannāgato acalappasādayutto, tassa vā vipākabhūtehi bahujanassa piyamanāpatādi dhammehi yutto. **Aggappatto pamodatīti** yattha yattha sattanikāye uppanno, tattha tattha aggabhāvaṃ seṭṭhabhāvaṃ adhigato, aggabhāvaṃ vā lokuttaramaggaphalaṃ adhigato pamodati abhiramati paritussatīti.

Aggapasādasuttavaṇṇanā niṭṭhitā.

5. Vassakārasuttavaṇṇanā

35. Pañcame **ariye ñāyeti** saṃkilesato ārakattā ariye niddose parisuddhe niyyānikadhammabhāvato ñāye kāraṇeti attho. Ñāyati nicchayena kamati nibbānaṃ, taṃ vā ñāyati paṭivijjhīyati etenāti ñāyo, ariyamaggo. So eva ca sampāpakahetubhāvato kāraṇanti vuccati. Idha pana saha vipassanāya ariyamaggo adhippetoti āha “**sahavipassanake magge**”ti. Gāthāsu “**ñāyaṃ dhamman**”ti etthāpi eseva nayo.

Vasākārasuttavaṇṇanā niṭṭhitā.

6. Doṇasuttavaṇṇanā

36. Chaṭṭhe **ukkāhi dhāriyamānāhīti** dīpikāhi dhāriyamānāhi, daṇḍadīpikāsu jāletvā dhāriyamānāsu māpitattāti vuttaṃ hoti. Taṃ hi nagaraṃ “maṅgaladivase sukhaṇe sunakkhattaṃ mā atikkamī”ti rattimpi ukkāsu dhāriyamānāsu māpitaṃ. Ukkāsu ṭhāti **ukkaṭṭhā**, ukkāsu

vijjotayantīsu ʒhitā paṭiṭṭhitāti mūlavibhūjādipakkhepena¹ saddasiddhi veditabbā. Niruttinayena vā ukkāsu ʒhitāsu ʒhitā āsīti **ukkaṭṭhā**. Apare pana bhaṇanti “bhūmibhāgasampattiyā manussasampattiyā upakaraṇasampattiyā ca sā nagarī ukkaṭṭhagaṇayogato **ukkaṭṭhā**ti nāmaṃ labhati”ti. **Setabyanti** tassa nagarassa nāmaṃ. Taṃ pana kassapadasabalassa jātanagaranti āha “**atīte kassapasammāsambuddhassa jātanagaran**”ti.

Vijjantarikāyāti vijjuniccharaṇakkhaṇe. **Antaratoti** hadaye. **Antarā**ti ārambhanibbattīnaṃ vemajjhe. **Antarikāyā**ti antarāḷe. Ettha ca “**ṭadantaram** ko jāneyya², etesaṃ antarā kappā gaṇanato asaṅkhyeyya³, antarantarā kathaṃ opapāṭeti”ti⁴ ca āḍisu viya kāraṇavemajjhesu vattamānā antarāsaddā eva udāharitabbā siyuma, na pana cittakkaṇavivaresu vattamānā antara-antarikasaddā. Antarāsaddassa hi ayamatthuddhāroti.

Ayaṃ panettha adhippāyo siyā—yesu antarāsaddo vattati, tesu antarasaddopi vattatīti samānatthattā antarāsaddatthe vattamāno antarasaddo udāhaṭo. Antarāsaddo eva vā “yassantarato”ti ettha gāthāsukhatthaṃ rassaṃ katvā vuttoti daṭṭhabbaṃ. Antarā-saddo eva pana ikasaddena padaṃ vaḍḍhetvā “**antarikā**”ti vuttoti evamettha udāharaṇodāharitabbānaṃ virodhābhāvo daṭṭhabbo. **Ayojyamāne upayogavacanaṃ na pāpuṇāti** sāmivacanaṃsa pasaṅge antarāsaddayogena upayogavacanaṃsa icchitattā. Tenevāha “**antarāsaddena pana yuttattā upayogavacanaṃ katan**”ti.

Sakalajambudīpe uppannaṃ mahākalahaṃ vūpasametvāti parinibbuta bhagavati dhātūnaṃ atthāya kusināranagaraṃ parivāretvā ʒhitehi sesarājūhi “**amhākaṃ dhātuyo vā dentu yuddhaṃ vā**”ti-ādinā kosinārakehi mallehi saddhiṃ kataṃ vivādaṃ vūpasametvā. So kira brāhmaṇo tesam vivādaṃ sutvā “**ete rājāno bhagavato parinibbutaṭṭhāne vivādaṃ karonti, na kho panetaṃ patirūpaṃ, alaṃ iminā kalahena, vūpasamessāmi nan**”ti gantvā unnate padese ʒhitvā dvebhāṇavāraparimāṇaṃ doṇagajjitaṃ

1. Pāṇinī 3. 2. 5 suttaṃ passitabbaṃ.

2. Am 2. 308; Am 3. 367 piṭṭhesu.

3. Khu 4. 382 piṭṭhe.

4. Ma 2. 380 piṭṭhe.

nāma avoca. Tattha paṭhamabhāṇavāre tāva ekapadampi te na jāniṃsu. Dutiyabhāṇavārapariyosāne ca “ācariyassa viya bho saddo, ācariyassa viya bho saddo”ti sabbe niravā ahesuṃ. Jambudīpatale kira kulaghare jāto yebhuyyena tassa na-antevāsiko nāma natthi, atha kho so attano vacanaṃ sutvā nirave tuṅhībhūte viditvā puna—

“Suṇantu bhonto mama ekavācaṃ.
Amhāka buddho ahu khantivādo.
Na hi sādhu’yaṃ uttamapuggalassa,
Sarīrabhāge siyā sampahāro.

Sabbeva bhonto sahitā samaggā,
Sammodamānā karomaṭṭhabhāge.
Vitthārikā hontu disāsu thūpā,
Bahū janā cakkhumato pasannā”ti¹—

imaṃ gāthādvayaṃ vatvā taṃ kalahaṃ vūpasamtvā dhātuyo aṭṭhadhā bhājetvā adāsi, taṃ sandhāyetaṃ vuttaṃ “**sakalajambudīpe uppannaṃ mahakalahaṃ vūpasamtvā dhātuyo bhājessatī**”ti. **Lakkhaṇacakkānī**ti dvīsu pādātalesu dve lakkhaṇacakkāni.

Āsavenāti kammakilesakāraṇena āsavena. Ettha hi tebhūmakañca kammaṃ, avasesā ca akusalā dhammā “āsavā”ti vuttā. **Devūpapattī**ti devesu uppatti nibbatti. Ettha ca yakkhagandhabbatāya vinimuttā sabbe devā devaggahaṇena gahitā. **Gandhabbo vā vihaṅgamo** ākāśacārī. **Ahanti** vibhattivipariṇāmena yojetabbaṃ.

Doṇasuttavaṇṇanā niṭṭhitā.

7. Aparihānīyasuttavaṇṇanā

37. Sattame **nibbānasantikeveva caratī**ti kilesanibbānassa anupādāparinibbānassa ca santikeveva carati “na cirasseva adhigamissatī”ti

1. Dī 2. 137 piṭṭhe.

katvā. Gāthāya **appamādaratoti** samathavipassanāya appamajjane rato abhirato, appamādeneva rattindivaṃ vītināmentoti attho. **Pamādaṃ bhayato passantoti** nirayūpapatti-ādibhayahetuto pamādaṃ bhayato passanto. **Abhabbo parihānāyāti** so evarūpo samathavipassanādhammehi maggaphalehi vā parihānāya abhabbo. Samathavipassanāto hi sampattato na parihāyati, itarāni ca appattāni pāpuṇātīti.

Aparihānīyasuttavaṇṇanā niṭṭhitā.

8. Patilīnasuttavaṇṇanā

38. Aṭṭhame **antavā lokoti** ekapassena vaḍḍhitam kasiṇanimittam “loko”ti gātena vā takkena vā uppannadiṭṭhi. Lābhī hi jhānacakkhānā passitvā gaṇhāti, itaro takkamattena. **Anantavāti** samantato vaḍḍhitam appamāṇam kasiṇanimittam “loko”ti gāhena vā takkena vā uppannadiṭṭhi. **Tam jivam tam sarīranti** jīvo sarīraṅca ekameva vatthūti uppannadiṭṭhi. **Vissatṭhānīti** sakapariccajanavasena nissatṭhāni. **Vantānīti** idam puna anādiyanabhāvadassanavasena vuttam. Cattampi hi keci gaṇhanti, nayidamevanti dassanattham “**vantānī**”ti vuttam. Na hi yaṃ yena vantam, na so tam puna ādiyati. Vantampi kiñci sasantatilaggam siyā, nayidamevanti dassanattham “**muttānī**”ti vuttam. Tenevāha “**chinnabandhanāni katānī**”ti, santatito vinimocanavasena chinnabandhanāni katānīti attho. Muttampi kiñci muttabandhanam viya phalam kuhiñci tiṭṭhati, na evamidanti dassanattham “**pahīnānī**”ti vuttam. Yatha kiñci dunnissatṭham puna ādāya sammadeva nissatṭham “**paṭinissatṭhan**”ti vuccati, evam vipassanāya nissatṭhāni ādinnasadisāni maggena pahīnāni paṭinissatṭhāni nāma hontīti dassanattham “**paṭinissatṭhānī**”ti vuttam. Tenevāha “**yathā na puna cittam ārohanti, evam paṭinissajjitānī**”ti.

Kāmesanāti kāmānam esanā, kāmasaṅkhātā vā esanā kāmesanā. Vuttam hetam “tattha katamā kāmesanā? Yo kāmesu kāmacchando kāmarāgo kāmanandī kāmapipāsā kāmamucchā kāmajjhosānam,

ayaṃ vuccati kāmesanā”ti¹, tasmā kāmarāgo “kāmesanā”ti veditabbo. Tenevāha “**kāmesanā -pa- anāgāmimaggena pahīnā**”ti. Bhavānaṃ esanā **bhavesanā**. Vuttampi cetāṃ “tattha katamā bhavesanā? Yo bhavesu bhavacchando -pa- bhavajjhosānaṃ, ayaṃ vuccati bhavesanā”ti¹, tasmā bhavesanarāgo rūpārūpabhavapatthanāti veditabbo. Tenevāha “**bhavesanā pana arahattamaggena pahīyati**”ti.

Brahmacariyassa esanā **brahmacariyesanā**, sā ca maggabrahmacariyassa diṭṭhigatikasammatabrahmacariyassa ca gavesanavasena dvippakārāti āha “**brahmacariyaṃ esissāmi**”ti-ādi. Diṭṭhigatikasammatassa brahmacariyassa esanāpi hi brahmacariyesanāti vuccati. Vuttampi cetāṃ—

“Tattha katamā brahmacariyesanā? Sassato lokoti vā asassato lokoti vā antavā lokoti vā anantavā lokoti vā taṃ jīvaṃ taṃ sarīranti vā aññaṃ jīvaṃ aññaṃ sarīranti vā hoti tathāgato paraṃ maraṇāti vā na hoti tathāgato paraṃ maraṇāti vā hoti ca na ca hoti tathāgato paraṃ maraṇāti vā neva hoti na na hoti tathāgato paraṃ maraṇāti vā yā evarūpā diṭṭhi diṭṭhigataṃ diṭṭhigahaṇaṃ diṭṭhikantāraṃ diṭṭhivisūkāyikaṃ diṭṭhivipphanditaṃ diṭṭhisamyojanaṃ gāho patiṭṭhāho abhiniveso parāmāso kummaggo micchāpatho micchattaṃ titthāyatanāṃ vipariyesaggāho, ayaṃ vuccati brahmacariyesanā”ti¹.

Tasmā diṭṭhigatikasammatassa brahmacariyassa esanā diṭṭhibrahmacariyesanāti veditabbā. Tenevāha “**diṭṭhibrahmacariyesanā pana sotāpattimaggeneva paṭippassambhati**”ti. Ettāvatā ca rāgadiṭṭhiyo esanāti dassitaṃ hoti, na kevalaṅca rāgadiṭṭhiyo eva esanā, tadekaṭṭhaṃ kammampi. Vuttampi cetāṃ—

“Tattha katamā kāmesanā? Kāmarāgo tadekaṭṭhaṃ akusalaṃ kāyakammaṃ vacīkammaṃ manokammaṃ, ayaṃ vuccati kāmesanā. Tattha katamā bhavesanā? Bhavarāgo tadekaṭṭhaṃ

1. Abhi 2. 381 piṭṭhe.

akusalaṃ kāyakammaṃ vacīkammaṃ manokammaṃ, ayaṃ vuccati bhavesanā. Tattha katamā brahmacariyesanā? Antaggāhikā diṭṭhi tadekaṭṭhaṃ akusalaṃ kāyakammaṃ vacīkammaṃ manokammaṃ, ayaṃ vuccati brahmacariyesanā”ti¹.

Navavidhamānoti “seyyassa seyyohamasmī”ti-ādinā² āgato navavidhamāno.

“Kāmesanā”ti-ādigāthāya pana **brahmacariyesanā saḥāti** brahmacariyesanāya saddhiṃ. Vibhattilopena hi ayaṃ niddeso. Karaṇatthe vā etaṃ paccattavacanāṃ. Idaṃ vuttaṃ hoti “brahmacariyesanāya saddhiṃ kāmesanā bhavesanāti tisso esanā”ti. Tāsu brahmacariyesanaṃ sarūpato dassetuṃ “**itisaccaparāmāso, diṭṭhiṭṭhānā samussayā**”ti vuttaṃ. Tassattho— iti evaṃ saccanti parāmāso **itisaccaparāmāso**. Idameva saccam moghamaññanti diṭṭhiyā pavatti-ākāraṃ dasseti. Diṭṭhiyo eva sabbānatthahetubhāvato **diṭṭhiṭṭhānā**. Vittam hetam “micchādiṭṭhiparamāham bhikkhave vajjam vadāmi”ti³. Tā eva ca uparūpari vuddhiyā mānalobhādikilesasamussayanena vaṭṭadukkhasamussayanena ca **samussayā**, “idameva saccam moghamaññan”ti micchābhinivisamānā sabbānatthahetukā kilesadukkhūpacayato hetubhūtā ca diṭṭhiyo brahmacariyesanāti vuttaṃ hoti. Etena pavatti-ākārato nibbattito ca brahmacariyesanā dassitāti veditabbā.

Sabbarāgapirattassāti sabbehi kāmabhavarāgehi virattassa. Tato eva taṇhākkhayasaṅkhāte nibbāne vimuttattā **taṇhākkhayavimuttino** arahato. **Esanā paṇinissatṭhāti** kāmesanā bhavesanā sabbaso nissatṭhā pahīnā. **Diṭṭhiṭṭhānā samūhatāti** brahmacariyesanāsaṅkhātā diṭṭhiṭṭhānā ca paṭhamamaggeneva samugghātītā. Evampi imissā gāthāya atthavaṇṇanā veditabbā. Sesam suviññeyyameva.

Patilīnasuttavaṇṇanā niṭṭhitā.

1. Abhi 2. 381 piṭṭhe.

2. Saṃ 2. 308; Abhi 1. 255; Abhi 2. 366; Khu 7. 61, 66 piṭṭhesu.

3. Am 1. 35 piṭṭhe.

9. Ujjayasuttavaṇṇanā

39. Navame **anukulayaññanti** anukulaṃ kulānukkamaṃ upādāya dātābhadānaṃ. Tenāha “**amhākaṃ -pa- kulānukavasena yajitabban**”ti. Vaṃsaparamparāya pacchā duggatapuriṣehi padātābhadānaṃ. Evarūpaṃ kulaṃ sīlavante uddissa nibaddhadānaṃ, tasmim kule daliddānipi na upacchindanti. Tatridaṃ vatthu—anāthapiṇḍikassa ghare pañca salākabhattasatāni dīyimsu. Dantamayasalākānaṃ pañcasatāni ahesuṃ. Atha taṃ kulaṃ anukkamena dālididiyena abhibhūtaṃ. Ekā tasmim kule dārikā ekasalākato uddham dātuṃ nāsakkhi, sāpi pacchā sātavāhanaṃ raṭṭhaṃ gantvā khalaṃ sodhetvā laddhadhaññena taṃ salākaṃ adāsi. Eko thero rañño ārocesi. Rājā taṃ ānetvā aggamahesiṭṭhāne ṭhapesi, sā tato paṭṭhāya puna pañcapi salākāsātāni pavattesi.

Assamedhanti-ādīsu porāṇakarājakāle kira sassamedham, purisamedham, sammāpāsam, vācāpeyyanti cattāri saṅgahavatthūni ahesuṃ, yehi rājāno lokaṃ saṅgaṇhimsu. Tattha nipphanasassato dasabhāgaggahaṇaṃ **sassamedham** nāma, sassasampādane medhāvitāti attho. Pahāyodhānaṃ chamāsikabhattavetanānuppadānaṃ **purisamedham** nāma, purisasaṅgaṇhane medhāvitāti attho. Daliddamanussānaṃ hatthe lekhaṃ gahetvā tīṇi vassāni vinā vaḍḍhiyā sahasadvisahassamattadhanānuppadānaṃ **sammāpāsam** nāma. Taṃ hi sammā manusse pāseti hadaye bandhitvā viya ṭhabeti, tasmā sammāpāsanti vuccati. “Tāta mātulā”ti-ādinā pana saṅhavācābhaṇaṇaṃ **vācāpeyyam** nāma, peyyavajjaṃ piyavacanaṭṭi attho. Evaṃ catūhi vatthūhi saṅgahitaṃ raṭṭhaṃ iddhañceva hoti phītañca pahūta-annapānaṃ khemaṃ nirabbudaṃ, manussā mudā modanā ure putte naccatā apārutagharadvārā viharanti. Idaṃ gharadvāresu aggaḷānaṃ abhāvato **niraggaḷanti** vuccati. Ayam porāṇikā pavenī. Aparabhāge pana okkākarājakāle brāhmaṇā imāni cattāri saṅgahavatthūni imaṅca raṭṭhasampattim parivattentā ummūlaṃ katvā assamedham purisamedhanti-ādike pañca yaññe nāma akaṃsu. Vuttaṃ hetam bhagavatā **brāhmaṇadhammiyasutte**¹—

1. Khu 1. 324 piṭṭhe Suttanipāte.

“Tesam āsi vipallāso, disvāna aṇuto aṇum -pa-
Te tatha mante ganthetvā, okkākam tadupāgamun”ti.

Idāni tehi parivattetvā ṭhapitamattham dassento “**assamedhan**”ti-
ādimāha. Tattha **medhantī**ti vadhenti. **Dvīhi pariyaññehī**ti mahāyaññassa
pubbabhāge pacchā ca pavattetabbehi dvīhi parivārayaññehi.
Sattanavuttipañcapasusataghātabhimsanassāti sattanavutādhikānam
pañcannam pasusatānam māraṇena teravassa pāpatīrukānam bhayāvahassa.
Tathā hi vadanti—

“Chasatāni niyujjanti, pasūnam majjhime hani.
Assamedhassa yaññassa, unāni pasūhi tīhī”ti¹.

Sammati yugacchidde pakkhipitabbadaṇḍakam. **Pāsantī**ti khipanti.
Samhārimehīti sakāṭehi vahitabbehi. Pubbe kira eko rājā sammāpāsam
yajanto Sarassatinaditīre pathaviyā vivare dinne nimuggoyeva ahoṣi,
andhabālabrahmaṇā gatānugatigatā “ayam² tassa saggagamanamaggo”ti
saññāya tattha sammāpāsayaññam paṭṭhapenti. Tena vuttam “**nimuggokāsato
pabhutī**”ti. Ayūpo appakadivaso yāgo, sayūpo bahudivasam neyyo³
satrayāgoti. Mantapadābhisaṅkhatānam sappimadhūnam **vājamiti** samaññā.
Hiraññasuvaṇṇagomahimsādi **sattarasakadakkhipassa**.
Sāragabbhakoṭṭhāgārādīsu natthi ettha aggaḷanti **niraggaḷo**. Tattha kira yaññe
attano sāpateyyam anavasesato anigūhitvā niyyātiyati.

Mahārambhāti bahupasughātakammā. Aṭṭhakathāyam pana “vividhā
yattha haññare”ti vakkhamānattā “mahākiccā mahākaraṇīyā”ti paṭhamo
atthavikappo vutto, dutiyo pana atthavikappo “mahārambhāti papañcavasena
ajelakā”ti-ādi vuttanti adhippāyena “**apicā**”ti-ādinā āraddho. **Nirārambhā**ti
etthāpi vuttanayena attho veditabbo. Nanu ca pāṇātipātādi-akusalakammasa
appamattakampi phalam nupalabbhati, tasmā tassa nipphalabhāvam avatvā
“na te honti mahapphalā”ti kasmā vuttanti āha “**niravasesatthe**”ti-ādi.
Anugatam kulanti **anukulam**, kulānugatanti attho. Ye niccabhattādim
pubbapurisehi paṭṭhapitam aparāparam anupacchindantā

1. Sam-Ṭī 1. 180 piṭṭhepi.

2. Tam (Ka) Sam-Ṭī 1. 180 piṭṭhe passitabbam.

3. Sādheyyo (Sam-Ṭī 1. 180 piṭṭhe)

manussā dadanti, te anukulaṃ yajanti nāma. Tenevāha “**ye aññe anukulaṃ yajanti**”ti-ādi.

Ujjayasuttavaṇṇanā niṭṭhitā.

10. Udāyisuttavaṇṇanā

40. Dasame **pāṇasamārambharahitanti** pāṇaghātarahitaṃ. **Abyābajjhaṃ sukhaṃ lokaṃ, paṇḍito upapajjatīti** kāmacchandādibyāpādavirahitattā abyābajjhaṃ niddukkhaṃ. Parapīlābhāve pana vattabbaṃ natthi. Jhānasamāpattivasena sukhabahulattā sukhaṃ ekantasukhaṃ brahmalokaṃ jhānapuññaena, itarapuññaena pana tadaññasampattibhavasāṅkhātaṃ sukhaṃ lokaṃ paṇḍito sappañño upeti. Sesam uttānameva.

Udāyisuttavaṇṇanā niṭṭhitā.

Cakkavaggavaṇṇanā niṭṭhitā.

5. Rohitassavagga

1. Samādhībhāvanāsuttavaṇṇanā

41. Pañcamassa paṭhame **diṭṭhadhammasukhavihārāyāti** imasmim yeva attabhāve sukhavihāratthāya, nikkilesatāya nirāmisena sukkena viharatthāyāti attho. Iminā cattāri phalasaṃpattijjhānāni khīṇāsavassa āsavakkhayādhiḡamato aparabhāge adhiḡatarūpārūpajjhānāni ca kathitāni. **Dibbacakkhuññānadassanappaṭilābhāyāti** dibbacakkhuññānappaṭilābhatthāya. Dibbacakkhuññaṃ hi rūpagatassa dibbassa itarassa ca dassanaṭṭhena idha “ññānadassanaṃ”ti adhippetam. **Ālokasaññaṃ manasi karotīti** divā vā rattim vā sūriyadīpacandamaṇi-ukkāvijjulatādīnaṃ āloko divā rattinca upaladdho, yathāladdhavaseneva ālokaṃ manasi karoti citte ṭhapeti, tathā ca naṃ manasi karoti, yathāssa subhāvitālokakasiṇassa viya kasiṇāloko yathicchakaṃ yāvadicchakaṅca so āloko rattiyam

upatiṭṭhati, yena tatha divāsaññaṃ ṭhapeti, divā viya vigatathinamiddho hoti. Tenāha “**yathā divā tathā rattin**”ti.

Yathā divā ālokasaññaṃ manasi katā, tatheva naṃ rattimpi manasi karotīti yathā divā diṭṭho āloko, tatheva taṃ rattim manasi karoti. **Dutiyapadeti** “yathā rattim tathā divā”ti imasmim vākye. **Esanayoti** iminā yathā rattiyam candālokādi āloko diṭṭho, evameva rattim diṭṭhākāreणा divā taṃ ālokaṃ manasi karoti citte ṭhapetīti imamatthaṃ atidisati. **Iti vivaṭena cetasāti** evaṃ apihitena cittena, thinamiddhāpidhānena apihitacittenaṅgāti vuttam hoti. **Apariyonaddhenāti** samantato anaddhena asaṅchādhitena. **Kiñcāpīti**-ādinā attanā vuttamevatthaṃ samattheti. **Ālokasadisam katam** “yathā divā tathā rattin”ti-ādinā.

Sattaṭṭhānikassāti “abhikkante paṭikkante sampajānakārī hotī”ti-ādinā¹ vuttassa sattaṭṭhānikassa satisampajāññaṃ atthāya.

Pariggahitavatthārammaṇatāyāti vatthuno ārammaṇassa ca yāthāvato viditabhāvena. Yathā hi sappam pariyesantena tassa āsaye vidite sopi vidito gahito eva ca hoti mantāgadabalena tassa gahaṇassa sukarattā, evaṃ vedanāya āsayabhūte vatthumhi ārammaṇe ca vidite ādikammikassapi vedanā viditā gahitā eva hoti salakkhaṇato sāmāññalakkhaṇato ca tassā gahaṇassa sukarattā. Pageva pariññātavatthukassa khīṇāsavassa. Tassa hi uppādakkhaṇepi ṭhitikkhaṇepi bhaṅgakkhaṇepi vedanā viditā pākāṭā honti “tā vedanā evaṃ uppajjitvā”ti-ādinā. Na kevalaṅca vedanā eva, idha vuttā saññādayopi avuttā cetanādayopi viditāva uppajjanti ceva tiṭṭhanti ca nirujjhanti ca. Nidassanamattam hetam, yadidam pāḷiyam vedanāsaññāvitakkagahaṇam. Tena anavasesato sabbadhammānampi uppādādito viditabhāvam dasseti.

Apica vedanāya uppādo vidito hoti, upaṭṭhānam viditam hoti, atthaṅgamo vidito hoti. Katham vedanāya uppādo vidito

1. Dī 1. 67; Dī 2. 233; Ma 1. 72 piṭṭhesu.

hoti? Avijjāsamudayā vedanāsamudayo, kaṇhāsamudayā kammāsamudayo, phassasamudayā vedanāsamudayoti nibbatilakkhaṇaṃ passantopi vedanākkhandhassa samudayaṃ passati. Evaṃ vedanāya uppādo vidito hoti. Kathaṃ vedanāya upaṭṭhānaṃ viditaṃ hoti? Aniccato manasikaroto khayatupaṭṭhānaṃ viditaṃ hoti, dukkhato manasikaroto bhayatupaṭṭhānaṃ viditaṃ hoti, anattato manasikaroto suññatupaṭṭhānaṃ viditaṃ hoti. Evaṃ vedanāya upaṭṭhānaṃ viditaṃ hoti. Iti khayato bhayato suññato jānāti. Kathaṃ vedanāya atthaṅgamo vidiko hoti? Avijjānirodhā vedanānirodho -pa-. Evaṃ vedanāya atthaṅgamo vidito hoti. Imināpi nāyenettha attho veditaḥ.

Iti rūpanti ettha itisaddo anavasesato rūpassa sarūpanidassanatto tassa **idaṃ rūpanti** etena sādharmaṇato sarūpanidassanamaḥa, **ettakaṃ rūpanti** etena anavasesato, **na ito paraṃ rūpaṃ atthīti** tabbinimuttassa aññassa abhāvaṃ. **Iti vedanāti**-ādīsopi ayaṃ vedanā, ettakā vedanā, ito paraṃ vedanā natthi. Ayaṃ saññā -pa-. Ime saṅkhārā -pa-. Idaṃ viññānaṃ, ettakaṃ viññānaṃ, ito paraṃ viññānaṃ natthīti evamattho daṭṭhabboti āha “vedanādisopi eseva nayo”ti.

Ñāṇena jānitvā paroparāni. **Paroparānīti** parāni ca oparāni ca¹. **Uttamādhamaṇīti** paratābhāvasakattābhāvādīni uttamādhamaṇī. **Calitanti** taṇhādīṭṭhivipphandaṃ. **Anīghoti** rāgādi-īgharahito. **Atāri** soti so evarūpo arahā jātūjaraṃ atari.

Samādhībhāvanāsuttavaṇṇanā niṭṭhitā.

2. Pañhabyākaraṇasuttādivaṇṇanā

42-44. Dutīye **etesam pañhānanti** ekaṃsabyākaraṇādīnaṃ catunnaṃ pañhanaṃ. **Tasmim thāne byākaraṇaṃ jānātīti** “cakkhūṃ aniccaṃ”ti puṭṭhe “aniccaṃ”ti ekaṃseneva byākātābbaṃ. “Aniccā nāma cakkhūṃ”ti puṭṭhe pana “na kevalaṃ cakkhūmeva, sotampi aniccaṃ”ti evaṃ vibhajitvā byākātābbaṃ.

1. Parāni ca orāni ca (Ka)

“Yathā cakkhum̐ tathā sotaṃ, yathā sotaṃ tathā cakkhun̐”ti puṭṭhe
 “kenaṭṭhena pucchāsī”ti paṭipucchitvā “dassanaṭṭhena pucchāmī”ti vutte “na
 hī”ti byākātabbam̐. “Aniccaṭṭhena pucchāmī”ti vutte “āmā”ti byākātabbam̐.
 “Taṃ jīvaṃ taṃ sarīraṃ”ti-ādīni puṭṭhena pana “abyākatametam̐
 bhagavatā”ti ṭhapetabbo, esa pañho na byākātabboti evaṃ jānātīti attho.
Atthasamāgamenāti atthassa paṭilābhena laddhabbena. Samiti sāṅgati
 samodhānanti samayo, paṭilābho. Samayo eva **abhisamayo**,
 abhimukhabhāvena vā samayo **abhisamayoti** evamettha padattho veditabbo.
 Sesam̐ suviññeyyameva. Tatiyacatutthāni uttānatthāneva.

Pañhabyākaraṇasuttādivaṇṇanā niṭṭhitā.

5. Rohitassasuttādivaṇṇanā

45-46. Pañcame¹ **ekokāseti** cakkavāḷassa pariyantasaññīte ekasmim̐
 okāse. **Bhumanti** “yatthā”ti idaṃ bhumavacanaṃ. Sāmaññato vuttampi
 “so lokassa anto”ti vacanato viṭṭhavisayameva hoti. “Na jāyati na mīyati”ti
 vatvā puna “na cavati na upapajjati”ti kasmā vuttanti āha “**idaṃ aparāparam̐**
-pa- gahitaṃ”ti. **Padagamanenā**ti padasā gamanena. **Satthā saṅkhāralokassa**
antam̐ sandhāya vadati upari sabbāni pakāsetukāmo. Saṅkhāralokassa hi
 anto nibbānaṃ.

Daḷham̐ thiraṃ dhanu etassāti daḷhadhanvā, so eva “daḷadhammā”ti
 vutto. Tenāha “**daḷhadhanū**”ti. **Uttamappamāṇam̐** nāma saḥassathāmadhanu.
 Dhanuggaṇhanasippacittakatāya dhanuggaho, na dhanuggahaṇamattenāti āha
 “**dhanuggahoti dhanu-ācariyo**”ti. “Dhanuggaho”ti vatvā “sikkhito”ti vutte
 dhanusikkhāya sikkhitoti viññāyati. Sikkhā ca ettakena kālena sikkhantassa
 ukkaṃsagatā hotīti āha “**dvādasa vassāni dhanusipparṃ sikkhito**”ti.
Usabhappamāṇeti vīsati yaṭṭhiyo usabham̐, tasmim̐ usabhappamāṇe padese.
Vālaganti vālokoṭim̐. **Katahatthoti** paricitaḥattho. **Katasarakkhepoti**
 thiralakkhe ca calalakkhe ca paresam̐

1. Saṃ-Ṭī 1. 158 piṭṭhepi passitabbam̐.

dassanavasena sarakkhepassa katāvī. Tenāha “**dassitasippo**”ti, “katayoggo”ti keci. Asanti etenāti **asanam**, kaṇḍo. **Tālacchādinti** tālacchāyam. Sā pana ratanamattā vidatthacaturaṅgulā.

Puratthimā samuddāti ekasmim cakkavāle puratthimā samuddā. Samuddasīsena puratthimacakkavālamukhavatṭim vadati. **Pacchimasamuddoti** etthāpi eseva nayo. **Nippapañcatanti** adantakāritam. **Sampatteti** tādisena javena gacchantena sampatte. **Anotatteti** etthāpi “sampatte”ti padaṃ ānetvā sambandho, tathā “nāgalatādantakaṭṭhan”ti etthāpi. **Tadāti** yadā so lokantagavesako ahosi, tadā. **Dīghāyutakālōti** anekavassasahassāyukakālo. **Cakkavāḷalokassati** sāmāññavasena ekavacanam, cakkavāḷalokānanti attho. Imasmimyeva cakkavāle nibbattipubbaparicayasiddhāya nikantiyā.

Sasaññimhi samanaketi na rūpadhammamattake, atha kho pañcakkhandhasamudāyeti dasseti. **Samitapāpoti** samucchinnasamkilesadhammo. Chaṭṭham uttānameva.

Rohitassasuttādivaṇṇanā niṭṭhitā.

7. Suvidūrasuttavaṇṇanā

47. Sattame **suvidūra**vidūra-saddānam samānatthānamyeva ekattha gahaṇam idha niddeso dūrāsannabhāvassa apekkhāsiddhattā idhādhippetassa dūrabhāvassa kenaci pariyāyena anāsannabhāvadassanattham katanti āha “**kenaci pariyāyena anāsannāni hutvā**”ti-ādi. Sesamettha uttānameva.

Suvidūrasuttavaṇṇanā niṭṭhitā.

8. Visākhasuttavaṇṇanā

48. Aṭṭhame vākkaraṇacāturīyato vacanaguṇahetūnam pūriyā¹porī, poriyam bhavāti porī, tāya **poriyā**. Tenāha “**paripuṇṇavācāyā**”ti, akkharapadaparipuṇṇāya vācāyāti attho. **Apalibuddhāyāti**

1. Pūriyam (Ka)

pittādīhi na vibaddhāya ananubuddhitāya. **Anelagalāyāti** anelāya agalāya niddosāya agalītapadabyañjanāya ca. Therassa hi kathayato padaṃ vā byañjanaṃ vā na parihāyati. Tenāha “**anelagalāyāti niddosāya ceva agalītāya cā**”ti-ādi. Tattha **niddosāyāti** atthato cabyañjanato ca vigatadosāya. **Apatitapadabyañjanāyāti** avirahitapadabyañjanāya. Atha vā **anelagalāyāti** na elāṃ dosaṃ galatīti anelagalā. Avicchinnavācāya anelagalāya yathā dandhamanussā mukhena kheḷaṃ gaḷantena vācaṃ bhāsanti, na evarūpāya, atha kho niddosāya visadavācāyāti attho. Vivaṭṭappakāsini vācā na kadāci vivaṭṭamuttāti kavā āha “**vivaṭṭapariyāpannāyā**”ti vivaṭṭaṃ amuñcitvā pavattāyāti attho. Vivaṭṭappakāsini hi vācā vivaṭṭaṃ paricchijja āpādentī pavattati. Navalokuttaradhammo sabbadhammehi samussitaṭṭhena abbhugataṭṭhena ca dhajo nāmāti āha “**abbhugataṭṭhena**”ti-ādi. Sesamettha suviññeyyameva.

Visākhassuttavaṇṇanā niṭṭhitā.

9. Vipallāsasuttavaṇṇanā

49. Navame aniccādīni vatthūni niccanti-ādinā viparītato asantīti vipallāsā, saññāya vipallāso **saññāvipallāso**. Itaresupi tisu eseva nayo. Evamete catunnaṃ vatthūnaṃ vasena cattāro, tesu vatthūsu saññādīnaṃ vasena dvādasa honti. Tesu aṭṭha sotāpattimaggena pahīyanti. **Asubhe subhanti** saññācittavipallāsā sakadāgāmimaggena tanukā honti, anāgāmimaggena pahīyanti. **Dukkhe sukhanti** saññācittavipallāsā arahattamaggena pahīyantīti veditabbā. Sesamettha uttānameva.

Vipallāsasuttavaṇṇanā niṭṭhitā.

10. Upakkilesasuttavaṇṇanā

50. Dasame **upakkiliṭṭhabhāvakaṇṇenā**ti malīnabhāvakaṇṇena.
Pañcavidhāya surāya catubbidhassa ca merayassāti ettha pūvasurā
 pīṭṭhasurā odanasurā kiṇṇapakkhittā sambhārasaṃyuttāti pañca surā.
 Pupphāsavo phalāsavo madhvāsavo guḷāsavoti cattāro āsavā catubbidham
 merayaṃ nāma. Tattha pūve bhājane pakkhipitvā tajjaṃ udakaṃ datvā
 madditvā katā **pūvasurā**. Evaṃ sesasurāpi. **Kiṇṇā**ti pana tassā surāya bījaṃ
 vuccati. Ye surā “medakā”tipi vuccanti, te pakkhipitvā katā **kiṇṇapakkhittā**.
 Dhātaki-āsavādinānāsambhārehi saṃyojitvā **sambhārasaṃyuttā**.
 Madhukatālanāḷikerādipuppharaso ciraparivāsito **pupphāsavo**.
 Panasādiphalaraso **phalāsavo**. Muddikāraso **madhvāsavo**. Ucchuraso
guḷāsavo.

Upakkilesasuttavaṇṇanā niṭṭhitā.

Rohitassavaggavaṇṇanā niṭṭhitā.

Paṭhamapaṇṇāsako niṭṭhito.

2. Dutiyapaṇṇāsaka

(6) 1. Puññābhisandavagga

1. Paṭhamapuññābhisandasuttavaṇṇanā

51. Dutiyassa paṭhame **puññābhisandā**ti vā puññanadiyo. Avicchedena niccaṃ pavattiyamānāni hi puññāni abhisandanaṭṭhena “puññābhisandā”ti vuttā. **Aparimitanti** āḷhakagaṇanāya aparimitaṃ, yojanavasena panassa parimāṇaṃ atthi. Tathā hi heṭṭhā mahāpathaviyā upari ākāseṇa parato cakkavāḷapabbatena majjhe tattha tattha ṭhitehi dīpapabbatapariyantehi paricchinnattā yojanato sakkā pamāṇaṃ kātum. **Bheravārammaṇehī**ti saviññāṇakāviññāṇakehi bheravārammaṇehi. Tathā hi taṃ mahāsarīramacchakumbhīlayakkharakkhasamahānāgadānavādīnaṃ saviññāṇakānaṃ vaḷavāmukhapātālādīnaṃ aviññāṇakānaṃ bheravārammaṇānaṃ vasena “bahubheravan”ti vuccati. Sesametta uttānameva.

Paṭhamapuññābhisandasuttavaṇṇanā niṭṭhitā.

2. Dutiyapuññābhisandasuttavaṇṇanā

52. Dutiye **sotāpannessa saddhā adhippetā**ti sotāpannessa maggenāgatā saddhā adhippetā.

Dutiyapuññābhisandasuttavaṇṇanā niṭṭhitā.

3. Paṭhamasaṃvāsasuttādivaṇṇanā

53-54. Tatiye yathākammaṃ tā tā gatiyo aranti upagacchantīti ariyā, sattā. Ime pana kucchitā ariyāti **kadariyā**, thaddhamaccharino, thaddhena maccharena samannāgatāti attho. Thaddhamacchariyasadiṣaṃ hi

kucchitaṃ sabbadā nihīnaṃ natthi sabbaguṇānaṃ ādibhūtaṃ
bhogasampatti-ādisabbasampattīnaṃ mūlabhūtaṃ dānassa nisedhanato.
Tenāha “**Kadariyāti thaddhamaccharino**”ti. Ekacco hi attano vasanaṭṭhāne
bhikkhū hatthaṃ pasāretvāpi na vandati. Aññattha gato vihāraṃ pavisitvā
sakkaccaṃ vanditvā madhurappaṭisanthāraṃ karoti “kiṃ bhante amhākaṃ
vasanaṭṭhānaṃ nāgacchatha, sampanno padeso, paṭibalāhaṃ ayyānaṃ
yāgubhattādīhi upaṭṭhānaṃ kātun”ti. Bhikkhu “saddho ayaṃ upāsako”ti
yāgubhattādīhi saṅgaṇhāti. Atheko thero tassa gāmaṃ gantvā piṇḍāya carati,
so taṃ disvā aññena vā gacchati, gharaṃ vā pavisati. Sacepi
sammukhībhāvaṃ āgacchati, hatthena vanditvā “ayyassa bhikkhaṃ detha,
ahaṃ ekena kammaṃ gacchāmi”ti pakkamati. Thero sakalagāmaṃ caritvā
tucchapattova nikkhamati. Idaṃ tāva mudumacchariyaṃ nāma. Yena
adāyakopi dāyako viya paññāyati. Idha pana thaddhamacchariyaṃ
adhippetāṃ. Yena samannāgato bhikkhūsu piṇḍāya pavitṭhesu “therā ṭhitā”ti
vutte “kiṃ mayhaṃ pādā rajjantī”ti-ādīni vatvā silāthambho viya khāṇuko
viya ca thaddho hutvā tiṭṭhati, sāmīcimpī na karoti, kuto dānaṃ. Ayamidha
adhippeto. Tena vuttaṃ “**thaddhamaccharinoti thaddhena maccharena
samannāgatāti attho**”ti. Maccharaṃ maccharaṃ macchariyanti atthato ekaṃ.

Paribhāsakāti bhikkhū gharadvāre ṭhite disvā “kiṃ tumhe kasitvā āgatā
vapitvā lāyitvā, mayaṃ attanopi na labhāma, kuto tumhākaṃ, sīghaṃ
nikkhamathā”ti-ādīhi santajjakā. **Yācakānaṃ vacanassa atthaṃ jānantī**
ettha kiñcāpi bhikkhū gharadvāre ṭhitā tuṅhī honti, atthato pana “bhikkhaṃ
dethā”ti vadanti nāma ariyāya yācanāya. Vuttaṃ hetam “uddissa ariyā
tiṭṭhanti, esā ariyāna yācanā”ti¹. Tatra ye “mayaṃ pacāma, ime na pacanti,
pacamāne patvā alabhantā kuhiṃ labhissatī”ti deyyadhammaṃ
samvibhajanti, te vadaññū yācakānaṃ vacanassa atthaṃ jānanti nāma ñatvā
kattabbakaraṇato. Catutthaṃ uttānameva.

Paṭhamasamvāsasuttādivaṇṇanā niṭṭhitā.

1. Khu 1. 162; Khu 11. 224 piṭṭhesu.

5. Samajīvīsuttādivaṇṇanā

55-56. Pañcame **anuggaṇhanatthanti** nakulamātā nakulapitāti imesaṃ dvinnam saṅgahatthāya. Na kulassa dārakassa pitā **nakulapitā**. **Nakulamātāti** etthāpi eseva nayo. Sesamettha uttānameva. Chaṭṭhe natthi vattabbaṃ.

Samajīvīsuttādivaṇṇanā niṭṭhitā.

7. Suppavāsāsuttādivaṇṇanā

57-60. Sattame **āyubhāgaṇapaṭilābhinī hotīti** āyukoṭṭhāsassa paṭilābhinī hoti. **Tividhalokanti** sattasaṅkhārabhājanasaṅkhātāṃ tividham lokam. **Viditam katvāti** vibhūtam katvā. **Lokavidūnanti** karaṇatthe sāmivacananti āha “**buddhehi pasatthā**”ti. Aṭṭhamanavamadasamāni uttānatthāneva.

Suppavāsāsuttādivaṇṇanā niṭṭhitā.

Puññābhisandavaggavaṇṇanā niṭṭhitā.

(7) 2. Pattakammavagga

1. Pattakammasuttādivaṇṇanā

61-64. Dutiyassa paṭhame ye aniṭṭhā na honti, te iṭṭhāti adhippetāti āha “**aniṭṭhapaṭikkhepena iṭṭhā**”ti. **Iṭṭhāti** ca pariyiṭṭhā vā hotu mā vā, iṭṭhārammaṇabhūtāti attho. Gavesitampi hi iṭṭhanti vuccati, taṃ idha nādhippetam. **Maneti** manasmim. **Kantāti** vā kamanīyā, kāmetabbāti attho. **Manam appāyantīti** iṭṭhabhāvena manam vaḍḍhenti. Kammasādhano idha **bhoga-saddoti** āha “**bhogāti bhuñjitabbā**”ti-ādi. **Dhammūpaghātāṃ katvā** kusaladhammaṃ vinodetvā. Upanijjhāyāyantīti¹

1. Upanijjhāyantīti (Ka)

upajjhāyāti āha “sukhadukkhesu upanijjhāyitabbattā”ti, sukhadukkhesu uppannesu anussaritabbattāti attho. **Sandiṭṭhasambhattehi**ti ettha tattha tattha saṅgama diṭṭhamattā nātidalhamittā **sandiṭṭhā**, suṭṭhā bhattā sinehavanto dalhamittā **sambhattā**.

Visamalobhanti balavalobham. **Sukhitanti** sañjātasukham. **Pīṇitanti** dhātām suhitām¹. Tathābhūto pana yasmā balasampanno hoti, tasmā “**balasampannaṃ karotī**”ti vuttaṃ.

Sobhane kāyikavācasikakamme ratohi sūrato ukārassa dīgham katvā, tassa bhāvo **soraccaṃ**, kāyikavācasiko avitikkamo. So pana atthato susīlabhāvoti āha “**khantisoracce nivīṭṭhāti adhivēsanakkhantiyañca susīlatāya ca nivīṭṭhā**”ti. **Ekamattānanti** ekaṃ cittanti attho. Rāgādīnaṃ hi pubbabhāgiyaṃ damanādi paccekaṃ icchitabbam, na maggakkhaṇe viya ekajjhaṃ paṭisaṅkhāmukhena pajahanato. **Ekamattānanti** vā vivekavasena ekaṃ ekākinaṃ attānaṃ. Tenevāha “**ekaṃ attanova attabhāvan**”ti-ādi. **Uparūpari bhūmīsūti** chakāmasaggasaṅkhātāsu uparūparikāmabhūmīsu. Kamma phalaṃ **aggaraṃ** nāma. Taṃ panettha uccagāmīti āha “**uddhamaggamassā**”ti. Suvagge niyuttā, suvaggappayōjanāti vā **sovaggikā**. **Dasannaṃ visesānanti** dibba-āyuvaṇṇayasasukha-ādhipateyyānañceva iṭṭharūpādīnañca phalavi-asesānaṃ. Vaṇṇaggahaṇena cettha sako attabhāvavaṇṇo gahito, rūpaggahaṇena bahiddhā rūpārammaṇaṃ. Dutiyatatiyacatutthāni uttānatthāneva.

Pattakammasuttādivaṇṇanā niṭṭhitā.

5. Rūpasuttavaṇṇanā

6. Pañcame paminoti uḷāratādivisesaṃ etenāti pamāṇaṃ, rūpakāyo pamāṇaṃ etassāti **rūpappamāno**. Tato eva rūpe pasannoti **rūpappasanno**. **Ghosoti** cettha thutighoso. **Lūkhanti** paccayalūkhatā. **Dhammāti** silādayo guṇadhammā adhippetā. Imesaṃ pana catunnaṃ puggalānaṃ nānākaraṇaṃ pāḷiyāmyeva āgataṃ. Vuttaṃ hetam—

1. Sutittam (Ka)

“Katamo ca puggalo rūpappammāṇo rūpappasanno? Idhekacco puggalo ārohaṃ vā passivā pariṇāhaṃ vā passivā saṅṭhānaṃ vā passivā pāripūriṃ vā passivā tattha pamāṇaṃ gahetvā pasādaṃ janeti, ayaṃ vuccati puggalorūpappamāṇo rūpappasanto.

Katamo ca puggalo ghosappamāṇo ghosappasanno? Idhekacco puggalo paravaṇṇanāya parathomānāya parapasaṃsanāya paravaṇṇahārikāya tattha pamāṇaṃ gahetvā pasādaṃ janeti, ayaṃ vuccati puggalo ghosappamāṇo ghosappasanno.

Katamo ca puggalo lūkhappamāṇo lūkhappasanno? Idhe kacco puggalo cīvaralūkhaṃ vā passivā pattalūkhaṃ vā passivā senāsanalūkhaṃ vā passivā vividhaṃ vā dukkarakārikaṃ passivā tattha pamāṇaṃ gahetvā pasādaṃ janeti, ayaṃ vuccati puggalo lūkhappamāṇo lūkhappasanno.

Katamo ca puggalo dhammappamāṇo dhammappasanno? Idhekacco puggalo sīlaṃ vā passivā samādhiṃ vā passivā paññaṃ vā passivā tattha pamāṇaṃ gahetvā pasādaṃ janeti, ayaṃ vuccati puggalo dhammappamāṇo dhammappasanno”¹.

Tattha **ārohanti** uccataṃ. Sā ca kho tasmim̐ tasmim̐ kāle pamāṇayuttā daṭṭhabbā. **Pariṇāhanti** nātikisathūlatāvasena piṇataṃ. **Saṅṭhānanti** tesaṃ tesaṃ aṅgapaccaṅgānaṃ susaṅṭhitataṃ dīgharassavaṭṭādiyuttaṭṭhānesu tathābhāvaṃ. **Pāripūrinti** sabbesaṃ sarirāvayavānaṃ paripuṇṇataṃ avikalataṃ. **Tattha pamāṇaṃ gahetvāti** tasmim̐ rūpe rūpasampattiyaṃ pamāṇabhāvaṃ upādāya. **Pasādaṃ janetīti** adhimokkhaṃ janeti uppādeti.

Paravaṇṇanāyāti “asuko ediso ca ediso cā”¹ti parassa guṇavacanena. **Parathomānāyāti** parammukhā parassa silāghuppādakena abhitthavanena parena thutivasena, gāthādi-upanibandhanena vuttāya thomanāyāti vuttaṃ hoti. **Parapasaṃsanāyāti** parammukhā parassa guṇasaṃkittanena.

1. Abhi 3. 161 piṭṭhe.

Paravaṇṇahārikāyāti paramparavaṇṇahārikāya paramparāya parassa kittanasaddassa upasamhārena. **Tatthā**ti tasmim̐ thutihose.

Cīvaralūkhanti thūlajiṇṇabahutunnakatādicīvarassa lūkhabhāvaṃ. **Pattalūkhanti** anekaganthikāhaṭatādipattassa lūkhabhāvaṃ. **Vividham̐ vā dukkarakārikanti** dhutaṅgādivasena pavattanānāvidham̐ dukkaracariyaṃ. **Sīlam̐ vā passitvā**ti sīlapāripūrivasena visuddham̐ kāyavacīsucaritaṃ ṇāṇacakkhunā passitvā, jhānādi-adhigamasuddhisamādhiṃ vā vipassanābhiññāsāṅkhātāṃ paññaṃ vā passitvāti attho.

Evametasmim̐ catuppamāṇe lokasannivāse buddhesu appasannā mandā, pasannā bahukā. Rūpappamāṇassa hi buddharūpato uttari pasādāvahaṃ rūpaṃ nāma natthi. Ghosappamāṇassa buddhānaṃ kittighosato uttari pasādāvaho ghoso nāma natthi. Lūkhappamāṇassa kāsikāni vatthāni mahārahāni kañcanabhājanāni tiṇṇaṃ utūnaṃ anucchavike sabbasampattiyutte pāsādavare pahāya paṃsukūlacīvaraselamayapattarukkhamūlādisenāsanasevino buddhassa bhagavato lūkhato uttari pasādāvahaṃ aññaṃ lūkhaṃ nāma natthi. Dhammappamāṇassa sadevake loka asādhāraṇasīlādiguṇassa Tathāgatassa sīlādiguṇato uttari pasādāvaho añño sīlādiguṇo nāma natthi. Iti bhagavā imaṃ catuppamāṇikaṃ lokasannivāsaṃ muṭṭhinā gahetvā viya ṭhitoti.

Pamāṇimsūti pamāṇaṃ aggahesuṃ. **Niyakajjhatte tassa guṇaṃ na jānātī**ti tassa abbhantare pavattamānaṃ sīlādiguṇaṃ na jānāti. Sesam̐ suviññeyyameva.

Rūpasuttavaṇṇanā niṭṭhitā.

7. Ahirājasuttavaṇṇanā

67. Sattame **daṭṭhavisānevā**ti avadhāraṇena diṭṭhavisādayo nivatteti. Katṭhamukhādayo hi cattāro āsīvisā daṭṭhavisō, diṭṭhavisō, phutṭhavisō, vātavisōti paccekaṃ catubbidhā hontīti

visavegavikāravasena soḷasa vuttā, tesu daṭṭhavisānamyeva idha gahaṇam, na itaresanti dasseti. Sesam suviññeyyameva.

Ahirājasuttavaṇṇanā niṭṭhitā.

8. Devadattasuttavaṇṇanā

68. Aṭṭhame **kāle sampatteti** gabbhassa paripākagattā vijāyanakāle sampatte. **Potakanti** assatariyā puttam. “Phalam ve kadaliṃ hanti”ti-ādigāthāya kukkujakeneva pattavaṭṭipavasassa ucchinnattā phaluppatti kadaliyā parābhavāya hotīti āha “**phalam ve kadaliṃ hanti**”ti. **Kukkujakam** nāma kadaliyā pupphanālam. Tathā phalapākariyosānattā osadhīnam “**phalam veḷum naḷan**”ti vuttam. Ayam panettha piṇḍattho—yathā attano phalam kadaliyeḷunaḷe vināseti, gabbho ca assatariṃ, evam attano kammabhūto sakkāro asappurisaṃ vināsetīti.

Devadattasuttavaṇṇanā niṭṭhitā.

9. Padhānasuttavaṇṇanā

69. Navame padahati etehīti **padhānāni**. **Uttamavīriyāni** setṭhavīriyāni viṣiṭṭhassa atthassa sādhanato. **Kilesānam saṃvaratthāyāti** yathā abhijjhādayo na uppajjanti, evam satiyā upaṭṭhānena kilesānam saṃvaraṇatthāya. **Pajahanatthāyāti** kāmavitakkādīnam vinodanatthāya. **Padhānanti** tasseva pajahanassa sādhanavasena pavattavīriyam. **Kusalānam dhammānam brūhanatthāyāti** bojjhaṅgasaṅkhātānam kusaladhammānam vaḍḍhanatthāya. **Padhānanti** tasseva vaḍḍhanassa sādhanavasena pavattavīriyam.

Padhānasuttavaṇṇanā niṭṭhitā.

10. Adhammikasuttavaṇṇanā

70. Dasame **visamanti** bhāvanapuṃsakametaṃ. Tenāha **visamā hutvā**”ti. **Asamayenāti** akāle. Bhummatthe hetam karaṇavacanam.

Pakaṭṭhaṃ padhānaṃ añjasam etesanti pañjasā, añjasam pagatā paṭipannāti vā pañjasā, pakatimaggagāmino. Na pañjasā **apañjasā**, amaggappaṭipannā. Te pana yasmā maggato apagatā nāma honti, tasmā vuttaṃ “**maggato apagatā**”ti-ādi.

Gāthāsu pana evamettha sambandho veditabbo. **Gunnarī ce taramānānanti** gāvīsu mahoghaṃ tarantīsu. **Jimharī gacchati puṅgavoti** yadi yūthapati ubhabho kuṭilam gacchati. **Sabbā tājimharī gacchantīti** sabbā tā gāvīyo kuṭilameva gacchanti. Kasmā? **Nette¹ jimharī gate sati** tassa kuṭilagattā. So hi tāsam paccayiko upaddavaharo ca. **Evamevanti** yathā cetam, evameva yo manussesu padhānasammato, yadi so adhammacārī siyā, ye tassa anujīvino, sabbepi adhimmikā honti. Sāmisampadā hi pakatisampadam sampādeti. Yasmā etadevaṃ, tasmā **sabbarī raṭṭharī dukkharī seti, rājā ce hoti adhammiko**.

Adhammikasuttavaṇṇanā niṭṭhitā.

Pattakammavaggavaṇṇanā niṭṭhitā.

(8) 3. Aparaṇakavagga

1. Padhānasuttādivaṇṇanā

71-72. Tatiyavaggassa paṭhame yavati tena phalaṃ missitaṃ viya hotīti **yoni**, ekantikaṃ kāraṇam. **Assāti** yathāputtassa bhikkhuno. **Paripuṇṇanti** avikalam anavasesam. Āsave khepetīti **āsavakkhayo**, aggamaggo. Idha pana arahattaphalam adhippetanti āha “**arahattatthāyā**”ti dutiyaṃ uttānameva.

Padhānasuttādivaṇṇanā niṭṭhitā.

3. Sappurisasuttādivaṇṇanā

73-75. Tatiye **pañhatthāya abhinītoti** pañhakaraṇatthāya abhimukhaṃ nīto. **Alambitaṃ katvāti** alambaṃ katvā, ayameva vā pāṭho, vipalambaṃ akatvāti attho. **Avajānātīti** avaññaṃ karoti, nindatīti attho. Catutthapañcame natthi vattabbaṃ.

Sappurisasuttādivaṇṇanā niṭṭhitā.

6. Kusinārasuttavaṇṇanā

76. Chaṭṭhe nagaraṃ pavisitukāmā uyyānato upecca vattanti gacchanti etenāti **upavattanaṃ**. Yatheva hi kalambanaditīrato¹ rājamātuviharadvārena Thūpārāmaṃ gantabbaṃ hoti, evaṃhiraññavatīkāya pārimatīrato sālavanaṃ uyyānaṃ, yathā Anurādhapurassa thūpārāmo dakkhiṇapacchimadisāya, evaṃ taṃ uyyānaṃ kusinārāya dakkhiṇapacchimadisāya hoti. Yathā thūpārāmato dakkhiṇadvārena nagaraṃ pavisanamaggo pācīnamukho gantvā uttarena nivattati, evaṃ uyyānato sālapananti pācīnamukhā gantvā uttarena nivattā, tasmā taṃ “upavattanaṃ”ti vuccati. **Antareti** dvinnaṃ sālaruḅkhānaṃ vemajjhe. Tattha hi paññāpiyamānassa mañcassa ekā sālapananti sīsabhāge hoti, ekā pādabhāge. Tatrapi eko taruṇasālo sīsabhāgassa āsanno hoti, eko pādabhāgassa. Apica **samakasālā** nāma mūlakhandhaviṭapapattehi aññaṃaññaṃ saṃsibbitvā ṭhitasālātipi vadanti.

Dveḷhakanti dvīdhāgāho, anekamaṃsaggāhoti attho. **Vimatīti** saṃsayāpattīti āha “**vinicchitum asamatthata**”ti. **Taṃ vo vadāmīti** taṃ saṃsayavantaṃ bhikkhuṃ sandhāya vo tumhe vadāmīti. **Nikkaṅkhabhāvapaccakkhakarānanti** buddhādīsu tesāṃ bhikkhūnaṃ nikkaṅkhabhāvassa paccakkhakarīyā yāthāvato tamatthaṃ paṭivijjhivā ṭhitaṃ sabbaññutaññaṃameva. **Etthāti** etasmim atthe.

Kusinārasuttavaṇṇanā niṭṭhitā.

1. Kañjappanaditīrato (Ka) Dī-Ṭṭha 2. 163 piṭṭhe passitabbaṃ.

7. Acinteyyasuttavaṇṇanā

77. Sattame **lokacintā**ti lokasannivesappaṭisaṃyuttā vīmaṃsā. Tenāha “**kena nu kho candimasūriyā**”ti-ādi. **Nāḷikerādayoti ādi**-saddena avuttānaṃ osadhitiṇavanappati-ādīnaṃ saṅgaho. **Evarūpā lokacintā**ti edisā vuttasadisā aññāpi sā lokacintā.

Acinteyyasuttavaṇṇanā niṭṭhitā.

8. Dakkhiṇasuttavaṇṇanā

78. Aṭṭhame **dānasaṅkhātāya dakkhiṇāyā**ti deyyadhammasaṅkhātāya dakkhiṇāya. Visuddhi nāma mahājutikatā. Sā pana mahapphalatāya veditabbāti āha “**mahapphalabhāvenā**”ti. **Visujjhatī**ti na kilissati, amalinā mahājutikā mahāvippahārā hotīti attho. **Sucidhammoti** rāgādi-asucividhamanena sucisabhāvo. **Lāmakadhammoti** hīnasabhāvo pāpakiriyāya. Akusaladhammā hi ekantanihīnā. Jūjako silavā kalyāṇadhammo na hoti, tassa mahābodhisattassa attano vuttadānaṃ dānapāramiyā matthakaṃ gaṇhantaṃ mahāpathavikampanasamattham jātaṃ. Svāyaṃ dāyakaguṇoti āha “**vessantaramahārājā kathetabbo**”ti-ādi. **Uddharatī**ti bahulaṃ pāpakammavasena laddhabbavinipātato uddharati, tasmā natthi mayham kiñci cittassa aññatthattanti adhippāyo.

Petadakkhiṇanti pete uddissa dātabbadakkhiṇaṃ. **Pāpitakāleyevā**ti “idaṃ dānaṃ asukassa petassa hotū”ti taṃuddisanavasena pattiyā pāvitakāleyeva. **Assāti** petassa. **Pāpuṇī**ti phalasampattilabhāpanavasena pāpuṇi. Ayaṃ hi pete uddissa dāne dhammatā. Tadā Kosalarañño pariccāgavasena ativiya dānajjhāsayataṃ buddhappamukhassa ca saṅghassa ukkaṃsagataguṇavisitṭhataṃ sandhāyāha “**asadisadānaṃ kathetabban**”ti.

Dakkhiṇasuttavaṇṇanā niṭṭhitā.

9. Vaṇṇijjasuttādivaṇṇanā

79-80. Navame **tamsadisāti** yādisā vaṇijjā payuttā ayathādhippāyā aññā vā sampajjati, tadisāvāti attho. **Chedaṃ gacchatīti** vināsam pāpuṇāti. Adhippāyato parā visiṭṭhāti **parādhippāyo**. Tenevāha “**ajjhāsayato adhikataraphalā hotī**”ti. **Cīvarādinā paccayena vadeyyāsīti** cīvarādipaccayahetu maṃ vadeyyāsi pattheyyāsi. Atha vā yadā cīvarādinā paccayena attho hoti, tadā maṃ yāceyyāsīti attho. Sesam suviññeyyameva. Dasamaṃ uttānameva.

Vaṇṇijjasuttādivaṇṇanā niṭṭhitā.

Apaṇṇakavaggavaṇṇanā niṭṭhitā.

(9) 4. Macalavagga

1-5. Pāṇātipātasuttādivaṇṇanā

81-86. Catutthassa paṭhamādīni uttānatthāneva. Pañcame¹ “nīce kule paccājāto”ti-ādikena appakāsabhāvena tamatīti tamo, tena tamena yuttoti **tamo** puggalo vuccati. Tathā hi tamnyogato puggalassa tabbohāro yathā “maccherayogato maccharo”ti, tasmā **tamoti** appakāsabhāvena tamo tamabhūto andhakāraṃ viya jāto, andhakārattaṃ vā pattoti attho. Vuttalakkaṇaṃ tamameva paramparato ayanam gati niṭṭhā etassati **tamaparāyaṇo**. Ubhayenapi tamaggahaṇena khandhatamo kathito, na andhakāratamo. **Khandhatamoti** ca sampattirahitā khandhappavattiyeva daṭṭhabbā. “Ucce kule paccājāto”ti-ādikena pakāsabhāvenajotetīti joti, tena jotināyuttoti-ādi sabbaṃ vuttanayena veditabbaṃ. **Itare dveti** jotitamaparāyaṇo, jotijotiparāyaṇoti itare dve puggale.

Veṇuvettādivilīvehi peḷabhājanādikārakā **vilīvakārakā**. Migamacchādīnaṃ nisādanato **nesādā**, māgavikamacchabandhādayo. Rathesu

1. Saṃ-Ṭī 1. 194 piṭṭhepi.

cammena nahaṇakaraṇato¹ **rathakārā**, cammakārā. **Pu**-iti karīsassa nāmaṃ, taṃ kusenti apanentīti **pukkusā**, pupphachaḍḍakā. **Dubbaṇṇoti** vurūpo. **Okotiṃmakoti** ārohābhāvena heṭṭhimako, rassakāyoti attho. Tenāha “**lakuṇḍako**”ti. Laku viya ghaṭikā viya ḍeti pavattatīti **lakuṇḍako**, rasso. Kaṇati nimīlatīti **kāṇo**. Taṃ panassa nimīlanam ekena akkhinā dvīhipi vāti āha “**ekacchikāṇo vā ubhayacchikāṇo vā**”ti. Kuṇanam kuṇo, hatthavekallam, so etassa atthīti **kuṇī**. **Khañjo** vuccati pādavikalo. Heṭṭhimakāyasaṅkhāto sarīrassa pakkho padeso hatto assāti **pakkhahato**. Tenāha “**pīṭhasappi**”ti. Padīpe padīpane etabbam netabbanti **padīpeyyam**, telakapālādi-upakaraṇam. **Vuttanti** aṭṭhakathāyam vuttam.

Āgamanavipattīti āgamaṇaṭṭhānavasena vipatti “āgamo etthā”ti katvā. **Pubbuppannapaccayavipattīti** paṭhamuppannapaccayavasena viparāvatti. Caṇḍāsādisabhāvā hissa mātāpitaro paṭhamuppannapaccayo. **Pavattapaccayavipattīti** pavatte sukhapaccayavipatti. Tādise nihīnakule uppannopi koci vibhavasampanno siyā, ayam pana duggato durūpo. **Ājīvupāyavipattīti** ājīvanupāyavasena vipatti. Sukhena hi jīvikam pavattetuṃ upāyabhūtā hatthisippādayo imassa natthi, pupphachaṭṭanasilākoṭṭhanādikammaṃ pana katvā jīvikam pavatteti. Tenāha “**kasiravuttike**”ti. **Attabhāvavipattīti** upadhivipatti. **Dukkhakāraṇasamāyogoti** kāyikacetasikadukkhupattiyā paccayasamodhānam. **Sukhakāraṇavipattīti** sukhapaccayaparīhāni. **Upabhogavipattīti** upabhogasukhassa vināso anupaladdhi. Joti ceva jotiparāyaṇabhāvo ca **sukkapakkho**. Chaṭṭham uttānameva.

Pāṇātipātasuttādivaṇṇanā niṭṭhitā.

7. Puttasuttavaṇṇanā

87. Sattame **ma-kāro padasandhikaro** “aññaṃaññaṃ”ti-ādīsu viya. **Niccalasamaṇoti** thirasamaṇo. Abhisīñcitabboti **abhisekoti**

1. Hananakaraṇato (Saṃ-Ṭī 1. 194 piṭṭhe)

kammasādhano abhisekasaddo. Tenāha “**abhisekaṃ kātuṃ yutto**”ti.

Bākulatthero viyāti thero hi mahāyasassī, tassa puttadhītarō nattupanattakā sukhumasātakehi cīvarāni kāretvā rajāpetvā samugge pakkhipitvā paṇṇanti. Therassa nahānakāle nahānakoṭṭhake ṭhapenti. Thero tāni nivāseti ceva pārūpati ca. Tenevetam vuttam.

Khadiravanamagge sīvalitthero viyāti satthari kira tam maggam paṭipanne devatā “amhākaṃ ayyassa sīvalittherassa sakkāram karissāmā”ti cintetvā ekekayo jane vihāram kāretvā ekayo janato uddham gantum adatvā pātova uṭṭhāya dibbāni yāgu-ādīni gahetvā “amhākaṃ ayyo sīvalitthero kahaṃ nisinno”ti vicaranti. Thero attano abhihaṭam duddhappamukhassa bhikkhusamghassa dāpesi. Evaṃ satthā saparivāro timsayojanikaṃ kantāram sīvalittherassa puññaphalaṃ anubhavamānova agamāsi. Tenevetam vuttam.

Aṭṭhakanāgarasutte ānandatthero viyāti aṭṭhakanāgarako kira gahapati therassa dhammadesanāya pasīditvā pañcasatagghanakaṃ vihāram kāretvā adāsi. Tam sandhāyetaṃ vuttam.

Pilindavacchatthero viyāti therassa kira iddhānubhāvena pasannā manussā sappi-ādīni bahūni bhesajjāni abhihariṃsu. Pakatīyāpi ca āyasmā pilindavaccho lābhī hoti pañcannaṃ bhesajjānaṃ, laddham laddham parisāya vissajjeti. Tenetaṃ vuttam “**gilānapaccayaṃ pilindavacchatthero viyā**”ti.

Tiṇṇampi sannipātena nibbattānīti pittādīnaṃ tiṇṇampi visamānaṃ sannipātena jātāni. Atisītādibhāvena utūnaṃ pariṇāmoti āha “**atisīta-ati-unḥa-ututo jātānī**”ti. Purima-ututo visadiso utu utupariṇāmo, tato jātāni **utupariṇāmajāni**, visabhāga-ututo jātānīti attho. Jaṅgaladesavāsīnaṃ hi anūpadese vasantānaṃ visabhāgo va utū uppajjati, anūpadesavāsīnaṃ ca jaṅgaladeseti. Evaṃ malayasamuddatīrādivasenapi utuvisabhāgatā uppajjatiyeva. Tato jātāni utupariṇāmajāni nāma.

Attano pakaticariyānaṃ visamaṃ kāyassa parihaṇavasena **visamaparihārajāni**. Tāni pana accāsana-atīṭṭhānādīnā veditabbānīti āha “**accāsanaatīṭṭhānādikā**”ti. **Ādi**-saddena mahābhāravahaṇasudhākoṭṭana adesakālacaraṇādīni saṅgaṇhāti. Parassa upakkamato nibbattāni **opakkamikāni**, ayaṃ coroti vā pāradārikoti vā gahetvā jaṇṇukakapparamuggarādīhi nippothana-upakkamaṃ paccayaṃ katvā uppannānīti attho. Tenāha “**vadhabandhanādi-upakkamena nibbatāni**”ti. **Kevalanti** bāhiraṃ paccayaṃ anapekkhitvā kevalaṃ, tena vināti attho. Tenāha “**pubbekatakammavipākavaseneva jātāni**”ti.

Puttasuttavaṇṇanā niṭṭhitā.

8. Saṃyojanasuttādivaṇṇanā

88-90. Aṭṭhame sotāpanno catūhi vātehi indakhīlo viya parappavādehi akampiyo acalasaddhāya samannāgatattā sāsane laddhappatīṭṭho **samaṇamacalo** nāmāti āha “**sāsane laddhappatīṭṭhattā**”ti-ādi. **Thaddhabhāvakarānaṃ kilesānaṃ sabbaso samucchinnattā**ti cittassa thaddhabhāvakarānaṃ uddhambhāgiyakilesānaṃ sabbaso abhāvā **samaṇasukhumālo** nāma sukhumālabhāvappattito. Navamadasamāni suviññeyyāneva.

Saṃyojanasuttādivaṇṇanā niṭṭhitā.

Macalavaggavaṇṇanā niṭṭhitā.

(10) 5. Asuravagga

1. Asurasuttādivaṇṇanā

91-92. Pañcamassa paṭhamadutiyaṇi uttānatthāneva.

Asurasuttādivaṇṇanā niṭṭhitā.

3. Dutiyasamādhisuttavaṇṇanā

93. Tatiye **appaṭivānī**ti bhāvappadhāno niddesoti āha “**anivattanatā**”ti. “Appaṭivānitā”ti vattabbe “appaṭivānī”ti vuttam. Tathā hi vīriyappavāhe vattamāne antarā eva paṭigamanam nivattanam paṭivānam, tam assa atthīti paṭivānī, na paṭivānī appaṭivānī, tassa bhāvo **appaṭivānitā**, anivattanāti attho. **Appaṭivānī**ti vā itthilingavasene vāyam niddeso. Antarāyeva paṭigamanam nivattanam paṭivānī, na paṭivānī **appaṭivānī**, anivattanāti attho.

Dutiyasamādhisuttavaṇṇanā niṭṭhitā.

4. Tatiyasamādhisuttavaṇṇanā

94. Catutthe **saṅṭhapetabbanti** sammadeva ṭhapetabbam. Yathā pana ṭhapitam saṅṭhapitam hoti, tam dassetum “**sannisādetabban**”ti-ādi vuttam. Tattha **sannisādetabbanti** samādhippaṭipakkhe kilese sannisīdāpentena cittam gocarajjhatte sannisīdāpetabbanti. **Ekodi kātabbanti** abyaggabhāvāpādanena ekaggam kātabbam. **Samādahitabbanti** abyaggabhāvāpādanena ekaggam kātabbam. **Samādahitabbanti** yathā ārammaṇe suṭṭhu appitam hoti, evam sammā sammadeva ādahitabbam, suṭṭhu āropetabbam samāhitam kātabbanti attho.

Tatiyesamādhisuttavaṇṇanā niṭṭhitā.

5. Chavālātasuttādivaṇṇanā

95-96. Pañcame **chavālātanti** chavānam daḍḍhaṭṭhāne alātam. Tenevāha “**susāne alātan**”ti. **Majjhaṭṭhāne gūthamakkhitanti** pamāṇena aṭṭhaṅgulamattam dvīsu ṭhānesu ādittam majjhe gūthamakkhitam. **Kaṭṭhatthanti** kaṭṭhena kātabbakiccam. Sesamettha uttānameva. Chaṭṭham uttānameva.

Chavālātasuttādivaṇṇanā niṭṭhitā.

7. Khippanisantisuttādivaṇṇanā

97-100. Sattame **khippanisantī**ti khippapañño. Tenāha “**khippanisāmano**”ti-ādi. **Anurūpadhamanti** lokuttarādhigamassa anucchavikasabhāvaṃ. Kalyāṇā sundarā parimaṇḍalapadabyañjanā vācā assāti **kalyāṇavāco**. Tenāha “**sundaravacano**”ti. Kalyāṇaṃ madhuraṃ vākkaraṇaṃ udāhāraghoso assāti **kalyāṇavākkaraṇo**. Guṇaparipuṇṇabhāvena pūre puṇṇabhāve bhavāti porī, tāya **poriyā**. Tenāha “**guṇaparipuṇṇāyā**”ti. Pure bhavattā poriyā nāgarikitthiyā sukhumālattanena sadisāti porī, tāya **poriyā**. “Sukhumālattanena”ti iminā tassā vācāya mudusaṇṇabhāvo vutto. **Apalibuddhāyāti** pittasemhādīhi na paliveṭṭhitāya. **Adosāyāti** sandiddhivilambitādidosarahitāya. **Agalītapadamyāñjanāyāti** apatitapadabyañjanāya avirahitapadabyañjanāya. Ubhayametam anelagalāyāti imasseva atthavacanaṃ. **Anelagalāyāti** hi anelāya ceva agalāya cāti attho. **Attham viññāpetum samatthāyāti** ādimajjhapariyosānaṃ pākaṭam katvā bhāsitatthassa viññāpanasamatthāya. Aṭṭhamanavamadasamāni uttānatthāneva.

Khippanisantisuttādivaṇṇanā niṭṭhitā.

Asuravaggavaṇṇanā niṭṭhitā.

Dutiyapaṇṇāsako niṭṭhito.

3. Tatiyapaṇṇāsaka

(11) 1. Valāhakavagga

1-2. Valāhakasuttadvayaṇṇanā

101-2. Tatiyapaṇṇāsakassa paṭhame **gajjitā**ti thanitā. Tattha gajjitvā novassanabhāvo nāma pāpako. Manussā hi yadā devo gajjati, tadā “suvuṭṭhikā bhavissatī”ti bījāni nīharitvā vapanti. Atha deve avassante khette bījāni khetteyeva nassanti, gehe bījāni geheyeva nassantīti dubbhikkham hoti. Nogajjitvā vassanabhāvopi pāpako. Manussā hi imasmim kāle “dubbuṭṭhikā bhavissatī”ti ninnaṭṭhānesuyeva vappaṃ karonti. Atha devo vassitvā sabbabījāni mahāsamuddaṃ pāpeti, dubbhikkhameva hoti. Gajjitvā vassanabhāvo pana bhaddako. Tadā hi subhikkham hoti. Nogajjitvā novassanabhāvo ekantapāpakova. **Bhāsītā hoti no kattātī** “idāni ganthadhuraṃ pūressāmi, vāsadhuraṃ pūressāmi”ti kathetiyeva, na uddesaṃ gaṇhātī, na kammaṭṭhānaṃ bhāveti.

Kattā hoti no bhāsītātī “ganthadhuraṃ pūressāmi, vāsadhuraṃ vā”ti na bhāsati, sampatte pana kāle samattaṃ sampādeti. Iminā nayena itarepi vedītabbā. Atha vā sabbaṃ panetaṃ paccayadāyakeheva kathitaṃ. Eko hi “asukadivase nāma dānaṃ dassāmi”ti saṃghaṃ nimanteti, sampatte kāle no karoti. Ayaṃ puggalo puññaṃ parihāyati, bhikkhusaṃgho pana lābhena parihāyati. Aparo saṃghaṃ animantetvā sakkāraṃ katvā “bhikkhū ānessāmi”ti na labhi, sabbe aññattha nimantitā honti ayampi puññaṃ parihāyati, saṃghopi lābhena parihāyati. Aparo paṭhamaṃ saṃghaṃ nimantetvā pacchā sakkāraṃ katvā dānaṃ deti, ayaṃ kiccakārī hoti. Aparo neva saṃghaṃ nimanteti, na dānaṃ deti, ayaṃ pāpapuggaloti vedītabbo. Dutiyāṃ uttānameva.

Valāhakasuttadvayaṇṇanā niṭṭhitā.

3. Kumbhasuttavaṇṇanā

103. Tatiye **rittakoti** anto ritto. **Pihitamukhoti** pidahitvā ṭhapito. **Apārutamukhoti** vivaritvā ṭhapito, upamitapuggalesu panettha antogūṇasāravirahito ca **tuccho**, bāhiraśobhanatāya **pihito** puggaloti veditabbo. Sesesupi eśeva nayo.

Kumbhasuttavaṇṇanā niṭṭhitā.

4. Udakarahadasuttavaṇṇanā

104. Catutthe udakarahado jaṇṇukamattepi udake sati paṇṇarasasambhinnavaṇṇattā vā bahalattā vā udakassa apaññāyamānatalo **uttāno gambhīrobhāso** nāma hotīti āha “**purāṇapaṇṇarasa -pa-gambhīrobhāso nāmā**”ti. Tiporisacatuporise pana udake sati acchattā udakassa paññāyamānatalo **gambhīro uttānobhāso** nāma hotīti āha “**acchavippasannaṇiṇavaṇṇa-udako uttānobhāso nāmā**”ti. Ubhayakāraṇasambhavato pana itare dve veditabbā. Puggalepi kilesussadabhāvato guṇagambhīratāya ca abhāvato guṇagambhīrānaṃ sadisehi abhikkamanādīhi yutto **uttāno gambhīrobhāso** nāma. Iminā nayena sesā veditabbā.

Udakarahasuttavaṇṇanā niṭṭhitā.

5. Ambasuttādivaṇṇanā

105-106. Pañcame **āmakarṇ hutvāti** anto āmaṇ hutvā. **Pakkarṇ āmavaṇṇīti** anto pakkarṇ bahi āmasadisam. Tattha yathā ambe apakkabhāvo āmatā hoti, evaṃ puggalepi puthujjanatā. Yathā ca tattha pakkasadisatā pakkavaṇṇitā, evaṃ puggalepi ariyānaṃ abhikkamanādisadisatā pakkavaṇṇitāti iminā nayena sesā veditabbā. Chaṭṭhaṃ uttānameva.

Ambasuttādivaṇṇanā niṭṭhitā.

7. Mūsikasuttavaṇṇanā

107. Sattame **āvāṭam khaṇatī**ti attano āsayam bilakūpaṃ khaṇati. **Na ca tattha vasatī**ti tattha avasitvā kismiñcīdeva ṭhāne vasati, evaṃ biḷārādi-amittavasam gacchati. **Vasitā no gādham kattā**ti sayam na khaṇati, parena kate bile vasati, evaṃ jīvitam rakkhati. Tatiyā dvepi karontī jīvitam rakkhati. Catutthī dvepi akarontī amittavasam gacchati. Imāya pana upamāya upamitesu puggalesu paṭhamo yathā sā mūsikā gādham khaṇati, evaṃ navaṅgam satthusāsanaṃ uggaṇhāti. Yathā pana sā tattha na vasati, kismiñcīdeva ṭhāne vasantī amittavasam gacchati, tathā ayampi pariyaṭṭivasena nīṇaṃ pesetvā catusaccadhammaṃ na paṭivijjhati, lokāmisatṭhānesu vicaranto maccumārakilesamāradevaputtamārasaṅkhātānaṃ vasam gacchati. Dutiyo yathā mūsikā gādham na khaṇati, evaṃ navaṅgam satthusāsanaṃ na uggaṇhāti. Yathā pana parena khaṇite bile vasantī jīvitam rakkhati, evaṃ parassa katham sutvā catusaccadhammaṃ paṭivijjhitvā tiṇṇaṃ mārānaṃ vasam atikkamati. Iminā nayena tatiyacatutthesupi opammasaṃsandanaṃ veditabbam.

Mūsikasuttavaṇṇanā niṭṭhitā.

8. Balībaddasuttavaṇṇanā

108. Aṭṭhame balībaddo tāva yo attano gogaṇam ghaṭṭeti ubbejēti, paragone pana sūrato sukhasīlo hoti, ayaṃ **sagavacaṇḍo no paragavacaṇḍo** nāma. Puggalopi attano parisam ghaṭṭento vijjhanto pharuse samudācaranto, paraparīsāya pana soraccaṃ nivātavuttitaṃ āpajjanto **sagavacaṇḍo** nāmāti iminā nayena sesāpi veditabbā.

Balībaddasuttavaṇṇanā niṭṭhitā.

9. Rukkhasuttavaṇṇanā

109. Navame rukkho tāva **pheggu sārāparivāroti** vanajēṭṭhakarukkho sayam pheggu hoti, parivārarukkhaṃ panassa sārā honti. Iminā

nayena sesā veditabbā. Puggalesu pana silasāravirahitato pheggutā,
sīlacārasamannāgamena ca sārātā veditabbā.

Rukkhasuttavaṇṇanā niṭṭhitā.

10. Āsīvisasuttavaṇṇanā

110. Dasame yassa visam pajjalitatiṇukkāya aggi viya sīgham
abhiruhitvā akkhīni gahetvā khandham gahetvā sīsam gahetvā ṭhitanti
vattabbatam āpajjati maṇisappādīnam visam viya mantam pana parivattetvā
kaṇṇavātam datvā daṇḍakena pahaṭamatte otarivā datṭhaṭṭhāneyeva tiṭṭhati,
ayam **āgataviso na ghoraviso** nāma. Yassa pana visam saṇikam abhiruhati,
ārulhāruḷhaṭṭhāne pana āsitta-udakam viya hoti udakasappādīnam viya,
dvādasavassaccayenapi kaṇṇavidhakhandhapitṭhikādīsū paññāyati,
mantaparivattanādīsū ca kariyamānesu sīgham na otarati, ayam **ghoraviso
na āgataviso** nāma. Yassa pana visam sīgham abhiruhati, na sīgham otarati
aneḷakasappādīnam visam viya, ayam **āgataviso ca ghoraviso ca.**
Aneḷakasappo nāma mahā-āsīviso. Yassa visam mandam hoti,
ohāriyamānampi sukheveva otarati nīlasappadhamanisappādīnam visam
viya, ayam **neva āgataviso na ghoraviso.** **Nīlasappo** nāma sākhavaṇṇo
rukkhaggādīsū vicaraṇasappo.

Āsīvisasuttavaṇṇanā niṭṭhitā.

Valāhakavaggavaṇṇanā niṭṭhitā.

(12) 2. Kesivagga

1. Kesisuttādivaṇṇanā

111-117. Dutiyassa paṭhame **assadammeti** dammanayogge asse. **Sāretīti**
sikkhāpeti pavatteti. Sesamettha uttānameva. Dutiyādīni uttānatthāneva.

Kesisuttāsittādivaṇṇanā diṭṭhitā.

8. Saṁvejanīyasuttādivaṇṇanā

118-120. Aṭṭhame **saddhassā**ti buddhādīsu pasannacittassa vattasampannassa, yassa pāto vuṭṭhāya cetiyaṅgaṇavattādīni sabbavattāni katāneva paññāyanti. **Dassanīyā**ṇīti dassanārahāni. **Saṁvego** nāma sahotappamā ṇaṇam. Abhijātiṭṭhānādīnīpi tassa uppattihetūni bhavantīti sikkhāpento āha “**saṁvegajanakāni**”ti. **Ṭhānā**ṇīti kāraṇāni, padesaṭṭhānāni vā. Navamadasamāni suviññeyyāni.

Saṁvejanīyasuttādivaṇṇanā niṭṭhitā.

Kesivaggavaṇṇanā niṭṭhitā.

(13) 3. Bhayavagga

1. Attānuvādasuttavaṇṇanā

121. Tatiyassa paṭhame **attānam anuvadantassa uppajjanakabhayanti** attānam anuvadantassa pāpakammīno uppajjanakabhayam. **Dvattimsakammakāraṇe**¹ **paṭicca uppajjanakabhayanti** agārikānam vasena vuttam, anagārikānam pana vinayadaṇḍam paṭicca uppajjanakabhayampi daṇḍabhayanteva saṅkham gacchati. Sesam suviññeyyameva.

Attānuvādasuttavaṇṇanā niṭṭhitā.

2. Ūmibhayasuttavaṇṇanā

122. Dutiye **kodhūpāyāsassetam adhivacananti** ettha kujjhanatṭhena **kodho**, sveva cittassa kāyassa ca atippamaddanamathanuppādanēhi dalhāyāsattṭhena **upāyāso**. Anekavāram pavattitvā attanā samavetaṃ sattaṃ ajjhottharivā sīsam ukkhipitum adatvā ūmisadisatā daṭṭhabbā. Yathā hi bāhiraṃ udakam otiṇṇo ūmīsu osīditvā marati,

1. Dvattimsakammakāraṇā (Aṭṭhakathāyam)

evaṃ imasmiṃ sāsane kodhūpāyāse osīditvā vibbhamati, tasmā kodhūpāyāso “**ūmibhayan**”ti vutto. **Odarikattassetam̐ adhivacananti** yathā hi bāhiraṃ udakaṃ otiṇṇo kumbhīlena khādito marati, evaṃ imasmiṃ sāsane odarikattena odarikabhāvena āmisagedhena micchājīvena jīvikakappanena nāsitasīlādiguṇatāya khādītadhammasarīro vibbhamati, tasmā odarikattam̐ “**kumbhīlabhayan**”ti vuttam̐.

Anupaṭṭhitāya satiyāti kāyagataṃ satim̐ anuṭṭhāpetvā. **Asam̐ vutehīti** apihitehi. **Pañcennetaṃ kāmaguṇānam̐ adhivacananti** yathā hi bāhiraṃ udakaṃ otiṇṇo āvaṭṭe nimujjitvā marati, evaṃ imasmiṃ sāsane pabbajito pañcakāmaguṇāvaṭṭe nimujjitvā vibbhamati. Kāmarāgābhībhūto hi satto ito ca etto, etto ca itoti evaṃ manāpiyarūpādivisayasankhāte āvaṭṭe attānam̐ sāmsāretvā yathā tato bahibhūte nekkhamme cittampi na uppādeti, evaṃ āvaṭṭetvā byasanāpādanena kāmaguṇānam̐ āvaṭṭasadisatā daṭṭhabbā.

Anuddhamsetīti kilameti vilolati. **Rāgānuddham̐sitenāti** rāgena anuddham̐sitenā. **Mātugāmassetaṃ adhivacananti** yathā hi bāhiraṃ udakaṃ otiṇṇo caṇḍamacchaṃ āgamma laddhappahāro marati, evaṃ imasmiṃ sāsane mātugāmaṃ ārabha uppannakāmarāgo vibbhamati, tasmā mātugāmo “**susukābhayan**”ti vutto. Mātugāmo hi yonisomanasikārarahitaṃ adhīrapurisaṃ¹ itthikuttabhūtehi attano hāsabhāvavilāsehi abhibhuyya gahetvā dhīrajātikampi attano rūpādīhi sampalobhanavasena anavasesaṃ attano upakāradhamme sīlādike sampādetum̐ asamattham̐ karonto anayabyasanaṃ pāpeti.

Imāni pana cattāri bhayāni bhāyitvā yathā udakaṃ anorohantassa udakaṃ nissāya udakapipāsāvinayanaṃ sarīrasuddhipariḷāhūpasamo kāya-utuggāhāpananti evamādi ānisaṃso natthi, evamevaṃ imāni cattāri bhayāni bhāyitvā sāsane apabbajantassapi imaṃ sāsanaṃ nissāya saṅkhepato vaṭṭadukkhūpasamo, vitthārato pana sīlānisaṃsādivasena anekavidho ānisaṃso natthi. Yathā pana imāni cattāri bhayāni

1. Avīrapurisaṃ (Ka)

abhāyivā udakaṃ orohantassa vuttappakāro ānisaṃso hoti, evaṃ imāni abhāyivā sāsane pabbajantassapi vuttappakāro ānisaṃso hoti.

Mahādhammarakkhitatthero panāha “cattāri bhayāni bhāyivā udakaṃ anotaranto sotam chinditvā paratīraṃ pāpuṇitum na sakkoti, abhāyivā otaranto sakkoti, evamevaṃ bhāyivā sāsane apabbajantopi taṇhāsotaṃ chinditvā nibbānapāraṃ daṭṭhum na sakkoti, abhāyivā pabbajanto sakkotī”ti.

Ūmibhayasuttavaṇṇanā niṭṭhitā.

3. Paṭhamanānākaraṇasuttavaṇṇanā

123. Tatiye **brahmakāyikānaṃ devānanti** ettha brahmānaṃ kāyo samūhoti brahmakāyo, tappariyāpannatāya tattha gatāti **brahmakāyikā**. Etāya ca sabbassapi brahmakāyassa samaññāya bhavitabbaṃ. **Ābhassarānaṃ devānanti**-ādinā pana dutiyajjhānabhūmikādīnaṃ upari gahitattā gobalībaddaṇṇāyena tadavasitṭhānaṃ ayaṃ samaññā, tasmā “brahmakāyikānaṃ devānaṃ”ti paṭhamajjhānabhūmikānaṃyeva gahaṇaṃ veditabbaṃ. Saha byayati gacchatīti saha byo, sahavattanako. Tassa bhāvo **sahabyatā**, sahapavattīti āha “**sahabhāvaṃ upagacchatī**”ti. **Kappo āyuppamāṇanti** ettha yadipi brahmapārisajjādīnaṃ āyuno antaraṃ atthi, ukkaṭṭhaparicchedena panetaṃ vuttanti dassento “**paṭhamajjhānaṃ atthi hīnaṃ**”ti-ādimāha.

Dve kappā āyuppamāṇanti ettha pana hīnajjhānena nibbattānaṃ vasena ayaṃ paricchedo katoti dassetuṃ “**dutiyajjhānaṃ vuttanayeneva tividhaṃ hotī**”ti-ādi āradhāṃ. **Cattāro kappāti** ettha pana ukkaṭṭhaparicchedena catusaṭṭhi kappā vattabbāti dassento “**yaṃ heṭṭhā vuttaṃ ‘kappo dve kappā’ti, tampi āharitvā attho veditabbo**”ti āha. Kathaṃ panettha ayamattho labbhatīti āha “**kappoti ca guṇassapi nāmaṃ**”ti. Tattha **paṭhamānaṃ vutto kappo**, tato ekena guṇena, ekasmiṃ vāre gaṇanāyāti attho. **Dve kappā hontīti** ekavāragāṇanāya kappassa dviguṇitattā dve mahākappo hontīti attho. **Dutiyenāti** dutiyavāragāṇanāya. **Cattāro**ti dutiyavāragāṇanāya dvīsu kappesu

dviguṇitesu cattāro mahākappo hontīti attho. **Puna te cattāro kappā** vuttanayena dve vāre guṇetvā ye cattāro kappā dassitā, puna te cattāro kappā catugguṇā hontīti attho. Idam vuttam hoti—dve vāre guṇetvā ye cattāro kappā dassitā, tesu catukkhattum guṇitesu catusaṭṭhi kappā sampajjantīti. Tathā hi cattāro ekasmim vāre guṇitā aṭṭha honti, puna te aṭṭha dutiyavāre guṇitā soḷasa honti, puna te soḷasa tatiyavāre guṇitā dvattiṃsa honti, puna te dvattiṃsa catutthavāre guṇitā catusaṭṭhi honti. Tenevāha “**imehi catūhi guṇehi guṇitā ekena guṇena aṭṭha hontī**”ti-ādi. Ettha ca heṭṭhā **uposathasutte**¹—

“Yāni mānusakāni paññāsa vassāni, cātumahārājikānaṃ devānaṃ eso eko rattindivo”ti—

ādinā kāmāvacaradevānameva āyuppamāṇaṃ dassitaṃ. Heṭṭhāyeva—

“Tayome bhikkhave puggalā santo samvijjamaṇā lokasmim. Katame yato? Idha bhikkhave ekacco puggalo sabbaso rūpasaññānaṃ samatikkamā -pa- ākāsānañcāyatanūpagānaṃ devānaṃ saḥabyataṃ upapajjati. Ākāsānañcāyatanūpagānaṃ bhikkhave devānaṃ vīsati kappasahassāni āyuppamāṇaṃ”ti²—

ādinā arūpāvacarānaṃyeva āyuppamāṇaṃ vuttam. Idha pana rūpāvacarānameva āyuppamāṇaṃ dassitaṃ. **Vibhaṅgapāḷiyam**³ pana “manussānaṃ kittakam āyuppamāṇaṃ, vassasataṃ appaṃ vā bhiiyo”ti-ādinā devamanussānañceva rūpārūpāvacarasattānañca āyuppamāṇaṃ dassitaṃ.

Tattha sammāsambuddhena manussānaṃ devānañca āyūṃ paricchindamānena catūsu apāyesu bhummadevesu ca āyū na paricchinnaṃ, taṃ kasmāti? Niraye tāva kammameva pamāṇaṃ. Yāva kammaṃ khīyati, tāva paccanti. Tathā sesa-apāyesu. Bhummadevānampi kammameva pamāṇaṃ. Tattha nibbattā hi keci sattāhamattaṃ tiṭṭhanti, keci aḍḍhamāsaṃ, kappam tiṭṭhamānāpi atthiyeva. Tattha manussesu gihibhāve ṭhitāyeva sotāpannāpi honti, sakadāgāmi phalaṃ anāgāmiphalaṃ arahattampi pāpuṇanti, tesu sotāpannādayo

1. Am 1. 213 piṭṭhe.

2. Am 1. 270 piṭṭhe.

3. Abhi 2. 437 piṭṭhe.

yāvajīvaṃ tiṭṭhanti, khīṇāsavā pana parinibbāyanti vā pabbajanti vā. Kasmā? Arahattaṃ nāma seṭṭhaguṇaṃ, gihilingaṃ hīnaṃ, ta hīnatāya uttamaṃ guṇaṃ dhāretuṃ na sakkoti, tasmā te parinibbātukāmā vā honti pabbajitukāmā vā. Bhummadevā pana arahattaṃ pattāpi yāvajīvaṃ tiṭṭhanti, chasu kāmāvacaresu devesu sotāpannasakadāgāmino yāvajīvaṃ tiṭṭhanti, anāgāminā rūpabhavaṃ gantuṃ vaṭṭati khīṇāsavena parinibbātuṃ. Kasmā? Nilīyanokāsassa abhāvā. Rūpāvacarārūpavacaresu sabbepi yāvajīvaṃ tiṭṭhanti, tattha rūpāvacare nibbattā sotāpannasakadāgāmino na puna idhāgacchanti, tattheva parinibbāyanti. Ete hi jhāna-anāgāmino nāma.

Aṭṭhasamāpattilābhīnaṃ pana kiṃ niyameti? Paṇaṇṇajjhānaṃ. Yadevassa paṇaṇṇaṃ hoti, tena upapajjati. Sabbesu paṇaṇṇesu kiṃ niyameti? Nevasaññānāsaññāyatanaśamāpatti. Ekamseneva hi so nevasaññānāsaññāyatane upapajjati. Navasu brahmalokesu nibbatta-ariyasāvakaṇaṃ tatrūpapattipi uparūpapattipi, na heṭṭhūpapatti. Puthujjanānaṃ pana tatrūpapattipi hoti uparūpapattipi heṭṭhūpapattipi. Pañcasu suddhāvāsesu catūsu ca arūpesu ariyasāvakaṇaṃ tatrūpapattipi hoti uparūpapattipi. Paṭhamajjhānabhūmiyaṃ nibbatta anāgāmī nava brahmaloke sodhetvā matthake ṭhito parinibbāti. Vehapphalaṃ, akaniṭṭhaṃ, nevasaññānāsaññāyatanaṃ ime tayo devalokā seṭṭhabhava nāma. Imesu tīsu ṭhānesu nibbatta anāgāmino neva uddhaṃ gacchanti, na adho, tattha tattheva parinibbāyanti idaṃ pakīṇakaṃ veditaṃ.

Paṭhamanānākaṇasuttavaṇṇanā niṭṭhitā.

4. Dutīyanānākaṇasuttādivaṇṇanā

124-6. Catutthe **te dhammeti** te “rūpagatan”ti-ādinā nayena vutte rūpādayo dhamme. **Aniccatoti** iminā niccappaṭikkhepato tesam aniccatamāha, tato eva ca udayavayavantato vipariṇāmato tāvakālikato ca te aniccāti jotitaṃ hoti. Yaṃ hi nibbattaṃ hoti, taṃ udayavayaparicchinā. Jarāya maraṇena ca tadeva viparītaṃ, ittharakkhaṇameva ca hotīti. **Dukkhatoti** iminā sukhappaṭikkhepato

tesaṃ dukkhatamāha, tato eva ca abhiṅhappaṭipīḷanato dukkhavatthuto ca te dukkhāti jotitaṃ hoti. Udayavayavantatāya hi te abhiṅhappaṭipīḷanato nirantaradukkhātāya dukkhasseva ca adhiṭṭhānabhūtā. Paccayayāpanīyatāya rogamūlatāya ca **rogato**. Dukkhatāsūlayogato kilesāsucipaggharaṇato uppādasarābhaṅgehi uddhumātaparipakkapabhinnato ca **gaṇḍato**. Piḷājananato antotudanato dunnīharaṇato ca **sallato**. Avaḍḍhi-āvahanato aghavatthuto ca **bhaghato**. Aseribhāvajanato ābādhapadaṭṭhānatāya ca **ābādhato**. Avasavattanato avidheyyatāya ca **parato**. Byādhijarāmarañehi palujjanīyatāya **palokato**. Sāminivāsikārakavedaka-adhiṭṭhāyakavirahato **suññato**. Attappaṭikkhepaṭṭhena **anattato**. Rūpādidhammā hi na ettha attā atthīti **anattā**. Evaṃ sayampi attā na hontīti **anattā**. Tena abyāpārato nirīhato tucchato anattāti dīpitaṃ hoti. Lakkhaṇattayameva sukhāvabodhanatthaṃ ekādasahi padehi vibhajitvā gahitanti dassetuṃ “**tatthā**”ti-ādi vuttaṃ. Pañcamachaṭṭhāni uttānatthāneva.

Dutiyanānārakaraṇasuttādivaṇṇanā niṭṭhitā.

7. Paṭhamatathāgata-acchariyasuttavaṇṇanā

127. Sattame vattamānasamīpe vattamāne viya voharitabbanti “**okkamati**”ti āha “**okkanto hotīti attho**”ti. Dasasahassacakkavaḷapattharaṇo samujjalabhāvena **ulāro**. **Devānubhāvanti** devānaṃ pabhānubhāvaṃ. Devānaṃ hi pabhaṃ so obhāso adhibhavati, na deve. Tenāha “**devānan**”ti-ādi. Rukkhaḡacchādīnā kenaci na haññatīti **aghā**, asambādā. Tenāha “**niccavivarā**”ti. **Asaṃvutāti** heṭṭhā upari kenaci apihitā. Tenāha “**heṭṭhāpi appatiṭṭhā**”ti. Tattha **pi**-saddena yathā heṭṭhā udakassa pidhāyikā sandhārikā pathavī natthi asaṃvutā lokantarikā, evaṃ uparipi cakkavāḷesu devavimānānaṃ abhāvato asaṃvutā appatiṭṭhāti dasseti. Andhakāro ettha atthīti **andhakārā**. **Cakkhuviññānaṃ na jāyati** ālokassa abhāvato, na cakkhuno. Tathā hi

“**tenobhāseṇa aññamaññaṃ sañjānanti**”ti vuttaṃ. Jambudīpe
 ÷hitamajjhanhikavelāya pubbavidehavāsīnaṃ atthaṅgamavasena upaḍḍhaṃ
 sūriyamaṇḍalaṃ paññāyati, Aparagoyānavāsīnaṃ uggamanavasena. Evaṃ
 sesadīpesupīti āha “**ekappahāreṇeva tīsu dīpesu paññāyanti**”ti. Ito aññathā
 dvīsu eva dīpesu paññāyanti. Ekekāya disāya navanavayojanasatasahasāni
 andhakāravidhamanampi imināva nayena daṭṭhabbaṃ. **Pabhāya nappahontīti**
 attano pabhāya obhāsituṃ nātisambhuṅgati.

Yugandharapabbatamatthakasaṃmappamāṇe ākāse vicaraṇato
 “**cakkavāḷapabbatassa vemajjhena caranti**”ti vuttaṃ.

Byāvaṭṭati khādanatthaṃ gaṇhituṃ upakkamantā. **Viparivattitvāti**
 vivaṭṭitvā. **Chijjivvāti** mucchāpavattiyā ÷hitaṭṭhānato muccitvā,
 aṅgapaccaṅgachedanavasena vā **chijjivvā**. **Accantakhāreti**
 ātapasantaḷpābhāvena atisītabhāvaṃ sandhāya accantakhāratā vuttā siyā. Na
 hi taṃ kappasaṅghāna-udakaṃ sampattikaramahāmeghavuṭṭhaṃ
 pathavisandhāraḷakam kappavināsaka-udakaṃ viya khāraṃ bhavitumarahati,
 tathā sati pathavīpi vilīyeyya, tesam vā pāpakammaphalena petānaṃ pakati-
 udakassa pubbakheḷabhāvāpatti viya tassa udakassa khārabhāvāpatti hotīti
 vuttaṃ “**accantakhāre udake**”ti.

Paṭhamatathāgata-acchariyasuttavaṅṅanaṃ niṭṭhitā.

8. Dutiyatathāgata-acchariyasuttavaṅṅanaṃ

128. Aṭṭhame ālīyanti āramitabbaṭṭhena sevīyantīti ālayā, pañca
 kāmagaṇā. **Āramantīti** ratiṃ vindanti kīḷanti laḷanti. Ālīyanti vā allīyantā
 abhiramaṇavasena sevantīti ālayā, taṅhāvicarītāni. Tehi ālayehi ramantīti
ālayārāmā. Yatheva hi susajjitaṃ pupphaphalabharitarukkhādisampanna-
 uyyānaṃ pavīṭṭho rājā tāya sampattiyā ramati, sammudito
 āmoditappamodito hoti, na ukkaṅṅheti, sāyampi nikkhamituṃ na icchati,
 evamimehi kāmālayataṅhālayehi sattā ramanti, saṃsāraḷaṭṭe pamuditā
 anukkaṅṅhitā vasanti. Tena tesam bhagavā duvidhampi ālayaṃ
 uyyānabhūmiṃ viya dassento “**ālayārāmā**”ti-ādimāha. Sesamettha
 uttānameva.

Dutiyatathāgata-acchariyasuttavaṅṅanaṃ niṭṭhitā.

9. Ānanda-acchariyasuttādivaṇṇanā

129-130. Navame **paṭisanthāradhammanti** pakaticārittavasena vuttaṃ, upagatānaṃ pana bhikkhūnaṃ bhikkhunīnaṃca pucchāvissajjanavasena ceva cittarucivasena ca yathākālaṃ dhammaṃ desetiyeva, upāsaka-upāsikānaṃ pana upanisinnakakathāvasena. Dasamaṃ uttānameva.

Ānanda-acchariyasuttādivaṇṇanā niṭṭhitā.

Bhayavaggavaṇṇanā niṭṭhitā.

(14) 4. Puggalavagga

1. Saṃyojanasuttavaṇṇanā

131. Catutthassa paṭhame upapattippaṭilātaṃ saṃvattanikānīti **upapattippaṭilābhiyāni**. **Bhavapaṭilā bhiyānīti** etthāpi eseva nayo. **Yehīti** yehi saṃyojanehi hetubhūtehi, karaṇabhūtehi vā. Nanu ca sotāpannassapi orambhāgiyāni saṃyojanāni appahīnāni, kasmā pana sakadāgāmīyeva idha gahitoti āha “**sakadāgāmissāti idaṃ appahīnasamyojanesu ariyesu uttamakoṭiyā gahitan**”ti. Tattha **appahīnasamyojanesu**ti appahīna-orambhāgiyasamyojanesu. **Uttamakoṭiyā gahitanti** ukkaṭṭhaparicchedena gahitaṃ. Sakadāgāmito paraṃ hi appahīna-orambhāgiyasamyojano ariyo nāma natthi. Nanu ca sakadāgāmissa pahīnānīpi orambhāgiyāni saṃyojanāni atthi diṭṭhivicikicchāsīlabbataparāmāsasamyojanānaṃ pahīnattā, tasmā “orambhāgiyāni saṃyojanāni appahīnānī”ti kasmā vuttanti āha “**orambhāgiyesu ca appahīnaṃ upādāyā**”ti-ādi. Yasmā kāmārāgabyāpādasamyojanāni sakadāgāmissa appahīnāni, tasmā tāni appahīnāni upādāya “**orambhāgiyāni saṃyojanāni appahīnānī**”ti vuttaṃ, na sabbesaṃ appahīnattāti adhippāto.

Saṃyojanasuttavaṇṇanā niṭṭhitā.

2. Paṭibhānasuttavaṇṇanā

132. Dutiye paṭibhānaṃ vuccati nāṇampi nāṇassa upaṭṭhitavacanampi, taṃ idha adhippetam, atthayuttam kāraṇayuttañca paṭibhānamassāti **yuttappaṭibhāno**. Pucchānantarameva sīgham byākātum asamatthāya nomuttappaṭibhānamassāti **nomuttappaṭibhāno**. Iminā nayena sesā veditabbā. Ettha pana paṭhamo kañci kālam vīmaṃsitvā yuttameva pekkhati **tipiṭakacūlanāgatthero** viya. So pana pañham puṭṭho pariggahetvā yuttappattakāraṇameva katheti. Dutiyo pucchānantarameva yena vā tena vā vacanena paṭibāhati, vīmaṃsitvāpi ca yuttam na pakkheti **catunikāyikaṇḍatissatthero** viya. So pana pañham puṭṭho pañhapariyosānampi nāgameti, yaṃ vā taṃ vā kathetiyeva, vacanattham panassa vīmaṃsiyamānaṃ katthaci na lagati. Tatiyo pucchāsamakālemeva yuttam pekkhati, taṃkhaṇāmyeva ca naṃ byākaroti **tipiṭakavūlābhayatthero** viya. So pana pañham puṭṭho sīghameva katheti, yuttappattakāraṇo ca hoti. Catuttho puṭṭho samāno neva yuttam pekkhati, na yena vā tena vā paṭibāhitum sakkoti, tibbandakāranimuggo viya hoti **lāḷudāyitthero** viya.

Paṭibhānasuttavaṇṇanā niṭṭhitā.

3. Ugghaṭitaññūsuttādivaṇṇanā

133-4. Tatiye **ugghaṭitaññūti** ettha ugghaṭanaṃ nāma nāṇugghaṭanaṃ, nāṇena ugghaṭitamatteyeva jānāti attho. **Saha udāhaṭavelāyāti** udāhāre udāhaṭamattēyeva. **Dhammābhisamayo hotīti** catusaccadhammassa nāṇena saddhim abhisamayo. **Ayam vuccatīti** ayam “cattāro satipaṭṭhānā”ti-ādinā¹ nayena saṃkhittena mātikāya ṭhapiyamānāya desanānusārena nāṇam pesetvā arahattaṃ gaṇhitum samattho puggalo “ugghaṭitaññū”ti vuccati. Vipañcitam vitthāritameva attham jānāti **vipañcitaññū**. **Ayam vuccatīti** ayam saṃkhittena mātikam ṭhapetvā vitthārena atthe bhājiyamāne arahattaṃ pāpuṇitum samattho puggalo “vipañjitaññū”ti

1. Abhi 2. 201 piṭṭhe.

vuccati. Uddesādīhi netabboti **neyyo**. **Anupubbena dhammābhisamayoti** anukkamena arahattappatti. Byañjanapadameva paramaṃ assāti **padaparamo**. **Na tāya jātiyā dhammābhisamayo hotīti** tena attabhāvena jhānaṃ vā vipassanaṃ vā maggaṃ vā phalaṃ vā nibbattetuṃ na sakkotīti attho. Catutthaṃ uttānameva.

Ugghaṭitaññūsuttādivaṇṇanā niṭṭhitā.

5. Sāvajjasuttādivaṇṇanā

135-8. Pañcame **sāvajjoti** sadoso. **Sāvajjena kāyakadhammanāti** sadosena pāṇātipātādinā kāyakammaena. Itaresupī eseva nayo. **Ayaṃ vuccatīti** ayaṃ puggalo tīhi dvārehi āyūhanakammassa sadosattā gūthakuṇapādibharito padeso viya “sāvajjo”ti vuccati. **Sāvajjena bahulanti** yassa sāvajjameva kāyakammaṃ bahulaṃ hoti, appaṃ anavajjaṃ, so “sāvajjena bahulaṃ kāyakammaena samannāgato appaṃ anavajjena”ti vuccati. Itaresupī eseva nayo, ko pana evarūpo hotīti? Yo gāmadhammatāya vā nigamadhammatāya vā kadāci karahaci uposathaṃ samādiyati, sīlāni pūreti. **Ayaṃ vuccatīti** ayaṃ puggalo tīhi dvārehi āyūhanakammesu sāvajjasseva bahulatāya anavajjassa appatāya “vajjabahulo”ti vuccati. Yathā hi ekasmiṃ padese dubbaṇṇāni duggandhāni pupphāni rāsikatānassu, tesāṃ upari tahaṃ tahaṃ adhimuttikavassikapāṭalāni¹ patitāni bhaveyyuṃ, evarūpo ayaṃ puggalo vedītabbo. Yathā pana ekasmiṃ padese adhimuttikavassikapāṭalāni rāsikatānassu, tesāṃ upari tahaṃ tahaṃ duggandhāni varapupphādīni patitāni bhaveyyuṃ. Evarūpo tatiyo puggalo vedītabbo. Catuttho pana tīhi dvārehi āyūhanakammassa niddosattā ca catumadhurabharitasuvaṇṇapāti viya daṭṭhabbo. Chaṭṭhādīni uttānatthāneva.

Sāvajjasuttādivaṇṇanā niṭṭhitā.

1. Atimuttikavassikapāṭalāni (Abhi-Ṭṭha 3. 73 piṭṭhe)

9. Dhammakathikasuttādivaṇṇanā

139-140. Navame **appañca bhāsatī**ti sampattaparisāya thokameva katheti. **Asahitañcāti**¹ kathento ca pana na atthayuttaṃ kālayuttaṃ katheti. **Parisā cassa na kusalā hotīti** sotuṃ nisinnaparisā cassa yuttāyuttaṃ kāraṇākāraṇaṃ siliṭṭhāsiliṭṭhaṃ na jānātīti attho. **Evarūpoti** ayaṃ evaṃ jātikō bāladhammakathiko evaṃjātikāya bālaparisāya dhammakathikotveva nāmaṃ labhati. Iminā nayena sabbattha attho veditabbo. Ettha ca dveveva janā sabhāvadhammakathikā, na itare. Itare pana dhammakathikānaṃ anto pavitṭhattā evaṃ vuttā. Dasamaṃ uttānameva.

Dhammakathikasuttādivaṇṇanā niṭṭhitā.

Puggalavaggavaṇṇanā niṭṭhitā.

(15) 5. Ābhāvagga

1. Ābhāsuttādivaṇṇanā

141-146. Pañcamassa paṭhamādīni uttānatthāneva.

Ābhāsuttādivaṇṇanā niṭṭhitā.

7. Dutiyakālasuttādivaṇṇanā

147-150. Sattame paramatthato avijjamānasabhāvassa kālassa bhāvanādiyogo na sambhavatīti āha “**kālāti tasmim tasmim kāle dhammassavanādivasena pavattānaṃ kusaladhammānaṃ etaṃ adhivacanan**”ti. Kālasahacaritā hi kusalā dhammā idha kāla-saddena gahitā aparassa asambhavato. Aṭṭhamādīni uttānatthāneva.

Dutiyakālasuttādivaṇṇanā niṭṭhitā.

Ābhovaggaṇṇanā niṭṭhitā.

Tatiyavaṇṇāsako niṭṭhito.

1. Asahitaṃ vāti (Ka)

4. Catutthapaṇṇāsaka

(16) 1. Indriyavagga

1. Indriyasuttādivaṇṇanā

151-155. Catutthassa paṭhamādīni uttānāneva.

Indriyasuttādivaṇṇanā niṭṭhitā.

6. Kappasuttādivaṇṇanā

156-158. Chaṭṭhe saṁvaṭṭanaṃ vinassanaṃ **saṁvaṭṭo**, saṁvaṭṭato uddham tathā ṭhāyī **saṁvaṭṭaṭṭhāyī**. Vavaṭṭanaṃ nibbattanaṃ, vaḍḍhanaṃ vā **vivaṭṭo**. “Tejosaṁvaṭṭo āposamaṁvaṭṭo, vāyosaṁvaṭṭoti evaṃ saṁvaṭṭasīmānukkamena saṁvaṭṭesu vattabbesu tathā avatvā āposamaṁvaṭṭo, tejosāvaṭṭo, vāyosaṁvaṭṭoti vacanaṃ saṁvaṭṭamahābhūtaḍḍesaṇānupubbīyā”¹ti keci. “Bhāvīsaṁvaṭṭānupubbīyā”²ti apare. Āpena saṁvaṭṭo **āposamaṁvaṭṭo**. **Saṁvaṭṭasīmā**ti saṁvaṭṭanamariyādā. **Saṁvaṭṭatī**ti vinassati. **Sadā**ti sabbakālaṃ tīsupi saṁvaṭṭakālesūti attho. **Ekam buddhakkhettaṃ vinassatī**ti ettha buddhakkhettaṃ nāma tividhaṃ hoti jātikkhettaṃ, āṇākkhettaṃ, visayakkhettaṃ. Tattha **jātikkhettaṃ** dasasahassacakkavāḷapariyantam hoti, tathāgataṃ paṭisandhiggahaṇādīsu kampaṭi. **Āṇākkhettaṃ** koṭisatasahassacakkavāḷapariyantam, yattha **ratanasuttaṃ**¹ **khandhaparittam**² **dhajaggaparittam**³ **āṇāṇīyaparittam**⁴ **moraparittanti**⁵ imesaṃ parittānaṃ ānubhāvo vattati. **Visayakkhettaṃ** anantāparimāṇam, yaṃ “yāvata vā panākaṅkheyyā”⁶ti vuttaṃ. Tattha yaṃ yaṃ tathāgato ākaṅkhati, taṃ taṃ jānāti. Evametesu tīsu buddhakkhettesu ekam āṇākkhettaṃ vinassati, tasmim pana vinassante jātikkhettaṃ vanaṭṭhameva hoti, vinassantaṅca ekatova vinassati,

1. Khu 1. 4, 312 piṭṭhesu.

3. Saṃ 1. 220 piṭṭhe.

5. Khu 5. 38 piṭṭhe Jātake.

2. Am 1. 384; Vi 4. 245; Khu 5. 53 piṭṭhesu.

4. Dī 3. 159 piṭṭhe.

6. Am 1. 229 piṭṭhe.

saṅṭhahantañca ekatova saṅṭhahati. Sesamettha **visuddhimaggasaṃvaṇṇanāsu**¹ vuttanayeneva gahetabbaṃ. Satamaṭṭhamāni uttānatthāneva.

Kappasuttādivaṇṇanā niṭṭhitā.

9. Bhikkhunīsuttavaṇṇanā

159. Navame **evaṃ pavattaṃ paccuppannataṇhaṃ nissāyāti** “kudāssu nāmāhampi āsavānaṃ khayā”ti-ādinā nayena anuttare vimokkhe pihaṃ uppādentassa uppannataṇhaṃ nissāya. Kathaṃ pana lokuttaradhamme ārabba āsā uppajjati? Na kho panetaṃ evaṃ daṭṭhabbaṃ, na ārammaṇakaraṇavasena tattha piha pavattati avisayattā puggalassa ca anadhigatabhāvato. Anussavūpaladdhe pana anuttaravimokkhe uddissa pihaṃ uppādentō tattha pihaṃ uppādehi nāma. **Nākaḍḍhatī** kammaṭṭhābhāvaṃ appattatāya paṭisandhiṃ na deti. Sesam suviññeyyameva.

Bhikkhunīsuttavaṇṇanā niṭṭhitā.

10. Sugatavinayasuttavaṇṇanā

160. Dasame **valaṅjenti**ti sajjhāyanti ceva vācuggataṃ karontā dhārenti ca. Avigatataṇhatāya taṃ taṃ parikkhārajātaṃ bahumpi ādiyanti bahuḷā, te eva **bāhulikā** yathā “venayiko”ti². Te pana yasmā paccayabahulabhāvāya yuttappayuttā nāma honti, tasmā āha “**paccayabāhullāya paṭipannā**”ti. Sithilaṃ gaṇhanti **sāthalikā**, sikkhāya ādaragāravābhāvena sithilaṃ adalhaṃ gaṇhanti attho. **Sithilanti** ca bhāvanapumsakaniddeso, sithila-saddena vā samānatthassa sāthalasaddassa vasena **sāthalikā**ti padasiddhi veditabbā. **Avagamanatoti** adhogamanato, orambhāgiyabhāvatoti attho. **Nibbīriyāti** ujjhitussāhā tadadhigamāya ārambhampi akurumānā.

Sugatavinayasuttavaṇṇanā niṭṭhitā.

Indriyavaggavaṇṇanā niṭṭhitā.

1. Visuddhi-Ṭī 2. 50 piṭṭhe.

2. Ma 1. 193; Am 3. 20; Vi 1. 3 piṭṭhesu.

(17) 2. Paṭipadāvagga

1. Saṁkhittasuttavaṇṇanā

161. Dutiyassa paṭhame **dukkhāpaṭipadā dandhābhiññā**ti-ādīsu pāḷiyā āgatanayena attho vedītabbo. Tathā hi—

“Tattha katamā dukkhapaṭipadā dandhābhiññā paññā? Kicchena kasirena samādhim uppādentassa dandham taṁ ṭhānam abhijānantassa yā uppajjati paññā pajānanā -pa- amoho dhammavicayo sammādiṭṭhi, ayaṁ vuccati dukkhapaṭipadā dandhābhiññā paññā. Tattha katamā dukkhapaṭipadā khippābhiññā paññā? Kicchena kasirena samādhim uppādentassa khippam taṁ ṭhānam abhijānantassa yā uppajjati paññā pajānanā -pa- sammādiṭṭhi, ayaṁ vuccati dukkhapaṭipadā khippābhiññā paññā. Tattha katamā sukhapaṭipadā dandhābhiññā paññā? Akicchena akasirena samādhim uppādentassa dandham taṁ ṭhānam abhijānantassa yā uppajjati paññā pajānanā -pa- sammādiṭṭhi, ayaṁ vuccati sukhapaṭipadā dandhābhiññā paññā. Tattha katamā sukhapaṭipadā khippābhiññā paññā? Akicchena akasirena samādhim uppādentassa khippam taṁ ṭhānam abhijānantassa yā uppajjati paññā pajānanā -pa- sammādiṭṭhi, ayaṁ vuccati sukhapaṭipadā khippābhiññā paññā”¹—
ayamettha pāḷi.

Tattha **kicchena kasirena samādhim uppādentassā**ti pubbhāge āgamanakāle kicchena kasirena dukkhena sasaṅkhārena sappayogena kilese vikkhambhetvā lokuttarasamādhim uppādentassa. **Dandham taṁ ṭhānam abhijānantassā**ti vikkhambhitesu kilesesu vipassanāparivāse ciraṁ vasitvā taṁ lokuttarasamādhisaṅkhātāṁ ṭhānam dandham saṅikam abhijānantassa paṭivijjhantassa, pāpuṇantassāti attho. **Ayaṁ vuccatī**ti yā esā evaṁ uppajjati, ayaṁ kilesavikkhambhanappaṭipadāya dukkhattā, vipassanāparivāsapaññāya ca dandhattā maggakāle ekacittakkhaṇe uppannāpi paññā āgamanavasena

1. Abhi 2. 344 piṭṭhe.

“**dukkhapaṭipadā dandhābhiññā nāmā**”ti vuccati. Upari tīsu padesupi iminā nayena attho veditabbo.

Samkhittasuttavaṇṇanā niṭṭhitā.

2. Vitthārasuttavaṇṇanā

162. Dutiye **akatābhinivesoti** akatādhikāro. Rūpānam lakkhaṇādīhi paricchinditvā gahaṇam **rūpapariggaho**. Tīsu **addhāsu kilamatīti** pubbante aparante pubbantāparanteti evam tīsu padesesu kilemati. **Pañcasu ñāṇesūti** rūpapariggahādīsu pañcasu ñāṇesu. **Navasu vipassanāñāṇesūti** udayabbayādinavavipassanāñāṇesu. Sesamettha uttānameva.

Vitthārasuttavaṇṇanā niṭṭhitā.

3. Asubhasuttavaṇṇanā

163. Tatiye “**yathā etaṃ, tathā idan**”ti iminā **nayenāti** etena—

“Yathā idaṃ tathā etaṃ, yathā etaṃ tathā idaṃ.

Ajjhattaṅca bahiddhā ca, kāye chandaṃ virājaye”ti¹—

imaṃ desanāyamaṃ saṅgaṇhāti. Tassattho—yathā idaṃ saviññāṇakāsubhaṃ āyu-usmāviññāṇānam anapagamā carati tiṭṭhati nisīdati sayati, tathā etaṃ etarahi susāne sayitaṃ aviññāṇakampi pubbe tesam dhammānam anapagamā ahosi. Yathā ca etaṃ etarahi matasarīram tesam dhammānam apagamā na carati na tiṭṭhati na nisīdati na seyyam kappeti, tathā idaṃ saviññāṇakampi tesam dhammānam apagamā bhavissati. Yathā ca idaṃ saviññāṇakam netarahi susāne mataṃ seti na uddhumātakādibhāvamupagataṃ, tathā etaṃ etarahi matasarīrampi pubbe ahosi. Yathā

1. Khu 1. 308 piṭṭhe Suttanipāte.

panetaṃ etarahi aviññāṇakāsutaṃ matakasusāne seti
uddhumātakādibhāvaṅca upagataṃ, tathā idaṃ saviññāṇakampi bhavissatīti.
Tattha **yathā idaṃ tathā etanti** attanā matasarīrassa samānabhāvaṃ karonto
bāhire dosaṃ pajahati. **Yathā etaṃ tathā idanti** matasarīrena attano
samānabhāvaṃ karonto ajjhattike rāgaṃ pajahati. Yenākārena ubhayaṃ
samaṃ karoti, taṃ sampajānanto ubhayattha moham pajahati.

Bahiddhā diṭṭhānanti bahiddhā susānādīsu diṭṭhānaṃ
uddhumātakādidasannaṃ asubhānaṃ. “**Navannaṃ paṭikulyānaṃ vasaṇā**”ti
kasmā vuttaṃ, nanu antimajīvikābhāvato piṇḍapātassa alābhālābhesu
paritassanagedhādisamuppattito bhattassa sammadajananato
kimikulasamvaddhanatoti evamādīhipi ākārehi āhārepaṭikūlatā
paccavekkhitabbā. Vuttaṃ hetam “antamidaṃ bhikkhave jīvikānaṃ yadidaṃ
piṇḍolyaṃ atipāpoyaṃ lokasmim yadidaṃ piṇḍolyo vicarati pattapāṇīti¹.
Aladdhā ca piṇḍapātaṃ paritassati, laddhā ca piṇḍapātaṃ gadhito mucchito
ajjhopanno anādīnavadassāvī anissaraṇapaṇṇo paribhuñjatīti². Bhutto ca
āhāro kassaci kadāci maraṇaṃ vā maraṇamattaṃ vā dukkhaṃ āvahatī”ti.

Kaṭukīṭakādayo³ dvattimsakulappabhedā kimiyo naṃ upanissāya
jīvantīti? Vuccate—antimajīvikābhāvo tāva cittasamkilesavisodhanattham
kammaṭṭhānābhinivesanato pageva manasi kātabbo “māhaṃ chavālātasadiso
bhaveyyan”ti. Tathā piṇḍapātassa alābhālābhesu
paritassanagedhādisamuppattinivāraṇaṃ pageva anuṭṭhātabbaṃ
suparisuddhasīlassa paṭisaṅkhānavato tadabhāvato. Bhattasammado
ane kantito paribhoge antogadhovāti veditabbo. Kimikulasamvaddhanaṃ
pana saṅghetabbaṃ, saṅghatameva vā “navannaṃ paṭikulyānaṃ vasaṇā”ti
ettha niyamassa akatattā. Iminā vā nayena itaresampettha saṅgho daṭṭhabbo
yathāsambhavamettha paṭikūlatāpaccavekkhaṇassa adhippatattā.

1. Sam 2. 76; Khu 1. 255 piṭṭhesu. 2. Am 1. 278 piṭṭhe. 3. Bhakkoṭakādayo (Ka)

Evañca katvā **visuddhimagge**¹ dasahi ākārehi paṭikūlatā veditabbā. Seyyathidaṃ—gamanato, pariyesanato, paribhogato, āsayato, nidhānato, aparipakkato, paripakkato, phalato, nissandato, sammakkhanatoti. Evaṃ dasannaṃ vasena pāṭikulyavacanenapi idha “navanna”ti vacanaṃ na virujjhati, sammakkhanassa paribhogādīsu labbhamānabhāvā visuṃ taṃ aggahetvā na vadanti. **Visuddhimagge**² pana sammakkhanaṃ paribhogādīsu labbhamānampi nissandavasena visesato paṭikūlanti dassetuṃ sabbapacchā ṭhapitā.

Ukkaṇṭhitasaññāya samannāgatoti tīsu bhavesu aruccanavasene pavattāya vipassanāpaññāya samannāgato. Nibbidānupassanā hesā saññasīsenā vuttā. Sesamettha uttānameva.

Asubhasuttavaṇṇanā niṭṭhitā.

4. Paṭhamakhamasuttādivaṇṇanā

164-166. Catutthe padhānakaraṇakāle sītādīni nakkhamati na sahatīti **akkhamā**. Khamati sahati abhibhavatīti **khamā**. Indriyadamaṇaṃ **damā**. “Uppannaṃ kāmavitakkaṃ nādhivāseti”ti-ādinā³ nayena vitakkasamaṇaṃ **samāti** āha “**akusalavitakkānaṃ vūpasamanapaṭipadā**”ti. Nidassanamattañcetāṃ, sabbesampi kilesānaṃ samanavasena pavattā paṭipadā samā. Pañcamachaṭṭhāni uttānatthāneva.

Paṭhamakhamasuttādivaṇṇanā niṭṭhitā.

7. Mahāmoggallānasuttādivaṇṇanā

167-168. Sattamaṭṭhamesu **mahāmoggallānattherassāti**-ādinā Moggallānattherassa heṭṭhā tiṇṇaṃ maggānaṃ sukhaṭipadadandhābhiññabhāvo, aragattamaggassa dukkhaṭipadakhippābhiññabhāvo vutto, sārīputtattherassa pana heṭṭhimānaṃ tiṇṇaṃ maggānaṃ sukhaṭipadadandhābhiññabhāvo, arahattamaggassa ca sukhaṭipadakhippābhiññabhāvo dassito. Yaṃ pana vuttaṃ **visuddhimagge**⁴

1. Visuddhi 1. 336 piṭṭhe.

3. Ma 1. 14; Aṃ 1. 323; Aṃ 2. 342 piṭṭhesu.

2. Visuddhi 1. 341 piṭṭhe.

4. Visuddhi 2. 307 piṭṭhe.

“buddhānaṃ pana cattāropi maggā sukhapaṭipadakhippābhiññāva ahesuṃ, tathā dhammasenāpatissa. Mahāmoggallānattherassa pana paṭhamamaggo sukhapaṭipadakhippābhiñño ahoṣi, upari tayo dukkhapaṭipadadandhābhiññā”ti. Yañca vuttaṃ **Aṭṭhasālīniyaṃ**¹ “tathāgatassa hi sārīputtattherassa ca cattāropi maggā sukhapaṭipadakhippābhiññāva ahesuṃ, mahāmoggallānattherassa pana paṭhamamaggo sukhapaṭipadakhippābhiñño, upari tayo dukkhapaṭipadakhippābhiññā”ti, taṃ sabbaṃ aññaṃaññaṃ nānulometi, imāya pāḷiyā imāya ca aṭṭhakathāya na sameti, tasmā vīmaṃsitabbametaṃ. Taṃtaṃbhāṇakānaṃ vā matena tattha tattha tathā tathā vuttanti gaḥetabbaṃ.

Mahāmoggallānasuttādivaṇṇanā niṭṭhitā.

9. Sasaṅkhārasuttavaṇṇanā

169. Navame sasaṅkhārena dukkhena kasirena adhimattapayogaṃ katvāva kilesapariniḅbānadhammoti **sasaṅkharapariniḅbāyī**. Asaṅkhārena appayogena adhimattapayogaṃ akatvāva kilesapariniḅbānadhammoti **asaṅkhārapariniḅbāyī**. Dhammānusārī puggalo hi āgamanamhi kilese vikkhambhento appadukkhena akasirena akilamantova vikkhambhetuṃ sakkoti, saddhānusārī puggalo pana dukkhena kasirena kilamanto hutvā vikkhambhetuṃ, tasmā dhammānusārissa pubbhāgagakkhaṇe kilesacchedakaṃ ñāṇaṃ adandhaṃ tikhiṇaṃ sūraṃ hutvā vahati. Yathā nāma tikhiṇena asinā kadaliṃ chindantassa chinnaṭṭhānaṃ maṭṭhaṃ hoti, atisīghaṃ vahati, saddo na suyyati, balavavāyāmakiccaṃ na hoti, evarūpā dhammānusārino pubbhāgabhāvanā hoti. Saddhānusārino pana pubbhāgagakkhaṇe kilesacchedakaṃ ñāṇaṃ dandhaṃ atikhiṇaṃ asūraṃ hutvā vahati. Yathā nāma kuṇṭhena asinā kadaliṃ chindantassa chinnaṭṭhānaṃ na maṭṭhaṃ hoti, atisīghaṃ na vahati, saddo suyyati, balavavāyāmakiccaṃ icchitabbaṃ hoti, evarūpā saddhānasārino pubbhāgabhāvanā hoti. Evaṃ santepi nesaṃ kilesakkhaye nānattaṃ natthi, anavasesāva kilesā khīyanti.

Sasaṅkhārasuttavaṇṇanā niṭṭhitā.

1. Abhi-Ṭṭha 1. 279 piṭṭhe.

10. Yuganaddhasuttavaṇṇanā

170. Dasame **samathapubbaṅgamaṃ vipassanaṃ bhāvetīti** idaṃ samathayānikassa vasena vuttaṃ. So hi paṭhamaṃ upacārasamādhim̄ vā appanāsamādhim̄ vā uppādeti, ayaṃ samatho. So tañca taṃsampayutte ca dhamme aniccādīhi vipassati, ayaṃ vipassanā, iti paṭhamaṃ samatho, pacchā vipassanā. Tena vuccati “samathapubbaṅgamaṃ vipassanaṃ bhāvetī”ti. **Vipassanāpubbaṅgamaṃ samathaṃ bhāvetīti** idaṃ pana vipassanāyānikassa vasena vuttaṃ. So taṃ vuttappakāraṃ samathaṃ asampādetvā pañcupādānakkhandhe aniccādīhi vipassati. **Paṭhamo lokuttaramaggo nibbattaṭīti** sotāpattimaggaṃ sandhāya vadati, lokiyamaggavaseneva vā imissā pāḷiyā attho veditabbo. Kathaṃ? **Maggo sañjāyati**, pubbabhāgiyo lokiyamaggo uppajjati. **Āsevati** nibbidānupassanāvasena. **Bhāveti** muccitukamyatāvasena. **Bahulīkaroti** paṭisaṅkhānupassanāvasena. **Āsevati** vā bhayatupaṭṭhānādiñāṇavasena. **Bhāveti** muccitukamyatādiñāṇavasena. **Bahulīkaroti** vuṭṭhānagāminivipassanāvasena. **Samyojanāni pahīyanti, anusayā byantī hontīti** maggappaṭipāṭiyā pahīyanti byantī hontī.

Dhammuddhaccaviggahitamānasanti obhāsādisu ariyadhammoti pavattaṃ uddhaccaṃ vikkhepo dhammuddhaccaṃ, tena dhammuddhaccena vipassanāvīthito uggamanena virūpaṃ gahitaṃ pavattiyamānaṃ dhammuddhaccaviggahitamānasaṃ. Vuttaṃ hetam—

“Dhammuddhaccaviggahitamānasaṃ hoti, aniccato manasi karoti, obhāso uppajjati, obhāso dhammoti obhāsaṃ āvajjati, tato vikkhepo uddhaccaṃ, tena uddhaccena viggahitamānaso aniccato upaṭṭhānaṃ yathābhūtaṃ nappajānāti. Dukkhatto -pa- anattato upaṭṭhānaṃ yathābhūtaṃ nappajānāti. Tathā aniccato manasikaroto ñāṇaṃ uppajjati -pa- pīti passaddhi sukhaṃ adhimokkho paggaho upaṭṭhānaṃ upekkhā nitanti uppajjati, nikanti dhammoti nikantiṃ āvajjati, tato vikkhepo uddhaccaṃ, tena uddhaccena viggahitamānaso aniccato upaṭṭhānaṃ

yathābhūtaṃ nappajānāti. Dukkato -pa- anattato upaṭṭhānaṃ
yathābhūtaṃ nappajānāti”ti¹.

Sesamettha uttānameva.

Yuganaddhasuttavaṇṇanā niṭṭhitā.

Paṭipadāvaggavaṇṇanā niṭṭhitā.

(18). 3. Sañcetanīyavagga

1. Cetanāsuttavaṇṇanā

171. Tatiyassa paṭhame **kāyasañcetanā**hetūti kāyakammanimittaṃ, kāyikassa kammaṃ kaṭatvā upacitattāti attho. Esa nayo sesasañcetanādvayepi. Uddhaccasahagatacetanā pavattivipākaṃ detiyevāti “**vīsatividhā**”ti vuttaṃ. **Tathā vacīsañcetanā manosañcetanā**ti ettha kāmāvacarakusalākusalavasena vīsati cetanā labbhanti. Idaṃ tathā-saddena upasaṃharati. **Apicettha nava mahaggatacetanāpi labbhantī**ti iminā navahi rūpārūpakusalacetanāhi saddhiṃ manodvāre ekūnatimsāti tīsu dvāresu ekūnasattati cetanā hontīti dasseti. **Avijjāpaccayāvā**ti idaṃ tāpi cetanā avijjāpaccayāva hontīti dassanattamaṃ vuttaṃ. Yathāvuttā hi ekūnasattati cetanā kusalāpi avijjāpaccayā honti, pageva itarā appahīnāvijjasseva uppajjanato pahīnāvijjassa anuppajjanato.

Yasmā yaṃ taṃ yathāvuttaṃ cetanābhedaṃ kāyasaṅkhāraṇceva vacīsaṅkhāraṇca manosaṅkhāraṇca parehi anussāhito sāmampi asaṅkhārikacittana karoti, parehi kāriyamāno asaṅkhārikacittena karoti, “idaṃ nāma kammaṃ karontopi tassa evarūpo nāma vipāko bhavissatī”ti evaṃ kammaṃ vipākaṇca jānantopi karoti, mātāpitūsu cetiyavandanādīni karontesu anukaronto dārako viya kevalaṃ kammaññeva vijānanto “imassa pana kammaṃ ayaṃ vipāko”ti vipākaṃ ajānantopi

1. Khu 9. 291 piṭṭhe Paṭisambhidāmagge.

karoti, tasmā taṃ dassetuṃ “**sāmaṃ vā tan**”ti-ādi vuttaṃ. **Parehi anāṇattoti** saraseneva vattamāno. **Jānantoti** anussavādivasena jānanto.

Nanu ca khīṇāsavo cetiyaṃ vandati, dhammaṃ bhaṇati, kammaṭṭhānaṃ manasi karoti, kathamassa kāyakammādayo na hontīti? Avipākattā. Khīṇāsavena hi katakammaṃ neva kusalaṃ hoti nākusalaṃ, avipākaṃ hutvā kiriyāmatte tiṭṭhati. Tenassa te kāyādayo na honti. Tenevāha “**khīṇāsavassa kāyena karaṇakammaṃ paññāyati**”ti-ādi. **Tanti** kusalākusalaṃ.

Khiḍḍāya padussantīti khiḍḍāpadosino, khiḍḍāpadosino eva **khiḍḍāpadosikā**. Khiḍḍāpadoso vā etesaṃ atthīti **khiḍḍāpadosikā**. Te kira puññavisesādhigatena mahantena attano sirivibhavena nakkhattaṃ kīḷantā tāya sampattiyā mahantatāya “āhāraṃ paribhuñjimhā na paribhuñjimhā”tipi na jānanti. Atha ekāhārātikkamato paṭṭhāya nirantaraṃ khādantāpi pivantāpi cavantiyeva na tiṭṭhanti. Kasmā? Kammajatejassa balavatāya karajakāyassa mandatāya. Manussānaṃ hi kammajatejo mando, karajakāyo balavā. Tesāṃ tejassa mandatāya kāyassa balavatāya sattāhampi atikkamitvā uṇhodaka-acchayāgu-ādihi sakkā karajakāyaṃ upatthambhetuṃ, devānaṃ pana tejo balavā hoti uḷārapuññanibhattattā uḷāragarusiniddhasudhāhārajīraṇato ca. Karajaṃ mandaṃ mudusukhumālabhāvato. Te ekaṃ āhāraṃ velāṃ akkamitvāva saṅṭhāpetuṃ na sakkonti. Yathā nāma gimhānaṃ majjhanhike tattapāsāṇe ṭhapitaṃ padumaṃ vā uppalaṃ vā sāyanhasamaye ghaṭasatenapi siñciyamānaṃ pākatikaṃ na hoti vinassatiyeva, evameva pacchā nirantaraṃ khādantāpi pivantāpi cavantiyeva na tiṭṭhanti. Katame pana bhe devāti? “Ime nāmā”ti aṭṭhakathāya vicāraṇā natthi, “āhārūpacchedena ātape khittamālā viyā”ti vuttattā ye keci kabaḷikārāhārūpajīvino devā evaṃ karonti, te evaṃ cavantīti veditabbā. **Abhayagirivāsino** panāhu “nimmānaratiparanimmitavasavattino te devā, khiḍḍāya padussanamatteneva hete khiḍḍāpadosikāti vattā”ti. Ko panettha devānaṃ āhāro, kā āhāraṃ velāti? “Sabbesampi kāmāvacaradevānaṃ sudhā āhāro, sā heṭṭhimehi

heṭṭhimehi uparimānaṃ uparimānaṃ paṇititamā hoti. Taṃ yathāsakaṃ divasavaseneva divase divase bhuñjanti. Keci pana badarappamāṇaṃ sudhāhāraṃ paribhuñjanti. So jivhāyaṃ ṭhapitamattoyeva yāva kesagganakhaggā kāyaṃ pharati, tesāmyeva divasavasena sattadivasāṃ yāpanasamatthova hotī”ti vadanti.

Issāpakatattā paduṭṭhena manasā padussantīti **manopadosikā**. Usūyavasena vā manaso padoso manopadoso, so etesaṃ atthi vināsahetubhūtoti **manopadosikā**. **Akkuddho rakkhatīti** kuddhassa so kodho itarasmim̐ akkujjhante anupādāno ekavārameva uppattiyā anāsevano cāvetum̐ na sakkoti, udakantaṃ patvā aggi viya nibbāyati, tasmā akkuddho taṃ cavanato rakkhati. Ubhosu pana kuddhesu bhiiyo bhiiyo aññamaññamhi parivaḍḍhanavasena tikhiṇasamudācāro nissayadhanaraso kodho uppajjamāno hadayavatthum̐ nidahanto accantasukhumālaṃ karajakāyaṃ vināseti, tato sakalopi attabhāvo antaradhāyati. Tenāha “**ubhosu panā**”ti-ādi. Tathā cāha bhagavā “aññamaññamhi paduṭṭhacittā kilantakāya -pa- cavantī”ti¹.

Katame tena devā daṭṭhabbāti ettha **tenā**ti paccatte karaṇavacananti āha”**katame nāma te devā daṭṭhabbā**”ti. Karaṇattheyeva vā etaṃ karaṇavacananti dassento āha “**tena vā attabhāvenā**”ti sesamettha uttānameva.

Cetanāsuttavaṇṇanā niṭṭhitā.

2. Vibhattisuttavaṇṇanā

172. Dutiye atthappabhedassa sallakkhaṇavibhāvanavavatthānakaraṇasamatthaṃ atthe pabhedagataṃ ñāṇaṃ **atthapaṭisambhidā**. **Atthoti** cettha saṅkhepato hetuphalaṃ. Taṃ hi hetuvasena araṇīyaṃ gantabbaṃ pattabbaṃ, tasmā “attho”ti vuccati. Pabhedato pana yaṃ kiñci paccayasamuppannaṃ, nibbānaṃ, bhāsitattho, vipāko, kiriyāti ime pañca dhammā “attho”ti

1. Dī 1. 19 piṭṭhe.

veditabbā, taṃ atthaṃ paccavekkhantassa tasmim̐ atthe pabhedagataṃ ñāṇaṃ **atthapaṭisambhidā**. Tenāha “**pañcasu atthesu pabhedagataṃ ñāṇaṃ**”ti. **Ācikkhāmī**ti-ādīsu ādito kathento **ācikkhati** nāma, uddisatīti attho. Tameva uddesaṃ pariyosāpento **deseti**. Yathā-uddiṭṭhamatthaṃ uddisanavasena pakārehi ñāpento **ñāpeti**. Pakārehi eva tamatthaṃ patiṭṭhāpento **paṭṭhapeti**. Yathā-uddiṭṭhaṃ paṭiniddisanavasena **vivarati**. Vivaṇaṃ **vibhajati**. Vibhatta-atthaṃ hetūdāharaṇadassanehi pākaṭaṃ karonto **ittānir̐ karoti**.

Tisso paṭisambhidāti dhammaniruttipaṭibhānapaṭisambhidā. Tattha **dhammapaṭisambhidā** nāma dhammapabhedassa sallakkhaṇavibhāvanavavathānakaraṇasamatthaṃ ñāṇaṃ. **Dhammoti** ca saṅkhepato paccayo. So hi yasmā taṃ taṃ vidahati pavatteti ceva pāpeti ca, tasmā “dhammo”ti vuccati. Pabhedato pana yo koci phalanibbattako hetu, ariyamaggo, bhāsitaṃ, kusalaṃ, akusalanti ime pañca dhammā “dhammo”ti veditabbā, taṃ dhammaṃ paccavekkhantassa tasmim̐ dhamme pabhedagataṃ ñāṇaṃ **dhammapaṭisambhidā**. Niruttippabhedassa sallakkhaṇavibhāvanavavathānakaraṇasamatthaṃ niruttābhilāpe pabhedagataṃ ñāṇaṃ **niruttipaṭisambhidā**ti. Idaṃ vuttaṃ hoti—atthe ca dhamme ca yā sabhāvanirutti, taṃ sabhāvaniruttim̐ saddaṃ ārammaṇaṃ katvā paccavekkhantassa tasmim̐ sabhāvaniruttābhilāpe pabhedagataṃ ñāṇaṃ niruttipaṭisambhidāti.

Evamayaṃ niruttipaṭisambhidā saddārammaṇā nāma jātā, na paññatti-ārammaṇā. Kasmā? Yasmā saddaṃ sutvā “ayaṃ sabhāvaniruttī”ti jānanti. Paṭisambhidāppatto hi “phasso”ti vutthe “ayaṃ sabhāvaniruttī”ti jānāti, “phassā”ti “phassan”ti vā vutte pana “ayaṃ asabhāvaniruttī”ti jānāti. Vedanādīsupi eseva nayo. Aññaṃ panesa nāmākhyāta-upasaggabyañjanasaddaṃ jānāti na jānātīti? Yadaggena saddaṃ jānitvā “ayaṃ sabhāvanirutti, ayaṃ asabhāvaniruttī”ti jānāti, tadaggena tampi jānissatīti. Taṃ pana “nayidaṃ paṭisambhidākiccaṃ”ti paṭikkhipitvā idaṃ vatthu kathitaṃ—

Tissadattatthero kira bodhimaṇḍe suvaṇṇasalākāṃ gahetvā “aṭṭhārasasu bhāsāsu katarabhāsāya kathamī”ti pavāresi. Taṃ pana tena attano uggahe ṭhatvā pavāritaṃ, na paṭisambhidāya ṭhitena. So hi

mahāpaññatāya taṃ taṃ bhāsaṃ kathāpetvā uggahetvā evaṃ pavāresi. “Bhāsaṃ nāma sattā uggaṇhanti”ti vatvā panettha idaṃ kathitaṃ. Mātāpitaro hi daharakāle kumārake mañca vā piṭhe vā nipajjāpetvā taṃ taṃ kathayamānā tāni tāni kiccāni karonti. Dārakā tesam taṃ taṃ bhāsaṃ vavathāpentī “iminā idaṃ vuttan”ti. Gacchante gacchante kāle sabbampi bhāsaṃ jānanti. Mātā dāmiḷī, pitā andhako. Tesam jāto dārako sace mātukathaṃ paṭhamam suṇāti, dāmiḷabhāsaṃ bhāsissati. Sace pitukathaṃ paṭhamam suṇāti, andhakabhāsaṃ bhāsissati. Ubhinnampi pana katham assuṇanto māgadhabhāsaṃ bhāsissati. Yopi agāmake mahā-araññe nibbatto, tattha añño kathento¹ nāma natthi, sopi attano dhammatāya vacanaṃ samuṭṭhāpento māgadhabhāsameva bhāsissati. Niraye, tiracchānayanīyaṃ, pēttivīsaye, manussaloke, devaloketi sabbattha māgadhabhāsāva ussannā, sesā oṭṭakirāta-andhakayonakadāmiḷabhāsādīkā aṭṭhārasa bhāsā parivattanti, kālantarena aññathā honti ca nassanti ca.

Ayamevekā yathābhuccabrahmavohāra-ariyavohārasaṅkhātā māgabhosā na parivatti. Sā hi katthaci kadāci parivattantīpi na sabbattha sabbadā sabbathāva parivattati, kappavināsepi tiṭṭhatiyeva. Sammāsambuddhopi hi teṭṭakam buddhavacanaṃ tantim āropento māgadhabhāsāya eva āropesi. Kasmā? Evaṃ hi āharitum sukham hoti. Māgadhabhāsāya hi tantim āruḷhassa buddhavacanaṃ paṭisambhidāppattānam sotapathāgamanameva papañco. Tena saṅghaṭṭitamatteneva nayasatena nayasahassena attho upaṭṭhāti. Aññāya bhāsāya tantim āruḷhakaṃ sodhetvā uggahatabbam hoti, bahumpi uggahetvā pana puthujjanaṃ paṭisambhidāppatti nāma natthi, ariyasāvako nāpaṭisambhidāppatto nāma natthi.

Paṭibhānappabhedassa
sallakkhaṇavibhāvanavavathānakaraṇasamattham paṭibhāne pabhedagatam
ñāṇam **paṭibhānapaṭisambhidā**. Atthadhammādivīsayesu hi hīsu ñāṇesu
“imāni ñāṇāni idamatthajotakāni”ti² evam

1. Yattha araññe kathentā (Ka) Abhi-Ṭṭha 2. 371 piṭṭhe passitabbam.

2. Abhi 2. 309, 310, 311 piṭṭhesu.

pavattañāṇassetam̐ adhivacanam̐. Imā pana catasso paṭisambhidā dvīsu ṭhānesu pabhedam̐ gacchanti, pañcahi kāraṇe hi visadā hontīti veditabbā. Katamesu dvīsu? Sekkhabhūmiyañca asekkhabhūmiyañca, tattha sārīputtattherassa Mahāmoggallānattherassa mahākassapattherassa mahākaccāyanattherassa mahākoṭṭhikattherassāti asītiyāpi mahātherānam̐ paṭisambhidā asekkhabhūmiyam̐ pabhedagatā. Ānandattherassa, cittassa gahapatino, dhammikassa upāsakassa, upālissa gahapatino, khujjuttarāya upāsikāyāti evamādīnam̐ paṭisambhidā sekkhabhūmiyam̐ pabhedagatāti imāsu dvīsu bhūmīsu pabhedam̐ gacchanti. Pabhedo nāma maggehi adhigatānam̐ paṭisambhidānam̐ pabhedagamanam̐.

Katamehi pañcahi kāraṇehi paṭisambhidā visadā hontīti? Adhigamena, pariyattiyā, savanena, paripucchāya, pubbayogena. Tattha **adhigamo** nāma arahattam̐. Tam̐ hi pattassa paṭisambhidā visadā honti. **Savanam̐** nāma dhammassavanam̐. Sakkaccam̐ suṇantassa hi paṭisambhidā visadā honti. **Paripucchā** nāma aṭṭhakathā. Uggahitapāḷiyā attham̐ kathentassa hi paṭisambhidā visadā honti. **Pubbayogo** nāma pubbayogāvacaratā haraṇapaccāharaṇanayena parihaṭakammaṭṭhānatā. Pubbayogāvacarassa hi paṭisambhidā visadā honti.

Etesu pana pariyatti, savanam̐, paripucchāti imāni tīṇi pabhedasseva balavakāraṇāni, pubbayogo adhigamassa balavapaccayo. Pabhedassa hoti na hotīti? Hoti, na pana yathā adhigamassa balavapaccayo hoti, tathā pabhedassa. Pariyattisavanaparipucchā hi pubbe hontu vā mā vā, pubbayogena pana ceva etarahi ca saṅkhārasammasanam̐ vinā paṭisambhidādhigamo nāma natthi. Ime¹ pana dvepi ekato hutvā paṭisambhidā upatthambhetvā visadā hontīti.

Vibhattisuttavaṇṇanā niṭṭhitā.

3. Mahākoṭṭhikasuttādivaṇṇanā

173-4. Tatiye **phassāyatanānanti** ettha ākaraṭṭho āyatanasaddoti āha “**phassākarānan**”ti-ādi. “Suvaṇṇāyatanam rajatāyatanam”ti-ādīsu ākaropi “āyatanam”ti vutto, sañjāṭisamosaraṇādivasenapi āyatanatṭho labbhatiyeva. **Mā**-iti paṭisedhe nipāto. Svāyam channam phassāyatanānam asesam virāganirodhā atthaññam cavanam kiñcīti sandhāyāhāti āha “**mā bhaṇīti attho**”ti. **Pañcaphassāyatanāni niruddhānīti** cakkhādīnañca tattha abhāvam sandhāya vadati. **Chaṭṭhassāti** manāyatanassa. Catutthe natthi vattabham.

Mahākoṭṭhikasuttādivaṇṇanā niṭṭhitā.

5. Upavāṇasuttādivaṇṇanā

175-6. Pañcame **vijjāyāti** dibbacakkhupubbenivāsānussati-āsavakkhayaññāṇasañkhātāya tivīdhāya vijjāya, aṭṭhavidhāya vā. Aṭṭhavidhāpi hi vijjā vipassanāññāṇena manomayiddhiyā ca saha abhiññā pariggahetvā vuttā. **Pannarasadhammabhedena caraṇena samannāgatoti** sīlasamvaro, indriyesu guttadvāratā, bhojane mattaññutā, jāgariyānuyogo, saddhā, hirī, ottappaṃ, bāhusaccam, vīriyam, sati, paññā, cattāri rūpāvacarajjhānānīti evam pannarasabhedena caraṇadhammena samannāgato. Imeyeva hi pannarasa dhammā tasmā etehi carati ariyasāvako gacchati amataṃ disaṃ, tasmā “**caraṇam**”ti vuttā. Chaṭṭhe natthi vattabham.

Upavāṇasuttādivaṇṇanā niṭṭhitā.

7. Rāhulasuttavaṇṇanā

177. Sattame **pathavīdhātūrevesāti** duvidhāpesā thaddhaṭṭhena kakkhaḷaṭṭhena, pharusatṭhena ekalakkhaṇā pathavīdhātu evāti ajjhattikam bāhirāya saddhim yojetvā dasseti. Kasmā? Bāhirāya pathavīdhātuyā acetanābhāvo pākaṭo, na ajjhattikāya, tasmā bāhirāya

saddhiṃ ekasadisā acetanāyevāti gaṇhantassa sukhapariggāhā hoti, yathā kim? Dantena goṇena saddhiṃ yojito adanto katipāhameva visukāyati vipphandati, atha na cirasseva damathanṃ upeti, evaṃ ajjhattikaṃ bāhirāya saddhiṃ ekasadisāti gaṇhantassa katipāhameva acetanabhāvena upaṭṭhāti, atha na cirenevassā acetanābhāvo pākaṭo hoti dhātumattatāya dassanato. **Netarṃ mama -pa- daṭṭhabbanti** taṃ ubhayampi “na etaṃ mama, na esohamasmi, na eso me attā”ti evaṃ yathābhūtaṃ sammappaññāya daṭṭhabbaṃ. **Yathābhūtaṃ** yathāsabhāvaṃ. Taṃ hi aniccādisabhāvaṃ, tasmā aniccaṃ dukkhamanattāti evaṃ daṭṭhabbanti attho. Yasmā “netarṃ mama, nesohamasmi, na meso attā”ti passanto neva katthaci attānaṃ passati, na taṃ parassa kiñcanabhāve upanetabbaṃ passati, na parassa attānaṃ attano kiñcanabhāve upanetabbaṃ passati, tasmā vuttaṃ “**catukoṭikasunñatā nāma kathitā**”ti.

Rāhulasuttavaṇṇanā niṭṭhitā.

8. Jabbālīsuttavaṇṇanā

178. Aṭṭhame **santanti** aṅgasantatāya ceva ārammaṇasantatāya ca kamaṇīyaṃ manoharaṃ¹. **Cetovimuttinti** rūpārūpāvacaraṃ cittavimuttiṃ. Tenevāha “**aṭṭhannaṃ samāpattīnaṃ aññatarāṃ samāpattin**”ti. **Lepamakkhitenāti**² lākhāmakkhitena. **Pāripanthike asodhetvāti** kāmacchandāpāripanthike asodhetvā. Yo hi kāmādīnavapaccavekkhaṇādīhi kāmacchandaṃ na suṭṭhu vikkhambhetvā kāyappassaddhivasena duṭṭhullaṃ suppaṭippassaddhaṃ akatvā ārambhadhātumanasiharādivasena thinamiddhaṃ na suṭṭhu paṭivinodetvā samathanimittamanasikārādivasena uddhaccakukkuccaṃ na samūhataṃ katvā aññepi samādhiparipante dhamme na suṭṭhu sodhetvā jhānaṃ samāpajjati so asodhitaṃ āsayāṃ pavitṭhabhamaro viya asuddhaṃ uyyānaṃ pavitṭharājā viya ca khippameva nikkhamati. Yo pana samādhiparipante dhamme suṭṭhu visodhetvā jhānaṃ samāpajjati, so suvisodhitaṃ āsayāṃ pavitṭhabhamaro viya suparisuddhaṃ uyyānaṃ pavitṭharājā viya ca sakalampi divasabhāgaṃ antosamāpattiyāmyeva hoti.

1. Manorathaṃ (Ka)

2. Lesamakkhitenāti (Ka)

Āyamukhānīti naditaḷākakandarapadarādiko āgamanamaggā. Te ca kandarāyevāti āha “**catasso pavisanakandarā**”ti. **Apāyamukhānīti** apagamanamaggā. Apenti apagacchanti etehīti hi apāyā, te eva mukhānīti **apāyamukhāni**. Tāni ca udakanikkhamanacchiddānīti āha “**apavāhanacchiddāni**”ti, apāyasaṅkhātāni udakanikkhamanacchiddānīti attho. Sesam suviññeyyameva.

Jambālīsuttavaṇṇanā niṭṭhitā.

9. Nibbānasuttavaṇṇanā

179. Navame **abhidhamme vuttanayenāti**—

“Katamā hānabhāginī paññā? Paṭhamassa jhānassa lābhiṃ kāmasahagatā saññāmanasikārā samudācaranti hānabhāginī paññā, tadanudhammatā sati santiṭṭhati ṭhitibhāginī paññā. Avitakkasahagatā saññāmanasikārā samudācaranti visesabhāginī paññā. Nibbidāsahagatā saññāmanasikārā samudācaranti virāgūpasañhitā nibbedhabhāginī paññā”ti—

ādinā **vibhaṅge**¹ vuttanayena evamattho vedītabbo.

Tattha **paṭhamassa jhānassalābhinti** yvāyaṃ appaṅṅassa paṭhamassa jhānassa lābhī, taṃ. **Kāmasahagatā saññāmanasikārā samudācarantīti** tato vuṭṭhitam ārammaṇavasena kāmasahagatā hutvā saññāmanasikārā samudācaranti tudanti codenti. Tassa kāmānupakkhandānam saññāmanasikārānam vasena sā paṭhamajjhānapaññā hāyati parihāyati, tasmā “hānabhāginī paññā”ti vuttā. **Tadanudhammatāti** tadanurūpasabhāvā. **Sati santiṭṭhatīti** idam micchāsatiṃ sandhāya vuttam, na sammāsatiṃ. Yassa hi paṭhamajjhānurūpasabhāvā paṭhamajjhānam santato paṇītato disvā asādayamānā abhinandamānā nikanti uppajjati, tassa nikantivasena paṭhamajjhānapaññā neva hāyati na vaḍḍhati, ṭhitikoṭṭhāsikā hoti. Tena vuttam “**ṭhitibhāginī paññā**”ti. **Avitakkasahagatāti** avitakkam

1. Abhi 2. 343 piṭṭhe.

dutiyaññānaṃ santato paṇīto manasikaroto ārammaṇavasena avitakkasahagatā saññāmanasikārā. **Samudācarantī**ti paguṇato paṭhamajjhānato vuṭṭhitaṃ dutiyaññānādhiḡamatthāya tudanti codenti, tassa upari dutiyaññānānupakkhandānaṃ saññāmanasikārānaṃ vasena sā paṭhamajjhānāpaññā viśesabhūtaśśa dutiyaññānaśśa uppattipadaṭṭhānatāya “**viśesabhāgini**”ti vuttā.

Nibbidāśśahagatāti taṃyeva paṭhamajjhānalābhiṃ jhānato vuṭṭhitaṃ nibbidāśśākhātena vipassanāññāṇena śśahagatā. Vipassanāññāṇaṃ hi jhānaṅgabhede vattante nibbindati ukkaṇṭhāti, taśśmā “nibbidā”ti vuccati. **Samudācarantī**ti nibbānaśśacchikiriyatthāya tudanti codenti. **Virāgūpaśśāññhitā**ti virāgaśśākhātena nibbānena upaśśāññhitā. Vipassanāññāṇaṃ hi śśakkā iminā maggena virāgaṃ nibbānaṃ śśacchikātunti pavattito “virāgūpaśśāññhitā”ti vuccati. Taśśāmpayuttasāññāmanasikārāpi virāgūpaśśāññhitā eva nāma, tassa teśśāṃ saññāmanasikārānaṃ vasena yā paṭhamajjhānāpaññā ariyamaggappaṭivedhaśśa padaṭṭhānatāya “**nibbedhabhāgini**”ti vuttāti.

Nibbānaśśuttavaññānā niṭṭhita.

10. Mahāpaśśeśśasuttavaññānā

180. Daśśame **mahā-okāśśeti** mahante okāśśe mahantāni dhammaśśa paṭiṭṭhāpaṇaṭṭhānāni. Yesu paṭiṭṭhāpito dhammo nicchīyati aśśandehato, kāni paṇa tāni? Āgamaṇaviśśiṭṭhāni śśuttotaraññādiṇi. Dutiyavikappe apaśśiśśyāntīti apaśśeśśā, mahantā apaśśeśśā eśśeśśanti **mahāpaśśeśśā**. “Śśāmmukhā me taṃ āvuśśo bhagaṇavato śśutaṇ”ti-ādinā keṇaci ābhatāśśa dhammoti viṇicchayāne kāraṇaṃ. Kiṃ paṇa taṇti? Taśśa yaṭhābhatāśśa śśuttotaraññādi eva. Yaṇi evaṃ kaṭhaṃ cattāroṭi? Yaśśmā dhammaśśa dve śśāmpadāyo¹ śśatthā śśāvako ca. Teśśu śśāvakā śśāṃghagaṇapuggalavaśśena tiṇidhā. Evamimamhā mahāyaṃ dhammo paṭiḡgahitoti apaśśiśśitabbānaṃ bhedeṇa cattāro.

1. Śśāmpadāyāti (Ka) Netti-ṭṭha 80 piṭṭhe paśśiśśitabbānaṃ.

Tenāha **sammukhā metarū āvuso bhagavato sutan**”ti-ādi. Tathā ca vuttaṃ **nettiyaṃ**¹ “cattāro mahāpadesā buddhāpadeso, saṅghāpadeso, gaṇāpadeso, puggalāpadeso. Ime cattāro mahāpadesā”ti. Buddhā apadeso etassāti **buddhāpadeso**. Esa nayo sesesupi. Tenāha “**buddhādayo -pa-mahākāraṇāni**”ti.

Neva **abhinanditabbanti** na sampāṭicchitabbāṃ, ganthassa sampāṭicchanaṃ nāma savananti āha “**na sotabban**”ti². **Padabyañjanānīti** padāni ca byañjanāni ca, atthapadāni byañjanapadāni cāti attho. Pajjati attho etehīti **padāni**, akkharādīni byañjanapadāni. Pajjitabbato **padāni**, saṅkāsanādīni atthapadāni. “Aṭṭhakathāyaṃ padasaṅkhātāni byañjanānīti byañjanapadāneva vuttāni”ti keci. Atthaṃ byañjentīti **byañjanāni**, byañjanapadāni. Tehi byañjitabbato **byañjanāni**, attapadānīti ubhayaṅgahato. **Imasmim thāneti** tenābhatasuttassa imasmim padese. **Pāli vuttāti** kevalo pāḷidhammo vutto. **Attho vuttoti** pāḷiyā attho vutto niddiṭṭho. **Anusandhi kathitoti** yathāraddhadesanāya uparidesanāya ca anusandhānaṃ kathikaṃ, sambandho kathito. **Pubbāparam kathitanti** pubbena param avirujjhanañceva visesatthānañca kathitaṃ pakāsitaṃ. Evaṃ pāḷidhammādīni sammadeva sallakkhetvā gahaṇaṃ sādhukaṃ uggahaṇanti āha “**suṭṭhu gahetvā**”ti. **Sutte otāretabbānīti** nāṇena sutte ogāhetvā tāretabbāni. Taṃ pana ogāhetvā taraṇaṃ tattha otaraṇaṃ anuppavesanaṃ hotīti vuttaṃ “**otaritabbāni**”ti. Samsandevā dassanaṃ sandassananti āha “**vinaye samsandetabbāni**”ti.

“Kiṃ pana taṃ suttaṃ, ko vā vinayo”ti vicāraṇāyaṃ ācariyānaṃ matibhedamukhena tamatthaṃ dassetuṃ “**ettha cā**”ti-ādi vuttaṃ. **Vinayoti** vibhaṅgapāṭhamāha. So hi mātikāsaññitassa suttassa atthe sucanaṭo “suttaṃ”ti vattabbataṃ arahati. Vividhanayattā viṣiṭṭhanayattā ca **vinayo**, khandhakapāṭho. **Evanti** evaṃ suttavinayesu pariggayhamānesu vinayapiṭakampi na pariyādiyati parivārapāḷiyā asaṅgahitattā. Suttantābhidhammapiṭakāni vā **suttaṃ** atthasūcanādi-atthasambhavato. **Evampīti** suttantābhidhammapiṭakāni suttaṃ, vinayapiṭakaṃ vinayoti evaṃ suttavinayavibhāge vuccamānepi. **Na tāva pariyādiyantīti** na tāva anavasesato

1. Khu 10. 20 piṭṭhe. 2. Sampāṭicchanaṃ nāma gahaṇanti āha na gahetabbanti (Ka)

pariggayhanti. Kasmāti ceti āha “**asuttanāmakañhī**”ti-ādi. Yasmā suttanti imam nāmaṃ anāropetvā saṅgītaṃ jātakādibuddhavacenaṃ atthi, tasmā vuttanayena tīṇi piṭakāni na pariyādiyanti. Suttanipāta-udāna-itivuttakāni dīghanikāyādayo viya suttanti nāmaṃ āropetvā asaṅgītānī adhippāyenettha jātakādīhi saddhim tānipi gahitāni. Buddhavaṃsacariyāpiṭakānaṃ panettha aggahaṇe kāraṇaṃ maggitabbaṃ, kiṃ vā etena magganena, sabbopāyaṃ vaṇṇanānayo theravādadassanamukhena paṭikkhitto evāti.

Kim satthī¹ asuttanāmakaṃ buddhavacanaṃ natthiyevāti dasseti. **Taṃ sabbam paṭikkhipivā**ti “suttanti vinayo”ti-ādinā vuttasaṃvaṇṇanāyaṃ “nāyamatto idhādhippeto”ti paṭisedhetvā. Vineti etena kileseti vinayo, kilesavinayanūpāyo, so eva kāraṇanti āha “**vinayo pana kāraṇa**”ti.

Dhammeti pariyattidhamme. **Sarāgāyāti** sarāgabhāvāya kāmārāgabhavarāgaparibrūhanāya. **Saṃyogāyāti** bhavaśaṃyojanāya. **Sa-upādānāyāti** caturūpādānūpasamhitatāya. **Mahicchatāyāti** mahicchābhāvāya. **Asantuṭṭhiyāti** asantuṭṭhabhāvāya. **Kosajjāyati** kusītabhāvāya. **Saṅgaṇikāyāti** kilesasaṅgaṇikavīhārāya. **Ācayāyāti** tividhavaṭṭācayāya². **Virāgāyāti** sakalavaṭṭato virajjanatthāya. **Viśaṃyogāyāti** kāmārāgadīhi viśaṃyujjanatthāya. **Anupādānāyāti** sabbassapi kammabhavassa aggahaṇāya. **Appicchatāyāti** paccayappicchatādivasena sabbaso icchāya apagamāya. **Santuṭṭhiyāti** dvādasavidhasantuṭṭhabhāvāya. **Vīriyārambhāyāti** kāyikassa ceva cetāsitaṃ ca vīriyassa paggaṇhanatthāya. **Vivekāyāti** pavivittabhāvāya kāmavivekāditadaṅgavivekādivivekasiddhiyā. **Apacayāyāti** sabbassapi vaṭṭassa apacayanāya, nibbānāyāti attho. Evaṃ yo pariyattidhammo uggahaṇadhāraṇaparipucchāmanasikāravasena yoniso paṭipajantassa sarāgādibhāvaparivajjanassa kāraṇaṃ hutvā virāgādibhāvāya saṃvattati, ekaṃsato **eso dhammo, eso vinayo** sammadeva apāyādīsu apatanavasena dhāraṇato kilesānaṃ vinayanato ca. Satthu sammāsambuddhassa ovādānu rūpappavattibhāvato **etaṃ satthusāsananti** ca jāneyyāsīti attho.

1. Natthīti (Aṭṭhikathāyaṃ)

2. Ācayāyāti vaṭṭassa vaḍḍhanatthāya (Sārattha-Ṭī 3. 444 piṭṭhe)

Catusaccatthasūcanam suttanti āha “**sutteti tepītake buddhavacane**”ti. Tepītakam hi buddhavacanam saccavinimuttam natthi. Rāgādivinayakāraṇam yathā tena suttapadena pakāsītanti āha “**vinayeti etasmim rāgādivinayakāraṇe**”ti. Sutte otaraṇaṅcetha tepītakabuddhavacanapariyāpannatāvaseneva veditabbam, na aññathāti āha “**suttappaṭipāṭiyā katthaci anācāntvā**”ti. **Challim uṭṭhapetvāti** arogassa mahato rukkhassa tiṭṭhato upakkamena challikāya sakalikāya papaṭikāya vā uṭṭhāpanam viya arogassa sāsanaḍhammassa tiṭṭhato byañjanamattena tappariyāpannam viya hutvā challisadisam pubbāparaviruddhatādidosam uṭṭhapetvā paridīpetvā. Tādisāni pana ekaṃsato gulhavessantarādipariyāpannāni hontīti āha “**gulhavessantara -pa-paññāyantīti attho**”ti. **Rāgādivinayeti** rāgādivinayanatthena atadākāratāya **apaññāyamānāni chaḍḍetabbāni** cajitabbāni na gahetabbāni. **Sabbatthāti** sabbavāresu.

Mahāpadesa suttavaṇṇanā niṭṭhitā.

Sañcetanīyavaggavaṇṇanā niṭṭhitā.

(19) 4. Brāhmaṇavagga

1. Yodhājīvasuttavaṇṇanā

181-183. Catutthassa paṭhamādīni uttānatthāneva.

4. Abhayasuttavaṇṇanā

184. Catutthe **socatīti** citte uppannalavasokena socati, cittasantāpena anto nijjhāyatīti attho. **Kilamatīti** tasseva sokassa vasena kāye ca uppannadukkhena kilamati. **Paridevatīti** sokuddehakavasena tam tam vippalapanto vācāya paridevati. **Urattāḷinti** urattāḷam, uram tāḷetvāti attho. Tenāha “**uram tāḷetvā**”ti. **Kaṅkhāvicikicchāti**¹ ettha “ekamevidam pañcamam nīvaraṇam, kim nu kho

1. Kaṅkhī vicikicchīti (Pāḷiyam)

idan”ti ārammaṇaṃ kaṅkhanato **kaṅkhā**, “idameva varan”ti nicchetuṃ asamatthabhāvato **“vicikicchā”**ti vuccati “dhammasabhāvaṃ vicinanto kicchati, vigatā cिकicchā”ti vā katvā.

Abhayasuttavaṇṇanā niṭṭhitā.

5. Brāhmaṇasaccasuttavaṇṇanā

185. Pañcame **etthā**ti etasmiṃ suññatānupassanādhikāre. **Kvacī**ti katthaci ṭhāne, kāle, dhamme vā. Atha vā **kvacī**ti ajjhattaṃ bahiddhā vā. **Attano attānanti** satattānaṃ “ayaṃ kho bho brahmā mahābrāhmā -pa- vasī pitā bhūtabhavyānaṃ”ti-ādinā¹ parehi parikappitaṃ attānañca kassaci kiñcanabhūtaṃ na passatīti dassento **“kassaci”**ti-ādimāha. Tattha **parassā**ti parajāti paro purisoti vā evaṃ gahitassa. **Na ca mama kvacanī**ti ettha **mama**-saddo aṭṭhānappayuttoti āha **“mama-saddaṃ tāva ṭhapetvā”**ti. **Parassa cā**ti attano aññassa. Paro puriso nāma atthi mamatthāya ṭhito, tassa vasena mayhaṃ sabbaṃ ijjatīti ekaccadiṭṭhigatikaparikappitavasena paraṃ attānaṃ tañca attano kiñcanabhūtaṃ na passatīti dassento **“na ca kvacani”**ti-ādimāha. Ettha ca **nāhaṃ kvacani**ti saka-attano sabbhāvaṃ na passati. **Na kassaci kiñcanatasminti** saka-attano eva kassaci attaniyataṃ na passati. **Na ca mamā**ti etaṃ dvayaṃ yathārahaṃ sambandhitabbaṃ, atthi-padaṃ paccekaṃ. **Na ca kvacani parassa attā atthī**ti parassa attano abhāvaṃ passati. **Tassa parassa attano mama kiñcanatā natthī**ti parassa attano anattaniyataṃ passati. Evaṃ ajjhattaṃ bahiddhā khandhānaṃ attattaniyasuññatāsuddhasaṅkhārapuñjātaṭṭakasaññatāpariggaṇhanaṃ niṭṭhāhoti. Sesamettha suviññeyyameva.

Brahmaṇasaccasuttavaṇṇanā niṭṭhitā.

6. Ummaggasuttavaṇṇanā

186. Chaṭṭhe **ākadḍhīyatī**ti cittavasiko loko tatha tatha upadaḍḍhīyati. **Tesaṃyevettha gahaṇaṃ veditabbanti** ye apariññātavatthukā cittasa vasaṃ gacchanti, tesaṃyeva gahaṇaṃ. Na hi pariññātakkhandhā pahīnakilesā cittassa vasaṃ gacchanti, cittaṃ pana attano vase vattenti. **Saha sīlenā**ti cārittavārittasilena saddhiṃ. **Pubbabhāgaṭṭipadanti** dhutaṅgamādiṃ katvā yāva gotrabhuññaṃ, tāva pavattetabbaṃ samathavipassanāsaṅkhātāṃ sammāṭṭipadaṃ. Sesāṃ suviññeyyameva.

Ummaggasuttavaṇṇanā niṭṭhitā.

7. Vassakārasuttavaṇṇanā

187. Sattame **vassakāro brāhmaṇo magadhamahāmattoti** ettha **vassakāro**ti tassa brāhmaṇassa nāmaṃ. Mahatiyā issariyamattāya samannāgato mahāmatto. **Issariyamattāyā**ti ca issariyappamaṇenāti attho, issariyena ceva vitthūpakaraṇena cāri evaṃ vā ettha attho daṭṭhabbo. Upabhogūpakaraṇānipi hi loke “mattā”ti vuccanti. Magadharañño, magadharaṭṭhe vā mahāmattoti **magadhamahāmatto**. Tudisaññito gāmo nivāso etassāti **todeyyo**. Tenevāha “**tudigā mavāsikassā**”ti. Tudigā mavāsītā cassa tatha adhipatibhāvenāti daṭṭhabbā. So hi taṃ gāmaṃ soṇadaṇḍo viya campāṃ kūḍanto viya khāṇumataṃ adhipatibhāvena ajjhāvasati. **Mahaddhano hoti** pañcacattālīsakoṭivibhavo. **Parisatī**ti parisāyaṃ, janasaṃmūheti attho. Tenāha “**sannipatitāya parisāyā**”ti. **Abhippasannoti** ettha abhikkamanattho **abhi**-saddoti āha “**atikkammapasanno**”ti, pasādanīyaṃ ṭhanaṃ atikkamitvā appasādanīyaṭṭhāne pasannoti adhippāyo. Taṃ taṃ kiccaṃ atthaṃ passatīti atthadasā, alaṃ samatthā paṭibalā atthadasā alamatthadasā, alamatthadase atisayantīti **alamatthadasaratā**. Tenāha “**atthe passituṃ samatthā**”ti-ādi. **Neva sappusisaṃ na asappurisaṃ jānāti** sappurisaḍḍhamānaṃ

asappurisadhammānañca yāthāvato ajānanato. Sesamettha uttānameva.

Vassakārasuttavaṇṇanā niṭṭhitā.

8. Upadasuttavaṇṇanā

188. Aṭṭhame nibbattivāsena nirayaṃ arahati, nirayasamvattaniyena vā kammunā niraye niyuttoti **nerayuko**. Avīcimhi uppajjitvā tattha āyukappasaññitaṃ antarakappaṃ tiṭṭhatīti **kappattho**. Nirayūpapattiṃ pariharaṇavasena tikicchitum asakkuṇeyyoti **atekiccho**. **Apariyādinnāvāti** aparikkhīṇāyeva. Sace hi eko bhikkhu kāyānupassanaṃ pucchati, añño vedanānupassanaṃ -pa- cittaṇupassanaṃ. “Iminā puṭṭhe ahaṃ pucchāmi”ti eko ekaṃ na oloketi, evaṃ santepi tesaṃ vāro paññāyati eva, buddhānaṃ pana vāro na paññāyati. Vidatthacaturāṅgulaṃ chāyaṃ atikkamanato puretaraṃyeva bhagavā cuddasavidhena kāyānupassanaṃ, navavidhena vedanānupassanaṃ, soḷasavidhena cittaṇupassanaṃ, pañcavidhena dhammānupassanaṃ katheti. Tiṭṭhantu vā evaṃ cattāro. Sace hi aññe cattāro sammappadhānesu, aññe iddhipādesu, aññe pañcendriyesu, aññe pañcabalesu, aññe sattabojjhaṅgesu, aññe aṭṭhamaggaṅgesu pañhe puccheyyum, tampi bhagavā katheyya. Tiṭṭhantu vā ete aṭṭha. Sace aññe sattatiṃsa janā bodhipakkhiyesu pañhe puccheyyum, tampi bhagavā tāvadeva katheyya. Kasmā? Yāvata hi lokiyamahājane ekaṃ padaṃ kathente tāva ānandatthero aṭṭha padāni katheti. Ānandatthere pana ekaṃ padaṃ kathente yeva bhagavā soḷasa padāni katheti. Kasmā? Bhagavato hi jivhā mudu, dantāvarenaṃ suphusitaṃ, vacanaṃ agaḷitaṃ, bhavaṅgaparivāso lahuko. Tena vuttaṃ “**apariyādinnāvassa tathāgatassa dhammadesanā, apariyādinnaṃ dhammapadabyañjanan**”ti.

Tattha **dhammadesanā**ti tantitiṭṭhapanā. **Dhammapadabyañjananti** ettha **dhammoti** pāḷi. Pajjati attho etenāti **padaṃ**. Vākyañca padeneva saṅgahitaṃ. Atthaṃ byañjeti **byañjanaṃ**, akkharāṃ. Taṃ hi padavākyaṃ paricchijjamānaṃ taṃ taṃ atthaṃ byañjeti pakāseti. Etena aparāparehi padabyañjenehi sucirampi kālāṃ

Kathentassa tathāgatassa na kadāci tesam̐ pariyādānam̐ atthīti dasseti.
Guṇadhamsīti guṇadhamsanasīlo. **Pagabboti** vācāpāgabbhiyena samannāgato.

Upakasuttavaṇṇanā niṭṭhitā.

9. Sacchikaraṇīyasuttavaṇṇanā

189. Navame **nāmakāyenāti** sahaajātanāmakāyena. Sesametha uttānameva.

Sacchikaraṇīyasuttavaṇṇanā niṭṭhitā.

10. Uposathasuttavaṇṇanā

190. Dasame **tuṇhībhūtam̐ tuṇhībhūtanti** āmedītavacanam̐ byāpanicchāvasena vuttanti āha “**yato yato anuviloketi**”ti. **Anuviloketvāti** ettha **anu**-saddopi byāpanicchāvacanamevāti anu anu viloketvāti attho, pañcapasādappaṭidhamaṇḍitāni akkhīni ummīletvā tato tato viloketvāti vuttam̐ hoti. **Alanti** yuttam̐, opāyikanti attho “alameva nibbinditun”ti-ādīsū¹ viya. Puṭabandhanena pariharitvā asitabbam̐ **puṭosam̐** sambalam̐ a-kārassa o-kāram̐ katvā. Tenāha “**pātheyyan**”ti. Sesamettha suviññeyyameva.

Uposathasuttavaṇṇanā niṭṭhitā.

Brāhmaṇavaggavaṇṇanā niṭṭhitā.

(20) 5. Mahāvagga

1. Sotānugatasuttavaṇṇanā

191. Pañcamassa paṭhame **sotānugatānanti** pasādasotam̐ anugantvā vatānam̐, paguṇānam̐ vācuggatānanti attho. Evambhūtā ca pasādasotam̐

1. Dī 2. 161; Saṃ 1. 387, 388, 390 piṭṭhesu.

odihitvā nāṇasotena suṭṭhu vavatthapitā nāma hontīti āha “**pasādasotan**”ti-ādi. Ekaccassa hi uggahitapubbavacanaṃ taṃ taṃ paguṇaṃ niccharitaṃ suṭṭhu vavatthapitaṃ na hoti. “Asukaṃ suttaṃ vā jātaṃ vā kathehi”ti vutte “sajjhāyitvā saṃsanditvā samanuggāhitvā jānissāmī”ti vadanti. Ekaccassa taṃ taṃ paguṇaṃ bhavaṅgasotasadisāṃ hoti “asukaṃ suttaṃ vā jātaṃ vā kathehi”ti vutte uddharitvā tameva katheti. Taṃ sandhāyetaṃ vuttaṃ “**nāṇasotena vavatthapitānan**”ti. Itthilingādīni tīpi **liṅgāni**. Nāmādīni cattāri **padāni**. Paṭhamādayo satta **vibhattiyo**.

Valaṅjetīti pāḷim anusandhiṃ pubbāparavasena vācuggataṃ karonto dhāreti. **Vacasā paricitā**ti suttadasakavaggadasakapaṇṇāsadasakavasena vācāya sajjhāyitā, “dasasuttāni gatāni, dasavaggāni gatāni”ti-ādinaṃ sallakkhetvā vācāya sajjhāyitāti attho. Vaggādivasena hi idha vacasā paricayo adhippeto, na pana suttekadesassa suttamattassa vacasā paricayo. Manasā anu anu pekkhitā bhāgaso nijjhāyitā viditā **manasānupekkhitā**. Yassa vācāya sajjhāyitaṃ buddhavacanaṃ manasā cintentassa tattha tattha pākaṭaṃ hoti, mahādīpaṃ jāletvā ṭhitassa rūpagataṃ viya vibhūtaṃ hutvā paññāyati. Taṃ sandhāyetaṃ vuttaṃ. **Suppaṭividdhā**ti nijjaṭaṃ niggumbaṃ katvā suṭṭhu yāthāvato paṭividdhā. Sesamettha suviññeyyameva.

Sotānugatasuttavaṇṇanā niṭṭhitā.

2. Ṭhānasuttavaṇṇanā

192. Dutiye **saṃvāsenā**ti saḥavāsenā. **Sīlaṃ veditabbanti** “ayaṃ susīlo vā dussīlo vā”ti saha vasantena upasaṅkamantena jānitabbo. **Taṅca kho dīghena addhunā, na ittaranti** taṃ ca sīlaṃ dīghena kālena veditabbaṃ, na ittarena. Dvīhatīhañhi saṃyatākāro ca saṃvutindriyākāro ca na sakkā dassetuṃ. **Manasi karotāti** tampi “sīlamassa pariggahessāmī”ti manasikarontena paccavekkhanteneva sakkā jānituṃ, na ittarena. **Paññavatāti** tampi sappaññeneva paṇḍitena. Bālo hi manasikarontopi jānituṃ na sakkoti.

Saṁvohāranāti aparāparam kathanena.

“Yo hi koci manussesu, vohāraṁ upajīvati.

Evam Vāseṭṭhu jānāhi, vāṇijo so na brāhmaṇo”ti¹—

ettha hi byavahāro nāma. “Cattāro ariyavohārā, cattāro anariyavohārā”ti²
ettha cetanā. “Saṅkhā samaññā paññatti vohāro”ti³ ettha paññatti.
“Vohāramatena so vohareyyā”ti⁴ ettha kathāvohāro. Idhāpi esova adhippeto.
Ekaccassa hi sammukhākathā parammukhākathāya na sameti
parammukhākathā sammukhākathāya. Tathā purimakathā pacchimakathāya,
pacchimakathā ca purimakathāya. So kathaneneva sakkā jānitum “asuci eso
puggalo”ti. Sucisīlassa pana purimaṁ pacchimana, pacchimañca purimena
sameti. Sammukhākathitaṁ parammukhākathitena sameti,
parammukhākathitañca sammukhākathitena, tasmā kathanena sakkā
sucibhāvo jānitunti pakāsento evamāha.

Thāmoti nāṇathāmo. Yassa hi nāṇathāmo natthi, so uppannesu
upaddavesu gahetabbaṁ gahaṇaṁ kattabbaṁ kiccaṁ apassanto
advārakagharaṁ pavitṭho viya carati. Tenāha “**āpadāsu bhikkhave thāmo
veditabbo**”ti.

Sācacchāyāti saṅkathāya. Duppaññassa hi kathā udake geṇḍu viya
uppilavati. Paññavato kathentassa paṭibhānaṁ anantaṁ⁵ hoti.
Udakavipphanditeneva hi maccho khuddako vā mahanto vāti nāyati.

Ñātivināsoti corarogabhayādīhi nāṭīnaṁ vināso. Bhogānaṁ byasanaṁ
bhogabyasanaṁ, rājacorādivasena bhogavināsoti attho. Tenāha
“**dutiyapadepi eseva nayo**”ti. **Pañhumaggoti** pañhagavesanaṁ, nātuṁ
icchitassa atthassa vīmaṁsananti attho. **Atappakanti** atittikaraṭṭhena
atappakaṁ sādurasabhojanaṁ viya. **Saṇhanti** sukhumasabhāvaṁ.

Ṭhānasuttavaṇṇanā niṭṭhitā.

1. Ma 2. 409; Khu 1. 375 piṭṭhesu.

2. Dī 3. 193 piṭṭhe.

3. Abhi 1. 256; Khu 7. 144, 148 piṭṭhesu.

4. Saṁ 1. 14 piṭṭhe.

5. Anantaram (Saṁ-Ṭṭha 1. 138 piṭṭhe)

3. Bhaddiyasuttavaṇṇanā

193. Tatiye karaṇassa uttaram kiriyam karaṇuttariyam, tam lakkhaṇam etassāti **karaṇuttariyalakkhaṇo**. Sesam suviññeyyameva.

Bhaddiyasuttavaṇṇanā niṭṭhitā.

4. Sāmugiyasuttavaṇṇanā

194. Catutthe puggalassa pārisuddhiyā padhānabhūtāni vā aṅgāni **pārisuddhipadhāniyaṅgāni**. Sesamettha suviññeyyameva.

Sāmugiyasuttavaṇṇanā niṭṭhitā.

5. Vappasuttavaṇṇanā

195. Pañcame **pihitattāti** akusalassa pavesanadvāram pidahitvā ṭhitattā. Kāyena saṃvaritabbaṃ hi apihitena dvārena pavattanakaṃ pāpadhammaṃ saṃvaritvā ṭhito **kāyena saṃvuto nāma**. **Khayavirāgenāti** accantakhayasāṅkhātena virajjanena, anuppādanirodhenāti attho. Kim vijjā pubbe uppannāti? Ubhayametaṃ na vattabbaṃ. Pahānābhisamayabhāvanābhisamayānaṃ abhinnakālattā padīpujjanena andhakāraṃ viya vijjuppādena avijjā niruddhāva hoti, vattabbaṃ vā hetuphalattamupacārasena. Yathā hi padīpujjanahetuko andhakāravigamo, evaṃ vijjuppādahetuko avijjānirodho. hetuphaladhammā ca samānakālāpi pubbāparakālā viya voharīyanti yathā “cakkhum ca paṭicca rūpe ca uppajjati cakkhiviññāṇaṃ”¹ paccayādānuppajjanakiriyā. Cittassa kāyassa ca vihananato **vighāto**, dukkhaṃ. Paridahanato **pariḷāho**.

Niccavihārāti sabbadā pavattanakavihārā. Ṭhapetvā hi samāpattivelam bhavaṅgavelaṅca khīṇāsavā iminā chaḷaṅgupekkhāvihārena sabbakālam viharanti. **Cakkhunā rūpaṃ disvāti** cakkhuvīññāṇena rūpaṃ disvā. Cakkhunā rūpaṃ

1. Ma 1. 185 326; Ma 3. 328, 332, 333; Saṃ 1. 301, 302; Saṃ 2. 261; Abhi 4. 248 piṭṭhesu.

disvāti hi nissayavohārena vuttam. Sasambhāarakathā hesā yathā “dhanunā vijjhatī”ti, tasmā nissayasīsena nissitassa gahaṇam daṭṭhabbam. **Rāgavasena na somanasajāto hotīti** gehasitapemavasenapi javanakkhaṇe somanassajāto na hoti maggena samucchinnattā, na **domanassajāto** pasādaññhattavasenapi. **Upekkhako majjhatto hutvā viharatīti** asamapekkhanena moham anuppādentō ñāṇupekkhāvaseneva upekkhako viharati majjhatto. Khīṇāsavo hi iṭṭhepi aniṭṭhepi majjhattepi ārammaṇe yo asamapekkhanena samasamā ayonisogahaṇe akhīṇāsavānam moho uppajjati, tam anuppādentō maggeneva tassa samugghātittā ñāṇupekkhāvaseneva upekkhako viharati, ayañcassa paṭipatti sativepullapattiyā paññāvepullapattiyā cāti vuttam “**satisampajaññapariggahitāyā**”ti.

Ettha ca “chasu dvāresu upekkhako viharatī”ti iminā chaḷaṅgupekkhā kalitā, “sampajāno”ti vacanato pana cattāri ñāṇasampayuttacittāni labbhanti tehi vinā sampajānatāya asambhavato. “Satatavihārā”ti vacanato aṭṭhapi mahākiriya-cittāni labbhanti ñāṇupattipaccayarahitakālepi pavattijotanato. “Arajjanto adussanto”ti vacanato hasituppādavoṭṭhabbanehi saddhim dasa cittāni labbhanti. Arajjanādussanavasena pavatti hi tesampi sādharmaṇāti. Nanu cettha “upekkhako viharatī”ti chaḷaṅgupekkhāvasena imesam satatavihārānam āgatattā somanassam katham labbhatīti? Āsevanatoti. Kiñcāpi hi khīṇāsavo iṭṭhāniṭṭhepi ārammaṇe majjhatte viha bahulam upekkhako viharati attano parisuddhappakatibhāvāvijahanato, kadāci pana tathā cetobhisaṅkhārābhāve yaṁ tam sabhāvato iṭṭham ārammaṇam, tassa yāthāvato sabhāvaggahaṇavasenapi arahato cittam somanassasahagatam hutvā pavattateva, tañca kho pubbāsevanavasena.

Kāyoti¹ pañcadvārakāyo, so anto avasānam etissāti kāyantikā, tam **kāyantikam**. Tenāha “**yāva pañcadvārakāyo pavattati, yāva pavattan**”ti. **Jīvantikanti** etthāpi eseva nayo. **Pacchā uppajjitvāti** etasmim attabhāve manodvārikavedanāto pacchā uppajjitvā tato

1. Sam-Ṭī 2. 93 piṭṭhepi passitabbam.

paṭhamam nirujjhati, tato eva atthasiddhamattham sarūpeneva dassetum “**manodvārikavedanā paṭhamam uppajjitvā pacchā nirujjhati**”ti vuttam. Idāni tameva saṅkhepena vuttam vivaritum “**sā hī**”ti-ādimāha. Yāva tettiṃsavassāni paṭhamavayo. **Paññāsavassakāleti** paṭhamavayato yāva paññāsavassakālā, tāva. **Ṭhitā hotīti** vadḍhahāniyo anupagantvā samarūpeneva ṭhitā hoti. **Mandāti** mudukā atikhiṇā. **Tadāti** asītinavutivassakāle **vadantepi** tathāciraparicitepīti adhippāyo. **Bhaggāti** tejobhaggena bhaggā dubbaṇṇā. **Hadayakoṭhimyevāti** cakkhādivatthūsu appavattitvā tesam ādi-antakoṭibhūtam hadayavatthumyeva. **Tāvāti** yāva vedanā vattati, tāva.

Vāpiyāti mahātaḷakena. **Pañca-udakamaggasampananti** pañcahi udakassa pavisananikkhamanamaggehi vuttam. **Tato tato vissandamānam** sabbaso puṇṇattā. **Paṭhamam deve vassanteti**-ādi upamāsaṃsandanam. **Imam vedanam sandhāyāti** imam yathāvuttam pariyosānappattam manodvārikavedanam sandhāya.

Kāyassa bhedāti attabhāvassa vināsanato. **Parato agantvāti** paralokavasena agantvā. Vedanānam sītibhāvo nāma saṅkhāradarathapariḷābhāvo. So panāyam sabbaso appavattivasenevāti āha “**appavattanadhammāni bhavissanti**”ti.

Attabhāvam nāsetukāmassa daḷham uppannam samvegaññanam sandhāyāha “**kudālo viya paññā**”ti. Tato nibbattitajjhānasamādhiram sandhāya “**piṭakam viya samādhi**”ti. Tannissāya pavattetabbavipassanārambhaññanam sandhāya “**khanitti viya vipassanā**”ti ca vuttam. Sesametta uttānameva.

Vappasuttavaṇṇanā niṭṭhitā.

6. Sāḷhasuttavaṇṇanā

196. Chaṭṭhe kāyadaḷhibahulataṃ tapatīti tapo, attakilamathānuযোগবাসেনা পবত্তাম বীরিয়াম. Tena kāyadaḷhibahulatānimittassa pāpassa jigucchanam virajjanam **tapojigucchāti** āha “**dukkarakārikasaṅkhātenā**”ti-ādi. **Tapojigucchavādāti**-ādīsu tapojiguccham vadanti, manasāpi tameva

sārato gahetvā vicaranti, kāyenapi tameva allinā nānappakāraṃ
attakilamathānuyogamanuyuttā viharantīti attho.

Aparisuddhakāyasamācārāti aparisuddhena pāṇātipātādinā kāyasamācārena
samannāgatā. **Aparisuddhvacīsamācārā**ti aparisuddhena musāvādādinā
vacīsamācārena samannāgatā. **Aparisuddhamanosamācārā**ti aparisuddhena
abhijjhādinā manosamācārena samannāgatā. Kāmaṃ
akusalakāyasamācāravacīsamācārappavattikālepi abhijjhādayo
pavattantiyeva, tadā pana te cetanāpakkhikā vā abbohārikā vāti,
manosamācāravāre eva abhijjhādivasena yojanā katā. Atha vā dvārantare
pavattānaṃ pāṇātipātādīnaṃ vacīsamācārādībhāvābhāvo viya dvārantare
pavattānampi abhijjhādīnaṃ kāyasamācārādībhāvo asiddho,
manosamācārābhāvo eva pana siddhoti katvā manosamācāravāre eva
abhijjhādayo uddhaṭā. Tathā hi vuttam—

“Dvāre caranti kammāni, na dvārā dvāracārino.
Tasmā dvārehi kammāni, aññamaññaṃ vavattitā”¹.

Aparisuddhājīvāti aparisuddhena
vejjakammadūtakammavaḍḍhiyogādinā ekavīsati-anesanābhedenā ājīvena
samannāgatā. Idañca sāsane pabbajitānaṃyeva vasena vuttam, “yepi te
samaṇābrāhmaṇā”²ti pana vacanato bāhirakavasena gahaṭṭhavasena ca yojanā
veditabbā. Gahaṭṭhānampi hi
jātidhammakuladhammadesadhammavilomanavasena aññathāpi micchājīvo
labbhateva.

Ñāṇadassanāyāti ettha **ñāṇadassananti** maggañāṇampi vuccati
phalañāṇampi sabbaññūtaññāṇampi paccavekkhaṇañāṇampi
vipassanāñāṇampi. “Kim nu kho āvuso ñāṇadassanavisuddhattham
bhagavati brahmacariyaṃ vussatī”³ti² hi ettha maggañāṇaṃ “ñāṇadassana”²ti
vuttam. “Ayamañño uttarimanussadhammo alamariyañāṇadassanaviseso
adhigato phāsuvihāro”³ti³ ettha phalañāṇaṃ. “Bhagavatopi kho ñāṇaṃ
udapādi sattāhakālakato ālāro kālāmo”⁴ti⁴ ettha sabbaññūtaññāṇaṃ.
“Ñāṇaṃca pana medassanaṃ udapādi, akuppā me vimutti, ayamantimā
jātī”⁵ti⁵ ettha paccavekkhaṇañāṇaṃ. “Ñāṇadassanāya cittaṃ abhinīharatī”⁶ti⁶
ettha vipassanāñāṇaṃ. Idha pana

1. Abhi-Ṭṭha 1. 126 piṭṭhepi.

3. Ma 1. 268 piṭṭhe.

5. Saṃ 3. 370; Vi 3. 16; Khu 9. 331 piṭṭhesu.

2. Ma 1. 201 piṭṭhepi.

4. Vi 3. 10 piṭṭhe.

6. Dī 1. 72 piṭṭhe.

ñānadassanāyāti maggañāṇaṃ “ñānadassanaṃ”ti vuttaṃ. Tenāha “**maggañāṇasaṅkhātāya dassanāyā**”ti. Avirādhitam vijjhatīti avirādhitam katvā vijjhati. Sesamettha suviññeyyameva.

Sāḷhasuttavaṇṇanā niṭṭhitā.

7. Mallikādevīsuttavaṇṇanā

197. Sattame **appesakkhāti** appānubhāvā. Sā pana appesakkhatā ādhipeyyasampattiyā parivārasampattiyā ca abhāvena pākaṭā hoti. Tattha parivārasampattiyā abhāvaṃ dassento “**appaparivārā**”ti āha. **Issarāti** ādhipeyyasaṃvattanakkammabalena īsanasilā. Sā panassā issaratā vibhavasampattipaccayā pākaṭā jātāti aḍḍhutāpariyāyabhāvena vadanto “**aḍḍhāti issarā**”ti āha. Mahantaṃ dhanametissā bhūmigatañceva vaḷaṅjanakañcāti **mahaddhanā**. Idha pana vaḷaṅjanakeneva dhanena mahaddhanataṃ dassento “**vaḷaṅjanakadhanena mahaddhanā**”ti āha. Īsatīti īsā, abhibhūti attho. Mahatī īsā mahesā, suppatiṭṭhitamahesatāya pana parehi mahesoti akkhātabbatāya **mahesakkhā**. Yasmā pana so mahesakkhabhāvo ādhipeyyaparivārasampattiyā viññāyati, tasmā “**mahāparivārā**”ti vuttaṃ.

Sanṭhānapāripūriyā adhikaṃ rūpamassāti **abhirūpā**.

Sanṭhānapāripūriyāti ca hatthapādādisarīrāvayavānaṃ susaṅghitatāyāti attho. Avayavapāripūriyā hi samudāyapāripūrisiddhi. **Rūpanti** ca sarīraṃ “rūpavanteva saṅkhyam gacchatī”ti-ādīsu viya. **Dassanayuttāti** surūpabhāvena passitabbayuttā, dissamānā cakkhūni piyāyatīti¹ aññakiccavikkhepaṃ hitvāpi daṭṭhabbāti vuttaṃ hoti. Dissamānāva somanassavasena cittaṃ pasādetīti **pāsādikā**. Tenāha “**dassanena pāsādikā**”ti. Pokkharatāti vuccati sundarabhāvo, vaṇṇassa pokkharatā **vaṇṇapokkharatā**, tāya vaṇṇasampattiyāti attho. Porāṇā pana **pokkharanti** sarīraṃ vadanti, **vaṇṇam** vaṇṇameva. Tesam matena vaṇṇaṅca pokkharāṅca vaṇṇapokkharāni, tesam bhāvo

1. Milāyatīti (Ka)

vaṇṇapokkharatā. Iti **paramāya vaṇṇapokkharātāyā**ti uttamaparisuddhena vaṇṇena ceva sarīrasaṅṭhānasampattiyā cāti attho daṭṭhabbo. Tenevāha “**vaṇṇena ceva sarīrasaṅṭhānena cā**”ti. Tattha **vaṇṇenā**ti vaṇṇadhātuyā. Sarīraṃ nāma sannivesaviṣiṭṭho karacaraṇagīvāsīsādi-avayavasamudāyo, so ca saṅṭhānamukhena gayhatīti āha “**sarīrasaṅṭhānenā**”ti.

Abhisajjatiti kujjhanavaseneva kuṭilakaṇṭako viya tasmim tasmim samuṭṭhāne makaradanto viya¹ lagati. Yam hi kodhassa uppattiṭṭhānabhūte ārammaṇe upanāhassa paccayabhūtaṃ kujjhanavasena abhisajjanaṃ, taṃ idhādhippetam, na lubbhanavasena. **Kuppati**ti-ādīsu pubbuppatti **kopo**, tato balavataro **byāpādo** laddhāsevanatāya cittassa byāpajjanato. Sātīsayam laddhāsevanatāya tato byāpādatopi balavatarā paccatthikabhāvena thāmapatti **patitthiyānā.** **Annam pānanti**-ādīsu adīyato **annam**, khādanīyam bhojanīyañca. Pātabyato **pānam**, yamkiñji pānam. Vasitabbato acchādetabbato **vattham**, nivāsanapāvuraṇam. Yanti tenāti **yānam**, chattupāhanavayhasivikādi yamkiñci gamanapaccayam. Chattampi hi vassātapadukkhanivāraṇena maggagamanasādhananti katvā “yānan”ti vuccati. **Mālanti** yamkiñci sumanamālādipuppham. **Gandhanti** yamkiñci candanādivilepanam.

Mallikādevīsuttavaṇṇanā niṭṭhitā.

8. Attantapasuttavaṇṇanā

198. Aṭṭhame āhito ahammāno etthāti attā, attabhāvo. Idha pana yo paro na hoti, so attā, taṃ **attānam**. **Paranti** attato aññam. **Diṭṭheti** paccakkhabhūte. **Dhammeti** upādānakkhandhadhamme. Tattha hi attā bhavati, attasaññādiṭṭhi bhavatīti attabhāvasamaññā. Tenāha “**diṭṭheva dhammeti imasmimyeva attabhāve**”ti. **Chātam vuccati tanhājighacchāhetutāya.** **Anto tapanakilesānanti** attano santāne darathapariḷāhajanana santāpanakilesānam.

1. Mamantudanto viya (Ka)

Paresaṃ hananaghātanādinā rodāpanato **luddo**. Tato vighātakabhāvena kāyacittānaṃ vidālanato **dāruṇo**. Thaddhahadayo **kakkhaḷo**. Bandhanāgāre niyutto **bandhanāgāriko**.

Khattiyābhisekenāti khattiyānaṃ kātabba-abhisekena. **Santhāgāranti** santhāravasena kataṃ agāraṃ yaññāgāraṃ. **Sappitelenā**ti sappimissena telena. Yamakasnehena hi esā tadā kāyaṃ abbhāñjati. Vacchabhāvaṃ taritvā ṭhito **vacchataro**. **Parikkhepakaraṇatthāyā**ti navamālāhi saddhim dabbhehi vediyā parikkhipanattāya. **Yaññabhūmiyanti** avasesayaññatthāne.

Dūrasamussāritamānasseva sāsane sammāpaṭipatti sambhavati, na mānajātikassāti āha “**nihatamānattā**”ti. **Ussannattā**ti bahubhāvato. Bhovārogyādivatthukā madā suppahiyā honti nimittassa avaṭṭhānato, na tathā kulavijjāmadāti khattiyabrāhmaṇakulānaṃ pabbajitānampi jātivijjā nissāya mānajappanaṃ duppajahanti āha “**yebhuyyena hi -pa- mānaṃ karontī**”ti. **Vijātīyā**ti nihīnajātīyā. **Patitṭhātum na sakkontī**ti suvisuddhaṃ katvā sīlaṃ rakkhitum na sakkonti. Sīlavasena hi sāsane patitṭhahanti. **Patitṭhātunti** vā saccappaṭivedhena lokuttarāya patitṭhāya patitṭhātum. Yebhuyyena hi upanissayasampannā sujātāyeva honti, na dujjātā.

Parisuddhanti rāgādīnaṃ accantameva pahānadīpanato nirupakkilesatāya sabbaso visuddhaṃ. **Saddhaṃ paṭilabhatī**ti pothajjanikasaddhāvasena saddahati. Viññujātikānaṃ hi dhammasampattiggahaṇapubbikā saddhāsiddhi¹ dhammappamāṇadhammappasannabhāvato. **Jāyampatikā**ti gharāṇipatikā. Kāmaṃ “jāyampatikā”ti vutte gharasāmikagharasāminivasena dvinnāmyeva gahaṇaṃ viññāyati, yassa pana purisassa anekā pajāpatiyo honti, tattha kiṃ vattabbanti ekāyapi saṃvāso sambādhoti dassanattam “**dve**”ti vuttam. Rāgādīnā sakiñcanaṭṭhena, khettavatthu-ādinā sapaḷibodhaṭṭhena rāgarajādīnaṃ āgamanapathabhāpi uppajjanaṭṭhānatā evāti dvepi vaṇṇanā ekatthā, byañjanaṃ nānaṃ. **Alaggaṇatthenā**ti asajjanaṭṭhena appaṭibaddhabhāvena. Evaṃ akusalakusalappavattīnaṃ ṭhānabhāvena gharāvāsapabbajānaṃ sambādhabbhokāsataṃ dassetvā

1. Satthusiddhi (Ka)

idāni kusalappavattiyāyeva aṭṭhānaṭṭhānabhāvena tesam taṃ dassetuṃ “apicā”ti-ādi vuttaṃ.

Saṅkhepakathāti visum visum paduddhāraṃ akatvā saṅkhepato atthavaṇṇanā. **Ekampi divasanti** ekadivasamattampi. **Akhaṇḍaṃ katvāti** dukkaṭamattassapi anāpajjanena akhaṇḍitaṃ katvā. **Kilesamalena amalinanti** taṇhāsamkilesādivasena asaṃkiliṭṭhaṃ katvā. **Paridahivāti** nivāsetvā ceva pārupitvā ca. Agāravāso agāraṃ uttarapadalopena, tassa vaḍḍhi-āvahaṃ agārassa hitaṃ.

Bhogakkhandhoti bhogarāsi bhogasamudāyo. **Ābandhanaṭṭhena**ti putto nattāti-ādinaṃ pemavasena sapaṛicchadavasena bandhanaṭṭhena. Amhākameteti nāyantīti **ñātī**, pitāmahapituputtādivasena parivattanaṭṭhena **parivaṭṭo**. Sāmaññavācīpi sikkhā-saddo ājīvasaddasannidhānato upariṃvuccamānavisesāpekkhāya ca visesaniviṭṭhova hotīti vuttaṃ “**yā bhikkhūnaṃ adhisīlasaṅkhātā sikkhā**”ti. Sikkhitabbaṭṭhena **sikkhā**, saha ājīvanti etthāti **sājīvo**. **Sikkhanabhāvenāti** sikkhāya sājīve ca sikkhanabhāvena. **Sikkhaṃ paripūrentoti** sīlasaṃvaraṃ paripūrento. **Sājīvaṇca avītikkamantoti** “nāmakāyo padakāyo niruttikāyo byañjanakāyo”ti¹ vuttaṃ sikkhāpadaṃ bhagavato ca vacanaṃ avītikkamanto hutvāti attho. Idameva ca “sikkhanan”ti vuttaṃ, tattha sājīvānaṃ avītikkamo sikkhāparipūriyā paccayo. Tato hi yāva maggā sikkhāparupūrī hotīti.

Anuppadātāti anubalappadātā, anuvattanavasena vā padātā. Kassa pana anuvattanaṃ padānañcāti? “Sahitānaṃ”ti vuttattā sandhānassāti viññāyati. Tenāha “**sandhānānuppadātā**”ti. Yasmā pana anuvattanavasena sandhānassa padānaṃ ādhānaṃ ārakkhanaṃ vā daḥhakarāṇaṃ hoti, tena vuttaṃ “**dve jane samagge disvā**”ti-ādi. Āramanti etthāti **ārāmo**, ramitabbaṭṭhānaṃ. Yasmā pana ā-kārena vināpi ayamattho labbhati, tasmā vuttaṃ “**samaggarāmotipi pāḷi, ayamevattho**”ti.

1. Vi-Ṭṭha 1. 187 piṭṭhe.

Etthāti—

“Nelaṅgo setapacchādo, ekāro vattatī ratho.

Anīghaṃ passa āyantaṃ, chinnaṣoṭaṃ abandhanaṃ”¹—

imissā gāthāya. Silaṃ hettha nelaṅganti vuttaṃ. Tenevāha “citto gahapati nelaṅganti kho bhante sīlānametaṃ adhivacanaṃ”². **Sukumārā**ti appharusatāya mudukā. **Purassa esā**ti ettha **pura**-saddo tannivāsivācako daṭṭhabbo “gāmo āgato”³ti-ādīsu viya. Tenevāha “**nagaravāsīna**”⁴ti. Manam appāyati vaḍḍhetīti **manāpo**. Tena vuttaṃ “**cittavuḍḍhikarā**”⁵ti.

Kālavādīti-ādi samphappalāpā paṭiviratassa paṭipattidassanaṃ. Atthasamhitāpi hi vācā ayuttakālappayogena atthāvahā na siyāti anatthaviññāpanavācāṃ anulometi, tasmā samphappalāpaṃ pajahantena akālavādītā pariharitabbāti vuttaṃ “**kālavādī**”⁶ti. Kālena vadantenapi ubhayānatthasādhanato abhūtaṃ parivajjetabbanti āha “**bhūtavādī**”⁷ti. Bhūtañca vadantena yaṃ idhalokaparalokahitasampādakaṃ, tadeva vattabbanti dassetuṃ “**atthavādī**”⁸ti vuttaṃ. Atthaṃ vadantenapi lokiyadhammasannissitameva avatvā lokuttaradhammasannissitaṃ katvā vattabbanti dassanatthaṃ “**dhammavādī**”⁹ti vuttaṃ. yathā ca attho lokuttaradhammasannissito hoti, taṃ dassetuṃ “**vinayavādī**”¹⁰ti vuttaṃ. Pañcannaṃ hi samvaravinayānaṃ pañcannañca pahānavinayānaṃ vasena vuccamāno attho nibbānādhiagamanahetubhāvato lokuttaradhammasannissito hotīti. Evaṃ guṇavisesayuttova attho vuccamāno desanākosalle sati sobhati, kiccakaro ca hoti, na aññathāti dassetuṃ “**nidhānavatiṃ vācāṃ bhāsītā**”¹¹ti vuttaṃ. Idāni taṃ desanākosallaṃ vibhāvetuṃ “**kālenā**”¹²ti-ādimāha. Pucchādivasena hi otiṇṇavācāvattusmiṃ ekaṃsādibyākaraṇavibhāgaṃ sallakkhetvā ṭhapanāhetūdāharaṇasandassanādim taṃ taṃ kālānurūpaṃ vibhāventiyā parimitaparicchinnarūpāya vipulataragambhīrodāraparamatthavitthārasaṅgāhikāya kathāya ñāṇabalānurūpaṃ pare yāthāvato dhamme paṭiṭṭhāpento “desanākusalo”¹³ti vuccatīti evamettha atthayojanā veditabbā.

1. Saṃ 2. 482; Khu 1. 173; Khu 10. 202 piṭṭhesu.

2. Saṃ 2. 482 piṭṭhe.

Evam paṭipāṭiyā satta mūlasikkhāpadāni vibhajitvā abhijjhādiṭṭipahānaṃ indriyasamvarajāgariyānuyogehi vibhāvetuṃ tampi nīharitvā ācārasīlasseva vibhajanavasena pāḷi pavattāti tadatthaṃ vivarituṃ “**bījagāmabhūtagāmasamārambhā**”ti-ādi vuttaṃ. Tattha bījanaṃ gāmo samūho **bījagāmo**. Bhūtānaṃ jātānaṃ nibbattānaṃ rukkhagacchalatādīnaṃ samūho **bhūtagāmo**. Nanu ca rukkhādayo cittarahitatāya na jīvā, cittarahitatā ca paripphandābhāvato chinne viruhanato visadisajātibhāvato catuyoni-apariyāpannato ca veditabbā, vuddhi pana pavālasilālavaṇanampi vijjatīti na tesāṃ jīvabhāve kāraṇaṃ, visayaggahaṇaṅca nesāṃ parikkappanāmatthaṃ supanaṃ viya ciñcādīnaṃ, tathā dohaḷādayo, atha¹ kasmā bījagāmabhūtagāmasamārambhā paṭivirati icchitāti? Samaṇasārūppato tannivāsīsattānurakkhaṇato ca. Tenevāha “jīvasaṅgāhino hi moghapurisa manussā rukkhāsmin”ti-ādi².

Mūlameva bījaṃ **mūlabījaṃ**, mūlaṃ bījaṃ etassātipi **mūlabījaṃ**. Sesesupi eseva nayo. **Phalubījanti** pabbabījaṃ. Paccayantarasamavāye sadisaphaluppattiyā visesakāraṇabhāvato viruhanasamatthe sārāphale nirulho bīja-saddo tadatthasāmsiddhiyā mūlādīsupi kesuci pavattatīti mūlādito nivattanatthaṃ ekena bīja-saddena visesetvā vuttaṃ “**bījabījan**”ti “rūparūpaṃ, dukkhadukkhānaṃ”ti³ ca yathā. Kasmā panettha bījagāmabhūtagāmaṃ uddharitvā bījagāmo eva niddiṭṭhoti? Na kho panetaṃ evaṃ daṭṭhabbaṃ, nanu avocumhā “mūlameva bījaṃ mūlabījaṃ, mūlaṃ bījaṃ etassātipi mūlabījan”ti. Tattha purimena bījagāmo niddiṭṭho, dutiyena bhūtagāmo. Duvidhopesa mūlabījaṅca mūlabījaṅca mūlabījanti sāmāṅgāniddesena, ekasesanayena vā uddiṭṭhoti veditabbo. Tenevāha “**pañcavisso**”ti-ādi. **Nīlatiṇarukkhādikassā**ti allatiṇassa ceva allarukkhādikassa ca. **Ādi**-saddena osadhigacchalatādīnaṃ saṅgaho.

Ekam bhattaṃ ekabhattaṃ, taṃ assa atthīti **ekabhattiko**. So pana rattibhojanenapi⁴ siyāti tannivattanatthaṃ āha “**rattūparato**”ti. Evampi aparāṇhabhojīpi siyā ekabhattikoti tannivattanatthaṃ “**virato**

1. Tattha (Sārattha-Ṭī 3. 19; Dī-Ṭī 1. 123 piṭṭhesu.)

2. Vi 2. 51 piṭṭhe.

3. Saṃ 2. 453 piṭṭhe.

4. Rattibhojanopi (Dī-Ṭī 1. 123 piṭṭhe)

vikālabhojanā”ti vuttam. Aruṇuggamanato paṭṭhāya yāva majjhanhikā ayaṃ buddhādīnaṃ ariyānaṃ āciṅṅasamāciṅṅo bhojanassa kālo nāma, tadañño vikālo. Aṭṭhakathāyaṃ pana dutiyapadena rattibhojanassa paṭikkhittattā “atikkante majjhanhike yāva sūriyatthaṅgamanā bhojanaṃ vikālabhojanaṃ nāmā”ti vuttam.

Dārumāsakoti ye vohāraṃ gacchantīti iti-saddena evaṃpakāre dasseti. Aññehi gāhāpane upanikkhittasādiyane ca paṭiggahaṇattho labbhatīti “**neva taṃ uggaṇhāti, na uggaḥāpeti, na upanikkhittaṃ sādiyatī**”ti vuttam. Atha vā tividhaṃ paṭiggahaṇaṃ kāyena, vācāya, manasāti. Tattha kāyena paṭiggahaṇaṃ **uggaṇhanaṃ**, vācāya paṭiggahaṇaṃ **uggaḥāpaṇaṃ**, manasā paṭiggahaṇaṃ **sādiyananti** tividhampi paṭiggahaṇaṃ ekajjhaṃ gahetvā paṭiggahaṇāti vuttanti āha “**neva taṃ uggaṇhāti**”ti-ādi. Esa nayo **āmakadaññapaṭiggahaṇāti**-ādīsupi. Nivārādi-upadhaññassa sāli-ādīmūladhaññantogadhattā vuttam “**sattavidhassā**”ti. “Anujānāmi bhikkhave pañca vasāni bhesajjāni acchavasāṃ macchavasāṃ susukāvasāṃ sūkaravasāṃ gadrabhavasāṃ”ti¹ vuttattā idam **odissa anuññātāṃ** nāma. Tassa pana “kāle paṭiggahitaṃ”ti² vuttattā paṭiggahaṇaṃ vaṭṭati sati paccayeti āha “**aññatra odissa anuññātā**”ti.

Sāruppena vañcanaṃ **rūpakūṭaṃ**, patirūpena vañcanaṃ attho. Aṅgena attano sarīrāvayavena vañcanaṃ **aṅgakūṭaṃ**. Gaṇhanavasena vañcanaṃ **gahaṇakūṭaṃ**. Paṭicchannaṃ katvā vañcanaṃ **paṭicchannakūṭaṃ**. **Akkamatīti** nippīleti, pubbabhāge akkamattīti sambandho. **Hadayanti** nāli-ādīmānabhājanānaṃ abbhantaraṃ. Telādīnaṃ nāli-ādīhi minanakāle ussāpitā sikhāyeva **sikhābhedo**, tassā hāpanaṃ. **Kecīti** sārasamāsācariyā uttaraviharavāsino ca.

Vadhoti mutṭhippahārasātāḷanādīhi himsanaṃ, viheṭhananti attho. Viheṭhanatthopi hi **vadha**-saddo dissati “attānaṃ vadhitvā vadhitvā rodattī”ti-ādīsu³. Yathā hi apaṭiggahabhāvasāmaññe⁴ satipi pabbajitehi appaṭiggahitabbavatthuvisesabhāvasandassanattamaṃ itthikumāridāsīdāsādayo vibhāgena vuttā, evaṃ parassaharaṇabhāvato adinnādānabhāvasāmaññe

1. Vi 3. 291 piṭṭhe.

2. Vi 3. 292 piṭṭhe.

3. Vi 2. 364, 365 piṭṭhesu.

4. Paṭiggahabhāvasāmaññe (Ka) Dī-Ṭī 1. 124 piṭṭhe pana passitabbaṃ.

satipi tulākūṭādayo adinnādānavisesabhāvadassanattamaṃ vibhāgena vuttā, na evaṃ pāṇātipātapariyāyassa vadhassa puna gahaṇe payojanaṃ atthi, tattha sayamkāro, idha paramkāroti ca na sakkā vattum “kāyavacippayogasamuṭṭhāpikā cetaṇā chappayogā”¹ti vacanato, tasmā yathāvutto evamettha attho yutto. Aṭṭhakathāyaṃ pana “vadhōti mārāṇaṃ”ti vuttaṃ. Tampi pothanameva sandhāyāti ca sakkā viññātum mārāṇasaddassa vihimsanepi dissanato.

Cīvarapiṇḍapātānaṃ yathākkamaṃ kāyakucchipariharaṇamattajotanāyaṃ avisesato aṭṭhannaṃ parikkhārānaṃ tappayojanaṭā sambhavatīti dassento “**te sabbepī**”ti-ādimāha. **Etepī**ti navaparikkhārikādayopi appicchā ca santuṭṭhā ca. Na hi tattakena mahicchatā asantuṭṭhitā hotīti.

Catūsu disāsu sukhaṃ viharati, tato eva sukhavihāraṭṭhānabhūtā catasso disā assa santīti **cātuddiso**. Tattha cāyaṃ satte vā saṅkhāre vā bhayena nappaṭihaññatīti **appaṭiḅho**. Dvādasavidhassa santosassa vasena santussanato **santussamāno**. **Itarītarenā**ti uccāvācena parissayānaṃ bāhirānaṃ sīhabyagghādīnaṃ, abhantarānaṃ kāmaccchandādīnaṃ kāyacittūpaddavānaṃ abhibhavanato **parissayānaṃ sahitā**. Bandhanabhāvakarabhayābhāvena **acchambhi**. **Eko** asahāyo. Tato eva khaggamigasīṅgasadisatāya **khaggavisāṇakappo** careyyāti attho.

Chinnapakkho asaṅjātapakkhā vā sakuṇo gantu na sakkotīti pakkhi-saddena visesetvā sakuṇo pāḷiyaṃ vuttoti āha “**pakkhayutto sakuṇo**”ti. Yassa sannidhikāraparibhogo kiñci ṭhapetabbaṃ sāpekkhāṭhapanāṅca natthi, tādiso ayaṃ bhikkhūti dassento “**ayamettha saṅkhepattho**”ti-ādimāha. Ariyanti apenti tato dosā, tehi vā ārakāti **ariyoti** āha “**ariyenāti niddosenā**”ti. **Ajjhattanti** attani. **Niddosasukhanti** nirāmisasukhaṃ kilesavajjarahitattā.

Yathāvutte sīlasaṃvare patīṭṭhitasseva indriyaṃvare icchitabbo tadadhiṭṭhānato tassa ca paripālakabhāvatoti vuttaṃ “**so iminā**

1. Di-Ṭi 1. 125 piṭṭhepi.

ariyena sīlakkhandhena samannāgato bhikkū”ti. **Sesapadesūti** “na nimittaggāhī hoti”ti-ādipadesu. Ayam panettha saṅkhepattho—**na nimittaggāhīti** itthipurisanimittam vā subhanimittādikam vā kilesavatthubhūtam nimittam na gaṇhāti, diṭṭhamatteyeva saṅṭhāti. **Nānubyañjanaggāhīti** kilesānam anu anu byañjanato pākāṭabhāvakaraṇato anubyañjananti laddhavohāram hatthapādasiṭhasitakathitavilokitātibhedam ākāram na gaṇhāti. Yam tattha bhūtam, tadeva gaṇhāti. **Yatvādhikaraṇamenanti**-ādimhi yaṅkāraṇā yassa cakkhundriyāsamvarassa hetu etam puggalam satikavāṇena cakkhundriyam asamvutam apihitacakkhudvāram hutvā viharantam ete abhijjhādayo dhammā anvassaveyyum anuppabandheyyum. **Tassa samvarāya paṭipajjati**ti tassa cakkhundriyassa satikavāṇena pidahanatthāya paṭipajjati. Evam paṭipajjantoyeva ca “**rakkhati cakkhundriyam, cakkhundriye samvaram āpajjati**”ti vuccati. **Sotena saddam sutvāti**-ādīsupi eseva nayo. Evamidam saṅkhepato rūpādīsu kilesānubandhanimittādiggāhaparivajjanalakkhaṇam indriyasamvaram sīlam veditabbam. Ayamettha saṅkhepo, vitthāro pana **visuddhimaggasamvaṇṇanāsu**¹ vuttanayeneva veditabbo. **Kilesehi anavasittasukhanti**-ādīsu rūpādīsu nimittādiggāhaparivajjanalakkhaṇattā indriyasamvarassa kilesehi anavasittasukhatā avikiṇṇasukhatā cassa vuttā.

Abhikkamanam **abhikkanto**, purato gamanam. Paṭikkamanam **paṭikkanto**, paccāgamanam. Tadubhayampi catūsu iriyāpathesu labbhati. Gamane tāva purato kāyam abhiharanto abhikkamati nāma, paṭinivattento paṭikkamati nāma. Thānepi thitakova kāyam purato oṇamanto abhikkamati nāma, pacchato apanāmento paṭikkamati nāma. Nisajjāyapi nisinnakova āsanassa purima-aṅgābhimukho saṁsaranto abhikkamati nāma, pacchimanam aṅgappadesam paccāsaṁsaranto paṭikkamati nāma. Nipajjāyapi eseva nayo.

Sāthakasampajaññanti-ādīsu samantato pakārehi, pakāṭṭham vā savisesam jānātīti sampajāno, sampajānassa bhāvo sampajaññam, tathāpavattam nānam. Dhammato vuḍḍhisāṅkhātena saha atthena vattatīti sāthakam, abhikkantādisāthakassa sampajaññam **sāthakasampajaññam**. Sappāyassa attano upakārāvahassa sampajaññam **sappāyasampajaññam**. Abhikkamādīsu

1. Visuddhi-Ṭī 1. 38 piṭṭhe.

bhikkhācāragocare, aññatthāpi pavattesu avijahitakammaṭṭhānasaṅkhāte gocare sampajaññaṃ **gocarasampajaññaṃ**. Abhikkamādisu asammuyhanameva sampajaññaṃ **asammohasampajaññaṃ**. Tattha¹ abhikkamanacitte uppanne cittavaseneva agantvā “kinnu me ettha gatena attho atthi natthi”ti atthānattham pariggahetvā atthapariggahaṇam **sāttahasampajaññaṃ**. Tattha ca **atthoti** cetiyadassanabodhidassanasamghadassanatheradassana-asubhadassanādivasena dhammato vaḍḍhi. Cetiyaṃ vā bodhiṃ vā disvāpi hi buddhārammaṇam, samghadassanena samghārammaṇam pītiṃ uppādetvā tadeva khayavayato sammasanto arahattaṃ pāpuṇāti. There disvā tesam ovāde patiṭṭhāya asubham disvā tattha paṭhamajjhānam uppādetvā tadeva khayavayato sammasanto arahattaṃ pāpuṇāti, tasmā etesam dassanam “sāttakan”ti vuttam. Keci pana “āmisatopi vaḍḍhi atthoyeva tam nissāya brahmacariyānuggahāya paṭipannattā”ti vadanti.

Tasmim pana gamane sappāyāsappāyam pariggahetvā sappāyapariggaṇhanam **sappāyasampajaññaṃ**. Seyyathidam. Cetiyaḍassanam tāva sāttam. Sace pana cetiyassa mahāpūjāya dasadvādasayojanantare parisā sannipatanti, attano vibhavānurūpam itthiyopi purisāpi alaṅkatapaṭiyattā cittaḱammārūpakāni viya saṅcaranti. Tatra cassa iṭṭhe ārammaṇe lobho, aniṭṭhe paṭigho, asamapekkhane moho uppajjati, kāyasamsaggāpattim vā āpajjati, jīvitabrahmacariyānam vā antarāyo hoti. Evaṃ tam ṭhānam asappāyam hoti, vuttappakāra-antarāyābhāve sappāyam. Bodhidassanepi eseva nayo. Samghadassanampi sāttam. Sace pana antogāme mahāmaṇḍapam kāretvā sabbarattim dhammassavanam karontesu manussesu vuttappakāreneva janasannipāto ceva antarāyo ca hoti. Evaṃ tam ṭhānam asappāyam, antarāyābhāve sappāyam. Mahāparisāparivārānam therānam dassanepi eseva nayo. Asubhadassanampi sāttam maggaphalādhigamahetubhāvato. Dantakaṭṭhatthāya sāmaṇeram gahetvā gatadaharabhikkhuno vatthupettha kathetabbam. Evaṃ sāttampi panetaṃ purisassa mātugāmāsubham asappāyam, mātugāmassa ca purisāsubham. Sabhāgameva sappāyanti evam sappāyapariggaṇhanam sappāyasampajaññaṃ nāma.

1. Dī-Ṭṭha 1. 165; Ma-Ṭṭha 1. 258 piṭṭhesupi passitabbam.

Evam pariggahitasāthakasappāyassa pana aṭṭhatimsāya kammaṭṭhānesu attano cittaruciyaṃ kammaṭṭhānasaṅkhātāṃ gocaraṃ uggahetvā bhikkhācāragocare taṃ gahetvāva gamaṇaṃ **gocarasampajaññaṃ** nāma.

Abhikkamādisu pana asammuyhanaṃ **asammohasampajaññaṃ**. Taṃ evaṃ veditabbaṃ—idha bhikkhu abhikkamanto vā paṭikkamanto vā yathā andhaputhujjanā abhikkamādisu “attā abhikkamati, attanā abhikkamo nibbattito”ti vā, “ahaṃ abhikkamāmi, mayā abhikkamo nibbattito”ti vā sammuyhanti, tathā asammuyhanto “abhikkamāmi”ti citte uppajjamāne teneva cittena saddhiṃ cittasamuṭṭhānā vāyodhātu viññattiṃ janayamānā uppajjati, iti cittakiriyavāyodhātuvipphārasena ayaṃ kāyasammato aṭṭhisāṅghāto abhikkamati, tasseva abhikkamato ekekapaduddharaṇe pathavīdhātu, āpodhātūti dve dhātuyo omattā honti mandā, itarā dve adhimattā honti balavatiyo. Tathā atiharaṇavīti-haraṇesu. Vossajjane tejodhātu, vāyodhātūti dve dhātuyo omattā honti mandā, itarā dve adhimattā balavatiyo. Tathā sannikkhepanasannirumbhanesu. Tattha uddharaṇe pavattā rūpārūpadhammā atiharaṇaṃ na pāpuṇanti, tathā atiharaṇe pavattā vīti-haraṇaṃ, vīti-haraṇe pavattā vossajjanaṃ, vossajjane pavattā sannikkhepanaṃ, sannikkhepane pavattā sannirumbhanaṃ na pāpuṇanti. Tattha tattheva pabbapabbaṃ sandhisandhi odhi-odhi hutvā tatthakapāle pakkhittatilaṃ viya paṭapaṭāyanta¹ bhijjanti. Tattha ko eko abhikkamati, kassa vā ekassa abhikkamanaṃ? Paramatthato hi dhātūnaṃyeva gamaṇaṃ, dhātūnaṃ ṭhānaṃ, dhātūnaṃ nisajjanaṃ, dhātūnaṃ sayanaṃ. Tasmim̐ tasmim̐ hi koṭṭhāse saddhiṃ rūpena—

Aññaṃ uppajjate cittaṃ, aññaṃ cittaṃ nirujjhati.

Avīcimanusambandho, nadīsotova vattatīti².

Evam̐ abhikkamādisu asammuyhanaṃ asammohasampajaññaṃ nāmāti. **Paccayasampattinti** paccaya-pāripūriṃ. **Ime cattāro**ti sīlasaṃvaro, santoso, indriyasaṃvaro, satisampajaññanti ime cattāro araṇṇavāsassa

1. Taṭataṭāyanta (Ka) 2. Di-Ṭṭha 1. 173; Ma-Ṭṭha 1. 265; Saṃ-Ṭṭha 3. 255 piṭṭhesupi.

sambhārā. **Vattabbataṃ āpajjati** “asukassa bhikkhuno araṇṇe tiracchānagatānaṃ viya vanacarakānaṃ viya ca nivāsamattameva, na araṇṇāvāsānucchavikā kāci sammāpaṭipatti”ti apavādasena vattabbataṃ, āraṇṇakehi vā tiracchānagatehi vanacarakavisabhāgajanehi vipaṭipattivasena vatthabbataṃ āpajjati. **Bheravasaddaṃ sāventi**, tāvatā apalāyantānaṃ **hatthehi sīsaṃ -pa- karonti**. Kālakasadisattā **kālakarṇ**, vitikkamasaṅkhātāṃ thullavajjaṃ. Tilakasadisattā **tilakarṇ**, micchāvitakkasaṅkhātāṃ aṇumattavajjaṃ. **Tanti pītiṃ**. Vibhūtabhāvena upaṭṭhānato **khayato sammasanto**.

Vivittanti janavivittaṃ. Tenāha “**suññaṃ**”ti. Taṃ pana janasaddanigghosābhāvena vedittabbaṃ saddakaṇṭakattā jhānassāti āha “**appasaddaṃ appanigghosanti attho**”ti. **Etadevā**ti nissaddatāmyeva. **Vihāro** pākāraparicchinnō sakalo āvāso. **Aḍḍhayogo** dīghapāsādo, “garuḷasaṅṭhānapāsādo”tipi vadanti. **Pāsādo** caturassapāsādo. **Hammiyaṃ** muṇḍacchadanapāsādo. **Aṭṭo** paṭirājūnaṃ paṭibāhanayoggo catuppañcabhūmako patissayaviseso. **Mālo** ekakūṭasaṅgahito anekakoṇavanto patissayaviseso. Aparō nayo—**vihāro** nāma dīghamukhapāsādo. **Aḍḍhayogo** ekapassacchadanakasenāsanāṃ. Tassa kira ekapasse bhitti uccatārā hoti, itarapasse nīcā. Etena taṃ ekapassacchadanakāṃ hoti. **Pāsādo** nāma āyatacaturassapāsādo. **Hammiyaṃ** muṇḍacchadanaṃ candhikaṅgaṇayuttaṃ. **Guhā** nāma kevalā pabbataguḥā. **Leṇaṃ** dvārabaddhaṃ pabbhāraṃ. **Maṇḍapoti** sākḥāmaṇḍapo. **Āvasathabhūtaṃ** senāsanāṃ viharitabbaṭṭhena **vihārasenāsanāṃ**. Masārakādi mañcapīṭhaṃ tattha attharitabbabhisi upadhānañca mañcapīṭhasambandhato **mañcapīṭhasenāsanāṃ**. Cimilikādi bhūmiyaṃ santharitabbatāya **santhataśenāsanāṃ**. Abhisāṅkhatābhāvato kevalaṃ sayanassa nisajjāya ca okāśabhūtaṃ rukkhamūlādi paṭikkamitabbaṭṭhānaṃ **okāśasenāsanāṃ**. **Senāsanaggahaṇena gahitamevā**ti “vivittaṃ senāsanā”ti iminā senāsanaggahaṇena gahitameva sāmāññajotanābhāvato.

Yadi evaṃ kasmā “araṇṇaṃ”ti vuttanti āha “**imassa paṇā**”ti-ādi. **Bhikkhunīnaṃ** vasena āgatanti idaṃ vinaye tathā āgataṃ sandhāya

vuttaṃ, **abhidhammepi**¹ pana “araññanti nikkhamitvā bahi indakhilā sabbametaṃ araññan”ti āgatameva. Tattha hi yaṃ na gāmappadesantogadham, taṃ araññanti nippariyāyavasena tathā vuttaṃ. **Dhūtaṅganiddese**² yaṃ vuttaṃ, taṃ yuttaṃ, tasmā tattha vuttanayena gahetabbanti adhippāyo. **Rukkhamūlanti** rukkkhasamīpaṃ. Vuttaṃ hetuṃ “yāvata majjhanhike kāle samantā chāyā pharati, nivāte paṇṇāni patanti, ettāvata rukkkhamūlan”ti. **Sela**-saddo avisesato pabbatapariyāyoti katvā vuttaṃ “**pabbatanti selan**”ti, na silāmayameva. Paṃsumayādiko hi tividhopi pabbato evāti. **Vivaranti** dvinnam pabbatānaṃ mitho āsannatare t̥hitānaṃ ovarakādisadisam vivaraṃ. **Ekasmimyeva vā** pabbate. **Umaṅgasadisanti** suduṅgāsadisam³. **Manussānaṃ anupacaraṭṭhānanti** pakatisaṅcāravasena manussehi na saṅcaritabbaṭṭhānaṃ. **Ādi**-saddena “**vanapatthanti** vanasaṅṭānametaṃ senāsanānaṃ adhivacanaṃ. **Vanapatthanti** bhimsanakānametaṃ. **Vanapatthanti** salomahaṃsānametaṃ. **Vanapatthanti** pariyaṅtānametaṃ. **Vanapatthanti** na manussūpacārānametaṃ senāsanānaṃ adhivacanaṃ”ti⁴ imaṃ pāḷippadesaṃ saṅgaṇhāti. **Acchannanti** kenaci chadanena antamaso rukkkhasākhāyapi na chāditaṃ. **Nikkhaḍḍhitvāti** nīharitvā. **Pabbhāraṇasadiseti** pabbhārasadise, leṇasadise vā.

Piṇḍapātapariyesanaṃ **piṇḍapāto** uttarapadalopenāti āha “**piṇḍapātapariyesanato paṭikkanto**”ti. **Pallaṅkanti** ettha **pari**-saddo samantatoti etasmim athe, tasmā vāmoruṃ dakkhiṇoruṅca samaṃ t̥hapetvā ubho pāde aññaṃaññaṃ sambandhe katvā nisajjā pallaṅkanti āha “**samantato ūrubaddhāsanaṃ**”ti. Ūrūnaṃ bandhanavasena nisajjā pallaṅkaṃ. **Ābhujitvāti** ca yathā pallaṅkavasena nisajjā hoti, evaṃ ubho pāde ābhujite samīñjite katvā. Taṃ pana ubhinnaṃ pādānaṃ tathāsambandhatākaraṇanti āha “**bandhitvā**”ti. Heṭṭhimakāyassa anujukaṃ t̥hapanam nisajjāvacaneneva bodhitanti **ujum kāyanti** ettha **kāya**-saddo uparimakāyavisayoti āha “**uparimasarīraṃ ujukaṃ t̥hapetvā**”ti. Taṃ pana ujukaṃ t̥hapanam sarūpato payojanato ca dassetuṃ “**aṭṭhārasā**”ti-ādi vuttaṃ. **Na paṇamantīti** oṇamanti. **Na paripatatīti** na vigacchati vīthim na laṅgheti,

1. Abhi 2. 260 piṭṭhe.

2. Visuddhi 1. 19 piṭṭhe.

3. Suruḷhasadisam (Ka) Dī-Ṭī 1. 257; Si-Ṭī Abhinava 2. 122 piṭṭhesu passitabbaṃ.

4. Abhi 2. 260 piṭṭhe.

tato eva pubbenāparam visesasampattiyā kammaṭṭhānaṃ vuddhiṃ phātiṃ gacchati. **Parimukhanti** ettha **pari**-saddo abhi-saddena samānatthoti āha “**kammaṭṭhānābhimukhan**”ti, bahiddhā puthuttārammaṇato nivāretvā kammaṭṭhānaṃyeva purakkhatvāti attho. Samīpattho vā **pari**-saddoti dassento “**mukhasamīpe vā katvā**”ti āha. Ettha ca yathā “vivittam senāsanaṃ bhajati”ti adinā bhāvanānurūpaṃ senāsanaṃ dassitaṃ, evaṃ **nisīdatī**ti iminā alīnānuddhaccapakkihiyo santo iriyāpatho dassito. “Pallaṅkaṃ ābhujitvā”ti iminā nisajjāya daḥhabhāvo. “Parimukhaṃ satim upaṭṭhapetvā”ti iminā ārammaṇapariggahūpāyo.

Parīti pariggahaṭṭho “pariṇāyikā”ti-ādīsu¹ viya. **Mukhanti niyyānaṭṭho** “suññatavimokkhamukhan”ti-ādīsu viya. Paṭipakkhato niggamaṇaṭṭho hi niyyānaṭṭho, tasmā **pariggahitaniyyānaṃ satinti** sabbathā gahitāsammaṃsaṃ pariccattasammaṃsaṃ satim katvā, paramasatinepakkaṃ upaṭṭhapetvāti attho.

Abhijjhāyati vijjhati abhikaṅkhati etāyāti **abhijjhā**, lobho. **Lujjanaṭṭhenāti** bhijjanaṭṭhena, khaṇe khaṇe bhijjanaṭṭhenāti attho. **Vikkhambhanavasenāti** ettha vikkhambhanaṃ anuppādanaṃ appavattanaṃ paṭipakkhena suppahīnatā. **Pahīnattāti** ca pahīnasadisataṃ sandhāya vuttaṃ jhānassa anadhigatattā. Tathāpi nayidaṃ cakkhu viññāṇaṃ viya sabhāvato vigatābhijjhaṃ, atha kho bhāvanāvasena. Tenāha “**na cakkhuvīññānasadisena**”ti. **Eseva nayoti** yathā cakkhuvīññāṇaṃ sabhāvena vigatābhijjhaṃ abyāpannañca na bhāvanāya vikkhambhitattā, na evamidaṃ. Idaṃ pana cittaṃ bhāvanāya parisodhitattā abyāpannaṃ vigatathinamidham anuddhataṃ nibbicikicchañcāti attho. **Purimapakatinti** parisuddhapaṇḍarasabhāva. “Yā tasmim samaye cittaṃ akalyatā”ti-ādina² thinassa, “yā tasmim samaye kāyassa akalyatā”ti-ādina² ca middhassa abhidhamme niddiṭṭhattā vuttaṃ “**thinam cittagelaññam middham cetasikagelaññam**”ti. Satipi hi aññamaññaṃ avippayoge citta kāyalahutādīnaṃ viya citta cetasikānaṃ yathākkamaṃ taṃtaṃvisesassa yā tesam akalyatādīnaṃ visesapaccayatā, ayametesam sabhāvoti daṭṭhabbam. **Ālokasaññīti** ettha atisayattavisitṭha-atthi-atthāvabodhakoyamīkāroti dassento āha “**rattimpi -pa- samannāgato**”ti. **Idam ubhayanti** satisampajaññaṃ māha.

1. Abhi 1. 20 piṭṭhe.

2. Abhi 1. 233; Abhi 2. 263 piṭṭhesu.

Atikkamitvāti vikkhambhanavasena pajahitvā. Kathamidam kathamidanti pavattiyā kathamkathā, vicikicchā, sā etassa atthīti kathamkathī, na kathamkathīti **akathamkathī**, nibbicikiccho. **Lakkhaṇādibhedatoti** ettha **ādi**-saddena paccayaparihānappahāyakādīnampi saṅgaho daṭṭhabbo. Tepi hi pabhedato daṭṭhabbāti. **Ucchinditvā pātentī**ti ettha ucchindanam pātanañca tāsam paññānam anuppannānam uppajjitum appadānameva. Iti mahaggatānuttarapaññānam ekaccāya ca parittapaññāya anuppattihetubhūtā nīvaraṇadhammā itarāya ca samatthataṃ vihanantiyevāti “**paññāya dubbalīkaraṇā**”ti vuttā. **Appentoti** nigamento.

Attantapasuttavaṇṇanā niṭṭhitā.

9. Taṇhāsuttādivaṇṇanā

199-200. Navame tayo bhave ajjhottharivā ṭhitam “ajjhattikassa upādāya aṭṭhārasa taṇhāvicaritānī”ti-ādinā vuttam taṃ taṃ attano koṭṭhāsabhūtam jālametissā atthīti **jālinī**. Tenāha “**tayo vā bhave**”ti-ādi. **Tattha tathāti** tasmim tasmim bhave, ārammaṇe vā. **Apicāti**-ādinā niddesanayena visattikāpadassa attham dassento niddesapāḷiyā ekadesam dasseti “**visamūlā**”ti-ādinā. Ayam hettha **niddesapāḷi**¹—

“Visattikāti kenaṭṭhena visattikā? Visatāti visattikā. Visaṭāti visattikā. Visālāti visattikā. Visakkatīti visattikā. Visamharatīti visattikā. Visamvādikāti visattikā. Visamūlāti visattikā. Visaphalāti visattikā. Visaparibhogāti visattikā. Visālā vā pana sā taṇhā rūpe sadde gandhe rase phoṭṭhabbe kule gaṇe āvāse lābhe yase pasamsāya sukhe cīvara piṇḍapāta senāsana gilānapaccayabhesajja parikkhāre kāmādhātuyā rūpadhātuyā arūpadhātuyā kāmabhava rūpabhava arūpabhava saññibhave asaññibhave

1. Khu 7. 7; Khu 8. 76, 242 piṭṭhesu.

nevasaññināsaññibhave ekavokārabhave catuvokārabhave
pañcavokārabhave atīte anāgate paccuppanne
diṭṭhasutamutaviññātabbesu visaṭā vitthatāti visattikā”ti.

Tattha¹ **visaṭā**ti vitthatā rūpādīsu tebhūmakadhamabyāpanavasena.
Visaṭāti purimavacanameva ta-kārassa ṭa-kāraṃ katvā vuttam. **Visālā**ti
vipulā. **Visakkaṭī**ti parisahati. Ratto hi rāgavatthunā parena tāliyamānopi
sahati, vipphandanam vā “visakkanan”ti vadanti. **Visamharatī**ti tathā tathā
kāmesu ānisaṃsaṃ dassentī vividhehi ākārehi
nekkhammābhimukhappavattito cittaṃ saṃharati saṃkhipati. Visam vā
dukkham, taṃ harati upaneṭīti attho. Aniccādīṃ niccādīto gaṇhantī
visamvādikā hoti. Dukkhanibbattakassa kammassa hetubhāvato **visamūlā**,
visam vā dukkhadukkhādibhūtā vedanā mūlam etissāti **visamūlā**.
Dukkhasamudayattā visam phalaṃ etissāti **visaphalā**. Taṇhāya rūpādīkassa
dukkhassa paribhogo hoti, na amatassāti sā **visaparibhogā** vuttā. Sabbattha
niruttivasena padasiddhi veditabbā. Yo panettha padhāno attho, taṃ
dassetum puna “**visaṭā vā panā**”ti-ādi vuttam.

Tantaṃ vuccati² vatthavinanattam tantavāyehi daṇḍake āsañcitvā
pasāritasuttavaṭṭi “tanīyati”ti katvā, taṃ pana suttam santānākulatāya
nidassanabhāvena ākulameva gahitanti āha “**tantam viya ākulajāto**”ti.
Saṅkhepato vuttamattham vitthārato dassetum “**yathā nāmā**”ti-ādi vuttam.
Samānetunti pubbenāparam samaṃ katvā ānetum, avisamaṃ ujum kātunti
attho. Tantameva vā ākulaṃ tantākulaṃ, tantākulaṃ viya jāto bhūtoti
tantākulakajāto. Vinanato gulāti ittiliṅgavasena laddhanāmassa tantavāyassa
guṇṭhikaṃ nāma ākulabhāvena aggato vā mūlato vā duviññeyyameva
khalibaddhavantasuttanti āha “**gulāguṇṭhikaṃ vuccati**
pesakārakañjīyasuttan”ti. **Sakuṇikā**ti paṭapadasakuṇikā³. Sā hi
rukkhasākhāsu olambanakuṭavā hoti. Taṃ

1. Mahāniddeśa-Ṭṭha 35; Saṃ-Ṭṭi 1. 50 piṭṭhesupi passitabbaṃ.

2. Dī-Ṭṭi 2. 98; Saṃ-Ṭṭi 2. 103 piṭṭhesupi passitabbaṃ.

3. Kuṭabandhasakuṇikā (Ka), kulāvakasakuṇikā (Dī-Ṭṭi 2. 90 piṭṭhe),
vaṭṭacāṭakasakuṇikā (Saṃ-Ṭṭi 2. 104 piṭṭhe.)

hi sā kuṭavaṃ tato tato tiṇahīrādike ānetvā tathā vinati, yathā te pesakārakañjīyasuttaṃ viya aggena vā aggaṃ, mūlena vā mūlaṃ samānetuṃ vivecetūṃ vā na sakkā. Tenāha “**yathā**”ti-ādi. **Tadubhayampi** “gulāguṇṭhikan”ti vuttaṃ kañjīyasuttaṃ kulāvakañca. **Purimanayenevāti** “evameva sattā”ti-ādinā vuttanayeneva. Kāmaṃ muñjapabbajatiṇāni yathājātānipi dīghabhāvena pativā araññaṭṭhāne aññamaññaṃ vinandhitvā ākulabyākulāni hutvā tiṭṭhanti, tāni pana na tathā dubbiveciyāni yathā rajjubhūtānīti dassetuṃ “**yāthā tāni**”ti-ādi vuttaṃ. Sesamettha heṭṭhā vuttanameva.

Apāyāti avaḍḍhikā, sukkena, sukhaḥetunā vā virahitāti attho. **Sukkhassa gatibhāvatoti** āpāyikassa dukkhassa pavattiṭṭhānabhāvato. **Sukhasamussayatoti** abbhodayato. **Vinipatitattāti** virūpaṃ nipātattā, yathā tenattabhāvena sukhasamussayo na hoti, evaṃ nipatitakkā. **Itaroti** saṃsāro. Nanu “apāyan”ti-ādinā vuttopi saṃsāro evāti? Saccametam, nirayādīnaṃ pana adhimattadukkhabhāvadassanattam apāyādiggahaṇaṃ. Gobalībaddañāyenāyamatto veditabbo.

Khandhānañca paṭipāṭīti pañcannaṃ khandhānaṃ hetuphalabhāvena aparāparappavatti. **Abbocchinnam vattamānāti** avicchedena vattamānā. **Tam sabbampīti** tam “apāyan”ti-ādinā vuttaṃ sabbaṃ apāyadukkhañca vaṭṭadukkhañca. **Mahāsamudde vātakkhittā nāvā viyāti** idaṃ paribbhamanaṭṭhānassa mahantadassanattahañceva paribbhamanassa anavaṭṭhitatādassanattahañca upamā. **Yante yuttagoṇo viyāti** idaṃ pana avasībhāvadassanattahañceva duppamokkhabhāvadassanattahañcāti veditabbaṃ.

“**Samūhaggāhoti** taṇhāmānadiṭṭhīnaṃ sādharmaṇaggāho”ti vadanti, “itthaṃ evaṃ saññathā”ti pana visesaṃ akatvā gahaṇaṃ samūhaggāhoti daṭṭhabbo. **Visesaṃ akatvāti** ca anupanidhānaṃ samato asamato ca upanimānanti imaṃ vibhāgaṃ akatvāti attho. **Itthanti** hi anupanidhānaṃ kathitaṃ. **Evaṃ aññathāti** pana samato asamato ca upanidhānaṃ. **Aññaṃ ākāraṃti** parasantānagataṃ ākāraṃ.

Atthīti sadā samvijjatīti attho. **Sīdatī**ti nassati.

Saṁsayaparivitakkavasenati “kiṁ nu kho ahaṁ siyaṁ, na siyaṁ”ti evaṁ parivitakkavasena. **Patthanākappanavasena**ti “api nāma sādhu paṇāhaṁ siyaṁ”ti evaṁ patthanāya kappanavasena. **Suddhasīsā**ti taṇhāmānadiṭṭhīnaṁ sādharmaṇā sīsā. “Itthaṁ evaṁ aññathā”ti vuttassa visesassa anissitattā “**suddhasīsā**”ti vuttā. Tattha diṭṭhisīsehi diṭṭhiyā gahitāya tadavinābhāvinī taṇhā dassitā, catūhi sīdehi dvādasahi ca sīsamūlakehi mānadiṭṭhīhi ayameva taṇhā dassitāti āha “**evamete -pa- taṇhāvicaritadhammā veditabbā**”ti. Nanu ca mānadiṭṭhiggāhopi idhādhippeto, yato “taṇhāmānadiṭṭhivasena samūhaggāho”ti aṭṭhakathāyaṁ vuttaṁ, tasmā kathaṁ taṇhāvicaritānīti idaṁ vacanaṁ? Vuccate—diṭṭhimānesupi taṇhāvicaritānīti vacanaṁ aññamaññaṁ vippayogīnaṁ diṭṭhimānānaṁ taṇhāya avippayogānaṁ taṁmūlakattā tappadhānatāya katanti veditabbaṁ. Dasamaṁ uttānameva.

Taṇhāsuttādivaṇṇanā niṭṭhitā.

Mahāvaggavaṇṇanā niṭṭhitā.

Catutthapaṇṇāsako niṭṭhito.

5. Pañcamapaṇṇāsaka

(21) 1. Sappurisavagga

1. Sikkhāpadasuttādivaṇṇanā

201-210. Pañcamassa paṭhame **asappurisoti** lāmakapuriso. Pāṇam atipāteṭīti **pāṇātipāṭī**. Adinnaṃ ādiyati **adinnādāyī**. Kāmesu micchā caratīti **kāmesumicchācārī**. Musā vadati **musāvādī**. Surāmerayamajjapamāde tiṭṭhatīti **surāmerayamajjapamādaṭṭhāyī**. **Pāṇātipāte samādapetīti** yathā pāṇam atipāteṭi, tathā naṃ tattha gahaṇam gaṇhāpeti. Sesesupi eseva nayo. **Ayaṃ vuccati**ti ayaṃ evarūpo puggalo yasmā sayamkatena ca dussilyena samannāgato, yañca samādapitena katam, tato upaḍḍhassa dāyādo, tasmā “asappurisenā asappurisataro”ti vuccati. **Sappurisoti** uttamapuriso. **Sappurimasana sappurisataroti** attanā ca katena susilyena samannāgatattā yañca samādapito karoti, tato upaḍḍhassa dāyādattā uttamapurisenā uttamapurisataro. Ettha ca parena katam dussilyam susilyam vā āṇattiyā attanā ca vacippayogena katanti āṇāpanavasena pasutapāpassa puññassa vā dāyādo “tato upaḍḍhassa dāyādo”ti vutto. Dutiyādīni uttānatthāneva.

Sikkhāpadasuttādivaṇṇanā niṭṭhitā.

Sappurisavaggavaṇṇanā niṭṭhitā.

211-220. Dutīyo parisāsobhanavaggo uttānatthoyeva.

(23) 3. Duccaritavaggavaṇṇanā

221-231. Tatiyassa paṭhamādīni uttānatthāneva. **Cintākavīti**-ādīsu vatthu-anusandhi-ubhayameva cirena cintetvā karaṇavasena **cintākavi** veditabbo. Kiñci sutvā sutena assutam anusandhetvā karaṇavasena **sutakavi**, kiñci attham upadhāretvā tassa saṅkhipanavittāraṇādivasena

atthakavi, yaṁkiñci parena kataṁ kabbāṁ nāṭakaṁ vā disvā taṁsadisameva aññaṁ attano ṭhānuppattikappaṭibhānena karaṇavasena **paṭibhānakavi** veditabbo.

Duccaritavaggaṇṇanā niṭṭhitā.

(24) 4. Kammavagga

1. Saṁkhittasuttavaṇṇanā

232. Catutthassa paṭhame **kāḷakanti** malīnaṁ cittassa appabhassarabhāvakaranti attho. Taṁ panettha kammaṭṭhappattameva adhippetanti āha “**dasa-akusalakammaṭṭhan**”ti. Kaṇhābhijātihetuto vā **kaṇhaṁ**. Tenāha “**kaṇhavipākaṁ**”ti. Apāyūpapatti manussesu ca dobhaggiyaṁ kaṇhavipāko, yaṁ tassa tamabhāvo vutto. **Nibbattanato**ti nibbattāpanato. **Paṇḍarakanti** odātaṁ, cittassa pabhassarabhāvakaranti attho. Sukkābhijātihetuto vā **sukkaṁ**. Tenāha “**sukkavipākaṁ**”ti. Saggūpapatti manussasobhaggiyañca sukkavipāko, yaṁ tassa jotibhāvo vutto. Ukkatṭhaniddesena pana “**sagge nibbattanato**”ti vuttaṁ, nibbattāpanatoti attho. **Missakakammanti** kālena kaṇhaṁ kālena sukkanti evaṁ missakavasena katakammaṁ. **Sukhadukkhavipākaṁ**ti vatvā tattha sukhadukkhānaṁ pavatti-ākāraṁ dassetuṁ “**missakakammaṁ hī**”ti-ādi vuttaṁ. Kammaṣṣa kaṇhasukkasamaññā kaṇhasukkābhijātihetutāyāti apacayagāmitāya tadubhayaviddhaṁsakassa kammakkhayakarakammaṣṣa idha suttapariyāyopi icchitoti āha “**ubhaya -pa- ayamettha attho**”ti. Tattha **ubyayavipākassāti** yathādhigatassa ubhayavipākassa. Sampattibhavapariyāpanno hi vipāko idha sukkāṁ sukkavipākoti adhippeto, na accantaparisuddho ariyaphalavipāko.

Saṁkhittasuttavaṇṇanā niṭṭhitā.

2. Vitthārasuttavaṇṇanā

233. Dutiye **sabyābajjhanti** vā sadukkhaṃ, attanā uppādetabbena dukkhena sadukkhaṃ attho, dukkhasaṃvattanikanti vuttaṃ hoti. Kāyasaṅkhārādīsu kāyadvāre gahaṇādivasena copanappattā dvādasa akusalacetanā abyābajjhakāyasaṅkhāro nāma. Vacīdvāre hanusaṃcopanavasena vacībhedappavattikā tāyeva dvādasa vacīsaṅkhāro nāma. Ubhayacopanaṃ appatvā raho cintentassa manodvāre pavattā manosaṅkhāro nāma. Iti tīsupi dvāresu kāyaduccarītādibhedā akusalā cetanāva saṅkhārāti veditabbā. **Abhisāṅkharotīti āyūhati**, taṃ pana āyūhanaṃ paccayasamavāyasiddhito saṅkaḍḍhitvā piṇḍanaṃ viya hoti. **Sadukkhaṃ lokanti** apāyalokamāha. **Vipākaphassāti** phassasīsenā tattha vipākappavattamāha. **Vemānikapetāti** idaṃ bāhullato vuttaṃ, itaresampi vinipātikānaṃ kālena sukhaṃ, kālena dukkhaṃ hoti. **Tassa pahānāyāti** tassa yathāvuttassa kammaṃ anuppattidhammatāpādanāya. **Yā cetanāti** yā apacayagāminicetanā. Tenevāha “**vivaṭṭagāminī maggacetanā veditabbā**”ti.

Vitthārasuttavaṇṇanā niṭṭhitā.

3. Soṇakāyanasuttādivaṇṇanā

234-240. Tatiye **purimāni bhante divasāni purimatarānī**ti ettha hiyyo divasaṃ purimaṃ nāma, tato paraṃ purimataranti āha “**atītānantaradivasato paṭṭhāyā**”ti-ādi. Iti imesu dvīsu pavattito yathākkamaṃ purimapurimatarabhāvo dassito. Evaṃ santepi yadettha “purimataran”ti vuttaṃ, tato pabhuti yaṃ yaṃ oraṃ, taṃ taṃ purimaṃ. Yaṃ yaṃ paraṃ, taṃ taṃ purimataraṃ orapārabhāvassa viya purimatarabhāvassa ca apekkhāsiddhattā. Sesāṃ vuttanayameva. Catuttādīni uttānatthāneva.

Soṇakāyanasuttādivaṇṇanā niṭṭhitā.

10. Samaṇasuttādivaṇṇanā

241-2. Dasame **sesapadesupī**ti “idha dutiyo samaṇo”ti-ādīsu sesapadesupi. Yathāhi “vivicceva kāmehī”ti¹ ettha kato niyamo “vivicca akusalehī”ti etthāpi katoyeva hoti sāvadhāraṇa-atthassa icchitabbatā, evamidhāpīti. Tenāha “**dutiyādayopi hī**”ti-ādi. Sāmaññaphalādhigamavasena nippariyāyato samaṇabhāvoti tesam vasetthā cattāro samaṇā desitā. Imasmim hi thāne cattāro phalaṭṭhakasamaṇāva adhippetā samitapāpasamaṇaggahaṇato. Kasmā panettha mahāparinibbāne viya maggaṭṭhā tadatthāya paṭipannāpi na gahitāti? Veneyyajjhāsayato. Tattha hi maggādhigamatthāya vipassanāpi ito bahiddhā natthi, kuto maggaphalānīti dassentena bhagavatā “ñāyassa dhammassa padasavattī, ito bahiddhā samaṇopi natthī”ti² vuttaṃ, idha pana niṭṭhānappattameva taṃtaṃsamaṇabhāvaṃ gaṇhantena phalaṭṭhakasamaṇāva gahitā, maggaṭṭhato phalaṭṭho savisesaṃ dakkhiṇeyyoti. Svāyamattho dvīsu suttesu desanābhedeneva paññāyatīti. **Rittāti** vivittā. **Tucchāti** nissārā paṭipannakasārābhāvato.

Pavadanti etehīti **pavādā**. Diṭṭhigatikānaṃ nānādiṭṭhidīpakasamayāti āha “**cattāro sassatavādā**”ti-ādi. Tatthacattāro **sassatavādā**ti lābhivasena tayo, takkivasena ekoti evaṃ cattāro sassatavādā. Pubbenivāsaññalābhī titthiyo mandapañño anekajātisatasahassamattaṃ anussarati, majjhapañño dasa samvaṭṭavivaṭṭakappāni, tikkhapañño cattālīsa samvaṭṭavivaṭṭakappāni, na tato paraṃ. So evaṃ anussaranto “sassato attā ca loko cā”ti ativadati, takkī pana takkapaṭipariyāhataṃ vīmaṇnucaritaṃ sayampaṭibhānaṃ “sassato attā ca loko cā”ti abhivadati. Tena vuttaṃ “lābhivasena tayo, takkivasena ekoti evaṃ cattāro sassatavādā”ti.

1. Dī 1. 69; Ma 1. 214, 231, 239; Saṃ 1. 412; Aṃ 1. 441; Aṃ 2. 21 piṭṭhādīsu.

2. Dī 2. 125 piṭṭhe.

Sattesu saṅkhāresu ca ekaccaṃ sassatanti pavatto vādo ekaccasassatavādo. So pana brahmakāyikakhiḍḍāpadosikamanopadosikattabhāvato cavitvā idhāgatānaṃ takkino ca uppajjanavasena catubbidhoti āha “**cattāro ekaccasassatavādā**”ti.

Cattāro antānantikāti ettha amati gacchati ettha vosānanti anto, mariyādā. Tappaṭisedhena ananto. Anto ca ananto ca antānanto sāmāññamiddesena, ekasesena vā “nāmarūpapaccayā saḷāyatanan”ti-ādīsu¹ viya. Antānantasahacarito vādo antānanto yathā “kuntā carantī”ti. Antānantasannissayo vā yathā “mañcā ghosantī”ti. So etesaṃ atthīti **antānantikā**. “Antavā attā ca loko ca, anantavā attā ca loko ca, antavā ca anantavā ca attā ca loko ca, nevantavā nānantavā”ti evaṃ pavattavādā cattāro. Avaḍḍhitakasiṇassa taṃ kasiṇaṃ attāti ca lokoti ca gaṇhantassa vasena paṭhamo vutto, dutiyo vaḍḍhitakasiṇassa vasena vutto, tatiyo tiriyaṃ vaḍḍhetvā uddhamadho avaḍḍhitakasiṇassa, catuttho takkivasena vutto. Ettha ca yuttaṃ tāva purimānaṃ tiṇṇaṃ vādānaṃ antañca anantañca antānantañca ārabha pavattavādattā antānantikattaṃ, pacchimassa pana tadubhayanisedhanavasena pavattavādattā kathamantānantikattanti? Tadubhayappaṭisedhanavasena pavattavādattā eva. Antānantikappaṭisedhavādopi hi antānantavisayo eva taṃ ārabha pavattattā.

Na maratīti amarā, kā sā? “Evantipi me no”ti-ādinā² nayena pariyantarahitā diṭṭhigatikassa diṭṭhi ceva vācā ca. Vividho khepoti vikkhepo, amarāya diṭṭhiyā, vācāya vā vikkhepoti amarāvikkhepo, so etassa atthīti **amarāvikkhepiko**. Atha vā amarā nāma macchajāti, sā ummujjanādivasena udake sandhāvamānā gāhaṃ na gacchati, evamevaṃ ayampi vādo ito cito ca sandhāvati, gāhaṃ na upagacchatīti amarāvikkhepoti vuccati, so etesaṃ atthīti **amarāvikkhepikā**. Svāyaṃ vādo musāvādānuyogachandarāgabhayamohabhāvahetukatāya catudhā pavattoti āha “**cattāro amarāvikkhepikā**”ti.

1. Ma 3. 109; Khu 1. 77 piṭṭhesu.

2. Dī 1. 24 piṭṭhe.

Adhicca yaticchakaṃ yaṃ kiñci kāraṇaṃ kassaci buddhipubbaṃ vā vinā samuppannoti attalokasaññitānaṃ khandhānaṃ adhicca pavatti-ākārārammaṇaṃ dassanaṃ tadākārasannissayena pavattito tadākārasahacaritatāya ca “adhiccasamuppannaṃ”ti vuccati yathā “mañcā ghosanti”, “kuntā caranti”ti ca. Taṃ etesaṃ atthīti **adhiccasamuppannikā**. Lābhivasena takkivasena ca “**dve adhiccasamuppannikā**”ti vuttaṃ.

Saññīti pavatto vādo saññivādo, so etesaṃ atthīti **saññivādā**. Rūpicatukkaṃ ekantasukhacatutthanti imesaṃ catunnaṃ catukkānaṃ vasena **soḷasa saññivādā**. Imesuyeva purimānaṃ dvinnaṃ catukkānaṃ vasena **aṭṭhasaññivādā**, **aṭṭha nevasaññināsaññivādā** veditabbā. Kevalaṃ hi tattha “saññī attā”ti gaṇhantānaṃ tā diṭṭhiyo, idha asaññīti ca nevasaññināsaññīti ca.

Satta ucchedavādāti manussattabhāve kāmāvacaradevattabhāve rūpāvacarattabhāve catubbidhārūpattabhāve ca ṭhatvā sattassa ucchedapaññāpanavasena satta ucchedavādā.

Pañca diṭṭhadhammanibbānavādāti pañcakāmaguṇa-upabhogavasena catubbidharūpajjhānasukhaparibhogavasena ca diṭṭhadhamme nibbūtipaññāpanavādā. **Diṭṭhadhammoti** paccakkhadhammo vuccati, tattha tattha paṭiladdhattabhāvassetāṃ adhivacanaṃ. Diṭṭhadhamme nibbānaṃ diṭṭhadhammanibbānaṃ, imasmiṃyeva attabhāve dukkhavūpasamanti attho. Taṃ vadantīti **diṭṭhadhamanibbānavādā**.

Ñāyati kamati paṭivijjhatīti ñāyo, so eva nibbānasampāpakahetutāya dhammoti āha “**ñāyassa dhammassā**”ti. **Ito bahiddhā samaṇopi natthīti**-ādīsu kasmā panete aññattha natthīti? Akkhetakāya. Yathā hi na āragge sāsapo tiṭṭhati, na udakapiṭṭhe aggi balati, na piṭṭhipāsāṇe bijāni viruhanti, evamevaṃ bāhiresu titthāhatanesu na ime samaṇā uppajjanti, imasmiṃyeva sāsane uppajjanti. Kasmā? Sukkhetatāya. Sā pana nesaṃ akkhetatā sukkhetatā ca ariyamagassa abhāvato bhāvato ca veditabbā. Tenāha bhagavā—

“Yasmiṃ kho Subhadda dhammavinaye ariyo aṭṭhaṅgiko maggo na upalabbhati, samaṇopi tattha na upalabbhati, dutiyopi

tattha samaṇo na upalabbhati, tatiyopi tattha samaṇo na upalabbhati, catutthopi tattha samaṇo na upalabbhati. Yasmim ca kho Subhadda dhammavinaye ariyo aṭṭhaṅgiko maggo upalabbhati, samaṇopi tattha upalabbhati, dutiyopi tattha, tatiyopi tattha, catutthopi tattha samaṇo upalabbhati. Imasmim kho Subhadda dhammavinaye ariyo aṭṭhaṅgiko maggo upalabbhati, idheva subhadda samaṇo, idha dutiyo samaṇo, idha tatiyo samaṇo, idha catuttho samaṇo, suññā parappavādā samaṇebhi aññehi”ti¹.

Ariyamaggassa ca abhāvo bhāvo ca suparisuddhassa sīlassa suparisuddhāya samathavipassanābhāvanāya abhāvato bhāvato ca veditabbo. Tadubhayañca durakkhātasvākkhātabhāvahetukam. So ca asammasambuddhappaveditattā. Yasmā titthāyatanaṃ akkhettaṃ, sāsanaṃ khettaṃ, tasmā yathā surattahatthapādo bhāsurakesarabhāro siho migarājā na susāne vā saṅkārakūṭe vā paṭivasati, tiyojanasahassavitthataṃ pana Himavantaṃ ajjhogāhetvā maṇiguhāyameva vasati, yathā ca chaddanto nāgarājā na gocariyahatthi kulādīsu navase kulesu uppajjati, yathā ca valāhako assarājā na gadrabhakule vā ghoṭakakule vā uppajjati, sindhutīre pana sindhavakuleyeva uppajjati, yathā ca sabbakāmadadaṃ manoharaṃ maṇirataṃ na saṅkārakūṭe vā paṃsupabbatādīsu vā uppajjati, vipulapabbatabbhantareyeva uppajjati, yathā ca timirapiṅgalo maccharājā na khuddakapokkharāṇīsu uppajjati, caturāsītiyojanasahassagambhīre mahāsamuddeyeva uppajjati, yathā ca diyaḍḍhayojanasatiko suvaṇṇarājā na gāmadvāre eraṇḍavanādīsu paṭivasati, mahāsamuddaṃ pana ajjhogāhetvā simbalidahavaneyeva paṭivasati, yathā ca dhataratṭho suvaṇṇahaṃso na gāmadvāre āvāṭakādīsu paṭivasati, navutisatasahassaparivāro pana hutvā cittakūṭeyeva paṭivasati, yathā ca catuddīpissaro cakkavattirājā na nīcakule uppajjati, asambhinnajātiyakhattiyakuleyeva pana uppajjati, evamevaṃ imesu samaṇesu ekasamaṇopi na aññattha titthāyatane uppajjati, ariyamaggaparikkhate pana buddhasāsane

1. Dī 2. 124 piṭṭhe.

yeva uppajjati. Tenāha bhagavā “idheva bhikkhave samaṇo -pa- suññā parappavādā samaṇebhi aññehī”ti¹. Ekādasame natthi vattabbaṃ.

Samaṇasuttādivaṇṇanā niṭṭhitā.

Kammavaggavaṇṇanā niṭṭhitā.

(25) 5. Āpattibhayavagga

1. Saṃghabhedakasuttavaṇṇanā

243. Pañcamassa paṭhame **vivādādhikaraṇādisūti** vivādādhikaraṇaṃ anuvādādhikaraṇaṃ āpattādhikaraṇaṃ kiccādhikaraṇanti imesu catūsu. Tattha dhammoti vā adhammoti vā aṭṭhārasahi vatthūhi vivadantānaṃ bhikkhūnaṃ yo vivādo, idaṃ **vivādādhikaraṇaṃ** nāma. Sīlavipattiyā vā ācaradiṭṭhi-ājīvavipattiyā vā anuvadantānaṃ yo anuvādo upavadanā ceva codanā ca, idaṃ **anuvādādhikaraṇaṃ** nāma. Mātikāya āgatā pañca, vibhaṅge dveti sattapi āpattikkhandhā, idaṃ **āpattādhikaraṇaṃ** nāma. Saṃghassa apalokaṇādīnaṃ catunnaṃ kammānaṃ karaṇaṃ idaṃ **kiccādhikaraṇaṃ** nāma. Sesamettha uttānameva.

Saṃghabhedakasuttavaṇṇanā niṭṭhitā.

2. Āvattibhayasuttādivaṇṇanā

244-5. Dutiye bhassati niratthakabhāvena khipiyatīti bhasmaṃ, chārikā. Tassa puṭaṃ bhaṇḍikā **bhasmapuṭaṃ**. Tenāha “**bhasmapuṭanti chārikābhaṇḍikaṃ**”ti. Tatiyaṃ uttānatthameva.

Āpattibhayasuttādivaṇṇanā niṭṭhitā.

1. Ma 1. 92; Am 1. 560 piṭṭhesu.

4. Seyyāsuttādivaṇṇanā

246-9. Catutthe **petāti** peccabhāvaṃ gatā. Te pana yasmā idha katakālakiriyā kālena katajīvitucchedā honti, tasmā vuttaṃ “**kālakatā vuccanti**”ti, matāti attho. Atha vā peccabhavaṃ gatā, petūpapattivasena nibbattiṃ upagatāti attho. Tenāha “**atha vā petavisaye nibbattā petā nāmā**”ti. **Ekena passena sayituruṃ na sakkonti** dukkhuppattito.

Tejussadattāti iminā sīhassa abhīrukabhāvaṃ dasseti. Bhīrukā sesamigā attano āsayaṃ pavisitvā santāsapubbakaṃ yathā tathā sayanti, sīho pana abhīruko sabhāvato satokārī bhikkhu viya satim upaṭṭhapetvāva sayati. Tenāha “**dve purimapāde**”ti-ādi. Dakkhiṇe purimapāde vāmassa purimapādassa ṭhapanavasena **dve purimapāde ekasmim ṭhāne ṭhapetvā. Pacchimapāde** vuttanayeneva idhāpi ekasmim ṭhāne ṭhapanam veditabban, **ṭhitokāsasallakkhaṇam** abhīrukavaseneva. **Sīsam pana ukkhipitvāti**-ādinā vuttasīhakiriyā anutrastappabujjhanā viya abhīrubhāvasiddhadhammatāvasenevāti veditabbā. **Sīhavijambhanam** ativelam ekākāre ṭhapitānam sarīrāvayavānam gamanādikiriyāsu yogyabhāvāpādanattham. **Tikkhattum sīhanādanadanam** appesakkhamigarājehi parittāsapariharaṇattham.

Ayam vuccati bhikkhave tathā gataseyyāti iminā catutthajjhānaseyyā Tathāgataseyyā nāmāti dasseti. Seti abyāvaṭabhāvena pavattati etthāti seyyā, catutthajjhānameva seyyā **catutthajjhānaseyyā**. Kim pana taṃ catutthajjhānanti? Ānāpānacatutthajjhānam. Tattha hi ṭhatvā vipassanam vaḍḍhetvā bhagavā anukkamena aggamaggaṃ adhigantvā tathāgato jātoti. Tayidaṃ padaṭṭhānam nāma na seyyā, tathāpi yasmā “catutthajjhānasamanantarā bhagavā parinibbāyī”ti **mahāparinibbāne**¹ āgataṃ, tasmā lokiyacatutthajjhānasamāpatti eva tathāgataseyyāti keci. Evaṃ sati parinibbānakālikāva Tathāgataseyyā āpajjati, na ca bhagavā lokiyacatutthajjhānasamāpajjanabahulo vihāsi. Aggaphalavasena

1. Dī 2. 128 piṭṭhe.

pavattaṃ panettha catutthajjhānaṃ veditabbaṃ. Tattha yathā sattānaṃ niddūpagamalakkhaṇā seyyā bhavaṅgacittavasena hoti, sā pana nesam paṭhamajātisamanvayā yebhuyyavuttikā, evaṃ bhagavato ariyajātisamanvayaṃ yebhuyyavuttikaṃ aggaphalabhūtaṃ catutthajjhānaṃ tathāgataseyyāti veditabbaṃ. Pañcamādīni uttānatthāni.

Seyyāsuttādivaṇṇanā niṭṭhitā.

8. Paṭhamavohārasuttavaṇṇanā

250-253. Aṭṭhame **anariyānanti** asādhūnaṃ nihīnānaṃ. **Vohārāti** saṃvohārā abhilāpā vā, “diṭṭhaṃ mayā”ti evaṃvādītā. Ettha ca taṃtaṃsamuttāhāpakacetanāvasena attho veditabbo. Navamādīsu natthi pattabbaṃ.

Paṭhamavohārasuttavaṇṇanā niṭṭhitā.

Āpattibhayavaggavaṇṇanā niṭṭhitā.

Pañcamapaṇṇāsako niṭṭhito.

(26) 6. Abhiññāvagga

1. Abhiññāsuttādivaṇṇanā

254-256. Chaṭṭhassa paṭhame paccanīkasamanato **samatho**, samādhīti āha “**cittekaggatā**”ti. Aniccādinā vividhenākārena dassanato **vipassanā**, saṅkhārapariggāhakañāṇaṃ. Tenāha “**saṅkhārapariggahavipassanāññāna**”ti.

Dutiye anariyehi pariyesitabbatā anariyānaṃ pariyesanāti **anariyapariyesanā**. Sayam lāmakatāya anariyānaṃ pariyesanāti vā **anariyapariyesanā**. **Jarāsabhāvanti** jīraṇapakatikaṃ. Tatiyaṃ uttānameva.

Abhiññāsuttādivaṇṇanā niṭṭhitā.

4. Mālukyaputtasuttādivaṇṇanā

257-263. Catutthe **apasādetī**ti niggaṇhāti. **Ussādetī**ti paggaṇhāti.
 Apasādanākāraṃ ussādanākāraṅca vibhāvetum “**kathan**”ti-ādi āradham.
 Pañcamādīni uttānāneva. Sesam suviññeyyameva.

Mālukyaputtasuttādivaṇṇanā niṭṭhitā.

Abhiññāvaggavaṇṇanā niṭṭhitā.

Iti manorathapūraṇiyā aṅguttaranikāyaṭṭhakathāya
Catukkanipātavaṇṇanāya anuttānatthadīpanā samattā.

Dutiyo bhāgo niṭṭhito.

Aṅguttaraṭīkāya dutiyabhāge

Saṁvaṇṇitapadānaṁ anukkamaṇīkā

Padānukkamo	Piṭṭhaṅko		Padānukkamo	Piṭṭhaṅko
[A]			[A]	
Akatavedī	28		Ajjataṁ	25
Akathamkathī	382		Ajjavam	59
Akaniṭṭhagāmī	189		Ajjhattaṁ	375
Akaniṭṭhā	32		Ajjhattasaṁyojano	32
Akasiraṁ	158		Ajjhopanno	209
Akampiyatṭhena	9		Añjalikaraṇīyo	195
Akāraṇavacchalo	56		Aññāṇaṁ	23
Akutobhayaṁ	253		Aṭṭakārakena	140
Akkamati	374		Aṭṭhānaṁ	22
Akkhamā	342		Aṇḍakā	61
Akkharappabhedā	131		Ataccharaṁ	171
Akkhitto	131		Atappā	32
Agalītapadabyañjanāya	321		Atipātikāni	192
Agārikapucchā	14		Atippago	184
Aggato	290		Atiyātum	39
Aggappasādā	286		Attadamaṇaṁ	123
Aghato	331		Attapariccajanaṁ	21
Aghassa	17		Attabhāvīnaṁ	239
Accantaṁ	118		Attasanniyyātaṇaṁ	21
Accantakkhayo	41		Attādhipeyyaṁ	120
Accantaniṭṭho	218		Attānaṁ	369
Accantayogakkhemī	218		Atthaṁ	244
Accayo	191		Atthaṅgamo	284
Acchannaṁ	380		Atthapaṭisambhidā	347
Ajapālo	243		Atthavase	66
Ajinacammehi	158		Atthavaso	27, 122

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Atthasādhikā	101	Anīhatadosaṃ	198
Adinnādāyī	386	Anukulaṃ	298
Adosāya	321	Anukulayaññaṃ	297
Addhā	167	Anucchavikaṃ	90
Adhamuttame	95	Anucchaviko	195
Adhammarāgatā	128	Anuddayā	93
Adhammikā	44	Anuddhamseti	327
Adhigaṇhanti	23	Anupagamañādivasena	22
Adhicittam	198	Anupacāraṭṭhānaṃ	27
Adhiccasaṃmuppannikā	391	Anupavajjo	144
Adhiṭṭhahanti	117	Anupāto	129
Adhippayāso	206	Anuppadātā	371
Adhivatthā	118	Anuyogavattaṃ	115
Adhivāsanakhanti	60	Anurūpadhammaṃ	321
Adhisīlam	185	Anuvijjitvā	116
Anagāriyaṃ	3	Anusaññātum	39
Ananupavisitvā	58	Anusocati	3
Anabhāvaṃ	232	Anussarati	43
Anabhijjhādhammapadaṃ	277	Anussarituṃ	102
Anayo	171	Anussavo	166
Anariyapariyesanā	395	Anejamasokaṃ	18
Analaso	90	Anesanaṃ	270
Anavakāso	22	Anottappaṃ	5
Anavakkhitto	131	Anottāpī	232
Anātāpī	232	Anosakkaṇā	4
Anādīnavadassāvī	209	Antarakappe	107
Anāso	79	Antarato	292
Anītihaṃ	260	Antarahitā	115
Anīgho	99, 253	Antarā	292
Anītihaṃ	260	Antarāyikā	227

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Antarikāya	292	Appaṭivānitā	4, 320
Antā	220	Appaṭivāno	46
Antānantikā	390	Appanā	96
Antogatā	264	Appamāṇasubhā	32
Antojanasmiṁ	83	Appamāṇābhā	31
Antonijjhānaṁ	5	Appamādarato	294
Antopūti	80	Appameyyo	205
Andhakaṛaṇo	180	Appasamārambho	139
Andhakārā	331	Appento	382
Annaṁ	369	Appesakkhā	368
Apañjasā	313	Abbhavalāhakā	30
Apaṭṭhapanāṁ	54	Abbhutamanussā	45
Apaṇṇakatā	84	Abyāpādaṁ	274
Apatanasabhāvo	187	Abhavo	228
Apadānasobhanī	76	Abhikkantataro	15
Apanāmeti	169	Abhikkantena	15
Aparapariyāyavedanīyaṁ	101	Abhikkanto	376
Aparādho	191	Abhiceto	248
Aparisesaṁ	181	Abhijjhā	381
Apalibuddhāya	303, 321	Abhijjhāvinayo	279
Apasādeti	396	Abhiññātā	277
Apācīnaṁ	237	Abhiññāpāraṁ	129
Apāyamukhāni	353	Abhiññāpāragū	248
Apāyā	384	Abhibhosmi	120
Apārutamukho	323	Abhiniviṭṭho	44
Apilāpanalakkhaṇo	65	Abhinivesaṁ	275
Appaggho	196	Abhinīharati	135
Appaṭikūlaṁ	18	Abhirūpe	15
Appaṭigho	375	Abhilāso	32
Appaṭivānapadhānaṁ	4	Abhisāṅkhāro	83

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Abhisajjati	369	Asantuṭṭhitā	64
Abhisamayo	302	Asappurisabhūmi	28
Abhūtaṃ	171	Asappuriso	386
Amakkhetvā	156	Asampajānā	40
Amaccā	117, 182	Asallīnaṃ	120
Amarāvikkhepiko	390	Asāraddho	120
Amātāputtikāni	149	Asucīhi	80
Ambilikāphalaṃ	45	Asetṭhacariyaṃ	176
Ayasūlāni	2	Assaddho	25
Araññavanapatthāni	27	Assādo	202
Arahā	22	Ahitā	19
Arānaṃ	153	Ahirikaṃ	5
Ariyo	192	Ahosikammaṃ	101
Arīnaṃ	153		
Aru	92	[Ā]	
Arukūpamacitto	92	Ākaḍḍhīyati	359
Allīyitabbo	93	Ākāśacetiyaṃ	116
Avakujjapañño	96	Ākiṇṇāni	96
Avajānāti	314	Āgantukabhattaṃ	271
Avassayaṃ	92	Āgamaṇīyapaṭipadā	4
Avassayaṇaṭṭhena	127	Āgāmī	37
Avikkhepaṃ	274	Āghātento	46
Avikkhepo	48	Āciṇṇamanussā	45
Avinipātadhammo	187	Ājīvupāyavipatti	317
Aviruḷhidhammo	109	Āṇāpetvā	125
Avihā	32	Ādānaṃ	275
Aveccappasādo	182	Āpāyikā	203
Asaṃvutehi	327	Ābandhanaṃ	145
Asanaṃ	303	Ābandhanaṭṭhena	371
Asanivicakkaṃ	227	Ābādhikaṃ	116

Padānukkamo	Piṭṭhaṅko	Padānukkamo	Piṭṭhaṅko
[Ā]		[U]	
Ābādho	143	Ukkaṭṭhā	291, 292
Ābhassarā	31	Ukkaṇṭhitaṃ	276
Āyamukhāni	353	Ukkhaliparipuñchanam	196
Ārakattā	153	Uggaṇhanam	374
Āramanti	332	Uggahāpaṇam	374
Ārāmo	371	Uggahitaṃ	247
Āropento	115	Uggilitum	29
Ālayārāmā	332	Ugghaṭitaññū	334
Ālayo	32	Ugghāṭetvā	88
Ālimpeyya	201	Ugghāṭeyya	16
Ālokasaññaṃ	299	Uccā	178
Āvaṭṭanimāyaṃ	162	Ucchedavādā	391
Āvaraṇam	83	Ujjhāyanti	184
Āvaraṇiyā	87	Uṇhavalāhakā	29
Āsaṃso	79	Utukkhānam	52
Āsabham	226	Utunī	148
Āsavakkhayo	87	Utupariṇāmajāni	318
Āsavavināsanato	135	Utuvassam	29
Āhutaṃ	97	Uttamādhamaṇi	301
Āhuneyyā	29	Uttasati	270
Āhuneyyo	195	Uttānīkaroti	217
Āḷaviyaṃ	110	Udāhaṭavelāya	334
[I]		Uddesabhataṃ	271
Iṭṭhā	308	Uddhamasoto	189
Iddhiyā	15	Uddhambhāgiyāni	33
Isipatana	83	Uddhammaṇi	44
Issarā	368	Uddhumātassa	92
		Upagacchati	226
		Upagaccheyya	22
		Upaṭṭhātu	170

Padānukkamo	Piṭṭhaṅko	Padānukkamo	Piṭṭhaṅko
[U]		[U - Ū]	
Upaṇṇātam	28	Ubhatobyūḷham	55
Upatthambhakam	103	Ummādam	78
Upaddavo	75	Urattāḷim	357
Upadhāreti	201	Ulūkapakkham	267
Upadhivipatti	106	Ussādeti	396
Upadhivivekattā	238	Uḷāro	331
Upadhisāṅkhayo	253	Uḷumpo	150
Upadhisampatti	106	Ūrubalī	115
Upadhisukham	47		
Upanibaddhā	228	[E]	
Upapajjavedanīyaṃ	101	Ekakiyā	253
Upapattipaṭilābhiyāni	333	Ekabījī	189
Upapīlakam	103	Ekabhattiko	373
Uparimukham	16	Ekāgāriko	220
Upalāpakā	261	Ekāhavāro	220
Upavattanam	314	Ekāhikam	220
Upasaggo	75	Ekībhāvam	13
Upasaṅkamati	13	Ekodibhāvo	199
Upahacca	189	Eṇeyyakakammakāraṇam	2
Upahatattā	58	Erakavattakammakāraṇam	1
Upāyāso	5		
Upāsanato	24	[O]	
Upāsitaḅbo	93	Okoṭimako	79, 317
Uposathikam	271	Okkanti	147
Uposatho	172	Opakkamikā	143
Uppatanākārapattam	119	Opakkamikāni	319
Uppattiṭṭhānam	271	Opaneyyikam	128
Uppādo	124	Opapātiko	188
Uppilāvitabhāvattham	119	Obhāsakaraṇam	133
Ubbatṭetvā	28	Orambhāgiyāni	33

Padānukkamo	Piṭṭhaṅko	Padānukkamo	Piṭṭhaṅko
[O]		[Ka]	
Oropitadhurā	41	Kāṇo	79, 317
Ovādo	52	Kābyaṃ	42
Osakkitvā	109	Kānavitakko	199
Osāretvā	162	Kāmayogo	229
Otāretvā	118	Kāmesanā	294
Ohitasoto	169	Kāmesumicchācārī	386
[Ka]		Kāyaṅgaṃ	162
Kakkasā	61	Kāyantikaṃ	365
Kakkhaḷena	215	Kāyasakkhī	43
Kakkhaḷo	370	Kāyasakkhīhi	32
Kaṅkhāya	43	Kāyasuci	207
Kacchu	90	Kāraṇaṃ	227
Kaṭṭhatthaṃ	320	Kāraṇikā	2
Katasarakkhepo	302	Kārānaṃ	19
Katahattho	302	Kālavipatti	106
Kattabbakiccaṃ	118	Kālasampatti	106
Kathikasaṅṭhiti	155	Kāḷakaṃ	387
Kadariyā	306	Kimladdhiko	29
Kantā	308	Kimvādī	29
Kappaṭṭho	360	Kimśamācārā	253
Kammaṃ	91	Kimśilā	253
Kammavipākajā	143	Kiṅcāpi	27
Kammavibhatti	101	Kiṅṇapakkhittā	305
Karaṇuttariyalakkhaṇo	364	Kitti	291
Kalahajātā	40	Kimakkhāyī	29
Kalyāṇavākkaraṇo	321	Kukkuccāyati	53
Kalyāṇavāco	321	Kuṭṭibhattaṃ	271
Kasambujāto	80	Kuṇī	79, 317
Kahāpaṇikaṃ	2	Kuṇḍakaṃ	192
		Kuppati	92

Padānukkamo	Piṭṭhaṅko	Padānukkamo	Piṭṭhaṅko
[Ka]		[Kha]	
Kummaggo	16	Khiḍḍāpadosikā	346
Kuraṇḍakabandhanam	171	Khipitakam	90
Kulajetṭhakam	125	Khippanisanti	321
Kullo	150	Khīṇākāro	87
Kusacīram	267	Khīrodakībhūtā	41
Kusubbhā	194	Khuddakanadiyo	195
Kuhakā	261	Khobhayamānā	110
Kuhanattham	257	[Ga]	
Keṭubham	131	Gajjitā	322
Kerāṭīkā	157	Gativipatti	106
Kevalī	129	Gatisampatti	106
Kesakambalam	267	Ganthitā	43
Kesamuttiyā	165	Gandham	369
Kesarī	282	Gandhajātam	78
Koṭṭenti	2	Gandhabbo	148
Kotūhalamaṅgaliko	25	Gabbhāvakkantivaṭṭasmim	146
Kodhasāmantā	61	Gambhīravattanī	162
Kolaṅkolo	189	Gambhīrā	42
Kosajjāya	356	Garukam	102
[Kha]		Gahaṇī	130
Khañjo	79, 317	Gāmantaṃ	27
Khatattā	58	Gijjhakūṭe	160
Khandhatamo	316	Guṇadhamīsī	361
Khandhaparipāko	5	Gundāvane	38
Khamanīyam	13	Gūthubhāṇī	94
Khamā	342	Gelaññam	181
Khayavirāgena	28, 364	Gehavetanam	162
Khāraparissāvane	94	Gottavasena	151
Khārāpatacchikam	2	Gopanam	123
		Gopāyati	120

Padānukkamo	Piṭṭhaṅko	Padānukkamo	Piṭṭhaṅko
[Gha]		[Ja]	
Ghananivāsataṃ	128	Jātikkhayo	137
Ghātetvā	103	Jātimaraṇabhayaṃ	238
[Ca]		Jātimahallakā	127
Cakkaṃ	81, 253	Jātimahallake	38
Caṇḍikatassa	93	Jātiyo	129
Cammaṃ	267	Jāpetuṃ	198
Cariyakāle	118	Jiṇṇaṃ	115
Calitaṃ	301	Jiyappahārasaddo	119
Cātuddiso	375	Jīvitāsāya	55
Cātumahārājikā	31	Jeṭṭhakaśīlaṃ	34
Cāpallena	40, 205	Jotimālikaṃ	1
Cārikā	151	[Jha - Ña]	
Cīvaralūkhaṃ	311	Jhānaphassaṃ	43
Cetanārāsiraṃ	91	Ñāṇajavaṃ	201
[Cha]		Ñāṇathāmena	89
Chavālātaṃ	320	Ñāṇadassanaṃ	63
Chātakasunakhehi	2	Ñāṇena	99
Chijjivā	332	Ñātivaseṇa	21
Chinnamūlake	2	Ñātivinaṣo	363
[Ja]		Ñāṭī	182, 371
Janakaṃ	103	Ñāye	291
Jambonadaṃ	158	Ñāyo	182
Jarājiṇṇā	127	[Tha]	
Jarājiṇṇe	38	Thapanam	280
Jarāsabhāvaṃ	395	Thapenti	8
Jālinī	382	Thānaṃ	168
Jāti	4	Thānāni	326
		Thānehi	23

Padānukkamo	Piṭṭhaṅko	Padānukkamo	Piṭṭhaṅko
[Ta]		[Tha]	
Tamsamaṅgī	20	Thūpassa	45
Taṇhāgedhena	209	Thero	39
Taṇhādutiyo	228	[Da]	
Tathājātiko	98	Dakkhiṇeyyo	29, 195
Tadahu	172	Dakkho	90
Tanubhāvā	187	Damā	342
Tantākulakajāto	383	Darathaṃ	111
Tapanīyā	3	Dassanīyāni	326
Tapanti	3	Dānaṃ	58
Tapojigucchā	366	Dāruṇo	370
Tapparāyaṇatā	21	Diṭṭhaṃ	254
Tappasādataggarutāhi	19	Diṭṭhadhammanibbānavādā	391
Tamaparāyaṇo	316	Diṭṭhadhammavedanīyaṃ	101
Tamayātāya	121	Diṭṭhadhammasukhavihāraṃ	27
Tavatimsā	31, 178	Diṭṭhadhammikā	68, 86
Tiṇapupphakajaro	90	Diṭṭhantaṃ	43
Titto	56	Diṭṭhijukammaṃ	20, 21
Titthaṃ	268	Diṭṭhipaḷāso	46
Titthiyā	142	Diṭṭhippatto	44
Tibbānaṃ	125	Diṭṭhivisuddhi	62
Tiracchānayanigabbho	147	Diṭṭhisampadā	62
Tiriyam	237	Diṭṭhisampanno	22
Tucchā	389	Diṭṭhisīlasaṃghātena	18
Tuccho	323	Diṭṭhekatṭhe	275
Tuṭṭho	263	Diyyanakavasena	58
Tusitā	31, 179	Divātṭhānaṃ	88
Todeyyo	359	Dukkaṭakammakārī	76
[Tha]		Dukkhaḍḍhikā	66
Thaddhā	261	Dukkhasamudayo	135
Tharusippaṃ	97		

Padānukkamo	Piṭṭhaṅko	Padānukkamo	Piṭṭhaṅko
[Da]		[Dha]	
Dukkhānaṁ	125	Dhammavavatthānaṁ	274
Duggandhakathaṁ	94	Dhammiko	81
Duggahitehi	39	Dhammo	73
Duccintitacintī	76	Dhitisampannaṁ	137
Duṭṭhāruko	92	Dhīro	39
Duttappayā	57	Dhurabhattaṁ	271
Dunnikkhattaṁ	26	Dhuvaparibhogāni	29
Duppajahattā	55	[Na]	
Dubbaṇṇo	79, 196	Nakulapitā	308
Dubbinītaparisā	216	Najjā	242
Dubbhāsitaḥāsī	76	Naṭṭhalābhasakkārā	160
Dummaṅkūnaṁ	66	Nayaggāhena	84
Durāsadā	130	Naḷo	40
Dullabhā	55	Nāgariyo	103
Dussassaṁ	129	Nānākaraṇaṁ	83
Dussīlo	25, 80	Nāḷikayantaṁ	248
Devūpapatti	293	Nikkhattadhaṇa	89
Devā	147	Nikkhattadhurā	193
Dovacassatā	49	Niggilituṁ	29
Doso	170	Nighaṇḍu	131
Dvaṅgulakappo	214	Niccaḷikaṁ	247
Dvāresu	115	Niccelo	219
Dvīhavāro	220	Nicchāto	167
Dvemātikādharā	89	Nittejataṁ	163
Dvelhakaṁ	314	Nidānaṁ	48
[Dha]		Niddukkho	118
Dhammacakkaṁ	284	Ninhātapāpako	207
Dhammasā	18	Nīpatanti	89
Dhammadharā	226	Nippakkhalanaṭṭhena	44
Dhammarājā	81	Nippapañcataṁ	303

Padānukkamo	Piṭṭhaṅko	Padānukkamo	Piṭṭhaṅko
[Na]		[Pa]	
Nippītikam	47	Paggāho	48
Nimantanam	271	Paccayavaṭṭa	146
Nimittam	48	Paccayo	48
Nimittāni	124	Pacceti	25
Nimmathetvā	122	Pacchindati	28
Nimmalam	120	Pajahati	232
Nimmānarati	179	Pañhummaggo	363
Nimmānaratino	31	Paññācakkhu	95
Niyyātum	39	Paññādhurena	44
Nirayagabbho	147	Paṭikuṭṭho	25
Nirayapālā	112	Paṭikkanto	376
Nīliyanatṭhena	127	Paṭiggaṇhātu	192
Nivāso	137	Paṭighātāya	87
Nissaraṇapaññāya	43	Paṭicarati	168
Nekkham	157	Paṭicchāpetvā	173
Negamā	83	Paṭijagganam	123
Netabbo	26	Paṭijagganena	90
Netā	169	Paṭijāgaronti	117
Neyyo	335	Paṭinissatṭhā	296
Nerayiko	360	Paṭipakkhavasena	95
Nesādā	79, 316	Paṭibhāga-upamā	91
		Paṭibhātu	170
[Pa]		Paṭivedesi	18
Paṃsukūlam	263	Paṭisaṃvedī	122
Pakkhandanti	55	Paṭisaṅkhānabalam	9
Pakkhahato	79	Paṭisaṅkhānupassanā	275
Pakkhikam	271	Paṭisallānam	277
Pagabbo	361	Paṭṭhānagāthāya	122
Paguṇam	18	Paṇidhim	275
Paguṇā	247	Paṇipāto	21

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Paṇḍarakaṃ	387	Pariṇamantaṃ	11
Paṇḍitapaññattāni	123	Pariṇāhaṃ	310
Paṇḍito	90	Paritassati	270
Patibāhitaṃ	107	Parittaṃ	116
Pattakkhandho	163	Parittasubhā	32
Pattalūkhaṃ	311	Parittābhā	31
Patthanā	32	Paridevo	5
Pattheyyāsi	163	Paripakko	38
Padam	26	Paripācanaṃ	145
Padako	132	Paripuṇṇaṃ	156
Padaparamo	335	Paripuṇṇā	85
Padarā	194	Pariyantarahitaṃ	246
Padāni	355	Pariyāyanti	150
Padīpeyyaṃ	79, 317	Pariyesati	25
Paduṭṭhacitto	22	Parivaṭṭo	371
Padumaṃ	118	Parisati	359
Padhānāni	238	Paroparāni	301
Panthadūhanacoro	129	Palālapīṭhakaṃ	2
Pamādena	139	Palālavaṭṭim	2
Payirupāsaṇaṃ	17	Palāso	65
Payogavipatti	106	Palighaparivattikaṃ	2
Payogasampatti	106	Pallaṅke	119
Paranimmitavasavattī	179	Pavaḍḍhati	290
Parādhippāyo	316	Pavattinī	123
Parāyaṇaṃ	17	Pavādā	389
Parikkhayaṇa	188	Pasannakāraṃ	17
Pariññaṃ	211	Pasannānaṃ	290
Pariññāpāragū	248	Pasavanti	86
Pariṇataṃ	11	Pahaṭamattaṃ	198
Pariṇamati	239	Pahānapāragū	248

Padānukkamo	Piṭṭhaṅko	Padānukkamo	Piṭṭhaṅko
	[Pa]		[Pa]
Pahāya	24	Piṇḍapātakkhetam	271
Pahārasādhanattham	1	Pitā	22
Pahēnakasakkāro	206	Pitāmahayugo	103
Pahoti	168	Piyacakkhūni	194
Pākatindriyā	40	Pihitattā	364
Pāṭipadikaṃ	271	Pihitamukho	323
Pāṭiyekkaṃ	97	Piṇitaṃ	309
Pāṭihāriyaṃ	139	Pīṭimanassa	194
Pāṭihāriyapakkho	118	Pukkusā	79, 317
Pāṇātipātī	386	Puggalanimittaṃ	98
Pāṇātipāto	175	Puññakammaṃ	121
Pātimokkham	35	Puññakkhettaṃ	196
Pātimokkho	35	Puññābhisandā	306
Pānaṃ	369	Puṭosaṃ	361
Pāpaṇikaṃ	268	Pupphabhāṇī	94
Pāpadhammo	80	Pubbakāraṃ	25
Pāpamittatā	49	Pūvasurā	305
Pāragū	129	Pekkhāpenti	44
Pāripanthike	248	Petadakkhiṇaṃ	315
Pāripanthiko	129	Pettivisayo	147
Pāripūriṃ	310	Pesalānaṃ	67
Pārisajjā	117	Potthako	267
Pārisuddhipadhāniyaṅgāni	364	Ponobhavikā	231
Pāsamsā	139	Poriyā	303, 321
Pāsanti	298	Porī	61
Pāsādikā	368		[Pha]
Pāhutaṃ	97	Phalakacīraṃ	267
Pāhuneyyo	195	Phalitāya	172
Pāli	247	Phāsukaṃ	90
Pāliyā	26	Phuṭṭhuṃ	233

Padānukkamo	Piṭṭhaṅko	Padānukkamo	Piṭṭhaṅko
[Ba]		[Bha]	
Bandhanāgāriko	370	Bhagavaṃnettikā	169
Balaṃ	291	Bhagavaṃpaṭisaraṇā	170
Bahalarāgaṃ	277	Bhagavaṃmūlakā	169
Bahalānaṃ	125	Bhaggā	366
Bahiddhāsaṃyojano	32	Bhajānaṃ	17, 280
Bahussutā	226	Bhaṇḍanaajātā	194
Bahū	116	Bhadrena	38
Baḷisamaṃsikaṃ	2	Bhantacitto	205
Bālanimittāni	76	Bhayaṃ	7
Bāhubalī	115	Bhayadassī	37
Bāhulikā	193	Bhavadiṭṭhi	49
Bilaṅgathālikam	1	Bhavanetti	221
Bījagāmo	373	Bhavābhavo	228
Buddhā	45	Bhavesanā	295
Buddhāpadeso	355	Bhavo	228
Bodhisatto	202	Bhasmapuṭaṃ	393
Byañjanaṃ	26	Bhājanaṃ	127
Byañjanāni	355	Bhārahāro	191
Byākaraṇaṃ	132	Bhāvanāpāragū	248
Byādhitam	116	Bhāvanābalaṃ	9
Byāpajjati	92	Bhikkhugaṇaṇā	52
Byāpādo	199	Bhuttapātarāsā	167
Byāvaṭā	332	Bhūtagāmo	373
Brahmakāyikā	328	Bhūmi	38
Brahmacariyesanā	295	Bheraṇḍakamyeva	165
Brahmacariyogadham	138	Bhogakkhandho	371
Brahmadeyyaṃ	254	Bhogabyasaṇaṃ	363
Brahmapārisajjā	31	[Ma]	
Brahmapurohitā	31	Mamsavaṇijjā	25
Brahmavihārā	160	Magadhamahāmatto	359

Padānukkamo	Piṭṭhaṅko	Padānukkamo	Piṭṭhaṅko
[Ma]		[Ma]	
Macchariyaṃ	65	Mānābhisamayā	99
Majjavaṇijjā	25	Māradheyyaṃ	238
Matakabhattaṃ	138	Mālaṃ	369
Madhubhāṇī	94	Micchāññaṃ	23
Madhurakathaṃ	95	Mukhakarā	40
Madhurāyaṃ	38	Mukharo	205
Manasānupekkhitā	247	Mucchitā	43
Manasikāraḥsalatā	50	Mucchito	209
Manāpā	95	Muṭṭhassaccaṃ	64
Manāpo	372	Muṭṭhihatthapādake	179
Manussā	147	Muddāgaṇaṇā	97
Manopadosikā	347	Musāvādī	386
Manopavicārā	145	Mūlagandho	183
Mandā	366	Mūlabījaṃ	373
Masāṇāni	192	Mūlavatthuko	183
Mahaddhanā	368	Mecakavaṇṇassa	121
Mahantaṃ	253	Mettacittatā	83, 176
Mahākhallāṭasīsāṃ	115	Mettācakkhūhi	41
Mahāpadesā	354	Medhanti	298
Mahāpurisehi	123	Moghajīṇṇo	38
Mahābrahmā	31	Moneyyāni	207
Mahārambhā	298	Moho	170
Mahāvīpākāṃ	129	[Ya]	
Mahāvelā	242	Yaso	291
Mahesakkhā	368	Yācayogo	121
Mahesino	261	Yānaṃ	369
Mātā	22	Yāmā	31, 179
Mātucchā	8	Yuttappaṭibhāno	334
Mātulānī	8	Yogā	229
Mānaṃ	38	Yodhājīvo	216

Padānukkamo	Piṭṭhaṅko	Padānukkamo	Piṭṭhaṅko
[Ya - Ra]		[La]	
Yoni	85, 313	Lapā	261
Rakkhanti	8	Lapitalāpano	138
Rattaññumahantaṃ	245	Lāmakadhammo	315
Rattapaṭena	116	Lujjanatṭhena	381
Rattiṭṭhānaṃ	88	Luddo	370
Rathakārā	79, 317	Lūkhaṃ	309
Rathiyaṃ	268	Lokacintā	315
Rāgavirāgo	18	Lokanirodho	249
Rāgānuddhamisitena	327	Lokavajjasena	170
Rāhumukhakammakāraṇaṃ	1	Lokāyataṃ	132
Rittako	323	Lokuttarā	42
Rittassādo	214	Lobhaṃ	110
Rittā	389	Lobho	170
Rukkhadussaṃ	267	[Va]	
Rukkhamūlaṃ	263	Vacanaṃ	94
Ruccati	90	Vajjesu	37
Rūpakūṭaṃ	374	Vaṭṭasukhaṃ	47
Rūpanimittaṃ	98	Vaḍḍhiṃ	244
Rūpariṅgaho	340	Vaṇṇapokkharatā	368
Rūpappasanno	309	Vaṇṇena	15
Rūpārammaṇaṃ	47	Vaṇṇo	213
Rūpino	286	Vatthaṃ	369
Rogo	143	Vadhena	171
[La]		Vadho	374
Lakuṇḍako	79, 317	Vanapatthaṃ	380
Lagati	92	Vantamalo	39
Lajjavaṃ	60	Vayo	124, 133
Lajjā	7	Vayovuddhā	127
Laddhakaṃ	180	Vayovuddhe	38
Laddhokāsā	129	Varapurisānaṃ	138

Padānukkamo	Piṭṭhaṅko	Padānukkamo	Piṭṭhaṅko
[Va]		[Va]	
Vasavattī devatā	31	Vinipatitattā	384
Vasippattam	137	Vinetā	169
Vassasatajīvī	28	Vinodeti	232
Vassasatāyuto	28	Vipañcitaññū	334
Vaḷaṅjanakavasena	89	Vipatti	25
Vaḷaṅjenti	338	Viparivattitvā	332
Vākacīram	267	Vipassanā	62
Vācaṅgam	162	Vipulaphalā	32
Vādino	130	Vipulalābhī	158
Vāpiyā	366	Vibbhantacittā	40
Vālakambalam	267	Vibhavadiṭṭhi	49
Vālaggam	302	Vimati	314
Vālarūpāni	158	Virajjhanapañham	29
Vikiṅṇavācā	40	Virāgūpasañhitā	354
Vikiṅṇavāco	205	Virāgo	238
Vikkāyikabhaṅgam	89	Virocamānā	184
Vigatadaratho	194	Vilīvakārakā	79, 316
Vigatamacchariyamalam	121	Vivaṭehi	40
Viggāhikakatham	163	Vivaṭṭasukham	47
Vighāto	180, 263	Vivaṭṭānupassanā	275
Vicitra-akkharā	42	Vivaṭṭo	337
Vicinantānam	184	Vivādamūlabhūtā	86
Vicināti	222	Vivādāpannā	194
Vijjantarikāya	292	Vividhasassānam	129
Vijjābhāgiyā	28	Vivekanissitam	10
Vitthambhanam	145	Visaṃyogā	231
Viddhe	193	Visaṃyogāya	356
Vidhavaputte	75	Visakkati	383
Vinayo	73	Visatā	383
Vinaḷikatā	87	Visatā	383

Padānukkamo	Piṭṭhaṅko	Padānukkamo	Piṭṭhaṅko
[Va]		[Sa]	
Visaphalā	383	Samvaṭṭo	337
Visamalobhaṃ	309	Samvāsena	362
Visamūlā	383	Samvidahanapaññāya	96
Visamo	185	Saṃsandati	215
Visavaṇijjā	25	Saṃsayo	23
Visālā	383	Saṃsaraṇaṃ	221
Visiṭṭhadhuro	89	Saṃsārappavattiyā	101
Vissaṭṭhasatino	40	Samhato	18
Vihatakilesa	19	Sa-upādānāya	356
Vihāraggena	25	Sakasāvā	84
Vihārabhattaṃ	271	Sakuṇikā	383
Vuṭṭhānakusalatā	59	Sagaṇḍā	84
Vutthavāso	118	Saṅkhataṃ	124
Vuddhikarāṇi	90	Saṅkhamuṇḍakammakāraṇaṃ	1
Vussati	257	Saṅkhāro	48
Vedanīyaṃ	110	Saṅgaṇikāya	356
Veramaṇiyo	24	Saṅghātaṃ	282
Vesārajjaṃ	226	Sacchikato	249
Vesārajjena	226	Sacchikiriyāpāragū	249
Vehapphalā	32	Sajālāni	119
Vosito	137	Sajjeyya	201
[Sa]		Sañjātavalim	115
Samkasāyissanti	9	Saññivādā	391
Samkilesaṃ	47	Saññūḷhā	213
Samghabhattaṃ	271	Saññojaniyā	4
Samghabhogassa	54	Saṇhaṃ	363
Samyogāya	356	Saṇhavācatā	61
Samvaṭṭaṭṭhāyī	337	Satataṃ	181
Samvaṭṭati	337	Satantikaṃ	92
		Sattakkhattuparamā	189

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sattavaṇijjā	25	Samā	342
Sattasuñṇaṃ	42	Samādahitabbaṃ	320
Satthavaṇijjā	24	Samādānaṃ	185
Saddantare	119	Samāpattikusalatā	59
Saddhassa	326	Samāpattipāragū	249
Saddhāmūlikā	20	Samudācaranti	354
Saddhāyikā	177	Samūhatā	296
Saddhāvimutto	43	Sampajjamāne	129
Saddho	57	Samparāyikā	68
Santaṭāya	99	Sampahaṭṭhaṃ	158
Santāsaṃ	19	Sampāpakam	135
Santindriyā	253	Sambodhiṃ	233
Santhāgāraṃ	370	Sambodhiparāyaṇo	187
Sandiṭṭhiko	128	Sambhavo	117
Sandhārenti	8	Sambhārasaṃyuttā	305
Sandhiyati	215	Sammaṃ	298
Sannitodakaṃ	165	Sammataṃ	130
Sannivāsaṃ	46	Sammodanīyaṃ	14
Sappaccayaṃ	211	Sammoditaṃ	13
Sappāṭihāriyaṃ	211	Sayanaṃ	178
Sappāyasampajaññaṃ	376	Saraṇaṃ	17
Sappitelena	370	Saraṇagamanam	20
Sappītikaṃ	47	Saraṇagamanāni	18
Sappuriso	386	Sarasabhedo	87
Sabyābajjhaṃ	91, 388	Sarāgāya	356
Sabrahmakāni	97	Sarīrasaṇṭhānena	369
Samattakārī	186	Sarīrasambhavānaṃ	125
Samatho	62	Salākabhataṃ	271
Samanuñño	220	Savanaṃ	92
Samasiho	282	Savanti	86

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sassusasurapakkhikā	182	Sukumārā	95
Sahatantikā	174	Sukkaṃ	387
Sahadhammiko	129	Sukkapakkhe	109
Sahabyatā	205, 328	Sukkasappaṭibhāgā	95
Sahassathāmaṃ	119	Sukhaṃ	291
Sahassabhaṇḍikā	2	Sukhappaṭisaṃvedī	167
Sahāyā	94	Sugandhakathaṃ	94
Sākacchāya	363	Sucidhammo	315
Sākhalyaṃ	60	Sucimitto	94
Sākhā	194	Sutadharo	247
Sājīvo	371	Sutasannicayo	247
Sāṇāni	192	Sudassā	32
Sāthakasampajaññaṃ	376	Sudassī	32
Sāthalikā	41, 193	Suddhakoseyyaṃ	158
Sāmaññaṃ	203	Suddhasīsā	385
Sāmaññatthaṃ	203	Sundaraṃ	157
Sārabhāvaṃ	144	Suparikammakataṃ	158
Sārādāni	101	Suppaṭividdhā	247
Sāreti	325	Subbaco	49
Sālohitā	182	Subhakiṇṇā	32
Sāvajjo	24, 335	Subhā	31
Sikkhāpadāni	191	Sumanapupphakumbhena	117
Siṅgaṃ	261	Sumbhakapattadhare	80
Sinānaṃ	268	Surāpānameva	220
Silācetiyaṭṭhānaṃ	122	Suvinītaparisā	216
Sissabhāvūpagamaṃ	21	Seṭṭhaṃ	94
Sītibhūto	167	Seyyo	96
Sīdati	385	Sevanaṃ	17, 280
Sīlavissuddhi	62	Socabyaṃ	61
Sīlasampadā	62	Sotānugatānaṃ	361

